

শ্রীশ্রীরাধারমণে জয়তি ।

ভজ নিতাই গৌর রাধে শ্রাম ।

অণ হরে কৃষ্ণ হরে রাম ॥

ॐ

চরিত-সুখ

—অর্থাৎ—

শ্রীল শ্রীমদ রাধাক্রীম চরণকাল বাবাজী মহাপ্রের

জীবনচরিত ।

তৃতীয় খণ্ড ।

□•□

তৃতীয় সংস্করণ ।

—•—

প্রকাশক

শ্রীরামদাস বাবাজী ।

শ্রীধাম নবদ্বীপ ।

“শ্রীশ্রীরাধারমণ বাগ ।”

চৈতন্য ৪৩১

মূল্য ২৮ বাজ ।

শ্রীশ্রীরাধারমণে জয়তি ।

জয় নিতাই গৌর রাধে শ্যাম । জয় হরে কৃষ্ণ হরে রাম ॥

বন্দে গুরুশীতলানীশমীশাবতারকান্ ।

তৎ প্রকাশাংশ্চ তচ্ছক্তিঃ কৃষ্ণচৈতন্যসংজ্ঞকম্ ॥

—•—

নিবেদন ।

পরম করুণাময় শ্রীশ্রীনিতাইগোরাঙ্গ ও শ্রীশ্রীরাধারমণ দেবের
কৃপায় এবং সাধুবৈষ্ণবগণের অনুগ্রহে আমাদের পরমারাধ্য
শ্রীশ্রীগুরুদেবের পুণ্য চরিত-সুধা তৃতীয় খণ্ডের দ্বিতীয় সংস্করণ
শেষ হইয়া যাওয়ায় সংগ্রহকারীর অনবধানতাবশতঃ যে যে স্থানে
ঘটনাবলীর অসামঞ্জস্য এবং অসংলগ্নতা ছিল সে সমস্ত সংশোধন-
পূর্বক তৃতীয়বার মুদ্রাস্থ করতঃ সর্বসাধারণের নিকট উপস্থিত
করিতে সমর্থ হইলাম । সাধুমহাত্মা ও সহৃদয় পাঠকবর্গের প্রতি
বিনীত নিবেদন এই যে ভাষার অসংলগ্নতা বা অশুদ্ধি সংশোধন-
পূর্বক শ্রীগুরুদেবের পুণ্য চরিত-সুধা আশ্বাদনে পরিতৃপ্ত হইয়া
আমাদিগকে কৃতার্থ করুন ।

অলমিতি—

সন ১৩৫৩ সাল ।

বিনীত

২৭শে শ্রাবণ ।

প্রকাশক


শ্রীগুরবে নমঃ ।

বন্দনা ।

দুর্গতাক্ষ-কলিগ্রাহ-প্রস্তানাং কুরুচেতসাম্
অশেষক্লেশহন্তারঃ করুণামৃতসিঞ্চনৈঃ ।
শ্রীনিত্যানন্দগোরাঙ্গমূর্তিমৎ প্রেমবিগ্রহং
করুণাসাগরং বন্দে শ্রীগুরুং দীনবৎসলম্ ॥

জয় জয় সিদ্ধিদাতা জয় গজানন ।
কুতাজলিপুটে করি চরণ বন্দন ॥
দেবী সরস্বতী জয় শঙ্করী শঙ্কর ।
চরণে প্রণতি করি করুণা বিতর ॥
পতিতপাবন প্রভু গোঁরনিত্যানন্দ ।
অবনতশিরে বন্দি চরণারবিন্দ ॥
শ্রীরাধাগোবিন্দ সঙ্গে সহচরীগণ ।
ভক্তিভরে বন্দি সবার রাতুল চরণ ॥
করুণাসাগর প্রভু শ্রীরাধারমণ ।
দয়াময় দীনবন্ধু অধমতারণ ॥
অধম পতিত জীবের দুর্গতি দেখিয়া ।
উদ্ধার করিলা প্রভু ঘরে ঘরে গিয়া ॥
হাসিমুখে পাপ তাপ অঙ্গিকার করি :
প্রেমামৃত পিয়াইলে শক্তি সঞ্চারি ॥

সে সকল লীলা বর্ণিবার সাধ্য কার ।
 নিজ লীলা নিজে প্রভু করহ প্রচার ॥
 নবদীপ দাদা ! পদে করি প্রণিপাত ।
 নিজ জন জানি কর শুভ দৃষ্টিপাত ॥
 তোমাতে করিয়া প্রভু শক্তি সঞ্চার ।
 যত যত মহাপাণী করিলা উদ্ধার ॥
 সে সব লীলার এক কণা প্রকাশিতে ।
 অভিলাষ উপজিল অভাজন-চিত্তে ॥
 নাহি ভাষাবোধ তবু লিখিতে বাসনা ।
 বাহা ইচ্ছা কর, পদে করি এ প্রার্থনা ॥



সূচীপত্র ।

বিষয়	পত্রাঙ্ক
কটক যাত্রা	১
ভূতের বাড়ীতে বাসা	১২
শ্রীশ্রীবিনোদবিহারী দ্বিউর বাড়ীতে অষ্টপ্রহর	১৭
স্বামী কেশবানন্দের সহিত মিলন	২৬
প্যারীবাবুর বাড়ীতে মহোৎসব	৩৫
শাক্ত ও বৈষ্ণবের তত্ত্বমীমাংসা	৩৮
ষাদশ গোপাল	৪৯
বাগান বাড়ীতে বাউল বাবাজী	৫২
নগরকীর্তন	৫৬
পুরী প্রত্যাগমন	৬১
রাঘবের ঝালি	৬৩
কেন্দ্রাপ্রহর গমন	৭২
অষ্টপ্রহর কীর্তন	৭৬
পদ্মনাভ উচ্চার	৮৩
লক্ষ্মীনারায়ণ জগদেব	৮৭
দ্যুতিসিংহের উচ্চার	৮৯
গোবিন্দদাদার বিদায়	৯৩
কৃষ্ণানন্দদাদার বিদায়	১০৩
কুকুরের মতিপরিবর্তন	১০৯

সূচীপত্র ।

বিষয়		পত্রাঙ্ক
বলদেবজীউর দর্শন	...	১১২
বারিমূল ও নিকরাই গমন	...	১১৬
নামসম্প্রদায় সংশোধন	...	১২০
পরগছর পাহাড় দর্শন	...	১২৮
দ্বিতীয়বার খণ্ডগিরিতে মহোৎসব	...	১৩৬
বাঁকশাই গমন	...	১৪৩
মহাপ্রসাদের মিলন	...	১৪৭
কুয়াপাল, মাহাজা ও কয়েরপুর গমন	...	১৫০
চক্রবর্তীর সন্দেহভঞ্জন	...	১৫২
সিদ্ধাপুর যাত্রা	...	১৬২
ধনেশ্বর গমন	...	১৬৭
সংকীর্্তন-মহারাস	...	১৭৪
পুরুষোত্তমপুর গমন	...	১৭৭
জালপুর গমন ও ঠাকুরের অন্নভোগ	...	১৭৮
উকীল মোহিনীবাবুর বাড়ীতে কীর্্তন	...	১৮৪
বর্ণবিচার	...	১৯২
উকীল ব্রহ্মানন্দবাবু	...	১৯৭
শ্রীধামপুরী প্রত্যাবর্তন ও শ্রীরাধারমণকুঞ্জে অবস্থিতি		২০৪
বালমুকুন্দবাবুর সহিত মিলন	...	২০৫
ললিতাদাসীর পরীক্ষা	...	২০৮
টোটাগোপীনাথের নটবরবেশ	...	২১১
টোটাগোপীনাথের সেবার বন্দোবস্ত	...	২২৯
শ্রী আনন্দ মিত্রের সহিত মিলন	...	২৩২

বিষয়			পত্রাঙ্ক
আনন্দবাবুর দীক্ষা	২৭০
সদলে পুরী প্রত্যাবর্তন	২৭৮
প্রাণবল্লভমঠ প্রাপ্তি	২৮৯
গদাধরদাসের পুনর্জন্ম	২৮২
অটলদাসের সহিত মিলন		...	২৮৭



চরিত-সুখা ।

—(*)—

তৃতীয় খণ্ড ।

—*—

কটক যাত্রা ।

কটক জেলার অন্তর্গত মাহাখানিবাসী শ্রীযুক্ত বাবু আনন্দ চন্দ্র ব্রহ্ম, বাবাজী মহাশয়কে তাঁহার কটক সহরস্থিত বাড়ীতে লইয়া যাইবার জন্য শ্রীধাম পুরী আসিয়াছেন । তাঁহার ইচ্ছা, বাবাজী মহাশয়ের সঙ্গে ইহার অন্তরঙ্গ দুই চারিজন মাত্র যান ; কিন্তু এ সম্বন্ধে বাবাজী মহাশয়ের নিকট কিছুই প্রকাশ করিয়া বলিতে সাহস পাইতেছেন না । একদিন অপরাহ্নে আনন্দ বাবু বলিলেন,—“আজ্ঞে আজ কটক যাত্রা করিলে ভাল হইত না ?”

বাবাজী । ইয়া, হবে হবে ।

দুই চারিদিন যায়, একদিন আনন্দ বাবু বিশেষ আগ্রহসহকারে বলিলেন “আজ্ঞে অনেক দিন হইয়া গেল । আজ রওনা হইলে ভাল হয় না কি ?”

বাবাজী । আজ বৃহস্পতিবার, আজ ধাম ছাড়িতে নাই ।

আনন্দ । আজ্ঞে আপনারা মহাপুরুষ । আপনাদের আবার বৃহস্পতিবার, অমাবস্তা, পূর্ণিমা কি ? ও সমস্ত ত সংসারী লোকের পক্ষে ।

বাবাজী । দেখ আনন্দ ! এ সব বিষয়ে সংসারী বা উদাসী বলিয়া কোন কথা নয় । আমরা লোকাচারপ্রসিদ্ধির প্রকৃত অবগত মৰ্ম্ম না হইয়া অনেক সময় ঐরূপ দাস্তিকতা প্রকাশ করিয়া থাকি । ভাবিয়া দেখিলে সেটা আমাদের ভুল বই আর কিছুই নহে । আচ্ছা এই বৃহস্পতিবারের কথাটাই আলোচনা করিয়া দেখ । বৃহস্পতিবারের অপর নাম গুরুবার । এই দিবসে কোথাও যাত্রা করিলে শ্রীগুরুদেবের নিকট অপরাধী হইতে হয় । এই বারের আর একটি নাম লক্ষ্মীবার । যে ধাম হইতে লক্ষ্মীবारे যাত্রা করা হয়, লক্ষ্মী সেই ধামেশ্বরকে পরিত্যাগ করেন । বল দেখি, এইটী কি কেবল গৃহস্থগত, না সাধুগত ? সকলেরই গুরু আছেন । তাঁহার অসন্তোষে জগতের অসন্তোষের কারণ হয় না কি ? আমি না হয় পরম বিরক্ত ; আমার লক্ষ্মীর প্রয়োজন না থাকতেও পারে ; তাই বলিয়া ধামেশ্বরেরও কি লক্ষ্মী ত্যাগ করাইতে হইবে ?

আনন্দ । আচ্ছা এ কথাটী আমি ধারণা করিতে পারিলাম না । কারণ আমি ক্ষুদ্র জীব ; আমি সামান্য একটী কাজ করিলাম, তাহার জন্য কি ঈশ্বরের লক্ষ্মী ছাড়িয়া যাইবেন ? তাহা হইলে ত শ্রীনারায়ণের বক্ষঃস্থলস্থিতা লক্ষ্মীদেবীকে আমরা ইচ্ছা করিলেই বিয়োগ বা সংযোগ করিতে পারি ।

বাবাজী । এ লক্ষ্মী ছাড়াইবার কথা কিরূপ, যেমন একাদশীমাহাত্ম্যে আছে,—

মংশয়নে মত্ত্বাণে মংপার্শ্বপরিবর্তনে ।

ফলমূলজলাহারী হৃদি শূলং মমার্পয়েৎ ॥

অর্থাৎ বাহারা আমার শয়ন, উত্থান এবং পার্শ্ব পরিবর্তন একাদশীতে ফল মূল ও জল আহার করে, তাহারা আমার হৃদয়ে শূলবিন্দু করে । আমি জল খাইলাম, ভগবানের হৃদয়ে শূলাঘাত হইল, ইহার অর্থ কি ?

অর্থাৎ উক্ত দিবসে ফলাদি আহার করিলে ভগবান্ শ্লাহতবৎ দুষিত হন । তদ্রূপ বৃহস্পতিবারে স্থানান্তর গমন করিলে লক্ষ্মীদেবীর বিরহে ভগবান্ যেরূপ কষ্ট অনুভব করেন, সেই জাতীয় কষ্ট প্রাপ্ত হইয়া থাকেন । অতএব যে কার্য্যে ভগবানের কষ্ট হয়, সেই কার্য্য করা জীবের কখনই উচিত নহে ।

আনন্দ । (করষোড়ে) প্রভু ! এতক্ষণে বুঝিলাম যে আমাদের বাবহারিক কার্য্যাদির মধ্যেও অনেক মহৎ উদ্দেশ্য রহিয়াছে ।

এইরূপে কিছুদিন অতিবাহিত হইলে একদিন বাবাজী মহাশয় প্রাতঃকালে সঙ্গীগণকে বলিলেন, “দেখ, আনন্দ অনেকদিন বসিয়া আছে, আজ কটক যাইতে হইবে ।” ললিতাদাসী জিজ্ঞাসা করিল, “সঙ্গে কে কে যাইবে ?” বাবাজী মহাশয় বলিলেন, অনেক লোক যাইবার প্রয়োজন নাই । ইচ্ছা হইলে চারি পাঁচজন যাইতে পার ।” গুনিয়া আনন্দ বাবু মনে মনে আনন্দিত হইলেন । বুঝিলেন যে অন্তর্যামী শ্রীগুরুদেব আমার অন্তরের ভাব জানিয়াছেন । কে যে যাইবেন, ঠিক নাই ; কাজেই সঙ্গীগণ কেহ বা আনন্দিত, কেহ বা চিন্তিত, কেহ কেহ বা দুষিত ।

ক্রমে সন্ধ্যা হইল । বাবাজী মহাশয়ের কটক গমনবার্তা শ্রবণে পুরীবাসী অনেক ভদ্রলোক ইহার সহিত দেখা করিতে আসিয়া বলিতে লাগিলেন, “আজ্ঞে যত সত্তর হয় ফিরিয়া আসিতে চেষ্টা করিবেন ; কারণ আপনি পুরীধামে না থাকিলে আনন্দময় ধাম যেন নিরানন্দময় বলিয়া বোধ হয় এবং আমাদের যেন কিছুই ভাল লাগে না ।” ইত্যাদি নানারূপ প্রীতিপূর্ণ বাক্য শ্রবণে বাবাজী মহাশয় মধুর বাক্যে সকলকে আশ্বস্ত করিয়া বিদায় গ্রহণপূর্বক খোল করতালযোগে নাম করিতে করিতে টেশনাভিমুখে রওনা হইলেন । মঠে একটা বৃদ্ধ বাবাজীকে রাখিয়া অল্প সকলেই বাবাজী মহাশয়ের সঙ্গে গমন করিলেন । অনেক

বাবু ডায়াগণও ইহাদের অনুগমন করিতে লাগিলেন। যথাসময়ে ষ্টেশানে পৌঁছিয়া বাবাজী মহাশয় একটা ভদ্রলোককে জিজ্ঞাসা করিলেন, “বাবা ! গাড়ী ছাড়িবার কত বিলম্ব আছে ?” ভদ্রলোকটা ঘড়ি দেখিয়া বলিলেন, “আজ্ঞে, দেড় ঘণ্টা দেরী আছে।” তখন বাবাজী মহাশয় একপার্শ্বে উপবেশনপূর্বক সকলকে লক্ষ্য করিয়া বলিলেন, “দেখ, যে যে আমার সঙ্গে যাইতে ইচ্ছা কর, উৰ্দ্ধে হাত তুলিয়া ঐ পার্শ্বে যাও।” গুনিয়া সকলেই ঐরূপভাবে অপর পার্শ্বে যাইতে লাগিলেন। মঠে সেবার উপযোগী লোক রাখিয়া আটাশ জনের যাওয়া স্থির হইল। উপস্থিত ঘটনায় আনন্দ বাবুর মনে একটু চিন্তার উদ্রেক হইল। তিনি মনে করিয়াছিলেন যে, বাবাজী মহাশয়ের সঙ্গে অন্ততঃ সাত আট জনের বেশী যাইবে না। লোকসংখ্যা অতিরিক্ত দেখিয়া মনে মনে কি ভাবিতেছেন। এই সময় বাবাজী মহাশয় নিজের গামছাখানি সম্মুখে বিছাইয়া বলিলেন, “সকলে আমাকে কিছু কিছু ভিক্ষা দাও।” বলিবামাত্র উপস্থিত লোকসকল দুই এক টাকা করিয়া দিতে লাগিল। আনন্দবাবু যেমন কিছু টাকা দিতে গেলেন, অমনি বাবাজী মহাশয় বলিলেন, “আনন্দ ! এখন থাক, যখন প্রয়োজন হইবে, আমি বলিব।” গুনিয়া আনন্দবাবু যেন একটু অপ্রতিভ হইলেন। বাবাজী মহাশয় বলরামবাবুকে টাকা পরসা গণিতে বলায় তিনি গণিয়া বলিলেন, “ভেঁইশটাকা বার আনা হইয়াছে। ইহাতে ত্রিশ জনের কটক যাইবার ভাড়া হইতে পারে।”

এ দিকে টিকিটের ঘণ্টা বাজিলে লোক সকল টিকিটের জন্ত ছুটাছুটি করিতে লাগিল। এই সময় একটা মাদ্রাজী ভদ্রলোক অভিজ্ঞতবেগে টিকিটের জন্ত যাইতেছিলেন। বাবাজী মহাশয় তাঁহাকে ডাকিয়া বলিলেন, “বাবা ! এই টাকাকয়টা লইয়া কটক যাইবার যে কয়খানা টিকিট হয় আনিয়া দাও ত।” ভদ্রলোকটা বিস্মিতভাবে স্থির হইয়া

দাঁড়াইলেন, বাবাজী মহাশয় পুনরায় উহাকে বলিলেন, “বাবা ! ভাবিবার অবকাশ নাই, টিকিটের সময় উত্তীর্ণ হইয়া যায় ।” বলরামকে বলিলেন, “বলরাম ! টাকাকয়টি উহার হাতে দাও ত ।” বলরাম টাকাকয়টি ভদ্রলোকটির হাতে দিলে তিনি অগত্যা উহা হাতে লইয়া ধীরে ধীরে গমন করিতে লাগিলেন, আর এক একবার বিস্মিতভাবে বাবাজী মহাশয়ের মুখপানে তাকাইতে লাগিলেন ।

দেখিতে দেখিতে বাবুটি ইহাদের দৃষ্টির অন্তরালে গিয়া পড়িলেন । প্রায় আধ ঘণ্টা অতীত হইতে চলিল, বাবুটি আসিতেছে না দেখিয়া সঙ্গিগণ পরস্পর বলাবলি করিতে লাগিলেন, “কোথাকার অপরিচিত লোক, সে হয় ত টাকা লইয়া কোথায় পলাইয়া গিয়াছে ।” কেহ বা বা বলিতেছেন, “মাদ্রাজী লোক, তাহাতে আবার জানাশুনা নাই । সে নিশ্চয়ই টিকিট করিয়া রেল চাপিয়াছে ।” কেহ কেহ বা বলিতেছেন, “বাবাজী মহাশয় যদি আজ্ঞা করেন, তবে একবার এই সময় অনুসন্ধান করিলে বোধ হয় তাহাকে ধরা যাইতে পারে ।” ইত্যাদি আপন আপন মানসিক বৃত্তি অনুযায়ী সিদ্ধান্ত লইয়া উপস্থিত সঙ্গিগণ ব্যতিব্যস্ত হইয়া পড়িলেন । তখন বাবাজী মহাশয় যুহু হাসিয়া বলিলেন, “কি হে সিদ্ধান্ত-বাচস্পতিগণ ! টাকার জন্ম বড়ই ভাবিত হইয়াছে বোধ হয় ।” কুঞ্জবাবু বলিলেন, “আজ্ঞে ভাবনার বিষয়ই ত হইয়াছে ! প্রায় আধ ঘণ্টার উপর হইল কোন খবর নাই ; সে কি আর আসিবে ? কেন, আমরা এত লোক ত ছিলাম ; আপনি আদেশ করিলে একজন টিকিট আনিয়া গাড়ীতে উঠা হইত ।” বাবাজী মহাশয় একটু ব্যঙ্গচ্ছলে বলিলেন, “হাঁ ওটা আমার বুঝিবার সম্পূর্ণ ভুল হইয়াছে ; কারণ তোমরা পরিচিত লোক ছিলে ; তোমাদিগকে দেওয়াই উচিত ছিল । আচ্ছা, বল ত কুঞ্জ ! তুমি আমার কত জন্মের পরিচিত ? যেদিন তোমাকে

প্রথম দেখিয়াছিলাম, সেইদিন যদি অপরিচিত বলিয়া তোমাকে অকি-
 স্বাস করিতাম, তাহা হইলে আর কি কখনও তোমার উপর বিশ্বাস
 স্থাপন হইত ? তুমি কি বলিতে চাও, এই স্থল দেহটার সঙ্গে দুই চারি
 দিন সংসর্গ হইলেই পরিচয় হইয়া গেল ? অপরের কথা ত দূরে ; আচ্ছা,
 তোমার নিজের সহিত তোমার পরিচয় হইয়াছে কি ? তুমি কে ?
 কোথা হইতে আসিয়াছ ? কোথায় বাইবে ? তোমার স্বরূপ কি ?
 কেন আসিয়াছ ? তুমি কি জাতীয় লোক বলিতে পার কি ?

কুঞ্জ । কেন বলিতে পারিব না ? আমার নাম কুঞ্জ বিহারী রায় ।
 আমি এই পুরীতে চাকরী করিতে আসিয়াছি । জাতিতে কায়স্থ, আমার
 নিজ জন্ম স্থান হইতে চাকরী করিবার উদ্দেশ্যে আসিয়াছি । আমাদের
 পরিচয় কাগজে কলমে দিতে না পারিলে কোন চাকরীই মিলিবে না ।

বাবাজী । বেশ কথা ! বল দেখি, যখন মরা বলিয়া তোমাকে
 ঘরের বাহির করিবে, তখন তোমার এই সমস্ত পরিচয়ের কোনওরূপ
 অভাব হইবে কি ? কায়স্থ কুলোদ্ভব, সর্কাবয়বসম্পন্ন, দশেন্দ্রিয়বিশিষ্ট
 কুঞ্জবিহারী রায় ত বর্তমানই রহিয়াছে, তবে স্ত্রীপুত্র, মাতাপিতা প্রভৃতি
 আত্মীয় স্বজনগণ অল্পশ্রু বলিয়া তোমাকে স্থানান্তরিত করেন কেন ?
 এমন কি, তখন তুমি এতই অশুচি হইবে যে, যে কূলে জন্মগ্রহণ করিয়াছ,
 তাহার পর্দাস্ত এক মাস কাল অশৌচ ভোগ করিবে । এত সাধের যে
 পুত্রের সহিত তোমার পরিচয় ছিল, সে অকাতরে তোমার মুখে অগ্নি
 জালিয়া দিবে । পিতা বলিয়া মমতা না করিয়া তোমার এমন সুন্দর
 দেহখানিকে ভস্মসাৎ করিবে । ইহাকে কি বলে পরিচয় ? ইহাকেই
 কি তুমি সখ্য বা মমতা বলিতে চাও ? কি ভ্রম ! কি অবিজ্ঞান
 মোহময় কুহক ! একটু নিবিষ্ট চিন্তে ভাবিয়া দেখ, সচ্চিদানন্দ
 আদিপুরুষ গোবিন্দের এক কণামাত্র লাভ করিয়া এত অশুচি অচেতন

পদার্থও জগতে অতি পবিত্র বোধে আদরণীয় হইতেছিল ; আবার তাঁহার অভাবে পূর্ববৎ অচেতন অশুচি হইয়া পড়িল । সম্বন্ধ সচ্চিদানন্দ গোবিন্দের সহিত, পরিচয় তাঁহারই সহিত ; তাঁহার সত্তায় জগতের সত্তা । ভ্রমাচ্ছন্ন তুমি যাহাকে সংপ্রতি অপরিচিত মনে করিতেছ, সে হয় ত জন্মান্তরে তোমার পিতা বা মাতা, পুত্র কিংবা স্ত্রী অথবা স্ত্রী ছিল । আবার ভবিষ্যৎ জন্মে কে কাহার কি হইবে, তাহার নিশ্চয়তা কি ? জীব মাত্রেই একস্থান হইতে আসিয়াছে, আবার কালে একস্থানে যাইবে । শ্রীচরিতামৃতে মহাপ্রভু বলিয়াছেন—“জীব কৃষ্ণ নিত্যদাস ।” যদি সকলেই এক ভগবানের দাস হইলেন, তবে আবার অণু পরিচয় লইয়া পরিচিত অপরিচিত ভেদ কোথায় রহিল ? এ ত দূরের কথা । সংপ্রতি তোমাদের মনে যে সন্দেহ উপস্থিত হইয়াছে, সে ত সম্পূর্ণ অলীক । কারণ কাহারও স্বোপাজ্জিত অর্থ আজ কটক যাইবার জন্য টিকিট ক্রয় করিতে দেওয়া হয় নাই । বুঝিয়া দেখ, ভগবান্ ইচ্ছা করিয়া কটক যাইবার জন্য টাকা দিলেন ; আবার তাঁহার যদি ঐ টাকা দ্বারা অপর কাহারও অভাব পূরণ করিবার ইচ্ছা হয়, তবে সে বিষয়ে তোমার আমার আপত্তি করিবার কি অধিকার আছে ? যিনি দাতা, তিনি তাঁহার দত্ত বস্তু দ্বারা যাহা করিতে ইচ্ছা করিবেন, সে বিষয়ে গ্রহীতার আপত্তি করা সম্পূর্ণ অনধিকার । আমার এমন কোন বিশেষ প্রয়োজন হয় নাই যে অল্প কটক না গেলেই চলিবে না । ইচ্ছাময় নিতাইটাদের যদি ইচ্ছা হয় লইয়া যাইবেন ।”

এই কথা শুনিয়া সঙ্গিগণ সকলেই একটু অপ্রতিভ হইলেন । ইত্যবসরে পূর্বোক্ত মাদ্রাজী বাবুটী টিকিট লইয়া আসিলে তাঁহাকে দেখিবামাত্র সঙ্গিগণ আরও লজ্জিত হইলেন । বাবুটী খ্রিশ খানি টিকিট বাবাজী মহাশয়ের সম্মুখে রাখিয়া ভক্তিগদগদভাবে ইহার চরণে দণ্ডবৎ

প্রণাম করিলেন । তৎপরে সকলে গাড়ীতে উঠিলে বাবুটা অবকাশ পাইয়া বাবাজী মহাশয়কে প্রণাম করিতে লাগিলেন ।

বাবু । বাবাজী মহারাজ ! আপনার কোথায় থাকা হয় ?

বাবাজী । বাবা ! কয়েক দিন প্রভু শ্রীজগন্নাথধামে রাখিয়াছিলেন । সম্প্রতি কটক লইয়া যাইতেছেন । কি উদ্দেশ্যে কোথায় লইয়া যাইবেন তিনিই জানেন ।

বাবু । আজ্ঞে, আপনি কি কখনও আমাকে দেখিয়াছেন ?

বাবাজী । জানি না বাবা ! কোথাও দেখিয়াছি কি না । তবে এ কথা নিশ্চয় যে, কোন না কোন জন্মে অবশ্যই দেখাশুনা ছিল !

বাবু । অচ্ছা আমি অপরিচিত বিদেশী লোক ; আমাকে হঠাৎ দেখামাত্র আপনি কি বিশ্বাসে এতগুলি টাকা আমার হাতে দিলেন ?

বাবাজী । বাবা ! আমি ত আমার কোন নিজ সম্পত্তি তোমাকে দেই নাই । প্রভু আমাকে এই ষ্টেশানেই ইহাদের কটক যাইবার খরচ বাবদ কয়েকটা টাকা দিলেন । আমিও দেখিলাম, তুমি টিকিট কিনিতে যাইতেছ, তাই তোমাকে টাকাগুলি দেওয়া হইল । তোমার বিশেষ কষ্ট হইয়াছে কি বাবা ?

বাবু । আজ্ঞে না, আমার কোনই কষ্ট হয় নাই । কেবল মনে মনে আপনার ব্যবহারটা ভাবিতেছিলাম । এইরূপ ব্যবহার মানবে সম্ভবে বলিয়া আমার ধারণা ছিল না । আমার বিশ্বাস, আপনি মানুষ নহেন ।

বাবাজী । 'বাবা ! আমি মানুষ নহি, একথা বলিতে পার ; কারণ মানুষের' কর্তব্য অনেক । মানুষ নিজ কর্তব্যে ইচ্ছা লাভ করিতে পারে ; আবার বৈরাগ্যবলে ইচ্ছা, ব্রহ্মত্ব ত্যাগ করিতেও পারে । ঋষি, প্রজ্ঞান, ব্রজগোপীগণ মানুষ ; কিন্তু আমরা সামান্য

জীব । মানুষেতে ঘেব, হিংসা, পরশ্রীকাতরতা প্রভৃতি থাকিতে পারে না । মানব কাম ক্রোধের দাস নয় । কেবলমাত্র কুটম্ব ভরণপোষণ বা নিজ নিজ গ্রাসাচ্ছাদন সংগ্রহের জন্ত মানবদেহ নয় ; মানবদেহ ভগবদ্ভক্তনের জন্ত । নীতিশাস্ত্র বলিয়াছেন :—

আহার-নিদ্রা-ভয়-মৈথুনঞ্চ

সামান্যমেতৎ পশুভির্নরাণাম্ ।

দর্শ্যো হি তেবামধিকো বিশেষো

দর্শ্যেণ হীনাঃ পশুভি সমানাঃ ॥

দয়া ও ক্ষমা মানব দেহের ভূষণ । যে মানব নিজ সুখাভিলাষে পরসুখ বা পরের জীবন বিনাশ করিতে পারে, তাহাকে মানবের মধ্যে গণনা করা ভুল । আমরা মানব দেহ ধারণ করিয়াছি সত্য ; কিন্তু মানব দেহের কর্তব্যপালন আমাদের দ্বারা কিছুই হইতেছে না । তাই বলি বাবা ! আমি মানুষ নই—সামান্য জীবাধম ।

বাবু । আপনি যতই বলুন না কেন, আমাদের মনে হয় আপনি ভগবদবতার । বাবা ! আমরা ত বিষয়ী ; আমাদের কি গতি হইবার কোনও উপায় নাই ? এমন মানব জন্ম কি বিফলেই কাটাইব ? প্রভু কি আমাদের প্রতি একবার তাকাইবেন না ? তবে ত ভগবানেও পক্ষপাতিত্ব দোষ বর্ত্তিল !

বাবাজী । বাবা ! ভগবানে কখনই পক্ষপাতিত্ব দোষ সম্ভবে না । তিনি নরপেক্ষ ; সর্বজীবে তাঁহার সমান দয়া । তাঁহার আপন পর জেহই নাই । জীব নিজ নিজ কর্ম্মের ফলাফল ভোগ করিয়া থাকে । চন্দ্র সর্বত্রই শীতল কিরণ বিতরণে সকলের তাপ দূর করেন ; কিন্তু বিরহি জনের পক্ষে উহা অতিশয় তাপের কারণ হয় এবং সেই কিরণে পদ্ম ন্নান হইয়া যায় । কোকিলের স্তমধুর রবে কাহার না শ্রবণ পরিতৃপ্ত হয় ?

কিন্তু বিরহি-হৃদয়ে উহা বজ্রনাদ সম বোধ হয় । এটাকে কি তুমি চন্দ্র বা কোকিলের পক্ষপাতিত্ব বলিতে চাও ? ভগবান্ যদি প্রিয় বা অপ্রিয়জ্ঞানে জীবকে অমুগ্রহ নিগ্রহই করিতেন, তবে কি পুত্নাকে ধাত্মীগতি প্রদান সম্ভব হইত ? তাই বলি বাবা ! ভগবান্ সংসারে বিষয়-ভোগ করিতে দিয়াছে, কর ; কিন্তু অভিমান মদিরাপানে মত্ত হইও না । ভগবান্কে লইয়া বিষয় ভোগ কর । কৃষ্ণ দাসদাসী জ্ঞানে পুত্রকন্টার লালন পালন ও যত্ন কর । অপরের অনিষ্ট চেষ্টা না করিয়া ভগবদন্ত বস্তু অনাসক্তভাবে উপভোগ কর । সংসারশ্রমের যে যে কর্তব্য শাস্ত্রাদিতে নির্দিষ্ট আছে, অবিচারে তাহা পালন করিতে যত্নবান্ হও । পিতৃঋণ, দেবঋণ ও ঋষিঋণ পরিশোধ করিবার জন্য উদযোগী হও, এই সংসারই সুখের আগার হইবে । এই বিষয়ই কৃষ্ণপ্রাপ্তির সাধক হইবে । এই স্নেহ মমতাই তোমাকে অপ্রাকৃত সম্বন্ধ রাজ্যে লইয়া যাইবে । এই স্ত্রীই তোমার গোপীভাবে কৃষ্ণসেবার শিক্ষাগুরু হইয়া অমুকুল আচরণ করিবে । জীব নিজেই নিজের অনিষ্ট করিয়া থাকে ; কিন্তু ভ্রমবশতঃ অপরের দোষ দিয়া ভগবানের নিকট অপরাধী হয় ।

এতক্ষণ গাড়ী চলিতেছিল । বাবুটী নীরবে বাবাজী মহাশয়ের উপদেশগুলি হৃদয়ঙ্গম করিতেছিলেন । হঠাৎ গাড়ী থামিলে বাবাজী মহাশয়ও চূপ করিলেন ; বাবুটীর হৃদয়ের বাধাও ভাঙ্গিয়াগেল, একেবারে অর্ধৈর্ধ্য হইয়া বালকের ন্যায় উচ্চৈঃস্বরে কাঁদিয়া উঠিলেন এবং বাবাজী মহাশয়ের চরণ দুইখানি বুকে ধরিয়া গদগদকণ্ঠে বলিতে লাগিলেন, “বাবা ! এত দিনে আমার কৰ্ম্ম বন্ধন ঘুটিল । আপনার কৃপায় আমি পরম শান্তিলাভ করিলাম । আপনি আমাকে আশীর্বাদ করুন, বেন জন্মে জন্মে আপনার আচরণের দাস হইয়া পরম পুরুষ ভগবানের সেবা করিতে পারি ।” বাবাজী মহাশয় বাবুটীকে আলিঙ্গন প্রদানে

স্বপ্ন করিয়া একজনকে জিজ্ঞাসা করিলেন, “এটা কোন্ স্টেশন ?”

সে বলিল, “আজ্ঞে কটক স্টেশন ।”

বাবাজী মহাশয় শশব্যস্তে উঠিয়া সঙ্গিগণসহ গাড়ী হইতে নামিলেন । বাবুটা কলিকাতার টিকিট করিয়াছিলেন ; কিন্তু তিনিও নামিলেন ।

আনন্দ বাবু বাবাজী মহাশয়কে বলিলেন, “আজ্ঞে গাড়ী হইয়াছে, আসুন গাড়ীতে উঠিবেন ।”

বাবাজী মহাশয় আনন্দবাবুকে আশ্বাস প্রদান করিয়া বলিলেন, “আনন্দ ! তুমি তোমার বাসায় যাও, আমি অল্প সময় তোমার ওখানে যাইব । আজ আর তোমার বাসায় যাওয়া হইবে না ।”

আনন্দবাবু বলিলেন, “বাবা ! কটকে ত অল্প কাহারও সহিত বিশেষ পরিচয় নাই ; এত রাত্রে কোথায় যাওয়া হইবে ? আহালাদিরই বা কিরূপ ব্যবস্থা হইবে ?”

বাবাজী মহাশয় মুহূ হাসিয়া বলিলেন, “কেন নিতাইর ইচ্ছায় কাঠজুড়ি নদীর জল ত আছে । তাহার তীর্থে বড় বড় গাছগুলিও ত আছে ! চিন্তা কি ?” এই বলিয়া স্টেশনের পার্শ্ববর্তী একটি স্থানে বিশ্রাম করিতে লাগিলেন । মাদ্রাজী বাবুটা প্রাণের আবেগে নানা কথা জিজ্ঞাসা করিতে লাগিলেন ।

এইরূপ পরমানন্দে রাত্রি প্রভাত হইয়া গেল । সকলে কিঞ্চিৎ অগ্রসর হইয়া কাঠজুড়ি নদীর তীরে প্রাতঃকৃত্যাদি সমাপনপূর্বক “ভজ নিতাই গৌর রাধে শ্রাম । জপ হরে কৃষ্ণ হরে রাম ।” এই নাম করিতে করিতে নদী তীরবর্তী বাধা রাস্তার উপর দিয়া গমন করিতে লাগিলেন । অগ্রে অগ্রে দুইখানি খোল বাজিতেছে । পশ্চাতে বাবাজী মহাশয় প্রেমোন্মত্তভাবে চরণে চরণ রাখিয়া নাচিতে নাচিতে যাইতেছেন । সঙ্গে প্রায় ত্রিশজন লোক । কাহারই বাহাদুরি নাই—

সকলেই উদ্ভগু নৃত্য পরায়ণ । ক্রমে স্থানীয় লোক সকল আসিয়া ইহাদের সঙ্গে যোগ দিতে লাগিল । নৃতনধরণের সংকীর্ণনের দল দেখিয়া এবং নৃতন রকমের নাম শুনিয়া লোকসংখ্যা যতই অধিক হইতে লাগিল, সংকীর্ণনের ধ্বনিও যেন ততই উচ্চ হইতে উচ্চতর স্থান অধিকার করিতে লাগিল ।

ভূতের বাড়ীতে বাসা

বেলা প্রায় সাড়ে আটটা অতীত হইতে চলিল, এই সময় জনৈক ভদ্রলোক বাবাজী মহাশয়ের সঙ্গী ভীমচন্দ্র সিংহ নামক একটি ভক্তকে জিজ্ঞাসা করিলেন, “আপনারা কোথায় বাইবেন ?”

সে বলিল, “বাইবার কোন নির্দিষ্ট স্থান নাই ।”

শুনিয়া পূর্বোক্ত ভদ্রলোকের পার্শ্ববর্তী একটি কোতুকী ব্যক্তি হাসিতে হাসিতে বলিল, যদি কোন নির্দিষ্ট স্থান না থাকে, তবে ভূতের বাড়ী বাসা করিলেই ত ভাল হয়” ‘ভূতের বাড়ী’ কথাটা বাবাজী মহাশয়ে কর্ণগোচর হইবামাত্র ইনি একটু উৎসাহের সহিত সেই লোকটাকে জিজ্ঞাসা করিলেন, “বাবা ! ভূতের বাড়ীটা কোথায় ? আমাদিগকে দেখাইয়া দিতে পারিবে কি ?”

লোকটি এবার একটু গম্ভীরভাবে বলিল, তা পারি বই কি ! এই এই সোজা রাস্তা ধরিয়া বালুবাজারের মধ্যে উকীল তিনকড়িবাবুর বাড়ীর সম্মুখ দিয়া তিন চারিখানি বাড়ী অতিক্রম করিলেই কৃষ্ণ পালিতের যে

দোতলা বাড়ীখানি আছে, ঐ বাড়ীটাই ভূতের বাড়ী বলিয়া প্রসিদ্ধ । ঐ বাড়ীতে কেহই বাস করিতে পারে না । তবে আপনারা সাধু ; আপনাদের কথা বলিতে পারি না ।” শুনিবামাত্র বাবাজী মহাশয় নির্দিষ্ট রাস্তা ধরিয়া কীর্ত্তন করিতে করিতে চলিলেন । কাহাকেও জিজ্ঞাসা করা নাই ; বহুদিনের সুপরিচিতের গ্যার একেবারে সেই বাড়ীর সম্মুখে গিয়া উপস্থিত হইলেন । ঐ বাড়ীর নিকটবর্ত্তী একটা কাপড়ের দোকানের মালিক শ্রীবৃদ্ধ হৃদয় নাথ চৌধুরী নামক জনৈক বৃদ্ধ ভক্ত সংকীৰ্ত্তনের সম্মুখে আসিয়া দণ্ডবৎ প্রণাম করিলে বাবাজী মহাশয় তাহাকে বলিলেন, “বাবা ! এই বাড়ীর মালিকের নিকট হইতে চাৰি আনিয়া বাড়ীটা খুলিয়া দিতে পারিবে কি ?”

হৃদয়বাবু । আজ্ঞে এ বাড়ীতে কেহ বাস করিতে পারে না ।

বাবাজী । সেই জগুই আমাদের এত আগ্রহ ।

শুনিয়া হৃদয় বাবু অতি দ্রুতগতি কৃষ্ণ পালিতের বাড়ী হইতে চাৰি আনিয়া বাড়ীটা খুলিয়া দিলেন । ইহারা বাড়ীর মধ্যে প্রবেশপূর্বক প্রতি ঘরে ঘরে সংকীৰ্ত্তন করতঃ ছাতের উপর গিয়া উদ্দণ্ড নৃত্য করিতে লাগিলেন । সকলের পদভরে ছাতটী একপভাবে কম্পিত হইতেছে যে, বোধ হইতে লাগিল যেন অবিলম্বেই উহা ভূমিসাৎ হইবে ।° কিছুক্ষণ পরে বাবাজী মহাশয় কীর্ত্তন সমাপ্তি করতঃ দোতলার একটা ঘরে আসিয়া উপবেশন করিলেন অত্যান্ত সঙ্গিন গ কেহ কেহ দোতলার কেহ কেহ বা নীচের তলায় নিজ বাসস্থান নির্দেশ করিয়া লইলেন ।° লীলাময়ের কি বিচিত্র লীলা ! যে বাড়ীর নিকটবর্ত্তী রাস্তা দিয়া লোক চলাচল করিতে ভীত হইত, আজ সেই বাড়ীর উপর-নীচ লোকে লোকারণ্য । সকলেই আনন্দময় ! আবালবৃদ্ধবনিতা সকলেরই মুখে ইহাদের সমালোচনা । কেহ বা দম্ভ করিয়া বলিতেছেন, “রায়ে দেখা যাইবে । কত কত লোক

দেখলাম—কত কত সাহসী মুসলমান পর্যন্ত পরাস্ত হইয়া গেল ; ইহারা ত সামান্য বৈরাগী ।” কেহ বা বলিতেছে, “তাই ! ঐ যে দীর্ঘাকার বাবাজীটা উহাকে দেখিলে যেন ভক্তির উদ্বেগ হয় । আমার বিশ্বাস, উনি কোন মহাপুরুষ ।” কেহ বা বলিতেছে, “কত কত মহাপুরুষ দেখিলাম । ভূত প্রেতের কাছে মহাপুরুষগিরি খাটিবে না ।” ইত্যাদি ভাবে সমালোকগণ যাহার মুখে যাহা আসিতেছে, সে তাই বলিতেছে । কয়েকটা ভদ্রলোক বাবাজী মহাশয়ের নিকট বসিয়া নানারূপ প্রশ্ন করিতেছেন, ইত্যবসরে হৃদয়বাবু বাবাজী মহাশয়কে বলিলেন, “বাবা ! আদেশ হয় ত কিছু চা’ল ডা’ল আনিয়া ভোগের যোগাড় করিয়া দিই ।”

বাবাজী । ইচ্ছাময় নিতাইচাঁদের ইচ্ছা !

হৃদয়বাবু । আজ্ঞে, কত কি আনিতে হইবে ?

বাবাজী মহাশয় ললিতা দাসীকে দেখাইয়া বলিলেন, “বাবা ! তোমার ইচ্ছা হইলে উহাকে জিজ্ঞাসা করিয়া যাহা হয় ব্যবস্থা করিতে পার । আমাকে ও সব জিজ্ঞাসা করা নিশ্চয়োজন ।” অবসর বুঝিয়া ললিতা দাসী রাগ্নার ব্যবস্থা করিতে লাগিল । বাবাজী মহাশয় বৃদ্ধ হৃদয়বাবুকে বাবা বলিয়া সম্বোধন করিলেন ; কাজে কাজে তিনি সকলেরই বাবা হইলেন । তিনি সকলকেই সম্ভান বাৎসল্য করিতে লাগিলেন । দ্রুতকাল পরে হৃদয়বাবু নীচে নামিয়া নিজ কন্ঠার কন্ঠায় ললিতা দাসীর সহিত পরামর্শ করিয়া বাজার হইতে চা’ল, ডা’ল, তরকারী প্রভৃতি ভোগের দ্রব্য আনিতে লাগিলেন । রাগ্না আরম্ভ হইল । ইহাদের যাহার যাহা প্রয়োজন, হৃদয় বাবু সমাধা করিতে লাগিলেন । কিছুকাল পরে কৃষ্ণ বাবু আসিয়া বাবাজী মহাশয়কে বলিলেন, “দেখুন, আপনি আদেশ করেন ত আমি অপর একটি বাস্তু স্থির করিয়া দেই । কারণ আমার এই বাড়িতে অপদেবতার অভ্যাসে কেহই বাস করিতে পারে না ।

আপনারা বিদেশী, তাহাতে বৈষম্য ; আপনাদের উপর কোনরূপ অত্যাচার হইলে আবার দোরতর অপরাধ হইবে ।”

বাবাজী । ভয় কি ভাই ! আমরাও অপদেবতাবিশেষ, দেখা যাক্ নিতাইচাঁদ কি খেলা খেলেন ! সে এক। ভূত—আমরা অনেক ভূত । পঞ্চ ভূতে সকলেরই দেহ গড়া, তবে ভূতকে এত ভয় করিলে চলিবে কেন ? আচ্ছা তুই একদিন যাক্, পরে যদি দরকার হয়, ব্যবস্থা করা যাইবে । তুমি যেন ভাই মনে কিছু চুখ করিও না ।


কৃষ্ণ । আমি না হয় বুঝিলাম ; কিন্তু আমার মা ঠাকুরাণী ত কিছুতেই বুঝিবেন না । তিনি আমাকে বিশেষ করিয়া বলিয়া দিলেন ।

বাবাজী । আচ্ছা, তিনি তোমারও মা, আমারও মা । সম্বানের কথা ঠাঁহাকে বলিও, তিনি অবশ্য বুঝিবেন । তিনি পতিব্রতা সতী । তিনি আশীর্বাদ করিলে কোনই ভয়ের কারণ নাই ।

এইরূপ মিষ্টবাক্যে বাবাজী মহাশয় কৃষ্ণবাবুর মনস্তুষ্ট করতঃ ঠাঁহাকে মায়ের নিকট প্রেরণ করিলেন । ক্রমে বহু বহু ভদ্রলোকের সমাগম হইতে লাগিল । ঠাঁহাদের সহিত নানারূপ তত্ত্বকথার আলোচনায় বেলা দুইটা বাজিয়া গেল । সকলের অনুরোধে স্নানাহ্নিকাদি করিয়া ঠাকুরের ভোগের পর মহাপ্রসাদ গ্রহণপূর্ব্বক পুনরায় আগন্তুক ভক্তবৃন্দের সৃষ্টি নানারূপ ভগবৎকথাপ্রসঙ্গে সন্ধ্যা হইলে কীর্ত্তন আরম্ভ করিলেন ।

লোকে লোকোরণ্য । লোক সকল চারিদিক্ হইতে যেন আত্মহারা-ভাবে ছুটিয়া আসিতে লাগিল । আজ আর ভূতের বাড়ী বলিয়া কাহারও মনে ভয় নাই । শ্রাধানতুল্য স্থান আজ আনন্দকাননে পরিণত হইল । লে দলে লোক আসিতেছে—আবার দলে দলে যাইতেছে । রাত্রি দশটা যতীত হইয়া গেল—কাহারও হুঁস নাই—সকলেই আত্মহারা—সকলেই ঘন কি এক অভিনব ভাবে বিভাবিত । সকল শ্রেণীর লোকই

আসিতেছে । কেহ বা ভূতের বাড়ীতে সাধু আসিয়াছে শুনিয়া তাহাদের
 কিরূপ অবস্থা, কিরূপ ব্যবস্থা এই সমস্ত পরীক্ষা করিতে আসিতেছে ।
 কেহ বা বাবাজী মহাশয় খুব একজন ভূতের ওকা ভাবিয়া মন্তস্তম্বের দ্বারা
 কিরূপভাবে বাড়ী শোধন করেন, তাহা দেখিবার জ্ঞাত আসিতেছে ।
 আবার কেহ কেহ ইহাদের উপর ভূতের অত্যাচার দেখিতে আসিতেছে ।
 যে যে অবস্থায়ই আসুক না কেন, আসিয়া দেখে সবই বিপরীত ।
 বাবাজী মহাশয় একটা ঘরে বসিয়া নাম কীর্তন করিতেছেন এবং সঙ্গিগণ
 ইহার দোহারকি করিতেছে । বাড়ী শোধন ও নাই—তত্ত্বমন্তও নাই ।
 সকলেই দেখিয়া অবাক । কোন কোন ব্যক্তি বা বলিতেছে, “আচ্ছা
 দেখা যাবে, দুদিন যাক না ! আপনিই সমস্ত বুজুকী বাহির হইয়া
 পড়িবে ।” এইরূপে যাহার যেরূপ মনোবৃত্তি, সে সেইরূপ বলিতে
 লাগিল । বহুকাল পরে নামকীর্তন সমাপ্তি করতঃ সকলের সহিত নানাবিধ
 ইষ্টালাপ করিয়া সকলকে বিদায় দিলেন । সকলে অবেলায় আহার
 করার দক্ষণ সে রাত্রে আহার করিতে অনিচ্ছা প্রকাশ করিলেও হৃদয়বাবু
 কিছু মিষ্টি আনিয়া দিলে ঠাকুরকে ভোগ দিয়া সকলেই কিঞ্চিৎ কিঞ্চিৎ
 প্রসাদ গ্রহণ পূর্বক অবশেষ হৃদয়বাবুর বাড়ীতে পাঠাইয়া দিলেন ।
 তদনন্তর আপন আপন কুটি অনুসারে কেহ উপরে কেহ বা নীচে বিশ্রাম
 করিতে লাগিলেন । যে ঘরে কীর্তন হইতেছিল, বাবাজী মহাশয় সেই
 শয়ন করিলেন । সেবার জ্ঞাত দুইচারিজন মাত্র ইহার নিকট রহিলেন ।



শ্রীশ্রীবিনোদবিহারী জিউর কাঁড়িতে অষ্টপ্রহর ।

রাত্রি প্রভাত হইতে না হইতেই বাবাজী মহাশয় প্রাতঃকৃত্য সমাপন-
পূর্বক প্রভাতী কীর্তন আরম্ভ করিলেন । ক্রমে বহু লোক সংঘটি হইতে
লাগিল । কেহ বা কীর্তন শুনিতে, কেহ বা রাত্রে ইহাদের উপর কোনও
অত্যাচারাদি হইয়াছে কি না তাহারই অন্বেষণে, আবার কেহ বা
বাবাজী মহাশয়কে পরীক্ষা করিবার জ্ঞাত, কেহ বা কোতুক দেখিবার
জ্ঞাত ইত্যাদি নানাভাবে নানাশ্রেণীর লোক আসিয়া উপস্থিত হইতেছে ।
বাবাজী মহাশয় কিন্তু আশ্বানন্দী ; যে যে ভাব লইয়াই ইহার নিকট
আসিতেছে, ইনি সকলকেই প্রীতির চোখে দেখিতেছেন এবং
ভগবদারাধনাই যে মানব জীবনের একমাত্র কর্তব্য, কীর্তনে ইহাই
সাধারণের হৃদয়ঙ্গম করাইয়া দিতেছেন ।

এইরূপে বেলা অল্পমান আটটা পর্য্যন্ত কীর্তন করিয়া কীর্তন সমাপ্তি
করিবেন, এই সময় হৃদয়বাবু বলিলেন, “বাবা ! আমাদের বিনোদ-
বিহারী জিউকে দর্শন করিতে যাইবেন কি ?” বাবাজী মহাশয় বিশেষ
উৎসাহিতভাবে বলিলেন, “চলুন বাবা ! এত পরম সৌভাগ্যের কথা !”
এই বলিয়া “ভজ নিতাই গোঁর রাখে শ্রাম । জপ হরে কৃষ্ণ হরে রাম”
এই নাম ধরিয়া সদলে বাহির হইলেন । রাজারের মধ্য দিয়া যখন
কীর্তন যাইতেছে, তখন দোকানী পসারী দোকান ফেলিয়া কীর্তনে যোগ
দিতেছে । কীর্তনানন্দে এক এক স্থানে একরূপ লোক সংঘটি হইতেছে যে,
কাহারই সেস্থান পরিত্যাগ করিতে ইচ্ছা হইতেছে না । যদিও

বালুবাজারের মধ্যেই বিনোদবিহারী জিউর মন্দির, তথাপি কীর্তন লইয়া
 বাইতে প্রায় দুই ঘণ্টা সময় লাগিল । ক্রমে বহুলোক-সমভিব্যাহারে
 বিনোদবিহারী জিউর বাড়ীতে উপস্থিত হইলেন । সকলেরই রাধাবিনোদ
 জিউর অপূৰ্ণ মাধুরি দর্শনে বিমোহিত হইলেন । বাবাজী মহাশয়
 প্রেমবিহ্বলভাবে ভাব গদগদকণ্ঠে কীর্তন ধরিলেন :-

(হের দেখ)

বিনোদ নাগর রায় !

(উহার) বিনোদ চিকুরে,

বিনোদ বরিহা,

ছলিছে বিনোদ বায় ॥

বিনোদ নয়ানে,

বিনোদ চাহনি,

বিনোদ টেরছ ছাঁদে ।

বিনোদ নাসায়,

বিনোদ মুকুতা,

হেরিয়া পড়িছু ফাঁদে ॥

বিনোদ অধরে,

বিনোদ হাসি,

বিনোদ বিনোদ বোল ।

বিনোদ বাঁশের,

বিনোদ বাঁশরী,

বিনোদ বিনোদ রোল ॥

বিনোদ গলায়,

বিনোদ মালা,

বিনোদ বিনোদ দোলে ।

কোন্ বিনোদিনী,

বিনোদ গাঁথনি,

গেঁথেছে বিনোদ সূলে ॥

বিনোদ হেলন,

বিনোদ দোলন,

বিনোদ বাঁকুয়া শ্রাম ।

বিনোদ কটিতে,

বিনোদ ধটা,

বিনোদ বিনোদ ঠাম ॥

বিনোদ চরণে, বিনোদ নুপুর,
 বিনোদ বিনোদ বাজে ।
 বিনোদ বসনে, বিনোদ ভূষণে,
 বিনোদ বিনোদ সাজে ॥
 বিনোদের বামে, শোভে বিনোদিনী,
 বিনোদ মোহন রূপ ।

(জন্ম) চাঁদে চকোরিণী, জ্বলে দামিনী,
 পীরিতি রসের কুপ ॥

আহা মরি মরি, যুগল মাধুরি,
 ছটায় ভুবন ভুলে ।

(জন্ম) শ্রাম সরোবরে, হেম কমলিনী,
 রসের হিল্লোলে দোলে ॥

এইরূপে স্বরচিত বহু বহু পদ গান করিতে লাগিলেন । বিনোদ-বিনোদিনীর অপরূপ রূপমাধুরী দর্শনে যেন প্রেম সিদ্ধ উৎথলিয়া উঠিল । উপস্থিত লোক সকল ইহার অপূর্ণ কীর্তনপ্রভাবে বিশ্বয়-সাগরে নিমগ্ন হইল । আনন্দের অবধি নাই । ক্রমে বেলা দ্বিতীয় প্রহর হইল । বাবাজী মহাশয় ভক্তগণের মন জানিয়াই যেন কীর্তন সমাপ্তি করতঃ বিনোদ বিহারী জিউর সম্মুখে উপবেশন করিলেন । সকলে ইহার চতুর্দিকে ঘেরিয়া বসিলে হৃদয়বাবু বলিলেন, “বাবা ! বিনোদবিহারী জিউর সম্মুখে অহোরাত্র নামকীর্তন হয়, আমার প্রাণে এই বাসনার উদয় হইয়াছে । এখন আপনার রূপা ।

বাবাজী । ভক্তের ইচ্ছা হইলেই ভক্তবৎসল নিতাইচাঁদ অবশ্যই তাহা পূর্ণ করিবেন । আনন্দময় শ্রীরাধাবিনোদ জিউর নিকট আসিবা-মাত্র আমার মনে হইয়াছিল যে, এইস্থানে একদিন অষ্টপ্রহর নামসংকীর্তন

হইলে ভাল হয় । বাহা হউক, নিতাইচাঁদ ভক্তের হৃদয়ে সেই ইচ্ছার উদয় করাইয়াছেন—পরম আনন্দের কথা ।

হৃদয়বাবু । আজ্ঞে আমরা ত কিছুই জানি না । কিরূপ কি যোগাড় করিতে হইবে ?

বাবাজী । কাল প্রাতঃকাল হইতে পরশ্ব প্রাতঃকাল পর্য্যন্ত নাম কীৰ্ত্তন চলিবে । কখনও বিরাম দেওয়া হইবে না । অন্ন আর কিছুর প্রয়োজন নাই ; একটা তুলসী বৃক্ষ, পাঁচটা কলসী এবং দুই একখানি চিত্রপট হইলেই হইবে ।

এই কথা শুনিয়া হৃদয়বাবু বিশেষ উৎসাহিত ভাবে অষ্টপ্রহর কীৰ্ত্তনের উদ্যোগ করিতে লাগিলেন । সে দিন ইহাদের বিনোদবিহারী জিউর মন্দিরেই মহাপ্রসাদ পাইবার ব্যবস্থা হইল । মহাপ্রসাদ পাইয়া সকলে বাসায় আসিলেন ।

সন্ধ্যার পর অধিবাস কীৰ্ত্তনের আয়োজন হইতে লাগিল । ইহার পূর্বে কুটকে কখনও এইরূপভাবে অষ্টপ্রহর কীৰ্ত্তন হয় নাই ; কাজেই লোকসকল নব উৎসাহে উৎসাহিত হইয়া কীৰ্ত্তনে যোগ দিতে লাগিল । সন্ধ্যার প্রাক্কালে বাবাজী মহাশয় কীৰ্ত্তন করিতে করিতে বিনোদবিহারী জিউর বাড়ী গিয়া অধিবাস কীৰ্ত্তন আরম্ভ করিলেন । আনন্দের অবধি নাই । রাত্রি প্রায় এগারটা পর্য্যন্ত কীৰ্ত্তন করিয়া কীৰ্ত্তন সমাপ্তি করতঃ বাসায় আসিয়া বিশ্রাম করিলেন ।

পরদিন প্রাতে নাম আরম্ভ হইল । অপূর্ব আকর্ষণ ! কি হিন্দু, কি মুসলমান, যে কেহই নাম শুনিতে বা ইহাদের কার্যকলাপ দেখিতে আসিতেছে, সেই ঠিক চুষকাকুটলোহের ত্রায় কীৰ্ত্তনে যোগদান করিতেছে । স্কুলের ছেলেরা দূরে থাকিয়া নাম শুনিতেছিল, হঠাৎ একবারে মাতালের ত্রায় টলিতে টলিতে কীৰ্ত্তনের মধ্যে গিয়া নাচিতে লাগিল । কাহারও

হাত হইতে বই পড়িয়া গিয়াছে—চৈতন্য নাই ; কেহবা বই হাতে করিয়াই উন্মত্তভাবে নাচিতেছে ; কেহ কেহ বা প্রেমানন্দে বিভোর হইয়া জামা জুতা সহই কীর্তনের মধ্যে গড়াগড়ি দিতেছে । কি গৃহস্থ, কি উদাসী, কি বালক, কি বৃদ্ধ কাহারই দেহস্থিতি নাই । সকলেই যেন গ্রহগ্রস্তের ন্যায় আবিষ্টভাবে নৃত্য করিতেছে, আর “ভজ নিতাই গৌর রাধেশ্যাম । জপ হরে কৃষ্ণ হরে রাম ।” এই নাম করিতেছে । বিনোদ-বিহারী জিউর মন্দিরে আজ যেন আনন্দের উৎস ছুটিতেছে । ঠাকুরের সম্মুখে কীর্তন । তিনি যেন আনন্দে মাতোয়ারা হইয়া নৃত্য করিতেছেন । যে- একবার যুগল চন্দ্রবদন দর্শন করিতেছে, সেই বলিতেছে, “কি আশ্চর্য্য ! আমরা চিরদিনই রাধাবিনোদজিউকে দর্শন করিয়া থাকি ; কিন্তু এরূপ অপূৰ্ণ হাসি, অপরূপ রূপলাবণ্য ত আর কখনও দেখি নাই ! দেখিলেই বোধ হয় যেন ঠাকুর নৃত্য করিতেছেন ।” ক্রমে বেলা যতই অধিক হইতে লাগিল, লোক সংখ্যাও ততই বাড়িতে লাগিল । নামের ধ্বনিতে দশদিক মুখরিত হইল । প্রেমময়ের রূপায় সকলেই যেন প্রেমময় হইয়া গেল ।

আজ বিনোদবিহারী জিউর বাড়ীতে প্রেমানন্দের বাজার বসিয়াছে । কে আর সেই নিরানন্দময় বালুবাজারে যাইবে ? কাজেকাজেই বিনোদ-বিহারী জিউর বাড়ীতেই বাজার । একদিকে নামের বাজার, প্রেমের বাজার, আনন্দের বাজার এবং সাধু-সজ্জনদের বাজার বসিয়াছে । আবার অপর দিকে শাকওয়ালী শাক লইয়া বিভোরভাবে কীর্তন শুনিতেছে । মুটে মোট মাথায় করিয়া চিত্রপুস্তকীর ন্যায় দাঁড়াইয়া রহিয়াছে । কেহ বা বাজার করিয়া বাড়ী যাইতে যাইতে বিনোদবিহারী জিউর বাড়ীর আনন্দসাগরে ডুবিয়া গিয়াছে ; বাড়ীর কথা মনে নাই—হাতে বাজার, কীর্তনে নৃত্য করিতেছে । গোয়ালী দুধ লইয়া যাইতেছিল, নামের আকর্ষণে দুধের কলসী কাঁধে করিয়াই নৃত্য করিতে লাগিল । অপূৰ্ণ দৃশ্য ! প্রস্থতি

নিবৃত্তির সংগ্রাম উপস্থিত । নিবৃত্তির আকর্ষণে প্রবৃত্তির দাসদাসীগণ প্রবৃত্তিকে সঙ্গে লইয়াই নিবৃত্তির চরণে শরণ লইতেছে ।

বাবাজী মহাশয় কিছুক্ষণ কীর্তন করিয়া একপার্শ্বে উপবেশন পূর্বক কয়েকটা ভদ্রলোকের সঙ্গে ভগবৎ কথা বলিতে আরম্ভ করিলেন । বেলা দ্বিতীয় প্রহর অতীত হইতে চলিল ; কিছুই আহার হয় নাই—নীলাকথায় মাতিয়া গিয়াছেন । সঙ্গিগণের মধ্যে কেহ কেহ বিশেষ উদ্বিগ্ন হইয়া পড়িয়াছেন ; কিন্তু কিছুই বলিতে সাহস পাইতেছেন না । এমন কি, ষেক্ষপভাবে লোকজন চারিদিকে ঘেরিয়া বসিয়াছে, তাহাতে বাবাজী মহাশয়ের নিকট যাওয়াই দুঃসাধ্য । সকলেই চিন্তিত ।

এই সময় ঈশদবগুর্জনবতী একটা বর্ষীয়সী স্ত্রীলোক একহস্তে একটা তুফের বাটী অপর হস্তে কিঞ্চিৎ মিষ্টান্নপূর্ণ একখানি থালা লইয়া দ্রুতপদে আসিয়া উপস্থিত হইলেন । উহার দুইটা চোখে জল ; দেখিবামাত্রই বোধ হয় যেন বাৎস্যল্যের মূর্তি স্নেহময়ী মা যশোমতী । উৎকণ্ঠাভরে বাবাজী মহাশয়ের দিকে এক এক পদ অগ্রসর হইতেছেন, আর যেন সকলের মনপ্রাণ বাৎস্যল্যেরে ডুবাইয়া দিতেছেন । কাহাকেও কিছু বলিবার প্রয়োজন হইতেছে না ; আপনা-আপনিই সকলে পথ ছাড়িয়া দিতেছে । ক্রমে মা আমার বাবাজী মহাশয়ের নিকট উপস্থিত হইয়া থালাখানি একপার্শ্বে রাখিলেন এবং বাম হস্তে ইহার মস্তক ধারণপূর্বক দক্ষিণ হস্তে তুফের বাটীটা মুখে ধরিলেন । ইনিও ঠিক পঞ্চমবর্ষীয় বালকের স্থায় মায়ের ইচ্ছানুরূপ কার্য্য করিতে লাগিলেন । মা দুধটুকু পান করাইয়া এক একটা করিয়া মিষ্টি কয়টা খাওয়াইলেন । যেমন খাওয়ান শেষ হইল, অমনি চারিদিকে চাহিয়া লজ্জাবনতমুখী মা আমার মাথার কাপড় টানিলেন । তখন যেন কি করিয়া কাহার সঙ্গে এতটা অপরিচিত পথ চলিয়া আসিলেন এবং কি করিয়া বাহিরে যাইবেন ইত্যাদি সমালোচনার

উহার হৃদয় উদ্বেলিত হইতে লাগিল । উপস্থিত জনগণ সকলেই ঐ ভাবের প্রতিমাখানিকে প্রণাম করিয়া বলিলেন, “মা ! আপনি নিঃসঙ্কোচে এই রাস্তায় চলিয়া আসুন । জগৎ আপনার সন্তান, আপনি জগৎমাতা, ভয় কি ?” তখন মা অতি সন্তর্পণে ধীরে ধীরে বাহিরে আসিয়া বিনোদ-বিহারীর সম্মুখে দাঁড়াইলেন । সকলেই উৎকীর্ণভাবে বাবাজী মহাশয়কে জিজ্ঞাসা করিলেন, “বাবা ! ইনি কে ? এরূপ অপূর্ব ভাববিহীনতা আমরাত আর কখনও দেখি নাই !”

বাবাজী মহাশয় বলিলেন, “ইনি মাণিক ঘোষ বাজার নিবাসী শ্রীযুক্ত প্যারীমোহন দত্ত মহাশয়ের পত্নী । ইহারা জাতিতে গন্ধবণিক্ । এমন অপূর্ব বাৎসল্যরসের মূর্তি আমি আর কখনও দেখি নাই । সর্বদা ভাব-নিমগ্না । উহার বাড়ীতে গোবিন্দদেবের সেবা রহিয়াছে । বাৎসল্যময়ী মা আমার বাৎসল্যভাবে গোবিন্দের যেরূপ সেবা করেন, দেখিলে অতি বড় পাষাণীরও হৃদয় দ্রব হইয়া যায় । ব্যক্তিগত লক্ষ্য নাই ; যে কেহই বাড়ীতে উপস্থিত হউক না কেন, তাহাকে কিছু না কিছু খাওয়ান চাই । এই নিহেতুক বাৎসল্যরসের স্থান একমাত্র শ্রীকৃষ্ণাবন । শ্রীকৃষ্ণরূপায় এই প্রেমের এক কণাও যাহার লাভ হইয়াছে, তিনি জগৎপূজ্য । বাৎসল্যভাবের নিকট কাম পরাভূত, মধুর ভাব লজ্জিত, ঐশ্বর্য্যভাব স্বদূরে পলায়িত, জাতিকুলমান তিরোহিত এবং ভেদজ্ঞান ভয়ে লুক্কায়িত হইয়া থাকে । বাৎসল্যপ্রেমে সংকোচতা নাই ।”

এইরূপ কথোপকথন হইতেছে, এমন সময়ে প্যারী বাবু আসিয়া বলিলেন, “বাবা ! তোমার মা যেমন শুনিলেন যে এত বেলা পর্য্যন্ত তুমি কিছুই খাও নাই, অমনি খাবার হাতে করিয়া দ্রুতগতি বাহির হইল । আমি গাড়ী পাকী করিয়া দিবার জন্ত বহু চেষ্টা করিলাম ; কিন্তু সে কিছুতেই মানিল না । কি আশ্চর্য্য ! যে স্নানের জন্ত নদীতে

যাইবার সময় রাস্তা ভুলিয়া যায় ; সঙ্গে লোক না লইয়া যাইতে পারে না, সে আজ এতটা অপরিচিত পথ এরূপ নিরপেক্ষভাবে নিঃসঙ্কোচে চলিয়া আসিল যে, আমি চেষ্টা করিয়াও উহার সঙ্গে আসিতে পারিলাম না । ইহার এত দ্রুত চলন আমি আর কখনও দেখি নাই ।” শুনিয়া উপস্থিত সকলেই অবাক্ । বাবাজী মহাশয় ঈষৎ হাসিয়া বলিলেন, “বাবা ! মা আমার বাৎস্যল্যের সাগরে ঝাঁপ দিয়াছিলেন । অমুরাগবাতাসে উৎকণ্ঠারূপ তরঙ্গ এতই প্রবল হইয়াছিল যে, অপরিচিত পথও অতি শীঘ্র চলিয়া আসিয়াছেন । কুলমানমর্যাদা বাৎস্যল্যের নিকট লজ্জিতভাবে দূরে পলায়ন করে । মা যেন বাৎস্যল্যময়ী মা যশোমতীর প্রতিমূর্তি ! আমরা পরম ভাগ্যবান্ যে, এ হেন ভাবের মূর্তিখানির বাৎস্যল্য পাইয়াছি ।” শুনিয়া সকলেই একবাক্যে বলিয়া উঠিলেন, আমরা জীবনে এরূপ ভাব আর কখনও প্রত্যক্ষ করি নাই—করিব বলিয়া আশাও ছিল না । কেবল আপনার রূপায় এইটুকু হইল ।”

এইরূপ নানা কথোপকথনের পর বাবাজী মহাশয় বিনোদবিহারীর মহাপ্রসাদ গ্রহনান্তে নাম করিবার জ্ঞাত সঙ্গিগণকে বিভাগ করিয়া দিলেন । সকলেই স্ব স্ব সময় অনুসারে নাম করিতে লাগিল । কোথা দিয়া যে দিবারাত্র কাটিয়া গেল, কাহারই সংজ্ঞা নাই । শেষ রায়ে তৈরবী-রাগিনীতে “নিতাই গোর রাখে শ্রাম । হরে কৃষ্ণ হরে রাম” এই নামগান হইতে লাগিল । অপূৰ্ণ আনন্দ ! মধুময় নাম, মধুময় স্বর, মধুময় সময়, মধুময় সঙ্গত, মধুময় তানে মনপ্রাণ মাতিয়া গেল । সকলেই মাতোয়ারা ! বাবাজী মহাশয় এক একবার চরণে চরণ রাখিয়া, মধুর নৃত্য করিতেছেন । ইহার বিশাল দেহখানি নূজকালে যেন নাচের পুতুলের মত চলিতেছে । উপস্থিত দর্শকবৃন্দ ইহার ভুবনমোহন নৃত্যদর্শনে বিশ্বয়সাগরে নিমগ্ন হইলেন । এইভাবে বেলা নয়টা বাজিয়া গেল । কাহারই ইচ্ছা হইতেছে

না যে, নাম সমাপ্ত হয় বা এ হেন আনন্দ ভঙ্গ হয় । জানি না ইচ্ছাময়ের কি ইচ্ছা ! বেলা দশটোৰ সময় বাবাজী মহাশয় ঐক্লপভাবে নৃত্য কৰিতে কৰিতে সদলে বাহিৰ হইলেন । সঙ্গে অসংখ্য লোক । কটকবাসীৰ নিকট ইহাদেৱ ভাব-ভঙ্গি, চলন-বলন, কীৰ্ত্তন-নৰ্ত্তন সকলই যেন নূতন বলিয়া বোধ হইতেছে । সকলোৱেই প্ৰাণে নূতন উৎসাহ । বালক-বৃদ্ধ, স্ত্ৰীপুৰুষ সকলেই এক বাক্যে বলিতেছে, “আহা মরি ! কি অপূৰ্ণ আনন্দ ! কি সুমধুৰ কীৰ্ত্তন ! কি মনোহৰ নৃত্য ! আমরা বহু বহু গান শুনিয়াছি বা নৃত্য দেখিয়াছি ; কিন্তু একুপ সৰ্ব্বচিত্তাকৰ্ষক প্ৰভাব আৰু কখনও অনুভব কৰি নাই ।” ক্ৰমে নগৰ পৰিভ্ৰমণপূৰ্বক বিনোদ-বিহারীৰ অঙ্গনে কীৰ্ত্তন সমাপ্তি কৰিয়া কাঠজুড়ি নদীতে স্নান কৰিতে গেলেন । কাঠজুড়ি নদীৰ জল এবং তীৰবৰ্তী ভূমি সকল দেখিয়া বাবাজী মহাশয় বলিলেন, “কাঠজুড়ি নদীটিকে আমাৰ ঠিক গঙ্গা বলিয়া মনে হয় । এমন নিৰ্ম্মল জল এবং একুপ অপূৰ্ণ শোভা সাধাৰণ নদীতে প্ৰায়ই দেখা যায় না ।”

বাবাজী মহাশয় যত দিন কটকে অবস্থান কৰিতেন, কাঠজুড়ি নদীৰ জল ভিন্ন অণু কোন জল ব্যৱহাৰ কৰিতেন না । এমন কি, কাঠজুড়ি নদীতে স্নান কালে তিনি গঙ্গাৰ স্তব পাঠ কৰিতেন । ক্ৰমে স্নান শেষ কৰিয়া নাম কৰিতে কৰিতে বিনোদবিহারী জিউৰ মন্দিৰে প্ৰত্যাগমনপূৰ্বক আত্মিকাদি কৰিতে লাগিলেন । এদিকে বিনোদবিহারী জিউৰ ভোগৰাগ শেষ হইলে বহু বহু ভক্তগণ সঙ্গে পৰমানন্দে মহাপ্ৰসাদ গ্ৰহণপূৰ্বক আসিয়া সদলে বাসায় বিশ্রাম কৰিলেন ।



স্বামী কেশবানন্দের সহিত মিলন ।

একদিন অপরাহ্নে একটী লোক আসিয়া বাবাজী মহাশয়কে বলিল,
“আজ্ঞে, কামী হইতে একজন সাধু আসিয়াছেন । তিনি আপনার সহিত
দেখা করিতে চান !”

গুনিবামাত্র বাবাজী মহাশয় সসঙ্কমে বলিলেন, “বাবা ! তিনি কোথায়
আছেন ? চল আমি তাঁহার সহিত দেখা করিব ।”

লোকটী বলিল, “আজ্ঞে, তিনি শ্রীযুক্ত বাবু বনবিহারী পালিত
মহাশয়ের বাড়ীতে আছেন, চলুন ।”

গুনিয়া বাবাজী মহাশয় লোকটির সঙ্গে বনবিহারী বাবুর বাড়ীতে
গিয়া উপস্থিত হইলেন । স্বামীজীর দর্শনমাত্র বাবাজী মহাশয় নমস্কার
করিলেন । স্বামীজীও প্রতি নমস্কার করতঃ নিকটে বসাইয়া ইহাকে
জিজ্ঞাসা করিলেন, “আপনার নাম ?”

বাবাজী । এ দাসকে সকলে রাধারমণ চরণদাস বলিয়া থাকে ।

স্বামীজী । কোথায় থাকা হয় ?

‘বাবাজী । থাকার কোন নির্দিষ্ট স্থান নাই । তবে অনেক দিন
শ্রীজগন্নাথদেব নিজ ধামে রাখিয়াছিলেন । সম্প্রতি জানি না কি উদ্দেশ্যে
এখানে প্রেরণ করিয়াছেন ।

এইরূপ নানা কথোপকথনের পর স্বামীজী জিজ্ঞাসা করিলেন,
“আচ্ছা, গৌরানন্দদেব কেশব ভারতীর নিকট শিখা স্মৃত্যোগ করিয়া
গৈরিক বসন ধারণ পূর্বক সন্ন্যাস গ্রহণ করিয়াছিলেন । তাঁহার মালা-
তিলকাদি কিছুই ছিল না, তবে তাঁহার সম্প্রদায়ের মধ্যে গুহ্র বসন
পরিধান এবং শিখাস্মৃত্ত-মালা তিলকাদি ধারণ কোথা হইতে আসিল ?

বাবাজী । বাবা ! ঈশ্বরানাং বচঃ সত্যং তথৈবাচরণং কচিৎ । শ্রীগৌরান্ধ-
দেব পূর্ণ পূর্ণতম সাক্ষাৎ ব্রজেন্দ্রনন্দন শ্রীকৃষ্ণচন্দ্র । তাঁহার আচরণ জীবের
আচরণীয় হইতে পারে না । তিনি জীবকে যেরূপভাবে চলিতে শিক্ষা
দিয়াছেন, আমাদের সেইরূপ ভাবে চলাই কর্তব্য । ✓ বিশেষতঃ ভবিষ্যতে
লোকের মনে এইরূপ সন্দেহের উদয় হয়, এই ভয়ে মহাপ্রভু তাঁহার
নিজ মতাবলম্বী সম্প্রদায়কে মধ্বাচার্য্য সম্প্রদায়ভুক্ত করিয়া দিয়াছেন ।
বৈষ্ণবসম্প্রদায় চারিভাগে বিভক্ত ;—রামানুজ, বিষ্ণুস্বামী, মধ্বাচার্য্য ও
নিম্বাদিত্য । এই চারি সম্প্রদায়ই গুত্র বসন ও শিখাসূত্র-মালাতিলকধারী ।

স্বামীজী । মহাপ্রভুর মতাবলম্বীগণ অণু সম্প্রদায়ভুক্ত হইলেন কেন ?

বাবাজী । মহাপ্রভু আজ্ঞা করিলেন, “যে জন আমাকে ভালবাসিবে
বা গুরুবুদ্ধি করিবে, সে নিজেকে মধ্বাচার্য্য সম্প্রদায় বোলাইবে ; অতএব
মহাপ্রভুর আজ্ঞাপালন ও সন্তোষবিধান করাই আমাদের সর্বতোভাবে
কর্তব্য ।

স্বামীজী । আচ্ছা, মধ্বাচার্য্য সম্প্রদায়ী বৈষ্ণবগণের প্রণালীতে
পাওয়া যায়, তাঁহাদের আরাধা দেবতা নারায়ণ, ধাম বদরিকাশ্রম এবং
উপাস্ত্র তন্ত্র । তবে আপনারা সেই সম্প্রদায়ী হইয়া রাধাগোবিন্দ
উপাসনা করেন কেন ?

বাবাজী । শ্রীমদমহাপ্রভু রাগমার্গের উপাসনাপ্রণালীতে ঐশ্বর্য্যগচ্ছহীন
ব্রজজনের আনুগত্যে শ্রীকৃষ্ণ ভজন উপদেশ করিয়াছেন । ব্রজগোপীগণ
নারায়ণকে দেবতা জ্ঞানে পূজা করিয়া তাঁহার নিকট কৃষ্ণপ্রাপ্তির জগু
প্রার্থনা করিতেন । কাজেই ব্রজভাবে ভজন করিতে হইলে নারায়ণকেই
দেবতা বলিয়া মানিতে হইবে । মহাপ্রভুর মতাবলম্বীগণের কাহাকেও
অবজ্ঞার চোখে দেখা উচিত নহে । “সর্বদেব পূজিবে না হবে তৎপর ।
সবার নিকট মেগে লবে কৃষ্ণ-ভক্তিবর ॥” গোপীগণ কাত্যায়নীব্রত করিয়া

কৃষ্ণকে লাভ করিয়াছিলেন । গোপেশ্বর মহাদেব ব্রজের অধীশ্বর । মর্যাদাপুরুষোত্তম শ্রীমন্নহাপ্রভু নিজে আচরণ করিয়া জীবকে শিক্ষাপ্রদান করিয়াছেন । যখন তিনি দক্ষিণদেশ ভ্রমণ করিতে বাহির হইয়াছিলেন, তখন যে স্থানে যে দেবতার দর্শন পাইয়াছেন, তাঁহাকেই মর্যাদা ও প্রণাম বন্দনা করিয়া ইষ্টবর প্রার্থনা দ্বারা জগৎকে শিখাইয়াছেন যে,

অপ্রাকৃত নরলীলা । ঐশ্বর্য্যগন্ধ থাকিতে বা রাধা-গোবিন্দকে নারায়ণাদির সম দেবতা জ্ঞান থাকিতে ব্রজ প্রাপ্তি হইবে না । শ্রীধাম বৃন্দাবন ও শ্রীধাম নবদ্বীপ ধামাতীত ধাম ; কাজেই বাহিরে থাকিয়া আমাদের উপাসনাতত্ত্ব সহজে বোধগম্য করা কঠিন ।

স্বামীজী । আচ্ছা, আপনি বলিলেন যে, শ্রীগোরাঙ্গের আদেশ পালন করাই আপনাদের কর্তব্য । শ্রীগোরাঙ্গদেব নিজে ভক্তভাব অঙ্গীকার করিয়াছিলেন । তিনি ত আর নিজেকে ভজিতে বলেন নাই । এমন কি অনেক স্থানে দেখা যায়, তাঁহাকে স্তবস্ততি করিলে বা তাঁহার নাম কীৰ্ত্তনাদি করিলে তিনি অসন্তুষ্টই হইতেন । তবে আপনারা তাঁহাকে ভজনা করেন কেন ?

বাবাজী । ষেরূপ বৃন্দাবনবিহারী নন্দনন্দন বংশীধারী কখনই নিজেকে ভজিতে বলেন নাই ; শ্রীগোরাঙ্গ মহাপ্রভুর আদেশে আমরা তাঁহাকে ভজনা করি, সেইরূপ শ্রীমন্নহাপ্রভুর অভিন্নকলেবর শ্রীনিত্যানন্দপ্রভু নিত্যপার্বদ শ্রীঅম্বৈতপ্রভু, শ্রীগদাধর পণ্ডিত গোস্বামী প্রভৃতির আদেশে আমরা শ্রীগোরাঙ্গদেবকে ভজনা করিয়া থাকি । নিতাই বলিয়াছেন :—

ভজ গোরাঙ্গ কহ গোরাঙ্গ লহ গোরাঙ্গের নাম ।

যে জন গোরাঙ্গ ভজে সেই আমার প্রাণ ॥

দিন গেলে হা গৌরান্স বলে একবার ।

সে জন আমার হয় আমি হই তার ॥

আবার শ্রীগৌরান্স বলিয়াছেন :—

জন্ম ধরিয়া হেলায় শ্রদ্ধায় যে লয় নিতাইর নাম ।

আমি বিকাই তারে দেখাই যুগল রাধাশ্রাম ॥ ইত্যাদি ।

অতএব আমরা উভয়ের আদেশে উভয়কেই ভজনা করিয়া থাকি । বিশেষতঃ যদি জীবের প্রকৃত কর্তব্যজ্ঞান থাকে, তবে নিতাই-গৌরান্স চরণে চিরকৃতজ্ঞতা স্বীকারপূর্বক সৰ্বাণ্ণে তাঁহাদিগকে ভজন ও স্মরণ করা উচিত । কারণ যদি নিতাই গৌরান্সদেব কৃপা করিয়া চির অনর্পিত নাম, প্রেম এবং রাধাগোবিন্দের যুগল উপাসনা আপামরসাধারণ জীবগণকে অবিচারে বিতরণ না করিতেন, তাহা হইলে অনাদিবদ্ধ মায়ামুগ্ধ কলিহত জীবগণের কি দুর্দশা হইত ভাবিয়া দেখুন দেখি ! আমরা এমনই ব্রাহ্ম জীব যে, সামান্য কোন বিষয়ে যদি কাহারও দ্বারা উপকৃত হই বা সামান্য কোনও বস্তু প্রাপ্ত হই, তবে তাঁহার নিকট শত শতবার কৃতজ্ঞতা স্বীকার করি ; কিন্তু যাহারা আমাদের দুর্দশা দেখিয়া নিজ নিজ স্নেহমুখ্যে জলাঞ্জলি দিয়া দ্বারে দ্বারে কাঁদিয়া কাঁদিয়া ব্রহ্মাদির দুর্লভ পরমধন প্রেমসম্পত্তি আমাদের অবিচারে বিতরণ করিলেন, আমরা কিনা তাঁহাদিগকে ভজিতে বা তাঁহা কিংবদন্তির নিকট কৃতজ্ঞতা স্বীকার করিতেও কুণ্ঠিত হই !”

বলিতে বলিতে বাবাজী মহাশয়ের চোখে জল আসিল—কণ্ঠ গদগদ হইল—সৰ্বান্স পুলকাবলীতে ভূষিত হইল । স্বামীজী ইহার অপূর্ণ প্রেমবিকার দর্শনে অতিশয় প্রীত হইয়া বলিলেন, “আজ আমি আপনাদের সঙ্গলাভ করিয়া ধন্য হইলাম । একপ সরল ভাষায় বৈষ্ণবসিদ্ধান্ত আমি আজ পর্য্যন্ত কাহারও নিকট শুনি নাই ।” বাবাজী মহাশয় কন্ববোধে

বিনীতভাবে বলিলেন, “আপনারা মহাত্মা, আপনাদের কৃপায় কাঠের পুতুলও নাচিতে পারে—পঙ্খও পর্কিত লজ্জন করিতে সমর্থ হয় ; আমাদের বলাইবেন এ আর কত কথা ?” ইত্যাদি নানারূপ দীনতা-সূচক বাক্য শ্রবণে স্বামীজী উঠিয়া আত্মহারাভাবে বাবাজী মহাশয়কে আলিঙ্গন করিলেন । আর কাহারও গুরুবুদ্ধি নাই ; পরম্পর সখ্যস্থলে বাঁধা পড়িলেন । স্বামীজী জিজ্ঞাসা করিলেন, “আচ্ছা ভাই ! জীবের মুখ্য সাধন কি ? কোন্ পথে গেলে জীব সহজে ভগবানের দিকে অগ্রসর হইতে পারে ?”

বাবাজী । আমাকে একথা জিজ্ঞাসা না করিয়া আপনার বলাই উচিত । আমি শাস্ত্রাদি কিছুই জানি না । শ্রীগুরুদেবের কৃপায় আমার প্রাণে যাহা ভাল লাগে বা তিনি যাহা বলান, আমি তাহাই বলিতে পারি ।

স্বামীজী । আমি গুরুপদে গুণিতে চাহি না । তোমার প্রাণে যাহা ভাল লাগিয়াছে, তাই বলিলেই আমি নিজেকে কৃতার্থ মনে করিব ।

বাবাজী । জীবের মুখ্য সাধন ভক্তি । ভগবান্ ভক্তিস্থত্রে বেক্রপ আবদ্ধ হন, অথ কোনও ভাবে সেরূপ আবদ্ধ হইন না । ভক্তিপথ অতি সূক্ষ্ম, অনাস্রাসসাধ্য এবং নিত্যসুখপ্রদ । শ্রীমদ্ভগবদগীতায় ভগবান্ বলিয়াছেন :—

ভক্ত্যা হনন্তয়া শকো। হহমেবংবিধোহর্জুন ।

জাতুং দ্রষ্টুঞ্চ তৎস্বেন প্রবেষ্টুঞ্চ পরম্পর ॥

স্বামীজী । কেন, যোগমার্গেত ভগবান্ আবদ্ধ হন । যোগই ত প্রধান উপায় । তিনি শ্রীমদ্ভগবদগীতায় বলিয়াছেন :—

অনন্তচেতাঃ সততং যো মাং স্মরতি নিত্যশঃ ।

তত্ত্বাহং সুলভঃ পার্থ নিত্যযুক্তস্ত যোগিনঃ ॥

বাবাজী । যোগ আপেক্ষিক শব্দ । যোগের দুইটি লক্ষণ ;—প্রথম যোগ চিত্তবৃত্তিনিরোধঃ । এই চিত্তবৃত্তিনিরোধরূপ যে যোগ, ইহা প্রত্যেকেরই প্রয়োজন । যোগ বলিলে একটা পথকে বুঝায় না— “যোগঃ কৰ্ম্মসু কৌশলং ।” ভক্তি, জ্ঞান বা কৰ্ম্মের পথ চিনিবার কৌশলকেই যোগ নামে অভিহিত করা হইয়াছে । ভাবিয়া দেখুন, শাস্ত্রে যে ইষ্টযোগ, রাজযোগ প্রভৃতির উল্লেখ করিয়াছেন, তাহাতে শরীররক্ষা বা মনের স্থিরতা ভিন্ন আর কিছু আছে কি ? যোগশাস্ত্রেও যাহা বলিয়াছেন, ভক্তিশাস্ত্রেও ঠিক তাহাই বলিয়াছেন । কেবল ক্রমভেদে ফলাফলের বিভিন্নতা । পতঞ্জলি বলিয়াছেন, “চিত্তের বৃত্তিসকলকে অবরোধ করিয়া রাখ । ধৌতি, বস্তি, নেতি, আসন এবং প্রাণায়ামাদি দ্বারা কৰ্ম্মপিত্তাদির বৈষম্যদোষ দূর করতঃ নাড়ীসকলের সরলতা বিধান কর— ধ্যান ধরাদি দ্বারা চিত্তস্থির হইলে সমাধি লাভ করিতে পারিবে ।” শ্রীমন্মহাপ্রভু বলিয়াছেন, “চিত্তের বৃত্তিসকলকে অবরুদ্ধ করিয়া রাখিলে যখন কোনও না কোনও কারণে তাহারা উন্মুক্ত হইবে, তখন কি কুপথে গমন করবে না ? একটা পাগলকে যদি কেহ গৃহের মধ্যে আবদ্ধ করিয়া রাখে, সময়ে সে যদি কোন কারণে মুক্তি পায়, তবে কি সে পূর্ববৎ পাগলামি করিবে না ? অবশ্যই করিবে । অতএব এত কষ্ট স্বীকারপূর্বক চিত্তবৃত্তি আবদ্ধ না করিয়া অনায়াসে যাহাতে তাহার বৃত্তিপরিবর্তন হইতে পারে, তাহা করাই শ্রেষ্ঠ উপায় । কাম ক্রুদ্ধকর্ম্মার্গে, ক্রোধ ভক্তদেবী জনে, লোভ সাধুসঙ্গে হরিকথা ইত্যাদি রূপে যদি ইন্দ্রিয়সকলের গতিপরিবর্তন করা যায়, তবে আর বিপদের আশঙ্কা কোথায় ? আসন প্রাণায়ামাদি দ্বারা নাড়ীর সরলতা বিধান পূর্বক ধ্যানধারণাযোগে চিত্ত স্থির হইলে তবে সমাধি লাভ হইবে । এত কষ্ট করিবার প্রয়োজন কি ? চতুর্দশের নামকীৰ্ত্তন, উদ্ভট নৃত্য, দণ্ডবন্ধন নমার, পরিক্রমা প্রভৃতি দ্বারা

দেহের জড়তা ও নাড়ীর বক্রতা বিনষ্ট হইয়া অতি সহজে আপনা আপনিই সমাধি লাভ হইবে ॥ যোগ শব্দের দ্বিতীয় অর্থ—যোজনা করা । যথা,—কর্মযোগ, জ্ঞানযোগ, ভক্তিযোগ প্রভৃতি । কর্মণা ভগবতা সহ যোগঃ কর্মযোগঃ । এইরূপ জ্ঞানেন ভক্ত্যা বা ভগবতা সহ যোগঃ । তবেই বুঝা গেল, যোগ একটা পথ নহে ; জ্ঞান, কর্ম-বা ভক্তি প্রভৃতি দ্বারা ভগবানের সহিত চিন্তাবৃত্তির যোগই যোগ নামে অভিহিত হয় । তাই শ্রীমদ্বহা প্রভু বলিয়াছেন, “জ্ঞান কর্মাদি অপেক্ষা ভক্তিদ্বারা পূর্ণপূর্ণতম শ্রীভগবানের সহিত অতি সহজেই যোগ হইয়া থাকে । তাই ভক্তিযোগই সর্বাপেক্ষা শ্রেষ্ঠ বলিয়া নির্দেশ করিয়াছেন । সেই ভক্তি আবার বৈধি ও রাগভেদে দ্বিবিধ । বৈধি ভক্তি চৌষটি অঙ্গে নয় প্রকারে বিভক্ত । রাগভক্তির ক্রম নির্দেশ করা যায় না ; কারণ রাগমার্গাবলম্বী ভক্তের প্রাণ যে কোন পথে যাইবে, কে বলিবে ? তাঁহারা বেদবিধির পারে চলিয়া গিয়াছেন । তবে পূর্বাচরিত ভক্তগণের মুখ্য মুখ্য পন্থা কিঞ্চিৎ শাস্ত্রে উল্লেখ করিয়াছেন । এই রাগাত্মিক ভক্তিরই নামান্তর সখ্যভক্তি । ইহার মুখ্য সাধন শাস্ত, দাস্ত, সখ্য, বাৎসল্য ও মধুর ভেদে পাঁচ প্রকার । তন্মধ্যে ব্রজে দাস্ত, সখ্য, বাৎসল্য ও মধুর এই চারিটি ভাবই দৃষ্ট হইয়া থাকে । আমার প্রভু, আমার সখা, আমার পুত্র, আমার কান্ত এইভাবে উপাসনা করিলে অতি সহজেই শ্রীকৃষ্ণচন্দ্র বাধ্য হইয়া থাকেন । এই চারিভাবই শ্রেষ্ঠ, তবে তটস্থ হইয়া বিচার করিলে উক্তরোক্তর শ্রেষ্ঠতা হেতু গোষ্ঠামীগণ মধুরভাবকেই সর্বশ্রেষ্ঠ বলিয়া নির্দেশ করিয়াছেন । এসব কথা বলিতে গেলে ফুরায় না । এই মধুর ভাবের অনেক বিভাগ ; অনেক আবরণ ভেদ করতঃ সম্পূর্ণ নিকামভাবে ঐশ্বর্য্যগন্ধহীন হইয় উপাসনা করিলে ব্রজেন্দ্র নন্দন কৃষ্ণ প্রাপ্তি হইবে । সেও আবার সোপীগণের আত্মগতা না হইলে পাইবার উপায় নাই ।

স্বামীজী । এ ত সাধনে ব্রজপ্রাপ্তি হইল বুঝিলাম ; কিন্তু জীবের মুক্তির উপায় কি ? সেবাই করুক আর পরিচর্য্যাই করুক, সেও ত একটা কর্ম্ম বটে !

বাবাজী । ভগবৎ-উদ্দেশ্যে কৃত কর্ম্ম কর্ম্মের মধ্যে গণনীয় নহে ; সুতরাং সেই কর্ম্ম জীবের বন্ধনের কারণ হইতে পারে না ।

স্বামীজী । কর্ম্মের মধ্যে গণনীয় হউক বা নাই হউক কর্ম্ম ত বটে ! জীবের মুক্তিই একমাত্র বাঞ্ছনীয় । কর্ম্ম থাকিতে মুক্তি হইবে কিরূপে ?

বাবাজী মহাশয় হাসিতে হাসিতে বলিলেন, “ভগবৎ-সেবাপরায়ণ ব্যক্তি মুক্তির বাঞ্ছা করা ত দূরের কথা, বরং তুচ্ছ জ্ঞানে পরিত্যাগ করিয়া থাকেন । ভগবান্ নিজমুখে বলিয়াছেন :—

সালোক্য-সাষ্টি-সামীপ্য-সামুজ্জৈকত্বমপ্যুত ।

দীয়মানং ন গৃহ্ণন্তি বিনা মৎসেবনং জনাঃ ॥

সেবানিষ্ঠ ব্যক্তি সেবা ভিন্ন অপর কোন বস্তুই প্রার্থনা করেন না ; এমন কি ধ্যানাদিকে পর্য্যন্ত হেয়জ্ঞান করিয়া থাকেন । বিশেষতঃ ব্রজভাবের উপাসকগণের ত কথাই নাই । এ বিষয়ে শ্রীমদ্রহস্যপ্রভুর শ্রীমুখের বাক্যই প্রমাণ । তিনি রাধাভাবাবেশে বলিয়াছেন ;—

পূর্ব্বে উদ্ধবদ্বারে, এবে সাক্ষাৎ আমারে,

যোগ জ্ঞানের কহিলে উপায় ।

তুমি বিদগ্ধ কৃপাময়, জান আমার হৃদয়,

মোরে ঐছে করিতে না যুয়ায় ॥

চিন্ত কাচি তোমা হৈতে, বিষয়ে চাহি লাগাইতে,

ষড়্ধ করি নারি কাচিবারে ।

তারে জ্ঞান শিক্ষা কর, লোক হাসাইয়া মার,

স্থানাস্থান না কর বিচারে ॥

প্যারীবাবুর বাড়িতে

ক্রমে যতই দিনের পর দিন যাইতে লাগিল, ততই কচকবাসিন্ধু বাবাজী মহাশয়ের প্রতি আকৃষ্ট হইতে লাগিল। একদিন প্যারীবাবু আসিয়া বাবাজী মহাশয়কে বলিলেন, “বাবা ! তুই ত সর্বত্রই আনন্দ করিয়া বেড়াইতেছিস্। একদিন গোবিন্দের বাড়ী যাবি না ?” পূর্বেই বলা হইয়াছে যে, সজ্জীক প্যারীবাবু বাৎসল্যরসের উপাসক এবং সগুণ বাবাজী মহাশয়ের প্রতি ইহাদের সম্বন্ধবাৎসল্য।

বাবাজী। কেন বাবা ! গোবিন্দ ত আমাদের, আমরাও তোমাদের। আদেশ করিলেই হইল।

প্যারী। বেশ ! আজই হউক।

বাবাজী। তাহাই হইবে। আমার আর আপত্তি কি ?

প্যারী। কত লোক হইবে বাবা ?

বাবাজী। সে জ্ঞান কোনই চিন্তা করিতে হইবে না। আপনি বাহা যোগাড় করিয়া গোবিন্দকে ভোগ দিবেন, তাহাতেই নিজইচান্দ পূরণ করিয়া দিবেন। সম্ভব চল্লিশ পঞ্চাশ জন হইতে পারে।

শুনিয়া প্যারীবাবু ছুট্‌চিঙে বাড়ী চলিয়া গেলেন এবং বাবাজী মহাশয়ের কথাবুলসারে পঞ্চাশ ঘাট জনের উপযোগী জব্যাদি যোগাড় করিলেন। দুইজন ব্রাহ্মণ পুজারী রপ্তাই করিতে লাগিলেন। বেলা অবসানপ্রায়, এই সময় বাবাজী মহাশয় সংকীৰ্ত্তন করিতে করিতে বালুবাজার, চৌধুরী বাজার, বকুলী বাজার, চাঁদনি চক, সাহেবজাদা বাজার প্রভৃতি ঘুরিয়া অবশেষে মণিকোষ বাজারে গমন করিলেন।

প্যারীবাবুর বাড়ী মাণিকঘোষ বাজারের মধ্যে । যখন সংকীৰ্ত্তনের দল প্যারীবাবুর বাড়ীর সম্মুখে, তখন লোক সংখ্যা প্রায় আড়াই শতের কম নহে । বাবাজী মহাশয় দরজার একপাশে দাঁড়াইয়া সকলকে বাড়ীর মধ্যে প্রবেশ করাইয়া দিতে লাগিলেন । সকলে প্রবেশ করার পর নিজে ঢুলিতে ঢুলিতে বাড়ীর মধ্যে প্রবেশ করিলেন এবং গোবিন্দ জিউকে দণ্ডবৎ প্রণাম পূৰ্ব্বক যে স্থানে রান্না হইতেছিল, 'সেই স্থানে গিয়া দেখেন যে, প্যারীবাবু ও তাঁহার স্ত্রী অতিরিক্ত লোকসংঘট্ট দেখিয়া বড়ই ভাবিত হইয়াছেন । তখন মাকে (প্যারীবাবুর স্ত্রীকে) প্রণাম করিয়া বলিলেন, "মা ! তুমি নিরুদ্ধেগে নামকীৰ্ত্তন শ্রবণ কর । লোক জন খাওয়াইবার জন্ত কোন চিন্তানাই ; নিতাইচাঁদ সকল অভাব পূরণ করিবেন । ক্ষুধার্ত্ত কেহই ফিরিয়া না গেলেই ত হইল ।" স্নেহময়ী মা ইহার মাথায় হাত দিয়া বলিলেন, "বাবা ! সমস্তই ত তোমাদের ; যদি কেহ বিমুখ হয়, সেও ত তোমাদেরই অপঘণ ! আমার কি বাবা ?" বাবাজী মহাশয় হাসিতে হাসিতে বলিলেন, "আচ্ছা, তাই হউক । নিতাইচাঁদের প্রসাদে কেহই বঞ্চিত হইবে না । চল, সকলে কীৰ্ত্তন শুনিবে ।" বলিয়া নিজে নাচিতে নাচিতে কীৰ্ত্তনের মধ্যে প্রবেশ পূৰ্ব্বক নাম করিতে লাগিলেন । রাত্র প্রায় দেড় প্রহর অতীত হইয়া গেল । কাহারই সংজ্ঞা নাই—আবালবুদ্ধযুব সকলেই নামে মাতোয়ারা । কাহারই বাহ্যভূসন্ধান নাই । ধাঁহারা বসিয়া আছেন, তাঁহারাও একাগ্রমনে একদৃষ্টে বাবাজী মহাশয়ের মুখের দিকে চাহিয়া আছেন । আবার ধাঁহারা ইহার সঙ্গে সঙ্গে কীৰ্ত্তন করিতেছেন, তাঁহারাও একপ্রাণে একতানে ইহার সুরে সুর মিশাইয়া তালে তালে নৃত্য করিতেছেন । প্যারীবাবুর তিনটা পুত্র কীৰ্ত্তনে নৃত্য করিতেছে ; নিজেও সেই নামানন্দে বিভোর ।

এইরূপে বহুক্ষণ সংকীর্ণনের পর নাম সমাপ্তি করিলেন । বাড়ীতে স্থান অতি সংকীর্ণ । বসিবার অল্পবিধা হইবে বলিয়া বাবাজী মহাশয় নিজে সকলকে বসাইয়া দিতে লাগিলেন । সকলেই নির্বিকারে একত্রে বসিয়া যাইতে লাগিল । পংক্তি বা জাতির বিচার যেন ভয়ে সে স্থান হইতে দূরে পলায়ন করিল । পরিবেশনের ভার ললিতাদাসী ও কুসুমদাসীর উপর । ইনি নিজে একবার ভোগের ঘরে গমনপূর্বক প্রসাদ দেখিয়া ললিতাদাসীকে বলিলেন, “পরমানন্দে প্রাণখুলিয়া পরিবেশন কর, নিতাইচাঁদ আছেন ।” ললিতাদাসী বলিল, “আপনি মহাপ্রসাদ পাইতে বসুন, কোন চিন্তা নাই !” তখন বাবাজী মহাশয় করেকটা ব্রাহ্মণকে লইয়া মধ্যস্থানে পঙ্কতে বসিলেন । পঙ্কত আরম্ভ হইল—আনন্দের অবধি নাই । স্থানাভাবে সকলে একসঙ্গে বসিতে পারেন নাই । ইহার সঙ্গী রাধাবিনোদ, কিশোরীগোপাল অদ্বৈতদাস প্রভৃতি কয়েক মুষ্টি এক এক কোণে এক এক জন দাঁড়াইয়া নিতাই-গৌর এবং রাধাগোবিন্দের গুণানুকীৰ্ত্তন করিতেছেন । বাবাজী মহাশয় প্রেমানন্দে বিভোর হইয়া অর্দ্ধমুদ্রিতনেত্রে ঢুলিতেছেন । ভোগের ঘর হইতে যতই মহাপ্রসাদ বাহির হইতেছে, ততই যেন নিতাইচাঁদ যোগাইতেছেন । নিতাইচাঁদের ভাণ্ডার পূর্ণ রহিয়াছে । এইরূপ পরমানন্দে সে পঙ্কত উঠিতে না উঠিতেই অপর একদল সেই পাতায় বসিয়া গেল । তাঁহাদের পঙ্কত শেষ হইলে প্রায় ত্রিশ চল্লিশ জন জ্বীলোক সেই পাতায় প্রসাদ পাইবার পর প্যারীবাবুর জ্বী ভোগের ঘরে বাইয়া দেখিলেন, তখনও প্রায় সাত আট জনের উপযুক্ত প্রসাদ রহিয়াছে । ভক্তির মুষ্টি প্যারীবাবুর জ্বী একেবারে বাগিকার হায় কাঁদিয়া ফেলিলেন । ইহার অলৌকিকী শক্তি দর্শনে সকলেই বিস্মিত । পঞ্চাশ ষাট জনের উপযুক্ত মহাপ্রসাদ প্রায় তিনশত লোকে পরিপূর্ণভাবে পাইল । যাহারা রান্না করিয়াছে, তাহারা আশ্চর্য্যাশ্বিত

হইয়া পরিবেশনকারিণী ললিতাদাসীকে জিজ্ঞাসা করিল, “কিরাপে এত লোকের পূরণ হইল ?” তিনি বলিলেন, “আমি কি জানি ? প্রয়োজন মত ডাল ভরকারী মহাপ্রসাদ লইয়া পরিবেশন করিতে যাই, এই পর্য্যন্ত জানি । তৎপর কোথা হইতে যে আসিল বা কিরাপে সকলের পূরণ হইল, তাহা একমাত্র গুরুদেব জানেন । আমার তখন এসব ভাবিবার অবকাশ থাকেনা ।” এইরূপ কথোপকথন হইতে লাগিল । এদিকে রাত্রি অধিক হওয়ার আর বিলম্ব না করিয়া ইঁহার নাম করিতে করিতে বাসায় রওনা হইলেন । বাবুভায়াগণ বাবাজী মহাশয়ের নিকট বিদায় গ্রহণ পূর্বক স্ব স্ব স্থানে গমন করিলেন । ইঁহারাও বাসায় আসিয়া বিশ্রাম করিলেন । উড়িষ্ঠাত্রমণকালে প্রায় প্রত্যহই বাবাজী মহাশয়ের এইরূপ ঐশ্বর্য্য বিকাশ দেখা যাইত ।

শাক্ত ও বৈষ্ণবের তত্ত্বমীমাংসা ।

একদিন প্রাতঃকালে জনৈক ভক্ত আসিয়া সগণে বাবাজী মহাশয়কে নিমন্ত্রণ করিবার প্রার্থনা করিলে বাবাজী মহাশয় স্বীকৃত হইলেন । ভক্তটী জিজ্ঞাসা করিলেন, “আজ্ঞে সঙ্গে অনুমান কত লোক হইবে ?” বাবাজী মহাশয় একটু মুঢ় হাসিয়া বলিলেন, “তোমার কতজন বলিবার ইচ্ছা ?”

ভক্ত । আজ্ঞে আমার কোনই ইচ্ছা নাই । আপনার যাহা ইচ্ছা, তাহাই হইবে ।

বাবাজী । আমি আর কি বলিব ? কীর্ত্তনের সঙ্গে যদি দশজন অধিক যায়, তাহা হইলে তোমার পরম সৌভাগ্য মনে করিতে হইবে ।

ভক্ত । আজ্ঞে তাহাতে আমার কোনই আপত্তি নাই । তবে পূর্ব হইতে না জানিলে কিরূপভাবে যোগাড় করিব ?

বাবাজী । আচ্ছা, তবে শতাবধি লোকের পরিমাণে আয়োজন কর । দুইচারি জন কমও হইতে পারে বেশীও হইতে পারে ।

তখন ভক্তটী দৃষ্টচক্ষে বাড়ী চলিয়া গেল । বাবাজী মহাশয়ের নিমন্ত্রণে যাওয়ার নিয়ম রাত্রি ; কারণ দিবসে নিমন্ত্রণ হইলে সকলে সমানভাবে যোগদান করিতে পারে না ; অথচ কীর্ত্তন শুনিবার জ্ঞাত বহু লোকের প্রাণে উৎকণ্ঠা থাকে ; কাজেই দিবসে বাসায় ঠাকুরের ভোগ হয় ; রাত্রি নিমন্ত্রণে যাওয়া হয় । সে দিনও তাহাই হইল । অপরাহ্ন সময় ইহাদিগকে লইয়া যাইবার জ্ঞাত ভক্তটী আসিয়া উপস্থিত হইলে বাবাজী মহাশয় সঙ্গিগণসহ নাম ধরিয়া বাহির হইলেন । ক্রমে বালুবাজারের রাস্তা ধরিয়া কটক সহর পরিভ্রমণপূর্বক ভক্তটীর বাড়ীতে উপস্থিত হইলেন ।

ভক্তটী জাতিতে ময়রা, যথেষ্ট অর্থশালী । প্রবাদ যে লোকটী একটু ব্যয়কুণ্ঠিত ; কিন্তু আজ তাঁহার হৃদয় খুলিয়া গিয়াছে । বাবাজী মহাশয় একশত লোকের কথা বলিয়াছিলেন ; কিন্তু তিনি প্রায় দুইশত লোকের পরিমাণে আয়োজন করিয়াছেন । কীর্ত্তনের সঙ্গে লোকসংখ্যা অতিরিক্ত দেখিয়া চিন্তিত না হইয়া বরং আনন্দিতই হইলেন । বহুক্ষণ কীর্ত্তনের পর বাবাজী মহাশয় নাম সমাপ্তি করিয়া যেমন উপবেশন করিলেন, অমনি দুর্গাপ্রসাদ দত্ত এবং বলরাম মহাপাত্র নামক দুইটা যুবক আসিয়া ইঁহার সন্মুখে বসিল । ইহাদের মধ্যে আজ তিন দিন হইতে বাদবিসম্বাদ চলিতেছে । এ বিবাদ, বিষয় বা ধন জন লইয়া নহে ; এ বিবাদ উজ্জয়ের ইষ্টদেব লইয়া । দুর্গাপ্রসাদ জাতিতে গন্ধবণিক, বৈষ্ণব সম্প্রদায়ভুক্ত, কৃষ্ণমন্ত্রে দীক্ষিত । উহার মত—কৃষ্ণভজনই সর্বশ্রেষ্ঠ—শ্রীকৃষ্ণই একমাত্র

ঈশ্বর ; অপরাধ দেবদেবীগণ তাঁহার অংশকলা বিশেষ । বলরাম মহাপাত্র
 দুর্গাপ্রসাদ অপেক্ষা কিঞ্চিৎ বয়োজ্যেষ্ঠ । তিনি বলেন, শক্তি-উপাসনাই
 সর্বপ্রধান । জগতে যাবতীয় কার্য্য একমাত্র শক্তির খেলা । শক্তি ভিন্ন
 সৃষ্টিকার্য্যই হইতে পারে না । কৃষ্ণও শক্তির উপাসনা করিয়া থাকেন ।
 আত্মাশক্তি ভগবতীকে না ভজিলে মনুষ্যজীবন বৃথা । ইত্যাদি ভাবে
 উভয়ের নিজ নিজ ইষ্টপক্ষ সমর্থন জ্ঞা তিন দিনকাল সমানভাবে উহাদের
 বাদপ্রতিবাদ চলিতেছে । কেহ কাহাকে পরাস্ত করিতে না পারিয়া
 আজ উভয়ে বড় বাবাজী মহাশয়কে মধ্যস্থপদে বরণপূর্ব্বক উপস্থিত
 হইয়াছেন ; কিন্তু কেহই বলিতে সাহস পাইতেছেন না । বাবাজী
 মহাশয় একটু মুহূর্ত্ত হাসিয়া বলিলেন, “তোমাদের দুই জনের মুখ দেখিয়া
 বোধ হইতেছে, তোমরা কিছু বলিতে আসিয়াছ । কি সন্দেহ, বল ।
 আমি নিজে না জানিলেও অপরের নিকট জানিয়া তোমাদের সন্দেহ
 ভঞ্জন করিব ।” তখন সাহস পাইয়া উভয়েই বলিয়া উঠিল, “আজ্ঞে
 শক্তির উপাসনা শ্রেষ্ঠ, কি কৃষ্ণের উপাসনা শ্রেষ্ঠ ?”

বাবাজী । তোমরা কোনটাকে বড় মনে কর, আগে বেশ প্রাণ
 খুলিয়া বল, তার পর আমি বলিব ।

দুর্গাপ্রসাদ । আজ্ঞে শ্রীকৃষ্ণই বড় ; কারণ ভাগবত বলিয়াছেন,—

এতে চাংশকলাঃ পুংসঃ কৃষ্ণস্ত ভগবান্ স্বয়ম্ ।

ইন্দ্রারিব্যাকুলং লোকং মুড়য়ন্তি যুগে যুগে ॥

শ্রীচৈতন্যচরিতামৃত বলিয়াছেন,—“যুগ প্রবর্ত্তন হয় অংশকলা হইতে ।
 আমা বিহু কেহ না রে ব্রজ প্রেম দিতে ॥” যখন আমাদের প্রেমেরই
 প্রয়োজন, তখন শ্রীকৃষ্ণকে না ভজিলে কিরূপে চলিবে ? আরও
 বলিয়াছেন,—“শ্রেয়সি তত্র খলু সঙ্কজনোন্নির্গাং স্ত্যঃ ।” এত গেল
 শাস্ত্রের কথা । স্বভাবতঃ ব্যবহারিক জগৎ দেখিতে গেলেও ত শাস্ত্রদের

আচরণ কত যুগিত দেখুন । মন্ত্রমাংসাদি লইয়া কি কখনও ভগবদ্‌পাসনা হয় ? ও সব ত আত্মরিক ব্যাপার । কালী দুর্গার যত কিছু লীলাখেলা, তাহার মধ্যে মারামারি কাটাকাটি ভিন্ন কোনটী আছে ? আপনি বলুন দেখি, ষাঁহাকে ভজন করিব, তিনি যদি খড়্গা, ত্রিশূল, মুষল, মুদগরধারী হইলেন, তবে ঠাঁহাকে ভজিয়া স্বত্বগুণ কোথা হইতে আসিবে ?

“অকামঃ সর্বকামো বা মোক্ষকাম উদারধীঃ ।

তীব্রেন ভক্তিযোগেন যজ্ঞেত পুরুষঃ পরম্ ॥”

কালী, দুর্গা প্রভৃতি সকাম দেবতা ভজিয়া কখনই পরমার্থলাভ হইতে পারে না । শাক্তের সহিত বৈষ্ণবের তুলনাই অসম্ভব ।

বাবাজী । আচ্ছা, এ ত একপক্ষের কথা শুনিলাম । তুমি কি বল বাবা ?

মহাপাত্র । আমি প্রথমে কয়েকটা কথা জিজ্ঞাসা করিতে ইচ্ছা করি । আচ্ছা, শক্তি না থাকিলে কোনও কার্য্য হইতে পারে কি ? দৃষ্টাদৃষ্ট (স্থলস্থ) জগৎ শক্তি হইতে উৎপন্ন । শক্তির অভাবে শক্তিমান্ কোন কার্য্যই করিতে পারেন না । যদি শক্তি ব্যতীত শক্তিমান্ কোনও কার্য্য করিতে না পারিলেন, তবে শক্তি বড় হইলেন না কি ? ব্রজগোপীগণ শক্তির আরাধনা করিয়া কৃষ্ণপ্রাপ্ত হইয়াছিলেন । শ্রীকৃষ্ণ বনে গিয়া ভগবতীকে মাতৃসম্বোধন করিয়াছেন । মাও কৃষ্ণকে কোলে লইয়া দশহস্তে নবনী খাওয়াইয়াছেন । ইহাতে আমরা কি বুঝিলাম ? দেবতাদিগের রক্ষার্থ মায়ের নিকট প্রার্থনা করায় মা অস্ত্রদিগকে বিনাশ করিবার নিমিত্ত অস্ত্রধারণ করিয়াছিলেন । মা ভক্তবাঞ্ছাকল্পতরু । ঠাঁহার নিকট ভক্ত ষাহা প্রার্থনা করিবেন, তিনি কি তাহা পূর্ণ করিবেন না ? রামচন্দ্র, কৃষ্ণচন্দ্র প্রভৃতি কখনও অস্ত্রধারণ করেন নাই কি ? অস্ত্রের যখন শক্তি না হইলে কোন কার্য্যই সাধিত হইতে পারে না,

তখন শক্তিই যে সর্বশ্রেষ্ঠ এ কথাই সন্দেহ থাকিতে পারে না ।

বাবাজী । আচ্ছা, তোমাদের মতামত শুনিলাম । এখন দুইজনেই হৃদয়ের ধ্বংসাব পরিভাগপূর্বক আমার কথা শুন । হিংসাধ্বষপূর্ণ হৃদয়ে বিস্তৃত বস্তু ধারণা হইতে পারে না । আমার মতে তোমাদের দুইজনের ধারণাই ভুল । শক্তি এবং শক্তিমানের গুরুত্ব লঘুত্ব লইয়া বিচার সম্ভবে না ; কারণ “শক্তিশক্তিমতোরভেদঃ ।” প্রাকৃত রাজ্যের কথা ভাবিয়া দেখ,—অগ্নি এবং দাহিকা শক্তি, ইহাদের লঘুত্ব বা গুরুত্ব, অথবা দুইয়ের পৃথকত্ব কেহ নির্ধারণ করিতে পারেন কি ? “সর্বদেব পূজিবে না হবে তৎপর । সবার নিকট মেগে লবে ইষ্ট ভক্তি বর ॥ গীতায় বলিয়াছেন :—

যদা যদা হি ধর্মস্ত গ্লানির্ভবতি ভারত ।

অভ্যুত্থানমধর্মস্ত তদাত্মানং সৃজাম্যহম্ ॥

পরিব্রাণায় সাধুনাং বিনাশায় চ গুরুতাম্ ।

ধর্মসংস্থাপনার্থায় সম্ভবামি যুগে যুগে ॥

অতএব—সাধকানাং হিতার্থায় ব্রহ্মণো রূপকল্পনা । পুরাণান্তরে—
দেবানাং কার্যাসিদ্ধার্থমাবির্ভবতি চাশ্বিকা । ইত্যাদি যাবতীয় শাস্ত্রবাক্য শক্তি এবং শক্তিমানের অভেদ ভিন্ন ভেদ কল্পনা করেন নাই । তুমি ত্রীমস্তাগবতের প্রমাণ দেখাইলে —“এতে চাংশকলাঃ পুংসঃ কৃষ্ণস্ত ভগবান্ স্বয়ম্ ।” বেশ ! কৃষ্ণ অংশী, অপর সমস্ত ঠাঁর অংশকলা বিশেষ । ইহাতে কি বুঝিলাম ? অংশী এবং অংশ বা অবতারী এবং অবতারে পার্থক্য সম্ভবে কি ? এক একটা কার্যাসিদ্ধির জন্য দেশ, কাল, পাত্রাভূষায়ী ভগবানের এক একটা রূপ ধারণ করা ভিন্ন আর কিছুই নহে । ভগবানের কোন অবতারের ক্রিয়াকলাপ বা লীলাখেলা লইয়া সমালোচনা করা সম্পূর্ণ সাধনাবিরুদ্ধ । আমাদের প্রাকৃত চক্ষু এবং সংকীর্ণ বুদ্ধি লইয়া

আমরা যে কোন লীলা দেখিতে যাইব, তাহাতেই দোষের সংশ্রব, প্রতারণা, নির্ভরতা এবং স্বার্থপরতা দেখিতে পাইব । যদি ভগবৎস্বরূপেই দোষের সংশ্রব রহিল, তবে জীবের আর উপায় কি ? শ্রুতি, স্মৃতি, পুরাণ, তন্ত্র, ইতিহাসাদিতে ঋষিদিগের যে মতবৈধতা দেখা যায়, সে কেবল উপাসকের রুচি বা অধিকার বিভেদের জ্ঞান বই আর কিছুই নহে ।

ঐশ্বী সাংখ্যঃ যোগঃ পশুপতিমতঃ বৈষ্ণবমিতি

প্রভিন্নে প্রস্থানে পরমিদমদঃ পথ্যমিতি চ ।

রুচীনাং বৈচিত্র্যাদ্ ঋজুকুটিলানানাপথজুষ্ণাং ॥

নৃণামেকো গম্যন্তুমসি পয়সামর্ণব ইব ॥

আমাদের নিজ নিজ প্রবৃত্তি অনুসারে উপাসনা এবং আচারগত এতই পার্থক্য হইয়া পড়িয়াছে যে, ঐ পার্থক্য উপাসকদিগকে অতিক্রম করিয়া উপাস্তদিগের উপর পর্য্যন্ত বর্তিয়াছে ; নিক্কার, নিক্কার, বিগুণ বৈষ্ণবধর্মের মধ্যে কল্পিত উপধর্মভাব অত্যন্ত বিস্তার লাভ করিয়াছে । ষ্ঠ স্ব ইন্দ্রিয়বৃত্তি চরিতার্থমূলক ঐ উপধর্মের প্রভাবে মহাপ্রভুর বিগুণ পথে লোক কতই না কলঙ্ক আরোপ করিতেছে ! এমন কি শিক্ষিত ভদ্রসমাজে বৈষ্ণবধর্মের প্রতি এতই অশ্রদ্ধা আসিয়াছে যে, ঐ অশ্রদ্ধা ধর্মবাজকদিগকে অতিক্রম করিয়া ভগবানকে পর্য্যন্ত স্পর্শ করিয়াছে । এইরূপ শাক্তদিগের মধ্যেও হইয়াছে । তন্মাদিতে শক্তির উপাসনাপ্রণালী ঘেরূপ পাওয়া যায়, তাহাতে দেশ-কাল পাত্র অনুসারে আচার নির্দেশ করিয়া দিয়াছেন । ঐ সমস্ত অনুসন্ধান না করিয়া নিজ নিজ প্রবৃত্তির বলে যথেষ্টাচার প্রয়োগ বশতঃ লোকের দৃষ্টিতে নানারূপ বিরুদ্ধভাব প্রকাশ পাইয়া ঐ আচারভ্রষ্টতা উপাসকদিগকে অতিক্রম করতঃ উপাস্তগণের উপর পর্য্যন্ত গুণ হইতেছে । তাই পঞ্চদেবতার উপাসকগণ প্রায়ই পরস্পর পরস্পরের প্রতি ঘৃণা হিংসা করিয়া থাকেন । তন্ত্রে

দিব্যাচার, বীরাচার এবং পশ্চাচার এই ত্রিবিধ আচার নির্দেশ করিয়াছেন । দিব্যাচার দেবতাগণের পক্ষে এবং বীরাচার ও পশ্চাচার মনুষ্যগণের পক্ষে বিহিত হইয়াছে । ক্ষত্রিয়ধর্মাবলম্বী রাজস প্রকৃতির লোকসকল বীরাচারমতে এবং সাধ্বিকভাবাপন্ন ব্যক্তিগণ পশ্চাচারমতে শক্তির উপাসনা করিয়া থাকেন । এমন কি তন্ত্রাদিতে অনেকস্থানে কলিতে একমাত্র পশ্চাচারেই মায়ের উপাসনার বিধান করিয়াছেন । (পশ্চাচার অর্থাৎ সাধ্বিক আচার, ইহাতে মনুষ্যসাদির সংশ্রব নাই । অনেকে পশ্চাচারমতে উপাসনা করিতে গিয়া হয়ত তন্ত্রোক্ত বীরাচারের চুই একটা শ্লোক অভ্যাস করতঃ নিজ নিজ প্রবৃত্তি চরিতার্থ করিবার মানসে পশুহিংসা বা মৃগাদি ব্যবহার করিয়া থাকেন । ইহাকেই কি মায়ের উপাসনা প্রণালী বলিতে হইবে ? এই সমস্ত লইয়াই শাস্ত্র বৈষ্ণবের মতবৈধতা ! শাস্ত্রের প্রকৃত মর্ম্ম অবগত না হইয়া বাহিরের ব্যবহার লইয়া বিবাদ করা সম্পূর্ণ ভুল । আমি ত অনেক অনেক অনুসন্ধান করিয়াও শাস্ত্র এবং বৈষ্ণবের কোনও পার্থক্য অবগত হইতে পারিলাম না ; কারণ বৈষ্ণবধর্ম্মাবলম্বীগণের প্রধান অবলম্বনই যোগমায়া পৌর্ণমাসী দেবী । যোগমায়ার রূপা না হইলে লীলায় প্রবেশের অধিকারই হইতে পারে না । ব্রজগোপীগণ কাতায়নীরত করিয়া শ্রীকৃষ্ণকে প্রাপ্ত হইয়াছিলেন । কল্লিণী দেবী অম্বিকার সেবা করিয়া কৃষ্ণলাভ করিয়াছিলেন । মা যশোমতী হরগৌরীর আরাধনা করিয়া কৃষ্ণকে লাভ করিয়াছিলেন । শচীমা পোড়ামাতা নামক নবদ্বীপাধিপাত্রী দেবী এবং পুণ্যসলিলা মা গঙ্গার উপাসনা করিয়া গৌরান্ধলাভ করিয়াছিলেন । প্রধান পদকর্ত্তা চণ্ডীদাস ঠাকুর গ্রাম্য দেবতী বাণ্ডীর আরাধনা করিয়া তাঁহার রূপায় শ্রীশ্রীরাধাগোবিন্দলীলা প্রত্যক্ষ অনুভব করিয়াছিলেন । অতএব যে কোন ভাবের বৈষ্ণব হউক না কেন, শক্তির রূপা ব্যতীত কে

ভগবান্কে প্রাপ্ত হইয়াছেন ? আবার ঠাঁহার শাক্ত বলিয়া অভিমান করেন বা বৈষ্ণবগণ কিছুই নয় ইত্যাদিভাবে অবজ্ঞাপ্রদর্শন বা বাদপ্রতিবাদ করেন, তাঁহার কি শালগ্রাম শীলা সেবা করেন না ? বিষ্ণুর পূজা বা আরাধনা ভিন্ন কোন আরাধনাই সিদ্ধ হইতে পারে না । শাক্ত বলিয়াছেন, “বিষ্ণুপূজাবিহীনা যা সা পূজা নিফলা মতা ।” অল্প “চক্রহীনস্ত যৎ স্থানং তস্ত শৌচবির্জিতং । ন হি দেবগণান্তত্র তিষ্ঠন্তি শঙ্করোহব্রবীৎ ॥” এমন কোন ব্যক্তি আছেন, যিনি অস্তিমকালে হরে কৃষ্ণ গোবিন্দ রাম নারায়ণ ব্রহ্ম প্রভৃতি নাম উচ্চারণ না করেন ? তবে কাহাকে শাক্ত বলিব, আর কাহাকেই বা বৈষ্ণব বলিব ? আমি ত বৃত্তিতে পারিলাম না । এ ত গেল সাধনের কথা । আবার ভগবৎ-স্বরূপের কথা দেখ, রামচন্দ্র রাবণবধের সময় অষ্টোত্তর শত নীলোৎপল দ্বারা দেবীর আরাধনা করিয়াছিলেন । শ্রীকৃষ্ণচন্দ্র বৃন্দাবনলীলা আন্বাদনের জন্ত যোগমায়া আশ্রয় গ্রহণ করিয়াছিলেন । তাঁহাকে প্রণাম, বন্দনা এবং দেবী দশভুজাকে মাতৃসম্বোধনে নবনীত গ্রহণ প্রভৃতি বহু বহু কার্য্য করিয়াছেন । আবার দেবাদিদেব মহাদেব রামনামে উদ্ভূত হইয়া দিবানিশি শ্মশানে মশানে ভ্রমণ করিয়া থাকেন । মহামায়া ভগবদধরামৃত পাইবার জন্ত বহু তপস্তা করিয়া শ্রীজগন্নাথধামে বিমলারূপে বাস করতঃ মহাপ্রসাদ গ্রহণ করিতেছেন । এইরূপ দেবদেবীগণ পরস্পর পরস্পরকে ভাবনা করিয়া থাকেন । ইহা লইয়া বিবাদ করা সম্পূর্ণ অহুচিত । “নিন্দাশূন্য নম্রভাবে সবারে স্তবন । অভ্যাগত আহুত ব্যক্তির চরণ বন্দন ।” এটা সাধারণ বাক্য । ধর্ম্মযাজক মাত্রেই ইহা পালন করা অবশ্যকর্তব্য । ইহাতে গৃহী, বানপ্রস্থ বা সন্ন্যাসীর ভেদাভেদ নাই । যে কোন ভাবেই হউক, “পরচর্চকের গতি নাহি কোন কালে ।” বিশেষতঃ বৈষ্ণবধর্ম্মাবলম্বিগণের পক্ষে ত একেবারেই

বিরুদ্ধ কারণ—

ব্রাহ্মণ আচণ্ডাল কুকুরাস্ত করি ।
দণ্ডবৎ করিবেক বহুমাণ্ড করি ॥
এই সে বৈষ্ণবধর্ম সবারে প্রণতি ।
সেই ধর্মধরজী যার ইথে নাহি মতি ॥

এই মহাবাক্যটি বৈষ্ণবধর্মের মূলভিত্তি । যখন শাস্ত্র আচণ্ডাল কুকুর পর্যাস্তকে প্রণাম বন্দনাদি করিবার বিধান করিলেন, তখন শিব, দুর্গা, কালী প্রভৃতি দেবদেবীগণ কি তাহা হইতেও তুচ্ছ হইলেন ? যাহারা কিছুই না মানে, তাহারাও বরং ভাল ; কিন্তু একদেশবাসিনী ভক্তি অনর্থের মূল । এ কথা শাস্ত্রেও লিখিয়াছেন :—

কিছুই না মানে হয় সেই ত পাষণ্ড ।
একে মানে আরে না মানে সেই মত ভণ্ড ॥
পাষণ্ডের উদ্ধার হইবে অবহেলে ।
ভণ্ডের নিস্তার নাহিক কোন কালে ॥

তোমাদের এই বিবাদের কথায় আমার একটা গল্প মনে পড়িল—
একগুরুদেব কোম শিষ্যবাড়ী গিয়াছেন । শিষ্যটির পুত্রাদি কিছুই নাই ।
কেবল স্বামী স্ত্রী দুইজন । স্ত্রীটি গুরুদেবের নিকট প্রণম করিলেন,
“গুরুদেব ! শিষ্যের একমাত্র আশ্রয় স্থান বা উদ্ধারের উপায় কি ?”
গুরুদেব বলিলেন, “মা ! শ্রীগুরুপাদপদ্মই শিষ্যের একমাত্র অবলম্বন ।
গুরুপাদপদ্মসেবা ভিন্ন ভবপারে যাইবার আর উপায় নাই । গুরুবাক্যৈক-
নিষ্ঠ শিষ্যপত্নী মনে মনে দৃঢ় নিশ্চয় করিয়া রাখিলেন যে, গুরুপাদপদ্মই
শ্রেষ্ঠ—গুরুপাদপদ্মসেবাই শিষ্যের একমাত্র কর্তব্য । শিষ্যটি মনে
মনে সিদ্ধান্ত করিয়াছেন যে, “গুরুমুখপদ্মবাক্য, চিন্তিতে করিয়া ঐক্য,

আর না করিহ মনে আশ ।” শ্রীগুরুদেবের শ্রীমুখ-নিঃসৃত মন্ত্রাত্মক বর্ণ যদি কর্ণদ্বারে হৃদয়ে প্রবেশ না করিত, তবে কিরূপে হৃদয়ের অঙ্গকার দূর হইত ? অনাদিকাল হইতে ত্রিতাপে তাপিত হৃদয় মরুভূমিসদৃশ কঠিন এবং শুষ্ক ছিল। অবাচিত রূপাকারী পরমদয়াল শ্রীগুরুদেব করুণা করিয়া উপদেশামৃত সিঞ্চে সেই হৃদয় জ্বলন্ত ও স্নিগ্ধ করিয়াছেন। অতএব গুরুদেবের শ্রীমুখই সর্বশ্রেষ্ঠ। একদিন স্বামীজী উভয়ের মনঃকথা প্রকাশ করিতে গিয়া উভয়ের বাদামুবাদ হইতে লাগিল। স্বামী বলেন, গুরুদেবের চরণ শ্রেষ্ঠ ; স্বামী বলেন মুখ শ্রেষ্ঠ। কেহই কাহাকে পরাস্ত করিতে না পারিয়া গুরুদেবকে সংবাদ দিলেন। গুরুদেব আগমন করিবামাত্র শিষ্যপত্নী উহার চরণের যত্ন করিতে আরম্ভ করিলেন। শিষ্য উপদেশামৃত পানে বিভোর। গুরুদেব মহাবিপদগ্রস্ত। শিষ্য শিষ্যপত্নী উভয়ে মুখ এবং চরণ লইয়া ব্যস্ত ; বসিবার আসন বা আহারাদির ব্যবস্থা করে কে ? গুরুদেব দ্বিপ্রহরের সময় আসিয়াছেন। কে তাঁহাকে বাতাস করিয়া স্নান করিবে ? কারণ তাঁহার মস্তিষ্ক বা উদরের সেবক ত আর কেহই নাই। ইহাকেই বলে একদেশবাসিনী ভক্তি। আমার যে যে বস্তুর প্রয়োজন, আমি যাহার নিকট হইতে তাহা প্রাপ্ত হইব, তিনিই আমার সর্বস্ব ; তাঁহার অপর কেহ বাচুক আর মরুক। যেমন স্বামীই জীর একমাত্র সেবা বস্তু—স্বামিসেবাই জীর অবশ্য কর্তব্য। খণ্ডর শান্তী, দেবর বা ভাসুর প্রভৃতির সেবা ত আর শাস্ত্রে উল্লেখ নাই ; তাহাদের সেবাকরার প্রয়োজন কি ? পূর্ণপূর্ণতম শ্রীকৃষ্ণকে যিনি ভজনা করিবেন, শিব দুর্গাত দূরের কথা—চুলতা কীট পতঙ্গকে পর্য্যন্ত যদি তিনি প্রীতি বা ভক্তির চোখে না দেখেন বা পূজা না করেন, তবে তাঁহার কৃষ্ণভজনের অঙ্গহানি হইবে। আর একটি কথা জিজ্ঞাসা করি—যাহারা বিষ্ণুর আরাধনা করেন, তাঁহারা বৈষ্ণব এবং যাহারা

শক্তির উপাসনা করেন তাঁহারা শাক্ত । বেশ কথা ! যাহারা শ্রীসম্প্রদায়ী বৈষ্ণব, তাঁহাদিগকে শাক্ত বলিবে না বৈষ্ণব বলিবে ? তাঁহারাও ত শক্তির উপাসনা করিয়া থাকেন । মাধুর্য্যভাবে ব্রজউপাসকগণ শ্রীমতী রাধারাগীর আরাধনা করিয়া থাকেন, তাঁহারাও শাক্ত ! যদি বল বিষ্ণুশক্তিকে ভজিলেই বৈষ্ণব বলিব, অপর শক্তিকে ভজিলে শাক্ত বলিব ; বেশ কথা ! মার্কণ্ডেয় পুরাণান্তর্গত চণ্ডীর নারায়ণী মাহাত্ম্য দেখ,—

সর্বমঙ্গলমঙ্গল্যে শিবৈ সর্বার্থসাধিকে ।

শরণ্যে ত্র্যম্বকে গৌরি নারায়ণি নমোহস্তু তে ॥

ইত্যাদি শত শত স্থানে ভগবতীকে নারায়ণী বলিয়াছেন । তাই বলি, এ বিভেদ উপাস্তগত নহে—এ বিভেদ আচারগত । সাংখ্যিক ভাবে যিনি যাহাকেই ভজন করুন না কেন, তিনিই বৈষ্ণব ; কারণ বিষ্ণুর একটা নাম সত্ত্ব । যে স্থানে সাংখ্যিকভাব থাকিবে, সে স্থানে অপর কাহারও অধিকার থাকিতে পারে না । অতএব বলি, ধর্ম্ম লইয়া বিবাদ বিসম্বাদ পরিত্যাগ পূর্ব্বক যাহার যেরূপ রুচি, তদনুসারে ভগবৎপথে অগ্রসর হও । যে সময়ে যেটুকু দরকার, প্রভু আপনি মিলাইয়া দিবেন । শঙ্করশঙ্করী পরম বৈষ্ণব-বৈষ্ণবী—জগন্তের পিতামাতা । সমস্ত জগৎ প্রকৃতি ; সচ্চিদানন্দ গোবিন্দই একমাত্র পুরুষ । উপযুক্ত পাত্রের সহিত সৰ্ব্বদা স্থির করিতে হইলে পিতামাতাই করিয়া থাকেন । অতএব সর্ব্বাঙ্গে পরম বৈষ্ণব জগৎগুরু শঙ্কর ও শঙ্করীর আরাধনা কর । তাঁহাদের রূপা হইলে তবে শ্রীরাধাগোবিন্দ লাভ হইবে ।

তখন যুবকবয়স্ ব্যাকুলভাবে বাবাজী মহাশয়ের চরণতলে পড়িয়া কাঁদিতে লাগিলে ইনি উভয়কে আলিঙ্গনদানে স্নহ করিলেন ।

উপস্থিত ভক্তগণ বাবাজী মহাশয়ের মুখে শাস্ত বৈষ্ণবের সমন্বয় শ্রবণে চিরকাল উপাস্তগত দ্বেষ্টভাব হৃদয়ে পোষণ হেতু নিজেকে অপরাধী মনে করিয়া ইহার চরণে ক্ষমা প্রার্থনা করিতে লাগিলেন । বাবাজী মহাশয় প্রেমগদগদকণ্ঠে বলিলেন, “ভাই সকল ! ধন্য কলিকাল ! পরম দয়ালু নিতাই গৌরাজ্য কোনরূপ অপরাধের বিচার করেন না । ব্যাকুলপ্রাণে ‘হা নিতাই গৌরাজ্য’ বলিয়া ডাক—তীহাদের চরণে আত্মসমর্পণ কর, অভীষ্ট লাভ হইবে ।” এইরূপে সকলকে আশ্বাস প্রদান-পূর্বক পরমানন্দে মহাপ্রসাদ সেবা করিয়া নাম করিতে করিতে বাসায় প্রত্যাবর্তন করিলেন ।

দ্বাদশ গোপাল ।


একদিন বিমলাপ্রসাদ সেন নামক জনৈক ভক্ত ভদ্রলোকের বাড়ীতে সদলে বাবাজী মহাশয়ের মহাপ্রসাদ পাইবার নিমন্ত্রণ হইল । সেন মহাশয়েরা জ্ঞাতিতে বৈষ্ণু । ইহাদের পূর্বনিবাস কয়েরপুরে । কার্য্যোপলক্ষে ইনি এবং ইহার কয়েকটা স্বজাতি সপরিবারে কটকে বাস করেন । ইহাদের মেয়েরা ফুলের দ্বারা সুন্দর মালা, চূড়া এবং অগাধ নানাবিধ অলঙ্কার প্রস্তুত করিতে পারেন । জানি না আজ তীহার কাহার প্রেরণায় চূড়া এবং মালা প্রভৃতি নানারূপ ফুলের আভরণ প্রস্তুত করিতেছেন । কাহাকেও বলা কথা নাই ; আজ যেন প্রত্যেকের হৃদয়ে অজ্ঞাতসারে কি এক অনির্বচনীয় ভাবের খেলা খেলিতেছে ।

ক্রমে বেলা অবসান দেখিয়া বাবাজী মহাশয় সগণে নামকীৰ্ত্তন করিতে করিতে কটক সহরের অনেক স্থান পরিভ্রমণপূর্বক বিমলা বাবুর বাড়িতে গিয়া উপস্থিত হইলেন । উদ্ভক্ত কীৰ্ত্তন হইতেছে, এই সময়ে বাবাজী মহাশয় একজনকে বলিলেন, “ইহা! তোমাদের বাড়ীতে

নাকি অনেক রকম ফুলের আভরণ প্রস্তুত হইয়াছে? লইয়া আইস দেখি।” ছেলেটা সে বাড়ীর নয়; কিন্তু বিমলাবাবুর স্বজাতি ও আত্মীয়। সে একটু বিস্মিতভাবে বলিল, “আজ্ঞে আমি ত কিছুই জানি না। আচ্ছা দেখিয়া আসি।” বলিয়া বাড়ীর ভিতর গিয়া দেখে অপূর্ব ঘটনা! মেয়েরা ফুলের দ্বারা নানারূপ চূড়া, বলয়, কঙ্কণ, বাজু, হার, আঁচলা প্রভৃতি প্রস্তুত করিয়া থালায় থালায় রাখিয়াছে। তখন সে বিস্মিতভাবে চিন্তা করিতে লাগিল, “নিশ্চয়ই ইনি সর্বাসুখ্যামী মহাপুরুষ; নতুবা আমরা নিকটে থাকিয়াও যাহা জানিতে পারি নাই, ইনি তাহা কিরূপে জানিলেন?” এইরূপ ভাবিতে ভাবিতে ফুলের থালা লইয়া বাহিরে আসিলে ফুল দেখিয়া বাবাজী মহাশয় মনে মনে কি ভাবিলেন, তিনিই জানেন; সঙ্গিগণকে নাম করিতে আদেশ করতঃ নিজে হুটুচিহ্নে এক প্রাস্তে বসিয়া এক একটা যুবককে সাজাইতে লাগিলেন। কৃষ্ণপালিত, রাধাকৃষ্ণ মহাস্তি, ব্রজবাবু প্রভৃতি দ্বাদশজন যুবককে ইহার মনোভাব অনুযায়ী দ্বাদশ রাখাল বেশে সুসজ্জিত করতঃ সারি সারি দাঁড় করাইয়া দিলেন এবং এক এক জনের কর্ণে যেমন এক একটা রাখালের নাম ও মন্ত্র প্রদান করিলেন, অমনি তাহারা ঠিক সেই সেই ভাবে বিভাবিত হইল। তখন বাবাজী মহাশয়ের আদেশক্রমে সঙ্গিগণ উহাদের লক্ষ্যে কীর্তন করিতে লাগিলেন। অপর দিকে ললিতাদাসী প্রভৃতি সখীগণকে অবলম্বন করিয়া অপর আট জনকে সখীবেশে সুসজ্জিত করতঃ মণ্ডলী-বন্ধনে দাঁড় করাইয়া দিলেন এবং সকলের কর্ণে সেই সেই সখীমঞ্জরীর নাম ও মন্ত্র প্রদানপূর্বক ভাবোন্মত্ত অবস্থায় কীর্তনে গিয়া যোগ দিলেন। কৃষ্ণলীলার দ্বাদশ রাখাল গৌরলীলায় দ্বাদশ গোপাল হইয়াছেন, ইহা এবং তাঁহাদের বাবতীর লীলাখেলা পদে গান করতঃ উপস্থিত ভক্তবৃন্দের দ্বন্দ্বের সমকালীন কৃষ্ণলীলা এবং গৌর লীলার প্রকট ভাব আগাইয়া দিতে

লাগিলেন । যেন প্রেমসিদ্ধ উথলিয়া উঠিল । সকলেই বিভোর—
সকলেই প্রকট লীলা অনুভব করিয়া আনন্দ-সাগরে নিমগ্ন । বাবাজী
মহাশয় সখারসগানের পর ঠিক সময়ানুসারে মধুর লীলায় প্রবেশ করিয়া
সেইভাবে গান আরম্ভ করিলেন । সখীবেশধারীগণ অপূর্ণ নৃত্য করিতে
লাগিলেন । আবালবৃদ্ধবনিতা সকলেই যেন লীলায় বিভোর ! কাহারই
বাহুস্বত্তি নাই । বাবাজী মহাশয় নিজকৃত পদে ঘেরুপভাবের বিকাশ
করিতেছেন, সখা বা সখীবেশধারী যুবকগণ ঠিক সেই সেই ভাবানুযায়ী
নৃত্য বা অঙ্গভঙ্গি প্রকাশ করিয়া দর্শক ভক্তবৃন্দের আনন্দ বর্দ্ধন
করিতেছেন এবং নিজেরা প্রেমানন্দসাগরে ভাসিতেছেন । কি আশ্চর্য্য !
যে সমস্ত যুবকগণ কৃষ্ণলীলা বা গৌরলীলা কাহাকে বলে, তাহা একেবারে
জানেন না, আজ মহাপুরুষের শক্তিপ্রভাবে তাঁহারাও ভাবসাগরে নিমগ্ন,
আত্মহারা এবং বাহুস্বত্তিরহিত হইয়া এমনভাবে নৃত্যকীর্ত্তনাদি
করিতেছেন যে, তাঁহাদিগকে দর্শন মাত্রই অনুভব হইতেছে যেন সকলেই
প্রকট লীলায় বিচরণ করিতেছেন ।

রাত্র প্রায় শেষ হইতে চলিল দেখিয়া একজন সঙ্গী বাবাজী মহাশয়কে
বলিলেন, “আজ রাত্র প্রায় তিনটা হইল ।” শুনিয়া বাবাজী মহাশয়
সকলের অনিচ্ছাসম্মে ও কীর্ত্তন সমাপ্তি করতঃ উপস্থিত ভক্তবৃন্দের সহিত
মহাপ্রসাদ পাইতে বসিলেন । তখনও যেন সকলের নেশা ছুটে নাই ।
এক এক জন হো হো করিয়া হাসিয়া উঠিতেছে । কেহ কেহ বা কাঁদিয়া
অধীর । এইরূপে রাত্র প্রায় সাড়ে তিনটার সময় মহাপ্রসাদ সেবা শেষ
করিয়া পুনরায় নামকীর্ত্তন করিতে করিতে বাসায় প্রত্যাবর্ত্তন করিলেন ।



বাগানবাড়ীতে বাউল বাবাজী ।

একদিন বাবাজী মহাশয় সদলে কটক সহর ভ্রমণ করিতে বাহির হইয়াছেন—স্থানীয় লোকজনও অনেক সঙ্গে আছেন । যাইতে যাইতে বনবাবুদের বাগানবাড়ীতে গিয়া উপস্থিত হইলেন । সে স্থানে একটা বাউল মতাবলম্বী সিদ্ধ বাবাজী ছিলেন । কিছুদিন হইল তিনি নিত্য-লীলায় প্রবেশ করিয়াছেন । তাঁহার একটা শিষ্য গুরুদেবের কাঁথা এবং পাতৃকা প্রভৃতির সেবা করেন । বাবাজী মহাশয় সেস্থানে দণ্ডবৎ প্রণাম করিয়া বলিলেন, “সিদ্ধ মহাত্মাগণ স্বেচ্ছায় বিচরণ করেন ; প্রকট-অপ্রকট তাঁহাদের একটা খেলামাত্র । তাঁহারা করুণা করিয়া যাহাকে দর্শন দিতে ইচ্ছা করেন, সে অনায়াসেই দর্শন পাইয়া থাকে ।” শুনিয়া একজন ভক্ত করযোড়ে বাবাজী মহাশয়কে জিজ্ঞাসা করিলেন, “আজ্ঞে আপনার কথায় আমার একটা সন্দেহ উপস্থিত হইল । এই স্থলদেহ ক্ষিতি, অপ, তেজঃ, মরুৎ ও ব্যোম এই পাঞ্চভৌতিক । ইহাতে সাধু-অসাধু, জ্ঞানী-অজ্ঞানী ভেদ নাই । এই স্থলদেহ হইতে যখন সূক্ষ্মদেহ স্থানান্তরিত হয়, তখন ইহাকে প্রথামুসারে হয় রঞ্জে প্রোথিত, না হয় জলে নিক্ষিপ্ত অথবা অগ্নিতে দগ্ধকরা হইলে স্থল পঞ্চভূত পঞ্চভূতে মিশ্রিত হইয়া যায় । মহাত্মাগণ ইচ্ছামুসারে আবার সেই দেহে প্রত্যক্ষীভূত হইবেন কিরূপে ? আর যদি সেই দেহেই আবির্ভূত না হইবেন, তবে তিনি যে সেই মহাত্মা ইহাই বা কিরূপে বুঝা যাইতে পারে ?”

বাবাজী । বাবা ! অচিন্তপ্রভাব ভগবানের কার্যাদি যেমন জীব-বুদ্ধির অগোচর, সিদ্ধ মহাত্মাগণের কার্যাদিও সেইরূপ অলৌকিক ; সুতরাং তাহা লইয়া বিচার বা যুক্তি তর্কাদি দ্বারা সমন্বয় করা সম্পূর্ণ

অসম্ভব । শাজ্জ বলিয়াছেন, “অচিন্ত্যঃ খলু যে ভাবা ন তাত্ত্বকেন যোজ্যেৎ ।” যোগবলে যদি পরকায় প্রবেশ বা অনিমা লঘিমা সিদ্ধি লাভ হইতে পারে, তবে ভগবদ্ভজন করিয়া কি সামান্য একটা স্থলদেহ ধারণ করা অসম্ভব ? এই কথায় একটা প্রস্তাব মনে পড়িল—ত্রীপাট অধ্বিকা কালনায় সিদ্ধ ভগবান্ দাস বাবাজী মহাশয় একদিন নিজ আসনে বসিয়া নিমীলিতনেত্রে ভজন করিতেছেন, এই সময়ে একটা বিষয়ী বড়লোক তাঁহার দর্শনেচ্ছায় আসিলেন । হঠাৎ বাবাজী মহাশয় অতি ত্রস্তভাবে “আরে মারু মারু তাড়া তাড়া ! ঠাকুরের অনিষ্ট করিতে আসিয়াছিস্, বের বের !” এইরূপ বলিতে লাগিলেন । বাবুটি ব্যাপার দেখিয়া বিস্মিতভাবে মনে করিলেন, “কি আশ্চর্য্য ! আমি সাধুদর্শন করিতে আসিলাম ; কিন্তু সাধু আমার প্রতি এত ত্রুদ্ধ হইলেন কেন ? যাহা হউক, ইহার কারণ অনুসন্ধান না করিয়া যাওয়া হইবে না” ভাবিয়া সেই স্থানে উপবেশন করিলেন । ক্ষণকাল পরে বাবাজী মহাশয় বাহ্যদশা প্রাপ্ত হইয়া বাবুটিকে দেখিবামাত্র আন্তঃবাস্তে বলিলেন, “বাবা ! কখন আসি হ’ল ? বেশ আনন্দে ভজন চলিতেছে ত ?” বাবুটি একটু স্তম্ভিতভাবে বলিয়া উঠিলেন, “কি আশ্চর্য্য ! অত কটু ভাষার পর এত আদর যত্ন ! এ কিরূপ ?”

বাবাজী । কেন বাবা ! কে কটু কথা বলিল ? “সর্ব্বত্রাভ্যাগতো গুরুঃ ।” অভ্যাগত ব্যক্তি নারায়ণসদৃশ । তাঁহাকে কটু কথা বলাও বা, ভগবান্কে বলাও তাই ।

বাবু । আজ্ঞে আমি বলিতে সাহস পাইতেছি না । আপনার আদেশানুসারে আমি তখনই চলিয়া যাইতাম ; কেবল কি অপরাধে আমি আপনার বিরক্তিভাজন হইলাম, এইটা জানিবার জন্তই এতক্ষণ এখানে রহিয়াছি ।

বাবাজী। কি হইয়াছে বাবা? আমি ত কিছুই বুঝিতে পারিতেছি না।

বাবু। আজ্ঞে আমি আপনার দর্শনমানসে যেমন আসিয়া দাঁড়াইলাম, অমনি আপনি “আরে মারু মারু! তাড়া তাড়া! ঠাকুরের অনিষ্ট করিতে আসিয়াছিস, বের বের!” এই বলিয়া আমাকে তাড়াইয়া দিতেছিলেন।

ইহা শুনিয়া বাবাজী মহাশয় লজ্জিতভাবে বলিলেন, “বাবা মনে ভ্রম করিও না, আমি তোমাকে কিছু বলি নাই বা তোমাকে দেখিও নাই। শ্রীবৃন্দাবনে গোবিন্দের মন্দিরস্থ একটি তুলসী গাছ ছাগলে খাইতেছিল; আমি সেই ছাগলটাকে তাড়াইয়াছি।” বাবুটি অতি বিম্বিসতভাবে পকেট হইতে ষড়ি বাহির করিয়া ঠিক ঘটনার সময় নির্দেশপূর্বক বৃন্দাবনে সংবাদ দিলেন। বৃন্দাবন হইতে উত্তর আসিল যে, “গত কল্য ঠিক ঐ সময়ে গোবিন্দজিউর সম্মুখস্থ তুলসীগাছ একটি ছাগলে খাইতেছিল। কালনা নিবাসী ভগবান্দাস বাবাজী মহাশয় তাহাকে তাড়াইয়া দিয়াছিলেন।” আমাদের স্থলদৃষ্টিতে দেখিলাম ভগবান্দাস বাবাজী মহাশয় নামব্রহ্মের নিকট বসিয়া ভজন করিতেছেন। বল দেখি বাবাজী মহাশয়ের স্থলদেহখানি যদি বৃন্দাবনে না যাইত, তবে তাঁহাকে ভগবান্দাস বাবাজী বলিয়া কে চিনিত? ইহাকেই বলে সিদ্ধ অবস্থা। সিদ্ধ মহাত্মাগণ স্বেচ্ছামুসারে বিচরণ করিয়া থাকেন এবং ইচ্ছামাত্রে যথাযথ স্থলদেহও ধারণ করিতে পারেন। ভগবানের প্রকটাপ্রকটের স্তায় মহাত্মাদিগের ঐটি একটি লীলামাত্র। এই সিদ্ধ মহাত্মাও সর্বদা এই স্থানে বিরাজ করিতেছেন।

ইত্যাদিভাবে নানারূপ কথোপকথন হইতেছে, এই সময় একটি বাবাজী আসিয়া বলিলেন, ‘আজ্ঞে আমাদের শ্রীরাধারাবিহারী ভিড়কে

একবার দর্শন করিবেন, চলুন।” গুনিয়া বাবাজী মহাশয় অভিশয় আনন্দিতচিত্তে শ্রীশ্রীরাসবিহারী জিউর দর্শনে গেলেন। রাসবিহারী জিউর সেবাইত বৃদ্ধ শ্রীগদাধর দাস বাবাজী ও তাঁহার শিষ্য ভিক্ষা করিয়া সেবা চালাইয়া থাকেন। জানি না রাসবিহারীর কি ইচ্ছা—দর্শনমাগ্রেই বড় বাবাজী মহাশয়ের মনপ্রাণ চুরি করিলেন। তখন সাশ্রঙ্গদগদকণ্ঠে বলিয়া উঠিলেন, “বাবা! আপনার রাসবিহারী যে আমাকে অঙ্গীকার করিলেন! আমি ত বাবা, কোনও ষড়্‌-আগ্রহ বা সেবা জানি না, তবে আমার প্রতি এরূপ আদেশ কেন?” বৃদ্ধ কঁাদিতে কঁাদিতে বলিলেন, “বাবা! আমিও মনে মনে ভাবিতেছিলাম, এতদিন পরে আমার মনের মতন লোক পাইলাম। ইহার হাতে রাসবিহারী জিউকে সমর্পণ করিয়া আমি নিশ্চিন্ত হইব।” বাবাজী মহাশয় বলিলেন, “বাবা! আমি ত ভগবৎ-সেবার অযোগ্য, তবে ইচ্ছাময়ের কি ইচ্ছা তিনিই জানেন।” ইত্যাদি নানারূপ কথোপকথনের পর বাসায় প্রত্যাবর্তন করিলেন।

কয়েকদিন পরে গদাধর দাস বাবাজী সেবা চালাইতে অসমর্থ হওয়ায় এবং বাবাজী মহাশয় কটকে উপস্থিত না থাকা হেতু তাঁহার অভিপ্রায় অবগত হইতে না পারিয়া অগত্যা শ্রীযুক্ত বাবু প্যারীমোহন দত্ত মহাশয়ের হস্তে রাসবিহারী জিউর সেবার ভার অর্পণ করিলেন। ক্রমে প্যারীবাবুর চেষ্টায় এবং রাসবিহারী জিউর ইচ্ছায় উক্ত সেবা বাবাজী মহাশয় অঙ্গীকার করিলেন।



নগরকীর্তন ।

একদিন প্রভাতে কয়েকজন ভদ্রলোক বাবাজী মহাশয়ের নিকট বসিয়া নানারূপ ভগবৎ কথার আলোচনা করিতেছিলেন, এই সময়ে হৃদয় বাবু আসিয়া বলিলেন, “বাবা ! প্রত্যহই নিমন্ত্রণে যাওয়া উপলক্ষ করিয়া নগরকীর্তন হয় ; কিন্তু নিরপেক্ষভাবে ত একদিনও নগরকীর্তন হইল না ।”

বাবাজী মহাশয়, “বাবা ! তোমাদের বিগত হৃদয় ; তোমরা ব্যকুলপ্রাণে নিতাইচাঁদকে জানাইলেই তিনি সকল অভিলাষ পূর্ণ করিবেন ।

হৃদয়বাবু । আজ্ঞে আজ রবিবার ; সকলেরই ছুটি আছে । আজ হইলেই ভাল হয় না কি ?

বাবাজী । আচ্ছা ! নিতাইচাঁদের ইচ্ছায় তাহাই হউক ।

শুনিয়া হৃদয়বাবু হঠাৎই নগরকীর্তনের উদ্যোগ করিতে লাগিলেন । ক্রমে এই সংবাদ পরস্পরের মুখে সহরে প্রচার হইয়া পড়িল । সকলেই আজ নব উৎসাহে উৎসাহিত । বাবাজী মহাশয় সঙ্গিগণ সঙ্গে কাঠজুড়ি নদীতে স্নানাদি শেষ করতঃ মহাপ্রসাদ পাইয়া একটু বিশ্রাম করিলেন । বেলা অল্পমান চারিটার সময় বহুলোক আসিয়া একত্র মিলিত হইল । জনৈক ভক্ত প্রসাদী ফুলের মালা ও চন্দন আনিয়া বাবাজী মহাশয়কে সাজাইয়া দিলে ইনি প্রেম গদগদকণ্ঠে কীর্তন ধরিলেন :—

প্রকট অপ্রকট লীলার দুইত বিধান ।

প্রকট লীলার করেন প্রভু নিজে নৃত্যগান ॥

অপ্রকটে নামরূপে সাক্ষাৎ ভগবান্ ।
 কীর্তন-বিহারী রূপে সদা বর্তমান ॥
 (প্রভুর) দক্ষিণে শ্রীনিত্যানন্দ বামে গদাধর ।
 সম্মুখেতে নৃত্যাবেশে কুবের কুমার ॥
 গদাধরের বামে শ্রীবাস আর নরহরি ।
 চৌষটি মহাস্তম্ব দ্বাদশ গোপাল সঙ্গে করি ॥
 সবাকার আগে নিতাই ছবাহ তুলিয়া ।
 হরেকৃষ্ণ হরিনাম যান বিলাইয়া ॥
 যে না লয় তারে বলে দস্তে তৃণ ধরি ।
 আমারে কিনিয়া লহ ভজ গৌরহরি ॥
 এত বলি নাচে নিতাই হুঙ্কার করিয়া ।
 আঙুপাছু নাচে যত সঙ্গের সঙ্গিয়া ॥
 ভাবাবেশে গৌরাচাঁদ নাচে বাহ তুলে ।
 মুখ বুক ভেসে যায় নয়নের জলে ॥

(হের) ঐ গোরারায়, ভাই নিতাই সনে, আনন্দে হরিগুণ গায়রে ।
 (গোরা) হরে কৃষ্ণ হরি বলি, প্রেমে ছুটি বাহ তুলি রে,
 কে নিবি কে নিবি বলি যাচিয়া বেড়ায় রে ॥
 (গোরার) অরুণ কমল আঁখি, প্রেমে ঢুলু ঢুলু দেখিরে,
 চরণে চরণ রাখি নাচি নাচি যায়রে ।
 (গোরা) রা রা রা রা রা বলি, ধা বলিতে পড়ে চলিরে,
 সোনার পর্বত যেন ধুলাতে লোটারে রে ॥
 (গোরার) চল চল মুখচাঁদ, ভুবন মোহন কাঁদরে,
 যেন অকলঙ্ক পূর্ণচাঁদ উদ্ভিত ধরায় রে ।

চারিদিকে ভক্তগণ, করে হরি সংকীৰ্ত্তন রে,

হরি বলি গৌরহরি নাচে উভরায়রে ॥

ভকত মণ্ডলী মাঝে, নাচে গোরা নটরাজে রে,

হুঙ্কার করিয়া নাচে নিত্যানন্দ রায় রে ।

পতিত পাষণ্ডী যত, নাচে গায় কত শত রে,

(আজ) প্রেমের বজ্রায় ত্রিভুগত ভেসে যায় রে ॥

এইরূপে সংকীৰ্ত্তন করিতে করিতে কটকের প্রতি গলি গলি ভ্রমণ করিতে লাগিলেন । লোকে লোকারণ্য ! সকলেরই দৃষ্টি বাবাজী মহাশয়ের উপর । মহাপুরুষ ভাবাবেশে কীৰ্ত্তন করিতেছেন, আর চরণে চরণ রাখিয়া নৃত্য করিতেছেন । সঙ্গিগণ লোকসংঘট্টের মধ্যে কে কোথায় ছড়াইয়া পড়িয়াছে ঠিক নাই । কি মনোহর দৃশ্য ! ছোট বড় ভেদ নাই—ইতর ভদ্র ঘেঘাঘেঘ নাই । শত শত মুখে কীৰ্ত্তন হইতেছে—শত শত হাতে তালি বাজিতেছে—শত শত লোক আনন্দে আত্মহারা হইয়া নৃত্য করিতেছে । যেন আনন্দের পাখার বহিরা যাইতেছে । বালকবৃদ্ধ-যুবা সকলেই প্রেমবজ্রায় ভাসিয়া যাইতে লাগিল । কটক সহর টলমলারমান । যে রাস্তায় কীৰ্ত্তন যাইতেছে, সে রাস্তার উভয় পার্শ্বস্থ আবালবৃদ্ধ বনিতা সকলেই এক অভিনব আনন্দে মাতোয়ারা হইতেছে । কেহ বা বাহিরে কেহ বা ছাতের উপরে, কেহ কেহ বা জানালার নিকট আসিয়া সংকীৰ্ত্তনানন্দ উপভোগ করতঃ জীবন সফল মনে করিতেছে ! সংকীৰ্ত্তন যে যে স্থান অতিক্রম করিয়া যাইতেছে, সেই সেই স্থানের লোকসকল চিত্রপুঙ্খলিকার ত্রায় দণ্ডায়মান হইয়া ‘ন যমো ন তমো’ ভাবে অবস্থান করিতেছে । আনন্দ জিনিষটা বাহিরের নয়, সুতরাং উহা ভাষায় ব্যক্ত করা বা অপরকে বুঝাইয়া দেওয়া অসম্ভব । আজ কটকবাসীগণ যে কি আনন্দ উপভোগ করিতেছেন, তাহা ভীহারাই

জানেন এবং শ্রীগুরুপাবলে বাহারা সেই সঙ্গে সঙ্গী, তাঁহারাও সেই আনন্দ যৎকিঞ্চিৎ অনুভব করিতেছেন। সকলেরই বাসনা যে বাবাজী মহাশয়ের নিকটে থাকিয়া ইহার সঙ্গসুখ অনুভব করেন। এবং শ্রীমুখের স্মৃতিমাথা নামকীর্তন শ্রবণ করিয়া মনপ্রাণ পরিতৃপ্ত করেন। অন্তর্যামী প্রভু সকলের মনোভাব জানিতে পারিয়াই যেন এক এক বার চৌমাথার উপর দাঁড়াইয়া উদ্ভূত নৃত্যকীর্তন করিতেছেন। এই স্মরণে সকলেই একত্রিত হইয়া বাবাজী মহাশয়ের সঙ্গে নৃত্যকীর্তনাদি করিতেছেন।

যদিও জ্যোৎস্না রাত্রি তথাপি কেহ মশাল, কেহ লণ্ঠন, কেহ কেহ বা কেরোসিন আলোর ষোগাড় করিয়া আনিতেছে। এ ষোগাড় এক অপূর্বভাবে ; কাহারও বাধ্যবাধকতার বলে নয় অথবা কেহ কাহাকে প্রেরণাও করিতেছে না। নিতাইচাঁদ বাহার ছদয়ে যেরূপ উদয় করিতেছেন, সে সেইরূপভাবে কার্য্য করিতেছে। কীর্তনশ্রান্তিতে বাবাজী মহাশয় ঘণ্টাকালেকের। কেহ বড় পাখা, কেহ ছোট পাখা লইয়া বাতাস করিতেছে ; কিন্তু লোকসংঘট্ট অধিক হেতু কখন নিকটবর্তী কখনও বা দূরবর্তী হওয়ায় সমানভাবে শ্রান্তিদূর হইতেছে না দেখিয়া নিত্যস্বরূপ ত্রাণদাতারী একখানি ছোট পাখা হাতে লইয়া বাবাজী মহাশয়ের মস্তকে বাতাস করিতে লাগিলেন। উড়িয়া ভ্রমণ কালে নিত্যস্বরূপের প্রতি অপূর্ব গুরুরূপা সকলে লক্ষ্য করিয়াছেন। নিত্যস্বরূপ স্বর্ষাকৃতি এবং অপেক্ষাকৃত স্থলাকায়, তথাপি সংকীর্তনকালে বাবাজী মহাশয় ক্ষণ বা ধীরভাবে যে অবস্থায়ই গমন করুন না কেন, অবিশ্রান্তভাবে ইহার মস্তকে বাতাস করিত। কি দিবা, কি রাত্রি, কি মধ্যাহ্ন, কি সায়াহ্ন, বাবাজী মহাশয় যে স্থানে যে অবস্থায় অবস্থান করিতেন, নিত্যস্বরূপও পাখা-হাতে ঠিকই সেই স্থানে দণ্ডায়মান থাকিত।

ক্রমে সহরের অনেক স্থান পরিভ্রমণ করিয়া রাত্রি প্রায় এগারটার

সময় সংকীৰ্ত্তন করিতে করিতে বাসায় প্রত্যাবৰ্ত্তন পূৰ্বক কীৰ্ত্তন সমাপ্তি করিলেন । সে রাত্রে কোথাও নিমন্ত্রণ নাই ; কাজেই আশ্রমেই ঠাকুরের ভোগ দিয়া মহাপ্রসাদ গ্রহণান্তে সকলে শয়ন করিলেন ।

বাবাজী মহাশয় শয়ন করিয়া আছেন, ললিতাদাসী বাতাস করিতেছে । রাত্রি অল্পমান দুইটার সময় বাবাজী মহাশয় হঠাৎ চমকিত-ভাবে ললিতাদাসীর বুকে হাত দিয়া বলিলেন, “তুই কোন ভয় পাইয়াছিস্ কি ?”

ললিতা । (বিস্মিতভাবে) কই আমি ত কিছুই জানি না । কি হইয়াছে ?

বাবাজী । ছাতের সিঁড়ির উপর তুই কিছুই দেখতে পাস্ নাই কি ?

ললিতা । (ছাতের সিঁড়ির দিকে তাকাইয়া) এতক্ষণ ত আমি কিছুই দেখি নাই ; আপনার কথা শুনিয়া এইমাত্র একটি জ্বীলোকের মত কে যেন উপরে যাইতেছে দেখিতে পাইলাম । কি সুন্দর লব্ধিত কেশ কলাপ ! ও কে এবং কেনই বা এত রাত্রে ঐরূপভাবে যাইতেছে ?

বাবাজী । উনি এতদিন এই বাড়ীতেই ছিলেন । উহারই ভয়ে এই বাড়ীতে কেহ বাস করিতে পারে নাই । আজ আমার সহিত সাক্ষাৎ করিয়া স্থানত্যাগ করতঃ চলিয়া গেলেন ।

ললিতা । তবে কি ও ভূত ?

বাবাজী । তা বই কি ! ভূত না হইলে অলঙ্কিত ভাবে ঐরূপ চলিয়া যাইতে পারে কি ?

ললিতা । আপনাকে কি বলিল ?

বাবাজী । সে সমস্ত শুনিয়া কি হইবে ? তবে অনেক কাকূতি মিনতি করিয়া বলিল—“যে দিন আপনারা এই বাড়ীতে আসিয়া নামকীৰ্ত্তন করিলেন, আমি সেই দিনই চলিয়া যাইতাম, কেবল এমন

অপূর্ব সঙ্গ আর কখনও পাই নাই বা পাব না বলিয়াই একদিন ছিলাম । আজ আপনার নিকট বিদায় লইবার জন্ত আসিয়াছি” বলিয়া দণ্ডবৎ প্রণামপূর্বক অত্থানে চলিয়া গেল । মোট কথা উহার উদ্ধার হইয়া গেল ।

ললিতা । কি অপরাধে ও ভূত হইয়াছিল ?

বাবাজী । অপরাধ উহার জীবনে খুব কমই ছিল ; তবে প্রলোভনে পড়িয়া অনেক পাপকার্য্য করায় শেষকালে নিজের অপমৃত্যু হয় । তাই ভূতযোনি প্রাপ্ত হইয়াছিল । অনেক স্মৃতি থাকা হেতু অল্প ভোগেই প্রভু উদ্ধার করিলেন ।

এইরূপভাবে অনেক কথোপকথনের পর বাবাজী মহাশয় নিদ্রিত হইলেন । ললিতা দাসীও যথাস্থানে শয়ন করিলেন ।

পুরী প্রত্যাগমন ।

কাল কাহারও বাধ্য নয় । দেখিতে দেখিতে কটকে একমাস কয়েক দিন পরমানন্দে কাটিয়া গেল । জগন্নাথদেবের স্নানযাত্রা নিকটবর্তী দেখিয়া বাবাজী মহাশয় পুরী রওনা হইবার ইচ্ছা প্রকাশ করিলে কটকবাসী অনেক ভদ্রলোক আর কিছুদিন কটকে থাকিবার জন্ত বিশেষ ভাবে অনুরোধ করিতে লাগিলেন ; কিন্তু বাবাজীমহাশয় যখন একান্তই পুরী যাইবার অভিপ্রায় প্রকাশ করিলেন, তখন অন্ততঃ মধ্যে মধ্যে কটক আসিবার জন্ত সকলে বিশেষভাবে প্রার্থনা করায় ইনি নিতাইচাঁদের ইচ্ছার উপর নির্ভর করিয়া মিষ্টবাক্যে সকলের মনস্তৃষ্টি সাধন করতঃ শ্রীধাম পুরী যাত্রা করিলেন ।

ষ্টেশনে আসা হইল বটে, কিন্তু কাহাকেও কিছু বলা হয় নাই এবং নিজ-সঙ্গিগণের নিকটও কোনরূপ অর্থের সংস্থান নাই । একজন সঙ্গী বাবাজীমহাশয়কে জিজ্ঞাসা করিল, “আজ্ঞে টিকিটের কিরূপ ব্যবস্থা

হইবে ?” বাবাজী মহাশয় একটু মুহূর্ত হাসিয়া বলিলেন, “বাবা ! আমার ত কোথাও যাইবার জ্ঞান বিশেষ প্রয়োজন হয় নাই ! যদি নিতাই চাঁদের প্রয়োজন হইয়া থাকে, ব্যবস্থা করিবেন, না হয় এই স্থানেই দশ দিন থাকা যাইবে । অগ্রপশ্চাৎ বিচার পূর্বক ভবিষ্যৎ বন্দোবস্ত করাই যদি দরকার হয়, তবে আর মিছামিছি একজনের দায় দিয়া লোক-প্রতারণা করিবার আবশ্যকতা কি ?”

এইরূপ কথাবার্তা হইতেছে, এমন সময় টিকিটের ঘণ্টা বাজিল । মহাপুরুষ নিশ্চিন্তমনে বসিয়া আছেন । যাত্রীগণ ছুটাছুটি করিয়া টিকিট ঘরে গমন করিতে লাগিল । হঠাৎ একটী কটকবাসী যুবক কয়েকখানি টিকিট আনিয়া বাবাজীমহাশয়ের সম্মুখে রাখিলে ইনি তাহাকে জিজ্ঞাসা করিলেন, “তোমাকে কে টিকিট করিতে বলিল ?” যুবকটী ভীতভীতভাবে বলিলেন, “আজ্ঞে আমাকে কেহই কিছু বলে নাই । আমি কাছারি হইতে বাসার আসিয়া গুলিলাম, আপনি পুরী রওনা হইয়াছেন । তাই আপনার শ্রীচরণ দর্শন মানসে ষ্টেশনে আসিলাম । আসিয়াই কেন যেন কাহাকেও কিছু না বলিয়া কয়েকখানা টিকিট করিতে ইচ্ছা হইল । মনে ভাবিলাম, যদি বাবাজী মহাশয়কে জিজ্ঞাসা করি, হয়ত তিনি নিষেধ করিবেন । তাই একেবারে আপনার সহিত দেখা না করিয়াই টিকিট আনিয়াছি । আমার অপরাধ ক্ষমা করিবেন ।” বাবাজী মহাশয় বলিলেন, “না বাবা ! অপরাধ কিছুই নয়, তবে আমি কেবল নিতাই-চাঁদের খেলা দেখিতেছি ।” গাড়ী আসিলে সঙ্গিগণকে বলিলেন, “নাও অভিষ্টলাভ হইয়াছে, আর অপেক্ষা কেন ? বড়ই ভাবিত হইয়াছিলে, তাই নিতাইচাঁদ দেখাইলেন ।” বলিয়া উপস্থিত কটকবাসী ভক্তবৃন্দকে মধুর বাক্যে আশ্বস্ত করতঃ গাড়ীতে উঠিলেন । ক্রমে রাত্রি দশটার সময় শ্রীধাম পুরীতে আসিয়া নাম করিতে করিতে আশ্রমে আসিয়া পৌঁছিলেন ।

রাঘবের ঝালি ।

আজ পুরীতে আবার নূতন আনন্দ । বাবাজী মহাশয় সংকীৰ্ত্তন লইয়া জগন্নাথদেবের দৰ্শনে চলিয়াছেন । যাহার সহিত ইহার দেখা হইতেছে, তিনিই আনন্দ-সাগরে ভাসিতেছেন । যাহার জগন্নাথ দৰ্শনের ইচ্ছা নাই বা নানা কাজে ব্যতিব্যস্ত, সেও আজ ইহার সঙ্গপ্রভাবে দৰ্শনে চলিয়াছে । “সংসঙ্গানু ভুঃসঙ্গঃ” এই শাস্ত্রবাক্যটির আজ প্রত্যক্ষানুভব হইতেছে । দোকানী দোকান ফেলিয়া কীর্ত্তনের সঙ্গে মন্দিরে যাইতেছে । উপবাসক্লান্ত রোগী প্রাণের বলে দৰ্শনে বাহির হইয়াছে । বালকগণ খেলা ছাড়িয়া আগে আগে ছুটিতেছে । বৃদ্ধগণ লাঠি ধরিয়া নাম করিতে করিতে পিছু পিছু চলিয়াছে । অপূৰ্ণ দৃশ্য ! অভূতপূৰ্ণ আকর্ষণী শক্তি ! এইরূপে ভক্তগণসমভিব্যাহারে মন্দিরে প্রবেশপূৰ্ব্বক জগন্নাথ দৰ্শন করিয়া শ্রীজগমোহনে কীর্ত্তন করিতে লাগিলেন । লোকে লোকারণ্য । জগন্নাথের সেবক পাণ্ডাপূজারীগণ বহুদিন পরে আজ বাবাজী মহাশয়কে পাইয়া আনন্দে বিভোর হইলেন । জগন্নাথের শিঙ্গারী পাণ্ডা মাধব পশুপালক প্রসাদী মালা আনিয়া বাবাজী মহাশয়ের গলায় দিবামাত্র ইনি আনন্দে নৃত্য করিতে লাগিলেন । হরিধ্বনি, উলুধ্বনি ও সংকীৰ্ত্তন-ধ্বনিতে দশদিক্ মুখরিত হইল । সকলেই প্রেমানন্দে বিভোর ! অনেকদিন পরে জগন্নাথদেবের শ্রীমুখচন্দ্র দৰ্শন পাইয়া বাবাজী মহাশয় প্রাণের আবেগে নানারূপ পদাবলী কীর্ত্তন করিতে লাগিলেন । বহুক্ষণ কীর্ত্তনের পর জগমোহন হইতে বাহির হইয়া শ্রীমন্দির পরিক্রমা করতঃ ক্রমে গভিরা, সিদ্ধবকুল এবং সার্কভৌমালয় দৰ্শনান্তে সমুদ্রতীরে গিয়া

হরিদাস ঠাকুরের সমাধি, টোটাগোপীনাথ প্রভৃতি দর্শন পূর্বক ঝাঁজপীটা মঠে আসিয়া উপস্থিত হইলেন ।

এইরূপ পরমানন্দে দিনের পর দিন যাইতে লাগিল । ক্রমে শ্রীজগন্নাথদেবের স্নানযাত্রা উপস্থিত হইলে পূর্ববৎ কীর্তননর্তনানন্দে স্নানযাত্রা উৎসব সমাপন করিলেন । পুরী ছাড়িয়া অনেকদিন স্থানান্তরে থাকাহেতু অনবসরে আর কোথাও যাওয়া হইল না । প্রত্যহ শেষ রাত্রে উঠিয়া কীর্তন করিতে করিতে পঞ্চতীর্থ ভ্রমণ, স্নান এবং মন্দির পরিক্রমা প্রভৃতি আনন্দে দিন অতিবাহিত হইতে লাগিল ।

কৃষ্ণাচতুর্দশীর দিন অপরাহ্নে বাবাজী মহাশয় ঝাঁজপীটামঠে বসিয়া আছেন, হঠাৎ মনপ্রাণ-মাতান সংকীৰ্তন-ধ্বনি শ্রবণে বাহিরে আসিয়া দেখেন, প্রাণপ্রতিম প্রিয়শিষ্য শ্রীমান্ রামদাস বহু ভক্তগণ সমভিব্যাহারে কীর্তন করিতে করিতে আসিতেছে । সে এক অপূৰ্ণদৃশ্য ! প্রত্যেকের মাথায় এক একটা করিয়া দ্রব্য—চোখে জল—মুখে কেবল হা ছতাশ ! সৰ্ব্বাগ্রে রামদাদা গাহিতেছেন :—

দমযন্তীদত্ত দ্রব্যে ঝালি সাজাইয়া ।

আইলেন রাঘব পণ্ডিত যজ্ঞে লইয়া ॥

(চলে রাঘব পথে পথে)

(ঝালি লইয়া মাথে)

(প্রেমে কঁাদিতে কঁাদিতে)

ইত্যাদি এক একটা করিয়া আঁখর দিতেছে, আর যেন আবাল-বৃদ্ধ-বনিতা সকলের প্রাণে “রাঘবের ঝালি” লীলাটির প্রকটতা জাগাইয়া দিতেছে । ক্রমে ঝাঁজপীটামঠের দ্বারদেশে উপনীত হইয়া ভাবুকচূড়ামণি রামদাদা পদ ধরিলেন—

গোড় হইতে রাঘবের ঝালি সাজাইয়া ।
 আনিয়াছি তুয়া প্রাণগোঁরাঙ্গ লাগিয়া ॥
 ঝালিমাথে গোঁরাসাথে করিয়া মিলন ।
 শীতল করহ মোদের তৃষিত নয়ন ॥
 বড় সাধে আসিয়াছি নীলাচলপুরী ।
 তুয়া সহ দেখিবারে গোঁরাঙ্গ ত্রীহরি ॥
 বারেক করুণা করি শ্রীরাধারমণ ।
 সেই নীলাখেলা মোদের করাও দরশন ॥

গাহিতে গাহিতে মঠের মধ্যে প্রবেশ করিবামাত্র বাবাজী মহাশয় প্রেমগরগরহৃদয়ে রামদাসকে দৃঢ় আলিঙ্গনপূর্বক পঙ্কত ঘরে বসিলেন । ভক্তগণ একে একে সকল দ্রব্য বাবাজী মহাশয়ের সম্মুখে রাখিলে ললিতাদাসী একএকটি দ্রব্যের আকর্ষণ মোচন করিয়া নাম উল্লেখ পূর্বক বাবাজী মহাশয়ের নিকট পরিচয় দিতে লাগিল ! বাবাজী মহাশয় এক একটা বস্তুর নাম শুনিতেছেন, আর চোখের জলে ইহার মুখবুক ভাসিয়া যাইতেছে এবং সর্বশরীর পুলকপরিব্যাণ্ড হইতেছে । ক্রমে যেমন তিগের 'লাডু' ও 'পুরাণ' শ্রুতাত্মর্থে নাম শুনিলেন, অমনি উচ্চৈঃস্বরে রোদন করিতে করিতে মুচ্ছিত হইয়া ভূতলে পতিত হইলেন । বহুসম্পর্পণে কিঞ্চিৎ বাহুদশা প্রাপ্ত হইয়া ভক্তগণকে বলিলেন, “দেখ, ভাইসকল ! করুণাময় নিতাইচাদের রূপায় কাল গম্ভীরায় রাঘবমিলনলীলা আন্বাদন করা যাইবে ।” অমরাগী ভক্তগণ বাবাজী মহাশয়ের এই কথা শ্রবণে প্রেমানন্দে হরিধ্বনি করিয়া উঠিলেন । যে যে ভক্তগণ দেশ হইতে কোনও দ্রব্য আনিতে পারেন নাই, তাঁহারা অতি আনন্দের সহিত বাজার হইতে নানাবিধ দ্রব্য আনিয়া প্রাণের আবেগ মিটাইতে লাগিলেন । বাবাজী মহাশয় ললিতাদাসীকে আদেশ করিলেন,

“শ্রীচৈতন্যচরিতামৃতের রাঘবের কালির বেরূপ বর্ণনা আছে, তন্মধ্যে যে যে বস্তুর অভাব থাকে, তাহা সংগ্রহ করিয়া রাখ।” শুনিয়া ললিতাদাসী দ্বিগুণতর উৎসাহে উৎসাহিতা হইয়া বাবাজী মহাশয়ের আদেশ পালন করিতে লাগিল। কাপড়ের কুথলি প্রস্তুত করিয়া তাহাতে নানারূপ দ্রব্য ভরিয়া রাখিল। নানারূপ আচার, মোরঝা প্রভৃতি ছোট বড় মাটির পাত্রে করিয়া ছোট ছোট বুড়ির মধ্যে রাখিল। ঝাললাড়ু, ব্যাসনলাড়ু, মুদগলাড়ু প্রভৃতি অনেক প্রকার দ্রব্য ঘরে প্রস্তুত করিয়া এক একটা পাত্রে রাখিয়া দিল এবং চরিতামৃত দেখিয়া দেখিয়া দ্রব্যসকল যথাসাধ্য সংগ্রহ করিতে লাগিল। বাবাজী মহাশয় প্রাণের আবেগে এক একবার আসিয়া দেখিতেছেন, আর ইহাদিগকে দ্বিগুণতর উৎসাহিত করিতেছেন।

ক্রমে রাত্রি প্রভাত হইলে সকলে স্নানাদি সমাপনপূর্বক একত্রিত হইলেন। বাবাজী মহাশয় এক একজনের মস্তকে এক একটা দ্রব্য দিয়া সারি সারি দাঁড় করাইয়া দিলেন এবং নিজেও একটা জিনিষ মাথায় লইয়া কীৰ্ত্তন ধরিলেন :—

কোথা প্রাণ বিশ্বস্তর গোরা নটরায় ।
 গোড় হইতে আসিয়াছি দেখিতে তোমায় ॥
 বহুদিন দেখি নাই ও চাঁদ বদন ।
 বারেক করুণা করি দেহ দরশন ॥
 শ্রীঅদ্বৈত নিত্যানন্দ হুঁহ অগ্রগণ্য ।
 আচার্য্যরত্ন আচার্য্যনিধি শ্রীবাসাদি ধন্য ॥
 বান্ধদেব দত্ত মুরারি গুপ্ত গঙ্গাদাস ।
 শ্রীমান্ সেন শ্রীমান্ পণ্ডিত অকিঞ্চন কৃষ্ণদাস ॥

মুরারি পণ্ডিত গরুড় পণ্ডিত বুদ্ধিমন্ত খান ।

সঞ্জয় পুরুরোত্তম পণ্ডিত ভগবান্ ॥

গুক্রাশ্বর নৃসিংহানন্দ আর যত জন ।

সবাই আইলা নাম না যায় গণন ॥

কুলীন গ্রামী খণ্ডবাসী আর শিবানন্দ ।

আইলা দেখিতে সবে তুয়া মুখচন্দ্র ॥

দময়ন্তীদত্ত দ্রব্য যতনে লইয়া ।

আইলা রাঘব পণ্ডিত ঝালি সাজাইয়া ॥

তোমা না দেখিয়া সবে বিষাদে মগন ।

একবার দেখা দাও শচীর নন্দন ॥

অতি ব্যাকুলভাবে এই পদ গান করিতে করিতে যেমন কাশী-
মিশ্রালয়ের সম্মুখবর্তী হইলেন, অমনি মহাপ্রভুর প্রতিনিধিস্বরূপ বলভদ্র
দাস মহাস্ত মহাশয় প্রসাদী মালা আনিয়া বাবাজী মহাশয়ের গলায়
দিলেন এবং পরস্পর প্রেমালিঙ্গনপূর্বক গম্ভীরা গৃহের দ্বারদেশে উপস্থিত
হইলেন । বাবাজী মহাশয় ভাবাবেশে গোবিন্দজ্ঞানে গম্ভীরাগৃহাভ্যন্তরস্থ
পূজারীর হস্তে এক একটা করিয়া দ্রব্য প্রদান করিতেছেন, পূজারীও
উহা গৃহের এক পার্শ্বে রাখিয়া ইহাদের ভাবোদ্দীপন করিতেছেন ।
বাবাজী মহাশয় গাহিতেছেন :—

ধর নাও হে গোবিন্দ রে'খ যতন ক'রে ।

মনোভাব বুঝি তুমি দিও গোঁরাঙ্গেরে ॥

দময়ন্তী দেবী সাক্ষাৎ বাৎসল্যের মূর্তি ।

দিয়াছেন শ্রীগোঁরাঙ্গেরে করি কত আর্তি ॥ (ধর নাও হে গোবিন্দ)

অপরূপ ভক্ষ্য দ্রব্য প্রভুর যোগ্য ভোগ ।

বৎসরেক প্রভু যেন করেন উপভোগ ॥ (ধর নাও হে গোবিন্দ)

আম্র কাম্বুদি আদা কাম্বুদি ঝাল কাম্বুদি আর ।

লেম্বু আদা আম্রকোলি বিবিধ প্রকার ॥ (ধর নাও হে গোবিন্দ)

আম্‌সি আম্রখণ্ড আর তৈলাম্র আম্রতা ।

চূর্ণ করি দিয়াছেন পুরাণ স্কুতা ॥ (ধর নাও হে গোবিন্দ)

স্কুতা বলি অবজ্ঞা না করিহ চিতে ।

স্বজায় যে প্রীতি প্রভুর নহে পঞ্চাম্রতে (ধর নাও হে গোবিন্দ)

ধনিয়া মহরী তণ্ডুল চূর্ণ করিয়া ।

লাডু বাঁধি দিয়াছেন চিনি পাক করিয়া ॥ (ধর নাও হে গোবিন্দ)

গুণ্ডীখণ্ড লাডু হয় আমপিত্ত হর ।

পৃথক পৃথক বাঁধা আছে কুথলি ভিতর ॥ (ধর নাও হে গোবিন্দ)

কোলি গুণ্ডী কোলিচূর্ণ কোলিখণ্ড আর ।

কত নাম লব যত প্রকার আচার ॥ (ধর নাও হে গোবিন্দ)

নারিকেল খণ্ড আর লাডু গঙ্গাজল ।

চিরস্থায়ী খণ্ড বিকার দিয়াছে সকল ॥ (ধর নাও হে গোবিন্দ)

শালিকাচুটি ধাত্তের আতপ চিড়া করি ।

দিয়াছেন বড় বড় কুথলিতে ভার ॥ (ধর নাও হে গোবিন্দ)

কতক চিড়া ছড়ুম করি স্বতেতে ভাজিয়া ।

চিনি পাকে লাডু কৈল কর্পূরাদি দিয়া ॥ (ধর নাও হে গোবিন্দ)

শালী তণ্ডুল ভাজা চূর্ণ করিয়া ।

স্বতসিল্পে লাডু কৈল চিনি পাক দিয়া (ধর নাও হে গোবিন্দ)

কর্পূর মরিচ এলাচ লবঙ্গ রসবাস ।

চূর্ণ দিয়া লাডু কৈল পরম সুবাস ॥ (ধর নাও হে গোবিন্দ)

শালি ধাত্তের খই স্বতেতে ভাজিয়া ।

চিনিপাকে উখড়া কৈল কর্পূরাদি দিয়া ॥ (ধর নাও হে গোবিন্দ)

ফুটকলাই চূর্ণ করি য়তে ভাজাইল ।

চিনিপাকে কর্পূর দিয়া লাড়ু করি দিল ॥ (ধর নাও হে গোবিন্দ)

কছু নাহি জানি নাম এ জন্মে যাহার ।

ঐছে নানা দ্রব্য দিল সহস্র প্রকার ॥ (ধর নাও হে গোবিন্দ)

গঙ্গামৃত্তিকা আনি বস্ত্রেতে ছানিয়া ।

পাঁপড়ী করিয়া দিল গন্ধ দ্রব্য দিয়া ॥ (ধর নাও হে গোবিন্দ)

কহিতে না পারি নাম কতক প্রকার ।

দিয়াছেন দময়ন্তী প্রীতি উপহার ॥ (ধর নাও হে গোবিন্দ)

যতন করিয়া সব করাঞা ভোজন !

যেমতে পায়েন প্রীতি শচীর নন্দন ॥ (ধর নাও হে গোবিন্দ)

দময়ন্তীদত্ত দ্রব্য সঁপিহু তোমারে ।

অবসর জানি দিও প্রাণ বিশ্বস্তরে ॥

হেনমতে রাঘব পণ্ডিত ঝালি সমর্পিল ।

ভোজন গৃহের কোণে গোবিন্দ রাখিল ॥

পূর্ব বৎসরের ঝালি আজাড় করিয়া ।

দ্রব্য ভরিবারে রাখে অল্প ঘরে লৈঞা ॥

আনন্দের অবধি নাই । বহুলোক সমাগম ; কিন্তু সকলেই একভাবে নিমগ্ন—সকলেই মহাপ্রভুর প্রকট লীলা অনুভব করতঃ প্রেমের পাথারে ডুবিয়া যাইতেছেন । অধিকারী, মহাস্ত্র এবং অগ্ন্যাত্ত বৈষ্ণবগণ বাবাজী মহাশয়ের ভাবগদগদ কণ্ঠের স্তমধুর পদাবলী শ্রবণে এবং, নবাগত ভক্তগণের ভাব-ব্যাকুলতা দর্শনে অঝোরনয়নে ঝুরিতেছেন, আর বলিতেছেন, “ধনু নিতাই গৌরান্ধগতপ্রাণ বাবাজী মহাশয় ! ধনু ইহার ভক্তগণ ! ইহাদের সঙ্গপ্রভাবে প্রকটলীলা আশ্বাদন করিয়া আজ আমরাও ধনু হইলাম ! বেলা অতিরিক্ত হওয়ায় ভক্তগণের শ্রম জানিয়া বাবাজী

মহাশয় অনিচ্ছাসত্ত্বেও কীর্তন সমাপ্তি করিলেন। মহাস্ত বলভদ্র দাস এবং অধিকারী হরিভজ্ঞনদাস প্রভৃতি মহাত্মাগণ মহাপ্রসাদ পাইবার জন্ত বিশেষ আগ্রহসহকারে সগণে বাবাজী মহাশয়কে সেই স্থানে রাখিলেন। বাবাজী মহাশয় শ্রীমন্মহাপ্রভুর প্রতিনিধি জ্ঞানে মহাস্তের ব্যবহারে পরম প্রীতি লাভ করিলেন। কিছুক্ষণ বিশ্রামান্তে মহাপ্রসাদ পাইয়া সকলে নাম করিতে করিতে শ্রীশ্রীজগন্নাথদেবের নবযৌবন দর্শন-মানসে শ্রীমন্দিরে গমন করিলেন। পনের দিন পরে আজ জগবন্ধুর চাঁদবদন দর্শনে ভক্তগণ আনন্দসাগরে নিমগ্ন হইয়া অনিমেঘনয়নে দর্শন করিতেছেন! সকলেই বাহুস্বতী রহিত। বাবাজী মহাশয় শ্রীগোরাঙ্গদেবকে সঙ্গে লইয়া ভাববিভাবিতচিত্তে অভিনব পদাবলী গান করতঃ নিজে ভাবসাগরে ডুবিয়া যাইতেছেন এবং উপস্থিত ভক্তবৃন্দকে প্রেমবজ্রায় ভাসাইয়া দিতেছেন। এই ভাবে কিছুক্ষণ কীর্তন নর্তন করিয়া আশ্রমে প্রত্যাবর্তন পূর্বক বিশ্রাম করিলেন।

রাত্র প্রভাত হইল। আজ শ্রীগুণ্ডিচামার্জন। বলরাম বাবুর উপর যাবতীয় দ্রব্য সংগ্রহের ভার। তিনি সমস্ত যোগার করিয়া মঠে আসিলেন। বলরামের ভক্তিভাব এবং কাৰ্য্যকৌশল দেখিয়া সকলেই উহার উপর পরম প্রীত হইলেন। বাবাজী মহাশয় সংকীর্তন লইয়া জগন্নাথদেবের দর্শনে গমন করিলেন। মন্দিরে যাহাদের সহিত দেখা হইল, তাঁহাদিগকে অপরাহ্নে গুণ্ডিচামার্জনলীলায় যোগদান করিবার জন্ত অহুরোধ করিয়া আশ্রমে প্রত্যাগমন করিলেন। ক্রমে সকলে স্নানাহ্নিকাদি শেষ করতঃ মহাপ্রসাদ গ্রহণান্তে প্রভুপাদ শ্রীধ্বজ রঘুনাথ দেব গোস্বামী মহাশয়কে অগ্রবর্তী করিয়া কীর্তন করিতে করিতে গুণ্ডিচাবাড়ী গমন পূর্বক পূর্ববৎ অতি সমারোহের সহিত মন্দির মার্জন, কালন, জলকেলি, মহাপ্রসাদসেবা প্রভৃতি লীলা সমাধা করিয়া আশ্রমে প্রত্যাগমন করিলেন।

রাত্র প্রভাত হইল । সকলেই নিজ নিজ প্রাতঃকৃত্যাদি শেষ করিয়া প্রস্তুত হইলেন । বাবাজী মহাশয়ও স্নানাহ্নিকাদি সমাপন পূর্বক কীর্ত্তন করিতে করিতে মন্দিরে গমন করিলেন । আজ রথযাত্রা । তিনখানি রথ আসিয়া সিংহদ্বারে লাগিয়াছে । রথে উঠিবার জন্ত চার বাঁধা হইলে শ্রীশ্রীজগন্নাথদেব শুভ বিজয় করিলেন । সেদিন আর রথটান হইল না । পরদিবস বেলা নয়টার সময় টান আরম্ভ হইল । বাবাজী মহাশয় পূর্ববৎ রথাগ্রে সগণে কীর্ত্তন নর্ত্তন করিতে লাগিলেন । সাতদিনে শ্রীজগন্নাথদেব শ্রীগুণ্ডিচা মন্দিরে উপস্থিত হইলেন । বাবাজী মহাশয়ের সঙ্গিগণ প্রত্যহ কীর্ত্তন লইয়া গুণ্ডিচা মন্দিরে যাতায়াত করিতে লাগিলেন । ক্রমে নবম দিনে যাত্রা শেষ করিয়া জগন্নাথদেব নিজমন্দিরে শুভাগমন করিলেন ! এইরূপ কীর্ত্তনানন্দে বাবাজী মহাশয় দিন যাপন করিতে লাগিলেন !



উড়িয়া ভ্রমণ !*

কেন্দ্রাপাড়া গমন ।

কেন্দ্রাপাড়ার জমিদার ভক্তপ্রবর শ্রীযুক্ত বাবু শ্রীমন্সুন্দর নরেন্দ্র জগন্নাথদেবের রথযাত্রা উপলক্ষে শ্রীধাম পুরীতে আসিয়াছেন । তিনি সগণে বাবাজী মহাশয়কে একবার কেন্দ্রাপাড়ায় লইয়া যাইবার জন্ত বহুদিন হইতে বিশেষভাবে অমুরোধ করিতেছেন । একদিন প্রভাতে বাবাজী মহাশয় প্রাতঃকৃত্য সমাপন পূর্বক কাঁজপীটা মঠে বসিয়া আছেন, এই সময়ে শ্রীমন্সুন্দর বাবু উপস্থিত হইয়া দণ্ডবৎ প্রণাম করতঃ ইহার চরণ ধারণ পূর্বক কাঁদিয়া কাঁদিয়া সেই দিনই কেন্দ্রাপাড়া যাইবার জন্ত বিশেষভাবে আগ্রহ প্রকাশ করিতে লাগিলেন । বাবাজী মহাশয়ও তাঁহার কথায় সন্তুষ্ট হইয়া জগন্নাথ দর্শন, সমুদ্রস্নানাদি সমাপনপূর্বক মহাপ্রসাদ পাইয়া কিঞ্চিৎ বিশ্রাম করিলেন ।

“অপরাহ্নে বহু ভক্তসমাগম হইতে লাগিল । তাঁহাদের সহিত নানারূপ তত্ত্বকথা আলোচনার পর উড়িয়া ভ্রমণে যাইবার জন্ত বিদায় গ্রহণ করিতে লাগিলেন । ক্রমে সন্ধ্যা উপস্থিত হইলে রাধাকান্ত দেবের আরতি দর্শন করতঃ দণ্ডবৎ প্রণাম পূর্বক রাধাকান্ত জিউর সেবার জন্ত দুই তিন মূর্ত্তি রাখিয়া সগণে নাম করিতে করিতে পুরী ষ্টেশনে উপস্থিত হইলেন ।

*কেন্দ্রাপাড়ার জমিদার শ্রীযুক্ত বাবু শ্রীমন্সুন্দর নরেন্দ্র মহাশয়ের নিকট এই ঘটনাটি পাওয়া গিয়াছে ।

শ্রামসুন্দর বাবু পূর্ব হইতেই সমস্ত বন্দোবস্ত করিয়াছিলেন । ইহারা গাড়িতে উঠিয়াই নাম করিতে আরম্ভ করিলেন । রেলওয়ে কর্মচারীদের মধ্যে কাহারও কাহারও নামে বাধা দিবার ইচ্ছা থাকিলেও বাবাজী মহাশয়কে দেখিয়া আর কেহ কিছু বলিলেন না । বাবাজী মহাশয় এবং ইহার প্রধান প্রধান কয়েকজন সঙ্গীদের জন্ত শ্রামসুন্দর বাবু ইন্টারক্লাসের টিকিট করিবার অভিপ্রায় প্রকাশ করিলে বাবাজী মহাশয় তাহাতে অমত করিয়া বলিলেন, “দেখ শ্রামসুন্দর ! একসঙ্গে আহারে বসিয়া ব্যক্তিগত তারতম্য করা এবং যানারোহণাদিতে উচ্চ নীচ বিচার করিয়া চলা সম্পূর্ণ বৈষম্যবর্জিত। মহাপ্রভু নিজে আচরণ করিয়া জীবগণকে শিক্ষা দিয়াছেন । সময় সময় তিনি এমনও বলিয়াছেন যে, ‘ভাল ভাল দ্রব্য সকল ভক্তগণকে দিয়া আমাকে লাফরা ব্যাঞ্জন দাও ।’ অতএব যদি আমাকে ভালবাস এবং আমাকে সুখী করিতে চাও, তবে যাহাতে অল্প বাবাজী বৈষম্যবর্জিত বা ছেলেদের সহিত আহার ব্যবহারে আমার কোনরূপ তারতম্য না ঘটে, এ বিষয়ে বিশেষ লক্ষ্য রাখিবে ।” শ্রামসুন্দর বাবু একটু লজ্জিতভাবে বলিলেন, “আজ্ঞে সকলেরই ইন্টারক্লাসের টিকিট করি ?” বাবাজী মহাশয় নিষেধ করিয়া বলিলেন, “বাবা ! নিশ্চয়োজ্ঞানে অর্থ ব্যয় করিবার দরকার নাই । তোমাদের বৈষম্যসেবার সংসার । সদ্ভাবে ব্যয় কর, আনন্দ পাইবে ।” কাজেই তৃতীয় শ্রেণীর টিকিট করিয়া সকলে পরমানন্দে কটক পৌঁছিলেন । তথায় একদিন থাকিয়া তৎপরদিন বোটে কেদ্রাপাড়া রওনা হইলেন ।

যথাসময়ে বোট কেদ্রাপাড়ায় পৌঁছিল । শ্রামসুন্দর বাবুর ইচ্ছা, বাবাজী মহাশয়কে পাক্ষীতে করিয়া লইয়া যান ; কিন্তু বাবাজী মহাশয় কিছুতেই সম্মত না হইয়া সংকীর্ণন করিতে করিতে পদব্রজে রওনা হইলেন । সংকীর্ণনের ধ্বনিতে দশদিক মুখরিত হইল । চারিদিকে

হলস্থল পড়িয়া গেল।” “পুরী হইতে একজন মহাপুরুষ আসিয়াছেন, তাঁহার সঙ্গে কয়েকটা সখী আছেন। তাঁহারা নৃত্যাদি করিয়া থাকেন, ঐ মহাপুরুষ অতি মধুর সংকীৰ্ত্তন করেন” এই কথা অতি অল্প সময়ের মধ্যেই রাষ্ট্র হইয়া পড়িল; সুতরাং চারিদিক্ হইতে বহুলোক আসিয়া মিলিত হইতে লাগিল। সাধু বৈষ্ণবগণ কেদ্রাপাড়ায় সৰ্বদা যাতায়াত করিয়া থাকেন; কিন্তু ইহারা যেন কেমন এক নূতন ধরণের বৈষ্ণব! সকলেরই নূতন ধরণের চাদর বাঁধা—নূতন ধরণের নাম—নূতন ধরণের কীৰ্ত্তন—নূতন ধরণের নৃত্য। দেখিয়া শুনিয়া লোকসকল অত্যন্ত বিস্মিত হইতে লাগিল। বাবাজী মহাশয়ের সেই স্মধুর নৃত্যভঙ্গি দেখিয়া আপামর সাধারণ যেন বিমুগ্ধ হইয়া পড়িতেছে। এইরূপে অতি অল্পক্ষণের মধ্যেই গোবিন্দ দেবের মন্দিরে* পৌছিয়া সাষ্টাঙ্গ দণ্ডবৎ প্রণাম করিলেন। গোবিন্দদেবের ভুবনমোহন মূর্তি দর্শনে দুইটা নয়নধারায় বাবাজী মহাশয়ের বক্ষস্থল ভাসিয়া যাইতেছে। সৰ্ব্বাঙ্গে পুলকাবলী বিভূষিত। ইহার তাৎকালিক ভাবভঙ্গি দেখিয়া মনে হইতেছে যেন ইনি এ রাজ্যে নাই। তখন প্রেমে গরগর হইয়া ভাবগদগদকণ্ঠে পদ ধরিলেন।

আহা মরি মরি, কিরূপ মাধুরী

নাগরী নাগর রাজ ।

এ তিন ভুবনে, নাহিক তুলনা,

মদনমোহন সাজ ॥

আধ বরণ, চিকণ কালিয়া,

আধ কনক কাঁতি ।

নব জলধরে, জম্ম সৌদামিনী,

মিলল কতেক ভাঁতি ॥

*শ্রামহন্দর বাবুর ঠাকুরবাড়ীতে ।

আধ শিরে শোহে, ময়ূর মুকুট,
ঈষৎ বামেতে হেলা ।

আধ শিরে বেলী, জন্ম ভুজঙ্গিনী,
ময়ূর-সহিতে মেঙ্গা ॥

আধ ললাটে, চন্দন তিলক.
(জন্ম) জলদ মিলিত শলী ।

আধ ভালে শোহে, সিম্পূর কস্তুরী,
(জন্ম) অরুণে তিমির রাশি ॥

আধ গলে দোলে, বনফুল হার,
আধ গলে গজমতি ।

আধ নাসিকায়, মুকুতা দোলনী.
আধ নাসিকায় মতি ॥

আধ কটিতে, পীত ধটি শোহে.
আধ নীলিম সাড়ী ।

আধ করে শোহে, কনক বলয়া,
আধ করে নীলচুড়ি ॥

(দৌহার) কটিতে কিঙ্কিনী, চরণে নৃপুর.
মধুর মধুর বাজে ।

ডাহিনে ললিতা, বামে শ্রীরাধিকা,
শোহে মনমথ রাজে ॥

এইরূপ ভাবে বহু বহু পদ কীর্ত্তন হইতে লাগিল । আনন্দের অবধি
নাই । চারিদিক্ লোকে লোকারণ্য । কিছুক্ষণ কীর্ত্তনের পর কীর্ত্তন-
সমাপ্তি করিলেন । শ্রামহ্মন্সর বাবুর অপর চারি সহোদর আসিয়া
সাত্ত্বজ দণ্ডবৎ প্রণামপূর্ব্বক করষোড়ে দাঁড়াইয়া রহিলেন । বাকাজী

মহাশয় উহাদিগকে আলিঙ্গন দানে কৃতার্থ করতঃ নানাবিধ কুশল প্রশ্ন জিজ্ঞাসা করায় তাঁহারা অতি বিনীত ভাবে যথাযথ উত্তর দিয়া গোবিন্দদেবের ঝুলনঘরে ইহাদিগের থাকিবার স্থান নির্দিষ্ট করিয়া দিলেন । বাবাজী মহাশয় এবং ইহার সঙ্গিগণ কিঞ্চিৎ বিশ্রাম করিতেছেন, এই সময়ে গোবিন্দ জিউর 'আরতি বাজিয়া উঠিলে ইহারা সকলে আরতি দর্শনান্তে আরতি কীর্তন আরম্ভ করিলেন । এদিকে গোবিন্দদেবের নানাবিধ ভোগের ষোগাড় হইতে লাগিল । রাত্রি আন্দাজ একটার সময় সকলে পরমানন্দ সহকারে গোবিন্দ জিউর মহাপ্রসাদ পাইয়া বিশ্রাম করিলেন ।

অষ্টপ্রহর কীর্তন ।

গোবিন্দজিউর বাড়ীতে প্রত্যহই সংকীৰ্তন চলিতে লাগিল । নিত্য নূতন পদ—নিত্য নূতনভাবে সংকীৰ্তন । কয়েকদিন যায় একদিন প্রাতঃকালে বাবাজী মহাশয় শ্রামস্থলের বাবুকে ডাকিয়া বলিলেন, “দেখ শ্রামস্থল ! অনেকদিন যাবৎ অষ্টপ্রহর কীর্তন হয় না ; অতএব নিতাইর ইচ্ছায় একটা অষ্টপ্রহর কীর্তন হউক ।” শুনিয়া শ্রামস্থলের বাবু দ্বষ্টচিত্তে বলিলেন, “আজ্ঞে কিরূপভাবে কি কি ষোগাড় করিতে হইবে এবং কোথায় স্থান নির্দেশ করা হইবে ?” তখন বাবাজী মহাশয় অষ্টপ্রহরের প্রয়োজনীয় দ্রব্যসকল উল্লেখ করতঃ উহাদের ওয়াসের* উত্তর পার্শ্ব দোতলা কোঠার সম্মুখে অষ্টপ্রহরের স্থান নির্দেশ করিয়া দিলে ক্রমে সমস্ত ষোগাড় হইতে লাগিল ।

আজ অষ্টপ্রহর নামকীর্তনের অধিবাস । বেলা আন্দাজ সাড়ে আটটার সময় সংবাদ আসিল যে শ্রামস্থলের বাবুর কনিষ্ঠ ভ্রাতা গোকুল

* নিজ বাটীর ।

বাবুর অবস্থা অতি শোচনীয়। বাবাজী মহাশয় গ্রামস্থল্যর বাবুকে জিজ্ঞাসা করিলেন, “শ্যামসুন্দর ! গোকুলের কি অস্থখ বল দেখি ?”

শ্যামসুন্দর । আজ্ঞে অনেকদিন হইতে তাহার শূলবেদনা আছে । উহার প্রতিকারের জন্ত বহু বহু চেষ্টা করা হইয়াছে ; কিন্তু কিছুতেই কোন ফল হয় নাই । সংপ্রতি কয়েকদিন হইল, ভয়ানক কম্প উপস্থিত হইয়াছে । সে কম্প দেখিলে মনে হয় এই মুহূর্ত্তেই প্রাণ বাহির হইয়া যাইবে । অনেক বড় বড় ডাক্তার দেখান হইল ; কলিকাতা হইতে অনেক ঔষধ আনা হইয়াছে ; কিন্তু কিছুতেই কিছু হইতেছেন । সংপ্রতি যেরূপ অবস্থা দাঁড়াইয়াছে, তাহাতে রক্ষা পাওয়া সুকঠিন । এতই অসহ যন্ত্রণাভোগ করিতেছে যে দেখিলে হৃদয় বিদীর্ণ হইয়া যায় ।

বাবাজী । সে কোথায় আছে ?

শ্যামসুন্দর । এই যে আমাদের কাছারীবাড়ীর একপার্শ্বে একটি কুঠরীতে রাখা হইয়াছে ।

বাবাজী । কি খাওয়া দাওয়া করে ?

শ্যামসুন্দর । আজ্ঞে খাওয়া ত দূরের কথা—একটু দুধ পর্য্যন্তও গলাধঃকরণ হইতেছে না ।

বাবাজী । আহা ! ছেলেটা বড়ই কষ্ট পাইতেছে । চল, একবার দেখিয়া আসি ।

এই বলিয়া শ্যামসুন্দরের সঙ্গে গোকুলের নিকট গমন করিলেন । গোকুল একখানি খাটের উপর শয়ন করিয়া আছে । অতি ক্লীণকার—অনবরত কম্প হইতেছে । চারি পাঁচজন উহার হাত পা ধরিয়া বসিয়া আছে । সকলেরই মুখ স্নান । বাবাজী মহাশয় খাটের এক পার্শ্বে উপবেশনপূর্ব্বক গোকুলের বুকের উপর হাত দিয়া বলিলেন, “গোকুল ! কেমন আছ বাবা ?” গোকুলের বাক্শক্তি রহিত ; সে কম্পিতকলেবরে

কাতর নয়নে বাবাজী মহাশয়ের মুখপানে তাকাইয়া যেন চিরকালের মত ইহার চরণে আত্মসমর্পণ করিল, বাবাজী মহাশয়ও মনে মনে কি ভাবিলেন, তিনিই জানেন । হঠাৎ চোখে জল আসিল—সর্বোচ্চ পুলকা-বলীতে ভূষিত হইল । গোকুলের বৃকের উপর বাবাজী মহাশয়ের দক্ষিণ হস্ত রহিয়াছে । ক্রমে ইহার দেহ কম্পিত হইতে লাগিল । ভয়ানক দৃশ্য ! উভয় দেহের কম্পে পার্শ্বস্থিত লোকসকল এবং দ্রব্যাদি যেন কি এক ভীষণ ভরঙ্গ মধ্যে পতিত হইয়া হাবুডুবু খাইতে লাগিল । ক্ষণকালমধ্যে জলে জল মিশিয়া গেল অর্থাৎ বাবাজী মহাশয়ের কম্পের মধ্যে গোকুলের কম্প আসিয়া প্রবেশ করিল । গোকুল উঠিয়া বসিল এবং বাবাজী মহাশয়ের ত্রিচরণ নিজ মস্তকে ও বক্ষদেশে ধারণ করিয়া বহু জন্মার্জিত তাপের শাস্তি করিল তখন বাবাজী মহাশয় জিজ্ঞাসা করিলেন, “গোকুল ! এখন সুস্থ আছ ? কোনরূপ কষ্ট অনুভব হইতেছে না ত ?

গোকুল । আজ্ঞে আপনার ক্রুপায় আমি পরম শাস্তি লাভ করিয়াছি । সম্প্রতি দৈহিক বা আন্তরিক কোনরূপ আলাময়ঙ্গণা নাই ।

বাবাজী । এই সমস্ত শিশি ও বোতলে কি আছে ?

গোকুল । আজ্ঞে এই অস্থখের জন্য কলিকাতা হইতে ঔষধ আনা হইয়াছিল ।

বাবাজী । আরও ঔষধ থাইবার মন আছে ?

গোকুল । আজ্ঞে আপনার যাহা আদেশ হইবে, আমি তাহাই করিতে প্রস্তুত আছি ।

বাবাজী । আচ্ছা আমি যদি এইগুলি এখন জলে ফেলিয়া দিতে বলি, তুমি পারিবে কি ?

গোকুল । আপনার ক্রুপা হইলে নিশ্চয়ই পারিব ।

বাবাজী । আচ্ছা ! তবে এই ঔষধগুলি তোমাদের ঐ গোবরা

নদীতে নিজ হস্তে ঢালিয়া ফেল ত ।

গোকুল তৎক্ষণাৎ দৃষ্টচিহ্নে অনুমান চারিশত টাকার ঔষধ বিনা বিচারে গোবরা নদীতে ঢালিয়া দিয়া আসিল । আসিয়াই বাবাজী মহাশয়ের চরণে সাষ্টাঙ্গ দণ্ডবৎ প্রণতি করিবামাত্র ইনি উহাকে উঠাইয়া আলিঙ্গন করিলেন । হঠাৎ গোকুলের ঈদৃশ অবস্থা পরিবর্তনে সকলেই পরমানন্দিত ও বিস্মিত হইলেন এবং বাবাজী মহাশয়ের অলৌকিক শক্তির কথা লইয়া সমালোচনা করিতে লাগিলেন । শ্যামসুন্দর বাবুর আনন্দের আর অবধি রহিল না । ক্রমে ইহারা স্নানাহিকাদি করিয়া মহাপ্রসাদ পাইলেন । গোকুলও বাবাজী মহাশয়ের আদেশে স্নান করিয়া ইহার অধরাযুত পাইল ।

দেখিতে দেখিতে সায়ংকাল উপস্থিত হইলে বাবাজী মহাশয় গোবিন্দ জীউর আরতি অস্ত্রে আজ্ঞামালা ও চন্দনাদি লইয়া অধিবাস কীর্তন করিলেন । যথানিয়মে পূর্ণঘটস্থাপন ও খোলমঞ্চলাদি সংকীৰ্তন মহোৎসবের অধিবাস শেষ করিয়া শ্যামসুন্দর বাবুদের পাঁচ ভাইকে আদেশ করিলেন, “তোমরা পাঁচ ভাই আগামী কল্য অতি প্রত্যাষে গাত্ৰোত্থান করিয়া গোবিন্দ জীউর মন্দিরে উপস্থিত হইবে ।” শুনিয়া সকলে অতি দৃষ্টচিহ্নে বাবাজী মহাশয়ের কথায় স্বীকৃত হইলেন । পরদিন অতি প্রত্যাষে শ্যামসুন্দর বাবুরা পাঁচ ভাই স্নানাদি করিয়া গোবিন্দজীউর মন্দিরে উপস্থিত হইবামাত্র বাবাজী মহাশয় গোবিন্দজীউর বড় পূজারী আনন্দ পাণ্ডাকে বলিলেন, “দেখ তোমাদের মন্দিরমধ্যে যে গোপাল যন্ত্র আছে, তাহার একটু চরণামৃত দাও ত ।” পূজারী শশবাস্তে সেই যন্ত্রের চরণামৃত আনিয়া বাবাজী মহাশয়ের হাতে দিবামাত্র ইহার সর্কশরীর রোমাঞ্চিত হইল এবং ছুটি চোখের জলে মুখ বুক ভাসিয়া বাইতে লাগিল । তখন গদগদকণ্ঠে সঙ্গিগণকে নাম করিতে বলিলে সকলে সমন্বয়ে “ভজ

নিতাই গৌর রাধেশ্যাম । জপ হরে কৃষ্ণ হরে রাম” এই নাম ধরিল । জগমোহনে প্রায় শতাধিক লোক । বাবাজী মহাশয় গোবিন্দকীডর বারান্দায় থাকিয়া দক্ষিণ হস্তের তর্জনী উত্তোলনপূর্বক প্রত্যেককে লক্ষ্য করিয়া কি মন্ত্র উচ্চারণ করিলেন তিনই জানন । সংকীর্ণনরোলে কেবলমাত্র “ওঁ ওঁ” এই শব্দ শুনা যাইতে লাগিল । ক্ষণকাল পরে উপস্থিত জনমণ্ডলী সমকালীন উচ্চৈঃস্বরে রোদন করিতে আরম্ভ করিল । কেন কি উদ্দেশ্যে কাঁদিতেছে, কেহই অবগত নহে । প্রায় অর্দ্ধঘণ্টাকাল এইরূপ ভাবে কাটিয়া গেলে বাবাজী মহাশয় সকলকে লইয়া যথানির্দিষ্ট স্থানে অষ্টপ্রহর নামকীর্ণন আরম্ভ করিলেন । অপূর্ব নামের ধ্বনিতে দিবাগুল মুখরিত হইল । সকলেই মাতোয়ারা—বাহস্বতি রহিত । ক্রমে যেমন বেলা বাড়িতে লাগিল, লোকসংখ্যা তেমনই বৃদ্ধি পাইতে লাগিল । কি আশ্চর্য্য ! কেন্দ্রাপাড়া হইতে পাঁচক্রোশ মধ্যে যত সংকীর্ণনের দল আছে, সকলেই আসিয়া কীর্ণনে যোগ দিতে লাগিল । মানী মর্যাদা খুঁজিতেছেন না—অর্থানী অর্থ প্রার্থনা করিতেছেন না, দলপতি নিমন্ত্রণের অপেক্ষা করিতেছেন না—ভঙ্গলোক নিজ সম্মানের প্রতি লক্ষ্য করিতেছেন না ; যেন কি এক অভিনব আকর্ষণে আকৃষ্ট হইয়া মন্ত্রমুগ্ধবৎ কীর্ণনে যোগ দিতেছেন । এক একটা দল খোল করতাল যোগে নামকীর্ণন করিতে করিতে কীর্ণনের মধ্যে প্রবেশ করিতেছে দেখিয়া বোধ হইতেছে যেন ক্ষুদ্র ক্ষুদ্র নদীসকল উত্তাল তরঙ্গমালায় নানাদিগদেশ প্রাবিত করতঃ গভীর গর্জনশীল অতলম্পর্শ মহাসমুদ্রে মিলিত হইতেছে । আনন্দসাগর যেন উখলিয়া উঠিল । নামের তরঙ্গ ক্রমেই প্রবল হইতে লাগিল । বালকবৃদ্ধ, পুরুষনারী আপামর সাধারণ জনগণ সেই তরঙ্গে হাবু ডুবু খাইতে লাগিল । কেন্দ্রাপাড়াবাসিগণ আজ অননুভূতপূর্ব আনন্দ উপভোগ করিতেছে । আবালবৃদ্ধবৃষা সকলেই যেন কি এক অপ্রাকৃত নেশার ঘোরে মাতিয়াছে ।

কীর্তনানন্দে উন্নত বালকগণ আত্মহারাভাবে নৃত্য করিতেছে । এই সময় তাহাদের মাতাপিতা উহাদিগকে কীর্তনমণ্ডলী হইতে বাড়ী লইয়া যাইবার দ্রুত হাতে ধরিয়াকে ; কিন্তু উলঙ্গ বালকগণ সেই অস্থাতেই “ভজ নিতাই গৌর রাধেশ্যাম, জপ হরে কৃষ্ণ হরে রাম” বলিয়া নৃত্য করিতেছে । যদি বা কেহ বলপূর্বক বাড়ী লইয়া যাইতেছে, সেও তাহাদের অজ্ঞাতসারে অতি দ্রুত বেগে আসিয়া পুনরায় কীর্তনে যোগ দিতেছে । পার্শ্বস্থ রাস্তা দিয়া রাখালবালকগণ গোমহিবাদি লইয়া যাইতেছিল ; নামের আকর্ষণে গোমহিবাদি পরিত্যাগপূর্বক আসিয়া কীর্তনে যোগ দিতে লাগিল । বোঝারগণ বোঝা মাথায় করিয়াই সংকীর্তনধ্বনিতে মুগ্ধ হইয়া গা দোলাইয়া নৃত্যকরিতে লাগিল । কীর্তনমণ্ডলী আলাতচক্রের স্থায় দ্রুতবেগে ঘুরিতেছে । উহার মধ্যেই বাবাজী মহাশয় এক এক জনকে ধরিয়া আলিঙ্গন করিতেছেন, আর সে দ্বিগুণতর উৎসাহে উৎসাহিত হইয়া নৃত্য করিতেছে । সংকীর্তনধ্বনিতে চতুর্দিক মুখরিত হইল । এইরূপভাবে অতিবেগে নামের প্রবাহ চলিতে লাগিল । সে আনন্দের কথা ভাষায় ব্যক্ত অসম্ভব ।

সুখের সময় বেন অতি শীঘ্রই চলিয়া যায় । দেখিতে দেখিতে দিবারাজ্য কাটিয়া গেল । পরদিবস বাবাজী মহাশয়ের আদেশে নিশান খুন্সি যোগাড় করিয়া নগরকীর্তন বাহির করা হইল । বাবাজী মহাশয় অগ্রে অগ্রে নাম ধরিয়া নৃত্য করিতে করিতে গমন করিতেছেন এবং পশ্চাৎ পশ্চাৎ অসংখ্য লোক পরমানন্দে নৃত্য করিয়া যাইতেছে । কেন্দ্রাপাড়া-বাসিবাসিনীগণ পরস্পর বলাবলি করিতেছে, “আমাদের সৌভাগ্যের সীমা নাই ; কেন্দ্রাপাড়া আজ ধন্য হইল । ধন্য শ্যামসুন্দর বাবু ! ঊহারই অনুগ্রহে আজ আমরা এ হেন মহাপুরুষের দর্শন পাইলাম । আমরা এখানে অনেক সাধুবৈষ্ণবের দর্শন করিয়া থাকি ; কিন্তু এরূপ

মহাশক্তিসম্পন্ন রসময়বিগ্রহ আর কখনও দেখি নাই,—দেখিব বলিয়া আশাও নাই।” এই প্রকারে যাহার যেরূপ ধারণা, সে সেইরূপ সমালোচনা করিতে লাগিল। ক্রমে কেন্দ্রাপাড়া গ্রাম পরিক্রমা করতঃ আপামর সাধারণকে প্রেমানন্দসাগরে ভাসাইয়া বেলা অনুমান একটার সময় প্রত্যাবর্তন পূর্বক কীর্তন সমাপ্ত করিলেন। সেদিন গোবিন্দ দেবের বিশেষ ভাবে ভোগরাগের ষোগাড় হইয়াছিল। ভোগের পর বহুসংখ্যক বৈষ্ণব এবং দ্বৈতী কাঞ্চালী মহাপ্রসাদ পাইল। বিদেশস্থ কীর্তনসম্প্রদায়ের লোকসকল বাবাজী মহাশয়কে একবার তাহাদের দেশে যাইবার জন্ত অনুরোধ করিলে, ইনি মধুর বাক্যে সকলের মনস্তুষ্ট সাধন করিয়া সকলকে বিদায় দিলেন।

পদ্মনাভ উদ্ধার ।

একদিন সদলবলে শ্রীগোবিন্দদেবের চন্দনপুকুরে স্নান করিতে গিয়া বাবাজী মহাশয়ের মনে কি খেয়াল হইল—বলিলেন, “দেখা যাক্, সঁতার দিয়া কে আগে চন্দনপুকুরের মধ্যস্থিত মন্দিরে যাইতে পারে ।” শ্যামহন্দর বাবু বলিলেন, “তবে সকলে একসঙ্গে সঁতার দিতে হইবে ।” বাবাজী মহাশয় বলিলেন, “না তোমরা সকলে আগে থাকিবে, আমি তোমাদের পশ্চাতে থাকিব ।” তাহাই হইল । বাবাজী মহাশয় হাতের সাহায্য ব্যতীত সঁতার দিতে লাগিলেন ; স্মৃতরাং সকলেই মনে করিলেন যে, নিশ্চয়ই ইনি পশ্চাতে পড়িবেন । বুক পর্য্যন্ত জলের উপর রহিয়াছে ; বৃকের উপর দুইখানি হাত রাখিয়া করজপ করিতেছেন—দর্শকবৃন্দ দেখিয়া অবাক্ । বোধ হইতেছে যেন পায়ে হাঁটিয়া যাইতেছেন । ক্ষণকাল মধ্যে জানি না কি কোশলে হঠাৎ ইনি সকলের অগ্রবর্তী হইয়া একেবারে সেই জলমধ্যস্থিত পর্বতাকার ভূমিতে গিয়া উপবেশন করিলেন । ক্রমে সকলেই সেই স্থানে উপস্থিত হইলেন । সকলেই পরিশ্রান্ত ; বাবাজী মহাশয় কিন্তু কিছুমাত্র ক্লান্তিবোধ করেন নাই । গোবিন্দজীউর বিহারভূমি দর্শন করিয়া পরমানন্দিতচিত্তে সকলকে বলিলেন, “দেখ, এইস্থানটা বড়ই মনোরম ! এই স্থানে বসিলে শ্রীকৃষ্ণভাস্করস্ব বিলাসমন্দিরের লীলাসকল মনে পড়ে ।” কিছুকাল এইভাবে নানারূপ লীলা-কথা আলোচনা করতঃ সকলে তীরে প্রত্যাবর্তন পূর্বক শুষ্ক বস্ত্রাদি পরিধান করিতে লাগিলেন । ভক্তগণ আনন্দময়ের লীলাখেলা দর্শনে পরমানন্দসাগরে নিমগ্ন হইতে লাগিলেন । ক্রমে সকলে নাম করিতে করিতে গোবিন্দদেবের সম্মুখে আসিয়া উপস্থিত হইলেন ।

এই সময়ে হঠাৎ অল্পমান চব্বিশ পাঁচশ বৎসর বয়স্ক একটা ব্রাহ্মণযুবক আসিয়া বাবাজী মহাশয়ের চরণ ভূইখানি ধারণপূর্বক অতি ব্যাকুল ভাবে রোদন করিতে লাগিল । কি জাতীয় ভাষায় কি যে বলিতেছে কেহই বুঝিতে পারিতেছেন না । কথার মধ্যে কিছু কিছু সংস্কৃত, কিছু কিছু ইংরাজী মিশ্রিত রহিয়াছে । সে স্থানে এমন কেহই ছিল না যে, উহার সেই রজে গড়াগড়ি, সেই আর্তি, সেই হৃদয়-বিদারক ক্রন্দন এবং ভক্তিমাখান গদগদ কণ্ঠের কাতরোক্তি প্রভৃতি দর্শন ও শ্রবণ করিয়া তাহার চোখে জল না আসিল । বাবাজী মহাশয় অতিশয় ব্যগ্রভাবে উহাকে উঠাইয়া আলিঙ্গন করিবামাত্র পুনরায় ভূতলে পতিত হইয়া অতি ব্যাকুলভাবে ছটফট করিতে লাগিল । মুখে কেবলমাত্র “গুরো ! কৃপাং কুরু” এই বুলি । কার সাধ্য তাহাকে স্থির করে ? তখন বলরামবাবু প্রভৃতি সকলেই উহাকে মন্ত্র প্রদান করিবার জন্ত বাবাজী মহাশয়কে অমুরোধ করিতে লাগিলেন । বাবাজী মহাশয়ও উহার ব্যাকুলতা দর্শনে নিতাইচাঁদের অভিমত জানিয়া উহার কর্ণে মন্ত্রপ্রদান করিলেন । ভাগ্যবান্ ব্রাহ্মণযুবক এতক্ষণে অভিষ্ট বস্তু লাভ করিয়া নিজেকে কৃতার্থজ্ঞানে “ধন্যোহস্মি কৃত-কৃতোহস্মি কুলং পবিত্রং জননী কৃতার্থা” ইত্যাদি বাক্য উচ্চারণ করিতে লাগিল । মন্ত্র প্রাপ্তির সঙ্গে সঙ্গে যুবকের দেহে সাস্থিক বিকারসকল প্রকাশ পাইতে লাগিল । সে কাতরভাবে বাবাজী মহাশয়ের চরণধারণ-পূর্বক প্রাণের আবেগে মিশ্রিত ভাষায় নিজের জীবনের সমস্ত ঘটনা বলিয়া ক্ষমা প্রার্থনা করিতে লাগিল । বাবাজী মহাশয় বাঙ্গালা ভাষায় যে সকল উপদেশ প্রদান করিলেন, নিত্যস্বরূপ ব্রহ্মচারী ইংরাজী ভাষায় তাহা উহাকে বুঝাইয়া দিতে লাগিলেন । বলরাম বাবু উহার পরিচয় জিজ্ঞাসা করায় সে ইংরাজীতে বলিল, “আমার নাম পদ্মনাভ । জাতিতে কান্তকুজ ব্রাহ্মণ । নিবাস মলিয়ালম্ দেশে অর্থাৎ কুমারিকা প্রদেশে

আমি এলু, এ পাশ করিয়াছি। সম্প্রতি বেদান্ত পড়িবার জন্য কানীধামে বাইতে মনস্থ করিয়াছি।” শুনিয়া সকলেই পরমানন্দ লাভ করিলেন। এই দিন হইতে পদ্মনাভ একটা দেবপ্রকৃতির লোক হইল। কণ্ঠে পাঁচকণ্ঠী তুলসীমালা, ললাটে ভিলক। হিংসা জিনিষটা তাহাতে আছে বলিয়া বোধ হইত না। এই হইতেই উক্ত পদ্মনাভ, বাবাজী মহাশয়ের সঙ্গে রহিল। ক্রমে বলরাম বাবু, শ্যামসুন্দর বাবু, ব্রজসুন্দর বাবু, বৃন্দাবন বাবু, গোকুল বাবু প্রভৃতি সকলেই বাবাজী মহাশয়ের নিকট মন্ত্র গ্রহণ করিলেন।

কিছুদিন যায় একদিন বাবাজী মহাশয় শ্যামসুন্দর বাবুর দৌতলার উপরে বসিয়া আছেন। শ্যামসুন্দর বাবু প্রভৃতি কয়েকজন কাছে বসিয়া নানা কথা জিজ্ঞাসা করিতেছেন। নীচের তলায় কয়েকজন চাকর ও অন্যান্য বাহিরের লোক রহিয়াছে। তন্মধ্যে কৃষ্ণমান সিংহনামক একটা লোক আস্তে আস্তে অপর একজনের নিকট বলিতেছে, “বড় বাবাজী মহাপ্রভু যেতে বড় বড় লোক মানস্কু ডাকি হাঁকি জোর জবরদস্তি করি মন্ত্র দেউছন্তি এ গরিবকু আর কিয় পচারে ? কৃষ্ণার ত আউ পরয়া নাহি, মন্ত্র পাইবারও সম্ভব নাই।” এদিকে বাবাজী মহাশয় হঠাৎ অতি চঞ্চলভাবে কৃষ্ণ কৃষ্ণ বলিয়া ডাকিতে লাগিলেন। তখন শ্যামসুন্দর বাবু বিস্মিতভাবে বলিলেন, “কৈ কৃষ্ণ ত এখানে নাই।”

বাবাজী। তুমি একজনকে পাঠাইয়া দাও। কৃষ্ণমান সিংহ নীচের তলায় রহিয়াছে। তাহাকে উপরে লইয়া আসুক।

তখন শ্যামসুন্দর বাবু একজনকে পাঠাইয়া দিলে সে কৃষ্ণকে বাবাজী মহাশয়ের কথা বলায় কৃষ্ণ অতি ভীতভীতচিত্তে দৌতলায় বাইয়া উপস্থিত হইল। বাবাজী মহাশয় একটু মুহূর্ত হাসিয়া বলিলেন, “কি রে কৃষ্ণ ! তুই কি বলিতেছিলি ? আমি কেবল বড় লোককে জোর জবরদস্তি করিয়া

মন্ত্র দেই, কিন্তু গরীবের প্রতি লক্ষ্য নাই ? বাবা ! এটা তোমার ভুল ; মন্ত্রদাতা নিতাইচাদের কাছে ছোটবড় সকলেই সমান ; বরং বড়লোক অপেক্ষা কান্ডালের প্রতি তাঁহার করুণা অধিক—কেবল সময় সাপেক্ষ ।” এই বলিয়া কৃষ্ণকে মন্ত্র প্রদান করিলেন । তখন কৃষ্ণ নিজ কল্লনার জগু অপরাধ হইয়াছ ভাবিয়া বড়ই হুঃখিতচিত্তে বাবাজী মহাশয়ের চরণধারণপূর্বক কাঁদিতে লাগিল । বাবাজী মহাশয় কৃষ্ণকে আলিঙ্গন পূর্বক অভয় প্রদান করিলেন । শ্যামসুন্দর বাবু বাবাজী মহাশয়কে জিজ্ঞাসা করিলেন, “আজ্ঞে, কৃষ্ণ কি বলিয়াছিল ?

বাবাজী । ওসব কিছুই নয় । উহার মনে একটা ভাব আসিয়াছিল যে, বড় বাবাজী মহাশয় কেবল বড়লোকদিগকেই জোর জবরদস্তি করিয়া মন্ত্র দেন ; কিন্তু ক্রুষ্ঠার ত আর পয়সা নাই বা বড়লোক নহে, তাহাকে আর কে জিজ্ঞাসা করে ?

শ্যামসুন্দর কৃষ্ণকে জিজ্ঞাসা করায় সে কাতরভাবে বলিল, “আজ্ঞে মূ তলে বসি ঠিক এহি কথা কহিখিলি, অন্তর্যামি প্রভু ত সবু জানি পারিলে মূ আউ কন কহিবা ।” শুনিয়া সকলেই অতিশয় বিস্মিত হইলেন । এইরূপে কেন্দ্রাপাড়ায় নানাবিধ ঐশ্বর্য্যামাধুর্য্যময়ী লীলাখেলায় পরমানন্দে দিন যাইতে লাগিল ।

লক্ষ্মীনারায়ণ জগদেব।

একদিন গ্রামস্বন্দর বাবুর ভ্রাতা জমিদার বাবু লক্ষ্মীনারায়ণ জগদেব সগণে বাবাজী মহাশয়কে প্রসাদ পাইবার জন্ত নিমন্ত্রণ করিয়াছেন। তাঁহার আন্তরিক অভিলাষ যে একটু লীলাকীৰ্ত্তন হয়; কিন্তু প্রকাশে কাহাকেও কিছু বলেন নাই। রাধাগোবিন্দের নৌকাখণ্ড উদ্ধীপনের জন্ত প্রাণের আবেগে নৌকা প্রস্তুত করাইয়া তাহাতে রাধাগোবিন্দ জিউকে বসাইয়াছেন। সন্ধ্যার পর বাবাজী মহাশয় নাম করিতে করিতে লক্ষ্মীনারায়ণ বাবুর বাড়ীতে উপস্থিত হইলেন। সুসজ্জিত নৌকাখানি জলের উপর একপ অপরূপভাবে ভাসমান হইয়াছে' যে, দেখিয়া সকলেই অতিশয় বিস্ময়ান্বিত হইলেন।

লক্ষ্মীনারায়ণ বাবু বাবাজী মহাশয়ের চরণে সাদাঙ্গদণ্ডবৎ প্রণামপূর্বক করযোড়ে বলিলেন, “আজ্ঞে একটা সখের যাত্রার দল আছে, আপনাদের আদেশ হইলে একবার উপস্থিত করা যায়।”

বাবাজী মহাশয় বলিলেন, “বেশ ত! অতি আনন্দের কথা।” বলিবামাত্রই লক্ষ্মীনারায়ণ বাবুর ভাগিনেয় কৃষ্ণ বাবু বিশেষ উত্তোষের সহিত গান আরম্ভ করাইয়া দিলে ইনি গান শুনিয়া অতিশয় তৃপ্তিলাভ করিলেন। যথাসময়ে গান সমাপ্ত হইলে বাবাজী মহাশয় স্বরচিত পদে মানস গঙ্গায় নৌকা বিহার কীৰ্ত্তন আরম্ভ করিলেন। লীলাটি যেন বর্তমান হইল। ইহার মুখে অপূর্ব পদাবলী শ্রবণে সকলেই বিমুগ্ধ। লোকে লোকারণ্য। যেন আনন্দের পাথর বহিয়া যাইতে লাগিল। লক্ষ্মীনারায়ণ বাবু আনন্দে অধীর হইয়া অবিরতধারে অশ্রু বিসর্জন

করিতেছেন। রাত্রি অধিক হওয়ায় বাবাজী মহাশয় অনিচ্ছাসঙ্গেও কীর্তন সমাপ্ত করিয়া কিঞ্চিৎকাল বিশ্রামান্তে মহাপ্রসাদ পাইতে বসিলেন। শ্রামসুন্দর বাবুরা পাঁচভাই তথায় উপস্থিত আছেন। লক্ষ্মী-নারায়ণ বাবু বাবাজী মহাশয়কে বলিলেন, “গুরুদেব! বহুদিন হইতে শ্রামসুন্দরের সহিত আমার একরূপ মনোমালিণ্য চলিয়া আসিতেছে যে, মহাবিপদাপন্ন হইলেও পরস্পর পরস্পরের বাড়ী যাওয়া ছিল না। আজ আপনার শ্রীচরণ-রূপায় আমাদের সকলের মানসিক বৈরতা দূর হইয়া পরমানন্দময় ভ্রাতৃত্বস্নেহের পরাকাষ্ঠা লাভ হইয়াছে। আপনি অশীর্বাদ করুন, আর যেন আমাদের প্রাণে সেই কুৎসিত ভাবের উদয় না হয়।”

বাবাজী মহাশয় বলিলেন, “এতদিন তোমাদের মায়া রাজ্যের বিষয়-সম্পত্তি লইয়া মায়া রাজ্যের সম্পর্কিত ভ্রাতায় ভ্রাতায় বিবাদ ছিল। শ্রীনিতাইচাঁদের রূপায় আজ তোমরা পরমার্থভ্রাতৃত্বপ্রেমে আবদ্ধ; স্বতরাং পরস্পর পরস্পরের হিতৈষী। এখনও যদি হৃদয়ে পূর্ববৎ বৈরতা বা হিংসা-দ্বेष-ঈর্ষ্যা প্রভৃতি বর্তমান থাকে, তবে পরমার্থপথের পথিক বলিয়া পরিচয় দেওয়াই ত ভুল। পরমার্থ অর্থাৎ সর্বশ্রেষ্ঠ বস্তুকে পরিত্যাগপূর্বক অতিতুচ্ছ পদার্থ লইয়া বিবাদ করা কি বুদ্ধিমানের কার্য? পরশমণি পরিত্যাগ করিয়া কাচ লইয়া আর ঝগড়া করিও না। এইবার ছয় ভায়ে একত্র হইয়া পরস্পর পরস্পরের উন্নতিকল্পে চেষ্টা কর। যেন তোমাদের আদর্শে জগৎ শিক্ষা পাইতে পারে।” বাবাজী মহাশয়ের এইরূপ কক্কাপূর্ণ উপদেশ শ্রবণে সকলেই কাঁদিয়া ফেলিলেন। তখন বাবাজী মহাশয়ের আদেশানুসারে জ্যেষ্ঠ কনিষ্ঠানুক্রমে দণ্ডবৎ প্রণাম এবং পরস্পর প্রেমালিঙ্গন করিয়া প্রেমময়ের রূপার পরিচয় দিতে লাগিলেন। ইহারা পরমানন্দে মহাপ্রসাদ পাইয়া নাম করিতে করিতে বাসায় প্রত্যাগমন পূর্বক বিশ্রাম করিলেন। এইরূপ ভাবে প্রায়

প্রত্যহই এক একস্থানে নিমন্ত্রণ হইতে লাগিল । যাহাদের বাড়ীতে যে দিন নিমন্ত্রণ হয়, তাহাদের প্রতিবেশী ও আত্মীয়স্বজনগণ সেই স্থানে উপস্থিত হইয়া বাবাজী মহাশয়ের নিকট মন্ত্র গ্রহণ করিয়া থাকেন ।

হ্যাতিসিংহের উদ্ধার ।

একদিন রাঘব মাহাস্তি নামক জৈনক ভক্তের বাড়ীতে সগণে বাবাজী মহাশয়ের নিমন্ত্রণ । বাবাজী মহাশয় অপরাহ্নে সঙ্গিগণ সঙ্গে নাম করিতে করিতে তাহার বাড়ী যাইতেছেন, পথিমধ্যে হ্যাতিসিংহ নামক একটা কুষ্ঠ ব্যাধিগ্রস্ত লোককে দেখিয়া বলিলেন, “হারে হ্যাতিসিংহ ! যাহা করিবার যথেষ্ট করিয়াছিস্, আর কেন ? এখনও কি চৈতন্য হইল না ?” শুনিয়া হ্যাতিসিংহ দণ্ডবৎ প্রণাম করতঃ কহিল, “বাবা ! আপনি কি বলিতেছেন, আমি ত কিছুই বুদ্ধিতে পারিতেছি না ।” তখন বাবাজী মহাশয় তাহার জীবনের আত্মোপাস্ত যাবতীয় বৃত্তান্ত মূখস্থের জায় বলিতে লাগিলেন । এক এক দিনের ঘটনা বলিতেছেন, আর হ্যাতিসিংহ কল্পিত হইতেছে । এইরূপে উহার ইহজন্ম এবং পূর্ব জন্মের সমস্ত পাপপুণ্যের কথা বলিবারাত্র সে ইহার চরণতলস্থানি ধরিয়া উচ্চৈঃস্বরে রোদন করিতে লাগিল । তখন তাহার মনে একরূপ আত্মগ্লানি উপস্থিত হইল যে, সে তাহার নিজের প্রত্যেক অঙ্গের অবস্থার উল্লেখ করিয়া বলিতে লাগিল, “দখুন বাবা ! আমি ঘোর পতিত ! আমার হাতের অঙ্গুলি দেখুন, প্রায় খসিয়া পড়িবার উপক্রম হইয়াছে । পায়ের অঙ্গুলিতে বল নাই ; যেন অসাড় হইয়া ক্রমে নষ্ট হইবার উপক্রম হইতেছে, আমি আপনার চরণে শরণাপন্ন হইলাম । আমার যদি এ পাপ হইতে আপনি নিস্তার না করেন, তবে আর আমার উপায় নাই । আমি এহেন অভিমानी মহাপাষাণ্ড যে আপনি

ভিন্ন জগতে আমাকে উদ্ধার করে, এমন আর কেহই নাই । দয়াময় ! শাস্ত্রে গুনিয়াছি যে, মহাপ্রভু কুষ্ঠব্যাধিগ্রস্ত দক্ষিণদেশীয় কোন ব্রাহ্মণকে কোল দিয়া ব্যাধিমুক্ত করিয়াছিলেন । প্রভু হে ! তাহার ভক্তি ছিল, আমার ভক্তিত ত নাইই, উপরন্তু আমি বিষ্ণু-বৈষ্ণবদেষী এবং দেব-দ্বিজ-গুরু-চরণে ঘোর অপরাধী । করুণাময় ! আমার ব্যবহারে আমার সহিত বাক্যালাপ করে, এমন ব্যক্তি এতদিন আমি দেখিতে পাই নাই । আমার বিশ্বাস, আপনার গায় অদোষদরশী প্রভু আমি আর পাইব না । যখন করুণা করিয়া পতিতের দুঃখে দুঃখী হইয়াছেন, পতিতপাবন ! তখন এবার পতিতের গতির উপায় না করিলে আর কোথায় দাঁড়াইব ?” এই বলিয়া একেবারে অর্ধৈর্য্যভাবে ভূমিতে পড়িয়া উচ্চৈঃস্বরে কঁাদিতে লাগিল ।

কুসুম-স্নিকোমল করুণহৃদয় বাবাজী মহাশয় অশ্রু-কম্পাদি সাম্বিক ভাব-পরিব্যাপ্ত-কলেবরে ত্র্যতীসিংহকে উঠাইয়া আলিঙ্গন পূর্বক উহার কর্ণে মন্ত্র প্রদান করিলেন এবং প্রসন্নচিত্তে বলিলেন, “বাবা ! তোর জন্ম-জন্মাজ্জিত যত কিছু পাপ তাপ সমস্তই আমি গ্রহণ করিলাম । তোর আর চিন্তা নাই । পাপের ফলে তোর এত দুর্দশা হইয়াছে । নিতাই-চাঁদের রূপায় আর কিছুই হইবে না । আজ হইতে তুই নিম্পাপ হইয়া নিতাইচাঁদের শ্রীচরণ চিন্তা করু অচিরে তোর সদগতি লাভ হইবে ।”

হ্রাতি । বাবা ! আমার ত কোনও সাধন ভজন করিবার সাধ্য নাই । আমার কি গতি হইবে ?

বাবাজী । তোর অণু কোন সাধন ভজনের প্রয়োজন নাই । এক মাত্র নাম করু । নাম হইতেই সর্বানর্থনাশ এবং সর্বশুভোদয় হইবে ।

হ্রাতি । প্রভু ! আমি কি নাম করিব, কিছুই ঠিক করিতে পারিতেছি না ; অতএব আপনি আজ্ঞা করুন, কোন নাম করা আমার কর্তব্য ।

❧ বাবাজী । একবার কৃষ্ণনামে যত পাপ হরে ।
 পাতকীর সাধ্য নাই তত পাপ করে ॥
 সেই কৃষ্ণ নাম জীব লয় বহুবার ।
 তথাপি না হয় প্রেমপুলকানুধার ॥
 তবে জানি অপরাধ আছেয়ে প্রচুর ।
 কৃষ্ণনাম বীজ তাহে না হয় অঙ্কুর ॥
 নিতাই গৌরান্ধে নাই সে সব বিচার ।
 নাম লইতে প্রেম হয় বহে অশ্রুধার ॥

“ বাবা ! নিতাই গৌরান্ধের রূপা ভিন্ন কলিজীবের অন্য গতি নাই ।
 পরমদয়াল অবতার নিতাই গৌরান্ধ-প্রভু যদি রূপা করিয়া কলিজীবের
 ঘরে ঘরে নামপ্রেম বিতরণ না করিতেন, তবে আমাদের কি গতি হইত !
 রত্নাকর কত যুগ তপস্যা করিয়া তবে রাম নাম উচ্চারণের শক্তি
 পাইয়াছিলেন ; আর কলিহত পতিত জীব সাক্ষাতে মহাপাপ করিতেছে,
 আর হরে কৃষ্ণ রাম গোবিন্দ উচ্চারণ করিতেছে—এ কাহার রূপা ?
 তাই বলি বাবা ! ভজিতে পার আর নাই পার দিনান্তে নিশান্তেও
 একবার সেই পরম করুণাময় নিতাই গৌরান্ধের উদ্দেশে মন্তক অবনত
 করিও । হেলার শ্রদ্ধায়ও একবার ‘হা নিতাই গৌরান্ধ’ বলিয়া ডাকিও,
 সর্বার্থ সাধন হইবে । দ্যুতিসিংহ যেন কি বলিতে চাহিয়া আবার ভয়ে
 সঙ্কুচিত হইল । অন্তর্যামী প্রভু উহার মনোভাব জানিতে পারিয়া
 বলিলেন, “দ্যুতিসিংহ ! চল্ তোরা বাড়ী যাই ।”

গুণিবামাত্র সে আত্মহারাভাবে নৃত্য করিতে করিতে বলিল, “হা
 অন্তর্যামী প্রভু ! আমার হৃদয়ে বাসনার উদয় হইবামাত্র আপনি তাহা
 পূরণ করিতে ইচ্ছা করিয়াছেন ? আমি নরাধম ; আমার মনে এই
 বাসনার উদয় হইয়াছিল ; কিন্তু বলিতে সাহস পাই নাই । প্রভু !

কল্পণ হয় ত এই রাস্তায় দাসের বাড়ী অগ্রসর হউন ।” তখন বাবাজী মহাশয় প্রেমানন্দে নাচিতে নাচিতে ত্র্যতিসিংহের বাড়ী গিয়া কিঞ্চিৎ মহাপ্রসাদ গ্রহণপূর্বক আবার নাম করিতে করিতে রাঘব মাহাস্তির বাড়ী আগমন করিলেন । শ্রামসুন্দর বাবু বাবাজী মহাশয়কে বলিলেন, “আজ্ঞে যাহার নাম করিলে সে দিন লোকের আহার হয় না এবং চন্দ্রশার সীমা থাকে না, আজ আপনি তাহার ঘরে মহাপ্রসাদ পাইলেন !” বাবাজী মহাশয় একটু মৃদু হাসিয়া বলিলেন, “শ্রামসুন্দর ! ও লোকটা খুব ভাল । কেবল বাহিরে অবস্থা দেখিলে ত চলিবে না, উহার অন্তঃকরণ বড়ই নিখল । অতি অল্প দিনের মধ্যেই তাহার পরিচয় পাইবে ।” বাস্তবিক কথা । বাবাজী মহাশয় কেন্দ্রাপাড়া ছাড়িয়া যাইবার কিছুদিন পর হইতেই উক্ত ত্র্যতিসিংহের অবস্থা পরিবর্তন হইয়া গেল । সর্বদা ভগবদ্গুণামুকীর্তন, ভাগবতপাঠ শ্রবণ সাধুসজ্জন-সাক্ষাৎ-বৈষ্ণবের প্রীতিভক্তি উহার যেন স্বাভাবিক বৃত্তি হইয়া পড়িল । তখন সকলে বুঝিল যে, বাবাজী মহাশয় যাহা বলিয়াছিলেন তাহা সূসত্য ।

ক্রমে দামোদর মোক্তারের বাড়ী, স্বদর্শন মোক্তারের বাড়ী ও অন্যান্য নানাস্থানে নিমন্ত্রণ হইতে লাগিল এবং বহুলোক বাবাজী মহাশয়ের নিকটে শিক্ষা গ্রহণ করিতে লাগিল । কেন্দ্রাপাড়া যেন আনন্দময় স্থান হইল । সর্বদা নামকীর্তন এবং বৈষ্ণব ও চুঃখী কাক্সালিদিগের সেবা হইতে লাগিল ।

একদিন একদল উড়িয়া যাত্রার দল আসিয়া বাবাজী মহাশয়কে বলিল,—“আজ্ঞে আমাদের বড়ই ইচ্ছা যে একবার আপনাকে আমাদের দেশী যাত্রা শুনাইব । অনুগ্রহপূর্বক আদেশ দিলে আরম্ভ করা যাইতে পারে ।” তখন বাবাজী মহাশয় শ্রামসুন্দরকে ডাকিয়া বলিলেন, “দেখ শ্রামসুন্দর ! একবার উড়িয়া যাত্রা শুনিতে হইবে ।” শ্রামসুন্দর বাবু

অতি দৃষ্টচক্ষে যে স্থানে অষ্টপ্রহর হইয়াছিল, সেই স্থানে যাত্রাপ্রাণের ষোগাড় করিয়া দিলেন । ঋবচরিত্রে পালা-গান আরম্ভ হইল । বাবাজী মহাশয় অনন্তচিন্তে বসিয়া গান শুনিতে লাগিলেন । গায়কেরাও দ্বিগুণতর উৎসাহে উৎসাহিত হইয়া গান করিতে লাগিল । যদিও তাহাদের গানের মধ্যে ভাব ও যুক্তিবিরুদ্ধ অনেক কথা বা গান এবং হাবভাব চালচলন রহিয়াছে, তথাপি বাবাজী মহাশয় তৎকালে কিছুই বলিলেন না ; বরং প্রশংসা করিতে লাগিলেন । একজন জিজ্ঞাসা করিল, “আজ্ঞে এইরূপ অযৌক্তিক ও ভাববিরুদ্ধ গান শুনিয়াও আপনি কিছুই বলিতেছেন না কেন ? বাবাজী মহাশয় হাসিতে হাসিতে বলিলেন, “দেখ, সত্যং জ্ঞাৎ প্রিয়ং ক্রদাৎ ন জ্ঞাৎ সত্যমপ্রিয়ং” এই মহা বাক্যটা সর্বদার ভরে সকলের স্মরণ রাখা প্রয়োজন । যত্বপি ইহাদের ভাবাদির বোধ কম, তথাপি উৎসাহ না পাইলে উদ্ভম ভঙ্গ হইয়া যাইবে । অতএব শিক্ষার প্রয়োজন হইলে সময়ান্তরে শিক্ষা দিলেই ভাল হয় ।” প্রাণিমাত্রের প্রাণে কোনরূপ উদ্বেগ দেওয়া বাবাজী মহাশয়ের চিরকাল স্বভাববিরুদ্ধ ছিল । সময়ান্তরে যাত্রার দলের অভিভাবককে ডাকিয়া বিস্তৃত ভাবতত্ত্ব বুঝাইয়া দিলেন । সেও পরমানন্দচিত্তে ইহার বাক্য শিরোধারণপূর্বক নিজেকে ধন্য মনে করিল ।

গোবিন্দদাদার বিদায় ।

একদিন প্রাতঃকালে বাবাজী মহাশয় অতি গভীরভাবে শ্রামসুন্দর বাবুদের কাহারীবাড়ীতে বসিয়া আছেন ; কাহারও সহিত কথাবার্তা নাই । ইহার সঙ্গিগণ প্রায় অনেকেই শ্রামসুন্দর বাবুদের বসতবাটীর

উত্তর দিকের দোতলায় থাকেন। বেলা অনুমান সাতটার সময় বাবাজী মহাশয় একখানি পত্র লিখিয়া গোবিন্দদাদার হস্তে দিবার জন্ত একটি ছেলের হাতে পাঠাইয়া দিলেন এবং পত্র পাইয়া সে কি বলে, তাহা শুনিয়া আসিতে বলিলেন। ছেলেটি পত্র লইয়া গোবিন্দদাদাকে দিলে তিনি পত্রখানি খুলিয়া পড়িতে লাগিলেন—

“ভাই গোবিন্দ ! পত্র পাঠমাত্র বিনা ওজরে হাঁটাপথে শ্রীধাম বৃন্দাবন রওনা হইবে। বৃন্দাবনে উপস্থিত হইয়া শ্রীরাধাকুণ্ডে বাস, ঝাড়ুগিরি সেবা এবং মাধুকরী বৃত্তি অবলম্বনে জীবনযাপন করিবে। সম্প্রতি আর আমার সঙ্গে দেখা হইবে না। শ্রীনিতাইচাঁদের ইচ্ছায় সময়মত স্থানান্তরে দেখা শুনা হইবে।” ইতি—

বৈষ্ণবদাসামুদাস

শ্রীরাধারমণ চরণ দাস।

পত্রখানি শুনিবামাত্র বেন সকলের মস্তকে বজ্রাঘাত হইল। সকলেই ব্যাকুলভাবে বলিতেছেন, “হায় কি হইল ! কি কারণে বাবাজী মহাশয়ের কুসুম-স্বকোমল রসময় হৃদয়খানি আজ বজ্র হইতেও কঠিন ভাব ধারণ করিল !”

ক্ষণকাল পরে গোবিন্দদাদা ধীরভাবে উত্তর করিলেন, “আচ্ছা— তাহাই হইবে। তাঁহার চরণে আমার দণ্ডবৎ। তিনি স্বখে থাকুন।” ছেলেটি ফিরিয়া আসিয়া এই তিনটি কথা বাবাজী মহাশয়কে বলিলে ইনি নীরবে কাহারীবাড়ীর পশ্চাদ্ভাগে প্রাতঃকৃত্য করিবার জন্ত গমন করিলেন। যাহারা সর্বদা বাবাজী মহাশয়ের কাছে থাকিয়া সেবার্থ্যাদি করে আশ্রয় তাহারাই আছে ; কিন্তু কাহারই মুখে রা নাই, সকলেই বিমর্ষ। বাবাজী মহাশয় এরূপ গভীরভাব ধারণ করিয়াছেন যে, কার

সাধ্য ইহার চোখের দিকে তাকাইয়া কথা বলে ? হঠাৎ নিত্যস্বরূপ ব্রহ্মচারী আসিয়া বলিলেন, “আজ্ঞা হয় ত আমি গোবিন্দদাদার সঙ্গে বৃন্দাবন গমন করি ।”

বাবাজী । স্বচ্ছন্দে ! আমার কোন আপত্তি নাই ।

নিত্যস্বরূপ । আজ্ঞে গোবিন্দদাদা আসিয়া একবার দণ্ডবৎ করিয়া গেলে হয় না ?

বাবাজী । না নিজ নিজ কর্তব্য পালনে তৎপর হও ; পরের কথায় থাকা নিম্প্রয়োজন ।

নিত্যস্বরূপ আর কোন কথা বলিতে সাহস না পাইয়া সাষ্টাঙ্গ দণ্ডবৎ প্রণামপূর্বক কাদিতে কাদিতে গোবিন্দদাদার নিকট গমন করিলেন । রাত্র চারিটার সময় উঠিয়া শ্রামানন্দদাস এবং নিতাই দাস নাম করিতে করিতে পরিক্রমায় বাহির হইয়াছিলেন । উহারা বেলা আন্দাজ আটটার সময় বাবাজী মহাশয়ের নিকট আসিয়া সাষ্টাঙ্গ দণ্ডবৎ প্রণামপূর্বক বলিলেন, “আজ্ঞে গোবিন্দদাদার সহিত শ্রীবৃন্দাবন যাইতে আমাদের বড়ই অভিনাষ হইতেছে, কি আজ্ঞা হয় ?”

বাবাজী । কোনই আপত্তি নাই, পরমানন্দে চলিয়া যাও এবং আর যদি কেহ যাইতে চায়, তাহাকেও লইয়া যাইতে পার ।

শ্রামহস্তর বাবু প্রভৃতি সকলে কাষ্ঠপুত্তলিকাবৎ দাঁড়াইয়া এইব্যাপার দেখিতেছেন ; কিন্তু কেহই কোন কথা বলিবার সাহস পাইতেছেন না । এদিকে গোবিন্দদাদা, নিত্যস্বরূপ ব্রহ্মচারী, শ্রামানন্দদাস এবং নিতাইদাস এই চারিজন শ্রামশ্রমণনে গদগদকণ্ঠে “ভজ নিতাই গৌর রাধে শ্রাম । জপ হরে কৃষ্ণ হরে রাম ।” এই নাম করিতে করিতে রওনা হইলেন । বাহারা বাসায় রহিয়াছেন, তাঁহারাও কাদিতেছেন, বাহারা গমন করিতেছেন, তাঁহারাও কাদিতেছেন, আবার বাহারা ইহাদের অবস্থা

দেখিতেছেন, তাঁহারাও কাদিতেছেন । চারিদিকে কান্নার রোল উঠিয়াছে । কিন্তু একমাত্র বাবাজী মহাশয় স্থির ধীর এবং গভীর ভাবে মুখ ধুইতেছেন । এই সময় গ্রামস্থানর বাবু অতি ব্যাকুলভাবে কাদিতে কাদিতে সাষ্টাঙ্গ দণ্ডবৎ প্রণাম করিয়া বাবাজী মহাশয়ের চরণধারণপূর্বক বলিতে লাগিলেন, “আজ্ঞে আমার একটা প্রার্থনা, আমি এই চারিজনের বৃন্দাবন ষাইবার ভাড়া দিয়া দিতেছি ; ইহাতে আপনি কোনও আপত্তি করিবেন না ।”

বাবাজী । আমার আপত্তি কি ? তাহারা যদি নিতে ইচ্ছা করে দিতে পার ।

গ্রামস্থানর বাবু গোবিন্দদাদার নিকট গিয়া বৃন্দাবন ষাইবার পাথের লইবার জন্ত অনুরোধ করিতে লাগিলে গোবিন্দদাদা উদাসপ্রাণে বলিলেন, “এখনও কি পরীক্ষা শেষ হয় নাই ? বলিহারি দয়া !” এই বলিয়া অতি দ্রুতপদে গমন করিলেন । যদিও গোবিন্দদাদার কষ্টলাঘবের জন্ত উহার সজ্জিগণ পাথের লইবার ইচ্ছা করিয়াছিলেন ; কিন্তু উহার তাত্ক্ষণিক অবস্থা দর্শনে আর কেহই লইতে সাহস পাইলেন না । গ্রামস্থানর বাবু বহু যত্নাগ্রহ করিয়াও বিফলমনোরথ হওয়ায় অতিশয় হতাশচিত্তে বাবাজী মহাশয়ের নিকট প্রত্যাবর্তনপূর্বক বলিলেন, “আমি বহু চেষ্টা করিয়াও তুর্ভাগ্যবশতঃ কৃতকার্য হইতে পারিলাম না, গোবিন্দদাদা কিছুতেই পাথের লইতে সম্মত হইলেন না ।” শুনিয়া বাবাজী মহাশয় অতিশয় স্তব্ধ হইলেন । এতক্ষণে মুখের ভাব পরিবর্তন হইল—চোখে জল আসিল,—গদগদকণ্ঠে গ্রামস্থানরকে জিজ্ঞাসা করিলেন, “শ্যামস্থানর । যথার্থই গোবিন্দ চলিয়া গেল ?”

শ্যামস্থানর । আজ্ঞে আপনিই ও পাঠাইয়া দিলেন । আদেশ হয় ত এখনও আমি লোক পাঠাইয়া উহাদিগকে ফিরাইতে চেষ্টা করি ।

বাবাজী । না, না—এমন কাজ করিতে নাই ; উহার। শ্রীকৃন্দাবন ধামে যাইতেছে । ইহাতে কি বাধা দিতে আছে ?

স্বযোগ পাইয়া ললিতাদাসী বলিল, “আপনার হৃদয় যে এত কঠোর, ইহা আমরা পূর্বে জানিতে পারি নাই । কি আশ্চর্য্য ! যাইবার সময় লোকটাকে একবার দেখাও দিলেন না । ‘বজ্রাদপি কঠোরাণি যুদুনি কুসুমাদপি’,—যাহা শুনিয়াছিলাম আজ তাহা প্রত্যক্ষ করিলাম । এখন আবার কপট কান্না কাঁদিবার প্রয়োজন কি ?”

বাবাজী । তোমরা বোঝ না ; গোবিন্দের একটা সুসময় আসিতেছে । নিতাইর রূপায় সে খুব উন্নতি লাভ করিবে তিনি মঙ্গলময় ; কাহাকেও কষ্টদেওয়া তাঁহার ইচ্ছা নহে ।

ললিতা । প্রথমে দুঃখ-সাগরে ডুবাইয়া পশ্চাৎ সুখ দিবেন এই আশায় থাকা আমাদের ঞায় ক্ষুদ্র জীবের পক্ষে দুঃসাধ্য ।

বাবাজী । তাহা হইলে তোমাদের মতে তিনি অবিচারক বা নির্দোষ । এইটাই জীবের ভ্রম ; ইচ্ছাময় যাহা দ্বারা যে কার্য্য করাইবার ইচ্ছা করেন, কার্য্যে প্রবৃত্ত করাইবার সঙ্গে সঙ্গেই ‘তাহার হৃদয়ে সেইরূপ শক্তির সঞ্চার করিয়া থাকেন । তিনি আমাদের ঞায় পরিচ্ছিন্ন জ্ঞানবান্ নহেন । তিনি অন্তর্য্যামী ; সকলের অন্তরের ভাব বুঝিয়াই কার্য্য করিয়া থাকেন ।

ললিতা । আচ্ছা কি দোষে তাহাকে সঙ্গহাড়া করাইলেন ?

বাবাজী । তুমি কি বৃন্দাবনে যাওয়াটা দেশের মধ্যে পরিগণিত করিতে চাও ? বৃন্দাবনে শ্রীরাধাকুণ্ডে বাস, কাড়ুসেবা, মাধুকরীগ্রাস এইগুলিই মহাত্মাদিগের প্রধান প্রার্থনা ।

ললিতা । তাহা হইলে আমাদের প্রাণে এত দুঃখ হইতেছে কেন ?

বাবাজী । তোমরা স্বার্থপর মান্নার কীট । তোমরা মন্নে কর

বেঙ্গপেই হটক সঙ্গে জড়িত হইয়া থাকিলেই ভাল । তাহা কখনও নয় ।

ললিতা । বেশ আপনারা ই ত বলেন,—“সাধুসঙ্গ সাধুসঙ্গ সৰ্বশাস্ত্রে
কর । লবমাত্র সাধুসঙ্গ সৰ্ব সিদ্ধি হয় । সৎ সঙ্গানুষ্ঠান হুঃসঙ্গ ইত্যাদি ।”
আমি যদি নিজে ভাল হইতে পারি, তবে আর আমার সঙ্গের দরকার
কি ? আমি পায়ণ্ড নাস্তিক অবিশ্বাসী প্রকৃতি বাহাই হই না কেন,
সৎ সঙ্গের প্রভাবে নিশ্চয়ই আমার মতি পরিবর্তন হইবে ; কারণ
বস্তুশক্তি বুদ্ধির অপেক্ষা করে না ।

বাবাজী । ❀ কথাগুলি সমস্তই সত্য ; কিন্তু সঙ্গ শব্দে তোমরা
বাহা বুঝিয়াছ, সেইটাই ভুল । সঙ্গটী দৈহিক ক্রিয়া নহে, মানসিক ।
সঙ্গ অর্থে আসক্তি । এই অর্থেই শ্রীমন্তগুবদগীতার বর্ণিতাছেন :—

“ধ্যায়তো বিষয়ান্ পুংসঃ সঙ্গন্তেবুপজায়তে ।

সঙ্গাৎ সংজায়তে কামঃ কামাৎ ক্রোধোহভিজায়তে ॥

ক্রোধান্তবতি সন্মোহঃ সন্মোহাৎ স্থিতিবিলম্বঃ ।

স্থিতিক্রংশাদবুদ্ধিনাশো বুদ্ধিনাশাৎ প্রগল্ভতি ॥”

যে বস্তুটা অশুদ্ধ মনে ভাবনা করা যায়, তাহাতেই আসক্তি জন্মে ।
সেই আসক্তি বশতঃই তত্তদবিষয়ে কাম (অভিলাষ) জন্মিয়া থাকে ।
ক্রমে অভিলাষ হইতে ক্রোধ, ক্রোধ হইতে মোহ, মোহ হইতে স্থিতিক্রংশ,
স্থিতিক্রংশ হইতে বুদ্ধিনাশ এবং বুদ্ধিনাশ হইতে প্রাণবিনাশ হইতে পারে ।
এই সঙ্গের কথাই একটা গল্প মনে পড়িল—“কোন এক গ্রামে দুইটা ব্রাহ্মণ
ছিলেন । একটীর নাম দীননাথ অপরটীর নাম রঘুনাথ । ইহাদের
উভয়ের মধ্যে এতই বন্ধুতা ছিল যে, পরস্পর পরস্পরকে না দেখিলে অস্থির
হইতেন । উভয়েই উভয়ের মঙ্গলের জন্য ব্যস্ত—উভয়েই উভরকে সুখী
করিবার জন্য লালায়িত । কিন্তু দুইজনের প্রকৃতি ভিন্ন ভিন্ন । দীননাথ
সাধ্বিক আচারসম্পন্ন পরম বৈষ্ণব ; সৰ্বদা শ্রমণকীর্তনাদিপরায়ণ নৈষ্ঠিক

ভক্ত । রঘুনাথ উহার সম্পূর্ণ বিপরীত । সে অতিশয় দুঃখাচার, অসচ্চরিত্র ও ঘোর পাবণ্ড । একদিন দুই বন্ধু একসঙ্গে রাস্তার গমন করিতেছেন ; কিছুদূর বাইতে যাইতে দীননাথ বলিলেন,—“চল ভাই ! শ্রীমদ্ভাগবতপাঠ শুনিতে বাই । বৃথা কার্য্যে সময় মষ্ট করা উচিত নহে । এত সাধের মনুষ্যজন্ম পাইয়া যদি ভগবতুপাসনাই না করা হইল, তবে আর মানব জন্মের সার্থকতা কি ? আহাৰবিহারাদি ত পশুদেহেও আছে । অতএব চল ভাই ! শ্রীমদ্ভাগবতকথা শ্রবণে জীবন সফল করি ।”

রঘুনাথ । দেখ ভাই ! তোমার ঐ কথাতেই আমার রাগ হয় । এমন হৃন্দর মনুষ্য দেহ পাইয়া কেবল বৃথা কতকগুলি অসত্য লোকের সঙ্গদোষে উপবাস কর, নিরামিষ খাও, গায়ে কতকগুলি মাটি মাখিয়া থাক, আর এখানে ভাগবতপাঠ, ওখানে চরিতামৃতপাঠ প্রভৃতি শুনিয়া শুনিয়া দিন কাটাও । এ কি কুসংস্কার ? ভগবান্ যদি কেবল এইরূপ কষ্ট ভোগ করিবার জন্যই মনুষ্যজন্ম দিতেন, তাহা হইলে বিলাসের প্রবৃত্তি বা শক্তি দিবেন কেন ? আবার ভাবিয়া দেখ, নানাবিধ ইগদ্বি দ্রব্য (আতর, গোলাপজল, এসেন্স, পমেটম্, সাবান প্রভৃতি) সৃষ্টি করিবার কি দরকার ছিল ? তাই বলি, মনুষ্যজীবন ভোগের জীবন ; কত লক্ষ লক্ষ জন্ম কষ্ট করিয়া তবে মনুষ্যজন্ম লাভ হইয়াছে ! এক্ষণেও যদি ঐরূপ কষ্টভোগ করিতে হইল, তবে সুখ হইবে কবে ? ভগবানের ত একটা বিচায় করা উচিত । সামান্ত কোন রাজসরকারে বহুদিন কার্য্য করিলে পেন্সন হয় অর্থাৎ কোন কাজ না করিলেও ঘরে বসিয়া বেতন পাওয়া যায়, আর আমরা যে এত জন্ম কষ্ট ভোগ করিলাম, ইহাতে কি আর কার্য্যের অবসর হইতে পারে না ? অতএব তোমার ও সব চর্কু ছি ছাড়িয়া চল আমরা বাজারে বাই । অতি উপদেশ কিছু যদিও দ্রব্য ব্যবহার করিয়া পরম রূপসী কোন রমণীর আদরে মনোমুগ্ধ হইয়া থাকি



নানারূপ আমোদ প্রমোদে মানবজীবনের সার্থকতা সম্পাদন করি ।

এইরূপ ভাবে পরম্পর পরম্পরের মতের শ্রেষ্ঠতা প্রতিপন্ন করিয়া অপর বন্ধুকে নিজমতে আনিবার জ্ঞান বহু চেষ্টা করিতে লাগিলেন, কিন্তু কেহই সকলমনোরথ হইতে না পারিয়া অগত্যা উভয়ে নিজ নিজ অভিষ্ট স্থানে গমন করিলেন । একজন শ্রীমদ্ভাগবতপাঠ শুদ্ধিতে বসিলেন । অপর জন বেণ্ডালায় গিয়া নানারূপ আমোদ প্রমোদে মত্ত হইলেন । এই সময় বৈকুণ্ঠধামে দেবর্ষি নারদ ভগবানের নিকট বসিয়া নানারূপ কথোপকথন করিতেছিলেন । হঠাৎ ভগবান উচ্চহাস্য করিয়া উঠিলেন । তখন নারদ জিজ্ঞাসা করিলেন,—“প্রভো ! অসময়ে হঠাৎ এরূপ হাস্যের কারণ কি ?”

ভগবান্ । নারদ ! মর্ত্যলোকে দুইটি ব্রাহ্মণ একটা শ্রীমদ্ভাগবত শ্রবণ করিতে গিয়াছে এবং অপরটি বেণ্ডালায় গমন করিয়াছে । উহার পরস্পর সখ্যতাসূত্রে আবদ্ধহেতু উভয়ের গতি বৈপরীত্যের কথা ভাবিয়া আমার হাসি পাইল ।

নারদ । আজ্ঞে গতি বৈপরীত্য কি আমি বুঝিতে পারিলাম না ।

ভগবান্ । নারদ ! কালপূর্ণতাহেতু ঐ উভয় ব্রাহ্মণেরই এই সময় এককালীন মৃত্যু হইবে ; কিন্তু যে বেণ্ডালায় রহিয়াছে, তাহার বৈকুণ্ঠ আগমন হইবে এবং যে ভাগবতপাঠ শুনিতেছে, তাহার অধোগতি হইবে ।

নারদ । প্রভু ! তাহা হইলে শাস্ত্রও মিথ্যা, আপনার বাক্যও মিথ্যা ; কারণ আপনি বলিয়াছেন—

নাহং তিষ্ঠামি বৈকুণ্ঠে যোগিনাং হৃদয়ে ন চ ।

মন্তভক্তা যত্র গায়ন্তি তত্র তিষ্ঠামি নারদ ॥

অন্ততঃ—তুলসীকাননং যত্র যত্র পদ্মবনানি চ । পুরাণপঠনং যত্র তত্র সন্নিহিতো হরিঃ ॥ আপনি যে স্থানে উপস্থিত, সেই স্থানেই তো বৈকুণ্ঠ ।

তাহাতে আবার সান্নিধ্যলাভ । ইহাতেও যদি জীবের অধোগতি হয়, তবে আর সদগতি পাইবে কোথায় ? আমি ত আপনার ভাব কিছুই বুঝিতে পারিলাম না ।

ভগবান্ । নারদ ! যে ব্যক্তি ভাগবত শুনিবে, সেই ত সদগতি লাভ করিবে ! আর যে বেঞ্চালয়গমনাদি অসৎ কার্য্য করে, তাহার অসদগতি হইলে ত দোষ হইবে না ?

নারদ । সে ত শাস্ত্রবিধিই রহিয়াছে । যদি কেহ অসৎকার্য্য করে তাহার অধোগতি হইবে ।

ভগবান্ । তবে চল নারদ ! একবার আমরা মর্তলোকে যাই ।

এই বলিয়া ভগবান্ এবং নারদ উভয়ে সূক্ষ দেহ ধারণপূর্ব্বক যে স্থানে ভাগবত পাঠ হইতেছিল, সেই স্থানে গিয়া দেখেন, ব্রাহ্মণ আত্মহারা হইয়া কেবল ভাবিতেছে “হার ! আমার বহুকালের বন্ধু রঘুনাথ না জানি এখন কিরূপ ভাবেই আছে ! হয় ত মদ্যপান করিয়া বিভোর অবস্থায় বারাধনাসহ নানারূপ ক্রীড়াকৌতুকে সময় অতিবাহিত করিতেছে । আর বিলাসিনী সেই রমণী, তাহার দ্বিতল গৃহ নানাবিধ সুগন্ধি বস্তু বিলাসিতার সামগ্রী দ্বারা হয় ত কতই সুসজ্জিত করিয়াছে । আবার নানাবিধ অলঙ্কারে অলঙ্কৃত বিলাস-লালসাময়ী, নৃত্যগীতকলাভিজ্ঞা, পঙ্কজ-রূপবতী সেই বাররমণীসহ একাসনে উপবিষ্ট হইয়া না জানি রঘুনাথ কতরূপ হাস্য পরিহাসে মত্ত হইয়াছে তাহার চারিদিকে পরিচারিকাগণ নানারূপ সেবা পরিচর্যা করিতেছে ।” ইত্যাদি ভাবনার সঙ্গে সঙ্গে কাল পূর্ণ হওয়ায় এই সময় তাহার প্রাণবায়ু বহির্গত হইয়া গেল : কাহ্নেই যমদূত আসিয়া উহাকে তুই হাতে বাধিল ।

ভগবান্ । কেমন নারদ ! দেখিলে ত ভাগবতশ্রবণের ফল কিরূপ ?

নারদ । প্রভো ! এরূপ ভাগবতশ্রবণের ফল এইরূপ হওয়াই

দরকার । এখন একবার বেশ্যালায়ের ব্রাহ্মণের অবস্থা জানিবার জন্ত বড়ই কোতুল হইতেছে । অনুগ্রহ করিয়া সেই স্থানে চলুন ।

তখন ভগবান্ সেইরূপ অবস্থাতেই নারদের সহিত বেশ্যালায়ে গমন করিয়া দেখেন যে, বেশ্যালায়স্থিত ব্রাহ্মণ নানারূপ আমোদ প্রমোদে মত্ত আছে সত্য ; কিন্তু তাহার মন কিছু মথোই নাই । সে কেবল চিন্তা করিতেছে, “হায় ! আমার বহুদিনের পুরাতন বন্ধু সেই দীননাথ না জানি কি অবস্থায়ই আছে । হয়ত ভাগবতপাঠক উচ্চ আসনে বসিয়া পাঠ করিতেছেন, আর চারিদিকে সেই সব ছাপা মুদ্রাধারী ভক্তগণ বসিয়া আছে । একটি তুলসীবৃক্ষও সম্মুখে রহিয়াছে । পাঠক এক একটি শ্লোক বলিতেছেন, আর সকলে কাঁদিয়া অস্তির হইতেছে । এক একবার হয়ত পাঠকের এক একটি কথা শুনিয়া সকলে সমস্ত হরি হরিবোল বলিয়া উঠিতেছে । কেহ কেহ বা হরেকৃষ্ণ গোবিন্দ রাম নারায়ণ বলিয়া আনন্দে উন্নত হইতেছে ।” এইরূপ বলিতে বলিতেই তাহার প্রাণবায়ু বহির্গত হইয়া গেল । এদিকে বিষ্ণুদূত আসিয়া নানারূপ স্তবস্তুতি করতঃ উক্ত ব্রাহ্মণকে বৈকুণ্ঠে লইয়া গেল ।

ভগবান্ বলিলেন, “কেমন নারদ ! রহস্য বুঝিতে পারিলে ত ?”

নারদ । প্রভো ! আপনার রূপায় অনেকটা অনুভব হইয়াছে । তবে এখনও মনের সকল সন্দেহ মিটে নাই ; কারণ এতকাল যে লোক ভক্তি বাঞ্ছন করিল, শেষকালে সে এইরূপ অসদ্গতি প্রাপ্ত হইল, ইহার কারণ কি ?

ভগবান্ । কেন নারদ ! আমি ত জুরোজুরো বলিয়াছি—

“যং যং বাপি স্মরন্ ভাবং ত্যজ্যত্যন্তে কলেবরম্ ।

তং তমেবৈতি কৌন্তের সদা তদ্ভাবভাবিতঃ ॥”

সে যে এতকাল ভজন করিয়াছে এবং তাহার দরুণ যে স্বকৃতি তাহা

কখনই নষ্ট হইবে না ; কিন্তু মৃত্যুকালের ভাবটা প্রাপ্ত হওয়ার দক্ষণ গেই
স্বকৃতির ফলাফল প্রাপ্তির কিঞ্চিৎ বিলম্ব হইবে।

এইরূপ বলিতে বলিতে ভগবান্ এবং নারদ স্বস্থানে গ্রহান করিলেন ।
এখন বুঝিলে ত সজ্জ কাহাকে বলা যায়। ভগবান্ আরও বলিয়াছেন—

সতাং প্রসঙ্গান্নম বীৰ্য্যসংবিদো ভবন্তি হৃৎকর্ণরসায়নাঃ কথাঃ ।

তজ্জ্যোষনাদাশ্বপবর্গবজ্রানি শ্রদ্ধারতিভক্তিরহুক্রমিহুতি ॥

জ্যোষনাং সেবনাং অর্থাং রুচিপূরক অনন্তচিন্ত হইয়া শ্রবণ করিলে
তবে ভক্তি জন্মিবে। এইরূপ নানা কথোপকথনে অনেকক্ষণ কাটিয়া
গেল। বাবাজী মহাশয় শ্রান করিতে গমন করিলেন এবং অত্যন্ত সৰ্ব্ব
নিজ নিজ কার্য্যে প্রবৃত্ত হইলেন।

কৃষ্ণানন্দদাদার বিদায়।

কেন্দ্রাপাড়াবাসী আপামর সাধারণ জনগণ সকলেই আনন্দলাগরে
নিমগ্ন। কখন কীর্ত্তনানন্দ, কখনও ভগবন্তঙ্ক-কথার আলোচনা, কখন
বা ভক্তিগ্রন্থাদি পাঠ হইতেছে। যেন সর্বদাই সকলে কেমন একটা নেশার
ষোরে মাতিয়া দিন যাপন করিতে লাগিল। প্রায় প্রত্যহ রাতে ইহাদের
নিমগ্ন হইতেছে। দিবসে গোবিন্দদেবের প্রসাদ পান। কোন কোন
দিন বা বলদেবজীউর প্রসাদ আসিয়া থাকে। কেবল যে বাবাজী
মহাশয়ের গণেরাই প্রসাদ পাইতেছেন, তাহা নহে ; অত্যন্ত নানারূপ
ভাবে নানাজাতীয় লোকও আসিয়া ইহাদের সঙ্গে মিলিত হইতেছে।

ঢেঁকানল রাজধানী হইতে আন্দাজ সতের আঠার বৎসর বয়স হইল
ব্রাহ্মণবালক সংস্কৃত পণ্ডিতের জন্ত কেন্দ্রাপাড়ায় আসিয়াছে। একটীর

নাম রত্নাকর মিশ্র, অপরটির নাম গতিরুদ্ধ মিশ্র । উহারা উড়িষ্যাবাসী শাসনব্রাহ্মণ । উৎকলীয় ব্রাহ্মণের মধ্যে এই শ্রেণীর ব্রাহ্মণই সর্বাশ্রেষ্ঠ । আহালাদির সম্বন্ধেও উহাদের বিশেষ শাসন । উহারা প্রায়ই শাস্ত এবং শৈব । দুইটা বালকের মধ্যে রত্নাকর নামক বালকটি সর্বাধিক বাবাজী মহাশয়ের গণের সঙ্গেই বেড়ায় । যেখানে নিমন্ত্রণাদি হয়, সেই স্থানেই প্রসাদ পায় এবং গলায় তিন কণ্ঠী তুলসীর মালাও ধারণ করিয়াছে ; কিন্তু উহার সঙ্গী গতিরুদ্ধ মিশ্র এই সব আচরণে উহার উপর বড়ই অসন্তুষ্ট ; এমন কি অবসর পাইলেই উহার গলার মালা ছিঁড়িয়া দেয় এবং বৈষ্ণবের সঙ্গে আহালাদি করার জন্য বড়ই লাজ্জনা দিয়া থাকে । রত্নাকর মধ্যে মধ্যে এই সমস্ত কথা বাবাজী মহাশয়ের সঙ্গীগণকে জানায় । একদিন একজন বাবাজী মহাশয়ের নিকট এই ঘটনা বলায় ইনি বলিলেন, “দেখ, যে ব্যক্তি প্রথমে যে বিষয়ে বিদ্বেষী হয়, সে হয় ত সেই বিষয়ে অধিক আকৃষ্ট হইয়া থাকে । হয় ত এমন দিন আসিবে যে, যে গতিরুদ্ধ রত্নাকরের প্রতি ঘেব করিতেছে সেই পরম বৈষ্ণব হইবে এবং রত্নাকরের মতিপরিবর্তন হইয়া যাইবে ।” সঙ্গিগণ সকলেই বলিলেন, “এ নিতান্ত অসম্ভব ; অত বড় ঘোর পাষণ্ডের মতি পরিবর্তন হওয়া কি সহজ ?” তখন বাবাজী মহাশয় একটু হাসিয়া বলিলেন, “দেখ, রঙ্গিয়া নিতাইচাঁদ কি খেলা খেলান ।”

এইরূপ ভাবে কয়েকদিন যায় । একদিন প্রভাতে কৃষ্ণানন্দদাস আসিয়া বাবাজী মহাশয়কে বলিলেন, “দেশপর্যটন করিবার জন্য আমার বড়ই অভিলাষ হইয়াছে ; আপনার অনুমতি হয় ত একবার গমন করি ।”

বাবাজী । তা বেশ ! তোমার কোথায় যাইতে ইচ্ছা হইতেছে ?

কৃষ্ণানন্দ । ইচ্ছা যে তত প্রবল হইয়াছে, তাহা নহে । তবে একবার মনে হয় প্রেমানন্দ ভারতী মহাশয়ের সঙ্গে আমেরিকা প্রভৃতি স্থান পরিভ্রমণ করি ।

বাবাজী । বেশ ! পরম সুখের কথা । আজই অপরাহ্নে বাইবার ব্যবস্থা কর ।

এই বলিয়া নিজে স্নান করিবার মানসে গোবরা নদীতে গমন করিলেন । শ্রামশূন্য বাবু প্রভৃতি সকলেই বলিতে লাগিলেন, “আজ্ঞে এ নদীর জল ভাল নয় বলিয়া আমরা ইহাতে স্নানাদি করি না । আপনি এতদিন আসিয়াছেন ; কিন্তু কৈ কোন দিন ত এ নদীতে স্নান করেন নাই । আজ কি হইল ?”

বাবাজী । দেখ, শ্রোতশ্রুতী নদীর জল কখন মন্দ হইতে পারে কি ? গতিশীল বস্তুই উন্নতির সোপানে অগ্রসর হইতে পারে । অমুরাগ গতিশীল । এই অমুরাগ সতেই হউক আর অসতেই হউক, অমুরাগী বাস্তিকে উর্দ্ধগামী করিবেই করিবে । তাই বলি, সকলেরই গতিশীল হওয়া প্রয়োজন । গতি বন্ধ হইলেই উন্নতির আশা রহিত হইয়া থাকে । শ্রোত না থাকিলে জলে পাক ও গন্ধ হয় এবং পোক জন্মে ।

কৃষ্ণানন্দ । আচ্ছা, এই গতি যদি অসংপথে হয় ?

বাবাজী । গতিশীল হইলেই তাহার পরিবর্তন অতি সহজ । ষোর পাষণ্ড, মদ্যপারী, মহাদম্ভা, অতি নির্ধুর পরপীড়ক, পরধন-লোলুপ দাঙ্গিক বা ইন্দ্রিয়পরতন্ত্র ব্যক্তিও যদি গতিশীল হয়, তবে অতি যৎসামান্য কারণেই ঠিক সে যতটা নিরন্তরে ছিল, ততটা উচ্চ সীমায় উত্তীর্ণ হইবে । বিশ্বমঙ্গল তুলসীদাস, রত্নাকর, অজ্ঞামিল, জগাই-মাধাই প্রভৃতির জীবনী আলোচনা করিলেই বেশ বুঝিতে পারিবে যে গতিশীল বস্তু যে কোনও ভাবের উচ্চসীমা লাভ করুক না কেন, ভগবৎ-রাজ্যে অগ্রসর হওয়া তাহার পক্ষে অতীব সহজ ।

এইরূপ ভাবে নানা কথাবার্তায় পরমানন্দে স্নানাদি সমাপন পূর্বক বাসার আসিয়া ভিলক-আহিকের পর কীর্তন আরম্ভ করিলেন ।

আজিকার কীর্তন যেন এক নূতন রকমের । আজ প্রায় অধিক পরিমাণে ঐশ্বর্য্য ভাবের বিকাশ দেখা যাইতেছে । ক্রমে কীর্তন সমাপ্তি করিয়া মহাপ্রসাদ পাইলেন । আজ আর বিশ্রাম নাই । কৃষ্ণানন্দকে লইয়া নানারূপ তত্ত্বকথার আলোচনায় বেলা প্রায় তিনটা বজিল । তখন কৃষ্ণানন্দ সাশ্রনয়নে গদগদকণ্ঠে বলিল, “আজ্ঞে আমাকে কি রকম ভাবে চলিতে হইবে, একবার উপদেশ করিলে ভাল হয় ।”

বাবাজী । আমি আর কি বলিব ভাই ! তবে সর্বদা নিতাইচাঁদের উপর নির্ভর করিয়া চলিবে । কাহারও নিকট কোনরূপ অর্থাদি গ্রহণ করিবে না । প্রেমানন্দ ভারতী মহাশয়ের সহিত দেখা না হওয়া পর্য্যন্ত কোথাও কোনরূপ অষ্টপ্রহর সংকীৰ্ত্তন বা মহোৎসবাদি কার্য্যের অনুষ্ঠান করিবে না । যেদিন যেস্থানে থাকিবে, নিজ উদরভরণোপযোগী ভিক্ষা গ্রহণ করিবে । প্রয়োজনাতিরিক্ত বস্তু উপস্থিত হইলেও তাহা বর্জন করিবে । প্রাপ্ত বস্তু ছদ্মবে ধারণপূর্ব্বক একনিষ্ঠ হইয়া চলিবে ।

বলিতে বলিতে ইহার চক্ষু দুইটা রক্তবর্ণ এবং সজল হইল—সর্বোচ্চ পুলক ও কম্পে পরিব্যাপ্ত হইল । অর্দ্ধমুদ্রিতনেত্রে গদগদকণ্ঠে বলিলেন, “ভাই ! এস একবার প্রাণ ভরিয়া আলিঙ্গন করি । মনের সাধ মিটিয়া যাক্ । জানি না আবার কতদিনে প্রভু তোমাদের সহিত দেখা করাইবেন ।” এইবার কৃষ্ণানন্দ অগীরভাবে বাবাজী মহাশয়ের চরণ ধরিয়া কাদিতে লাগিলেন । তাঁহার সেই আশ্রি, সেই কারা এবং সেই প্রেমবিহ্বলভাষ দেখিয়া গুনিয়া সকলেই অবাক্ ! ক্ষণকাল পরে বাবাজী মহাশয় কৃষ্ণানন্দকে উঠাইয়া আলিঙ্গন করিলেন । দুইজনেই বিভোর ! দুইজনেই কাদিয়া অস্থির । দুইজনেই চোখের জলে দুইজন সিক্ত-কলেবর । অনুমান পনের বিশ মিনিট পরে বাবাজী মহাশয় কৃষ্ণানন্দকে বুক হইতে ছাড়িয়া দিলেন । কৃষ্ণানন্দ ভাবে বিভোর অবস্থায় মস্ত

মাতালের ঋণ অর্কমুদ্রিত আরক্তনেত্রে টলিতে টলিতে চলিলেন ; এমন কি একজনকে অবলম্বন না করিয়া উপর হইতে নীচে নামিবার ক্ষমতা হইল না । বাবাজী মহাশয়ের সঙ্গিগণ প্রায় সকলেই কৃষ্ণানন্দের সঙ্গে সঙ্গে গোবরা নদীর তীর পর্য্যন্ত গমন করিলেন । কেবলমাত্র ঠাঁকি আখড়ার মহাস্ত বলাদেবদাস, বলরামবাবু, জনৈক জটাধারী বাবাজী, গতিকৃষ্ণ মিশ্র নামক বালকটি এবং ললিতাদাসী এই কয়েকজন বাবাজী মহাশয়ের নিকটে রহিলেন । বাবাজী মহাশয় বলিলেন, “নিতাইচাঁদ কৃষ্ণানন্দকে অতিরিক্ত প্রেম-মদিরা পান করাইয়া দিয়াছেন ; সামলাইতে পারিলে হয় ।” কৃষ্ণানন্দ নদী পার হইবার জন্ত নৌকায় উঠিয়াছেন । অকাত্ত কয়েকজন তাহার সঙ্গে সঙ্গে উঠিয়াছে । যেমন নৌকাখানি অপর তীরের সমীপবর্তী হইয়াছে, অমনি কৃষ্ণানন্দ টলিয়া নদীর জলে পতিত হইলেন । তখন সকলে আস্তে আস্তে তাঁহাকে ধরিয়া তীরে তুলিলে তাঁহার মন্ততা কমিয়া গেল—নেশার ঘোরও ভাঙ্গিয়া গেল । তীরে উঠিয়া “ভজ নিতাই গৌর রাধে শ্রাম । জপ হরে কৃষ্ণ হরে রাম ॥” এই নাম করিতে করিতে গমন করিলেন ?

এদিকে বাবাজী মহাশয় দোতলার উপর বসিয়াছিলেন । হঠাৎ মনে কি খেয়াল উঠিল ; গতিকৃষ্ণ নামক সেই ব্রাহ্মণবালকটাকে কাছে বসাইয়া ললিতাদাসীকে বলিলেন, “শীঘ্র মালা লইয়া আইস ।” ললিতাদাসী ঘরের মধ্য হইতে এক ছড়া মালা আনিয়া দিলে বাবাজী মহাশয় নিজহস্তে মালাগাহটি উক্ত বালকের গলায় পরাইয়া পুনর্বার আদেশ করিলেন, “প্রমাদী ডোর কোঁপীন বহির্কাস আছে কি না দেখ ত ?” ললিতাদাসী বহু অন্বেষণ করিবার পর দেখিতে পাইল, কালাকুঞ্জদাস বাবাজী স্নান করিয়া গিয়াছে ; তাহার সেই ভিজা ডোর কোঁপীন বহির্কাস রহিয়াছে । তখন ব্যস্তভাবে তাহাই লইয়া আসিবামাত্র বাবাজী মহাশয় সেই ডোর

কোণীন বহির্কাস উক্ত বালককে পরাইয়া দিলেন এবং তাহার পরিধেয় অতি মলিন বস্ত্রখানি নিজ মস্তকে বাধিয়া একটা খোলা ও একটা ঘটা হাতে দিয়া কাশে মন্ত্রপ্রদানপূর্বক ভিক্ষা করিবার আদেশ করিলেন। ইত্যবসরে সঙ্গিগণ সকলে আসিয়া পৌঁছিলেন। তখন বাবাজী মহাশয় সকলকেই ঐ বালকের সঙ্গে ভিক্ষায় যাইতে আদেশ করিলেন। বালকটা কিন্তু মন্ত্রমুগ্ধের স্থায় ভীতভীতভাবে বাবাজী মহাশয় যাহা বলিতেছেন, তাই করিতেছে। সকলেই নাম করিতে করিতে নীচে বাইবে, এই সময় ললিতাদাসী বলিল, “আজ্ঞে ব্রাহ্মণবালক যদি এইরূপ ভিক্ষায় বাহির হয়, তবে আর উহার ঘরে যাওয়া চলিবে না।” বাবাজী মহাশয় একটু মুত হাসিয়া বলিলেন, “নিতাই উহার আর ঘরে যাইবার পথ রাখিয়াছেন কি? উহাকে বৈরাগী হইয়া দেশে দেশে বেড়াইতে হইবে।”

ললিতা। আজ্ঞে তাহা! হইলেও আপাতত সংসারে থাকিবে ত?

বাবাজী। আর না; এই হইতেই উহাকে এই সঙ্গে থাকিতে হইবে।

ললিতা। তবে এক কাজ করা যাক। এই বাসাতেই সাত জনে ভিক্ষা দেওয়া হউক। তাহা হইলেই সাত বাড়ী ভিক্ষার কার্য্য হইবে।

বলরাম বাবুও এই প্রার্থনা করিলে বাবাজী মহাশয় অগত্যা তাহাতেই স্বীকৃত হইলেন। তখন বলরাম বাবু তাহাদের নিজ বাড়ী হইতে চাউল আনাইয়া বাসার মধ্যেই ঘুরাইয়া ঘুরাইয়া ভিক্ষা করাইলেন। উক্ত বালকের নাম রাখিলেন, গোবর্দ্ধনদাস। বালক খোলাট্ট আনিয়া বাবাজী মহাশয়ের হাতে দিলে ইনি বলিলেন, “বাবা! তোমার জন্ম জন্মান্তরের বত পাপ তাপ সমস্ত আমি গ্রহণ করিলাম। তোমার কোনও ভয় নাই; নির্মল হইয়া নিতাইচাঁদকে ডাক, অচিরাৎ তিনি রূপ করিবেন।” এইবার কিন্তু বালকের মন কি রকম হইয়া গেল; সে ব্যাকুলভাবে কাঁদিয়া ফেলিল। তখন বলরাম বাবু বালকের হ

বাবাজী মহাশয়ের চরণতলে সাষ্টাঙ্গে প্রণাম । করাইলেন । বাবাজী মহাশয়ও বালককে উঠাইয়া কোলে লইলেন । সকলে ব্রাহ্মণবালকের ভাগ্যের প্রশংসা করিতে লাগিলেন । কিছুক্ষণ পরে বাবাজী মহাশয় নিজ হস্তে বালকের ডোর কোঁপীন ছাড়াইয়া কাপড় পরাইয়া দিলেন এবং বলিলেন, “তোমার এই ডেকই রহিল । সম্প্রতি ধুতি পর, সময়ে ব্যবস্থা করা যাইবে ।” বালকের মনও কিরূপ হইয়া গেল ; আর ইহাদের সঙ্গ ছাড়িতে পারিল না । পুরোঁক রত্নাকরের অবস্থা পরিবর্তন হইয়া গেল । সে গলার মালা ফেলিয়া দিল এবং গোবর্দ্ধনকে পরিবর্তন করাইবার চেষ্টা করিতে লাগিল । কিন্তু বালক অপূর্ষ শক্তিশাল্য করিয়াছে ; কার সাধ্য তাহাকে পরিবর্তন করায় ? গোবর্দ্ধনের প্রতি বাবাজী মহাশয়ের কৃপা দর্শনে সকলেই অতিশয় বিস্ময়াবিত হইলেন ।

কুকুরের মতিপরিবর্তন ।

আজ কয়েকদিন হইতে একটি থাকিসম্প্রদায়ী নেপালী সাধু কুম্ভা-
পাড়ার বাস করিতেছেন । সাধুটি অতি নিরীহ-প্রকৃতি । সর্বদার তরে
একটি ধূনি জ্বালাইয়া তাহার নিকট বাসিয়া থাকেন ; সময়ে যখন
ঐশ্বর্যজন বোধ করেন, ঐ ধূনির উপরেই যাহা কিছু প্রস্তুত করিয়া
আহার করেন । শ্রীমন্তুন্দর বাবুদের কাছাড়ী বাড়ীতে একটি গাছতলাই
সাধুটির থাকিবার স্থান । উহার সঙ্গে অল্প বয়স্ক লাল রঙের একটি মেয়ে
কুকুর আছে । কুকুরটি সম্পূর্ণরূপে সাধুর মুখাপেক্ষী ; এমন কি সাধুর
সঙ্গ ছাড়িয়া অল্প কোথাও গমন করে না । উহার নাম সুখিয়া । সাধু
যে দিন যাহা খাইবেন, সুখিয়াও তাহাই খাইবে । সুখিয়ার উপর সাধুর

বাৎসল্যস্নেহ । সাধু রাত্রে শয়ন করিলে কুকুরটা তাঁহার নিকটেই শুইয়া থাকে । একদিন প্রাতঃকালে জানি না কি কারণে সাধু স্নিগ্ধ্যাকে একটা চিম্টার আঘাত করিয়াছেন । শাসনের জ্ঞাত বাৎসল্যভাবে সাধু উহাকে মধ্যে মধ্যে ঐরূপ মারিয়া থাকেন ; কিন্তু আজকার আঘাতটা যেন স্নিগ্ধ্যার হৃদয়ে বড়ই বাজিল । সে কঁাদিতে কঁাদিতে অনতিদূরে যে স্থানে বাবাজী মহাশয় বসিয়া মুখ ধুইতেছিলেন, ঐ স্থানে একেবারে ইহার চরণের নিকট গিয়া উপস্থিত হইল । ইতিপূর্বে পরীক্ষার জ্ঞাত উহাকে সাধুর নিকট হইতে কিঞ্চিৎ দূরে লইবার মানসে অনেকে অনেক করিয়াছেন ; কিন্তু কেহই কৃতকার্য হইতে পারেন নাই । আজ না জানি নিতাইচাঁদের কি খেলা খেলিবার ইচ্ছা হইয়াছে । স্নিগ্ধ্যা আপন আপনাই গিয়া বাবাজী মহাশয়ের চরণে শরণ গ্রহণ করিল । সঙ্গিগণ যতই উহাকে তাড়াইবার চেষ্টা করিতেছেন, ততই সে বাবাজী মহাশয়ের বসিবার জলচৌকির নীচে গমন করিতেছে । সাধু আসন হইতে “স্নিগ্ধ্যা স্নিগ্ধ্যা” বলিয়া ডাকিতেছেন । স্নিগ্ধ্যা কিন্তু নিকটে থাকিয়াও যেন দূরে—শুনিয়াও যেন শুনিতেছে না । ক্রমে সাধু বাবাজী মহাশয়ের নিকটে আসিলে বাবাজী মহাশয় উঠিয়া সাধুকে নমস্কার করিলেন ; সাধুও প্রতিনমস্কার করিয়া কুকুরটার আমূল বৃত্তান্ত বলিলেন । বাবাজী মহাশয় তখন কুকুরটার গারে হাত বুলাইয়া বলিতে লাগিলেন, “মা ! কি করিবে ? তোমার গুরু এবং পিতৃস্থানীয় সাধু এতদিন তোমাকে দেশে দেশে ভ্রমণ করাইয়াছেন । অতি সামান্য একটু শাসনে তোমার সেই সঙ্গ ছাড়া কোন মতেই উচিত নহে ; অতএব সাধুর সহিত উহার আসনের নিকট গমন কর ।” কার সাধ্য যে তাহাকে সেই চৌকির তলা হইতে বাহির করে ? বেগতিক দেখিয়া বাবাজী মহাশয় উঠিয়া দাঁড়াইলেন । স্নিগ্ধ্যা যেমন দেখিল যে বাবাজী মহাশয় দাঁড়াইয়াছেন, অমনি দ্রুতগতি আসিয়া

ইহার চরণের উপর গড়াগড়ি দিতে লাগিল। বাবাজী মহাশয় উহার গায়ে হাত বুলাইয়া পূর্ববৎ সাধুর নিকট যাইবার জ্ঞ উপদেশ দিতে লাগিলেন। অবশেষে সাধুকে বলিলেন, “বাবা! আপনি উহাকে ধরিয়া লইয়া যান। বাৎসল্যে মুগ্ধ হইয়া সাধু যেমন কুকুরটাকে ধরিতে গিয়াছেন, অমনি সে অতি ব্যাকুলভাবে চিৎকার করিতে লাগিল। উপস্থিত ব্যক্তিগণ কুকুরটির ভাব গতক দেখিয়া বিস্ময়াবিত হইলেন। সাধু কাতরভাবে বলিতে লাগিলেন, “রে স্মৃথিয়া! হাম্ এত্নে রোজসে তোমকো পালন পোষণ কিয়া হায়, আজ বিলকূল ভুলগয়া হায়! হাম্ বুড়া সাধু হায়, তেরি বাস্তে কেত্না ত্কলিপ কা কাম কিয়া থা। আচ্ছা কিয়ো; অব হামারী মমতা ভুলকে দোসরা সাধুনকে সঙ্গ লিয়া হায়?” ইত্যাদি নানারূপ কথা বলিতেছেন, আর দুঃখ প্রকাশপূর্বক স্মৃথিয়াকে ধরিতে যাইতেছেন। সাধুর হাওয়া যে দিকে যাইতেছে, স্মৃথিয়া সে দিকে পর্যন্ত যাইতেছে না। অনেক পীড়াপীড়ি করিবার পর সাধু নিরস্ত হইয়া নিজ আসনে গেলেন। ক্ষণকাল পরে বাবাজী মহাশয় বাসায় চলিলেন, স্মৃথিয়াও ইহার সঙ্গে সঙ্গেই চলিল। এই হইতেই স্মৃথিয়া আর ইহাদের সঙ্গ ছাড়িল না। এমনকি উহাকে না জানাইয়া কেথাও নিমন্ত্রণে গেলে সে আপনা আপনিই সে স্থানে গিয়া উপস্থিত হইত।

কয়েকদিন যায় একদিন সকালে বাবাজী মহাশয় সঙ্গিগণসহ স্নান করিতে গিয়াছেন, স্মৃথিয়াও ইহার সঙ্গে গিয়াছে। বাবাজী মহাশয় বলিলেন, “দেখ আজ স্মৃথিয়াকে স্নান করাইয়া দাও ত।” বলিয়া নিজে ডাকিলেন, “এ স্মৃথিয়া! স্নান করুবি আর।” তখন আপন ইচ্ছায় স্মৃথিয়া জলে নামিল এবং প্রাণ ভরিয়া স্নান করিতে লাগিল। দেখিয়া সকলে সম্মুখে হরিবোল বলিয়া উঠিলেন।

ক্রমে স্নানাদি সমাপনপূর্বক বাসায় আসিয়া তিলক আঁহিক শেষ

করতঃ “জয় জয় নিত্যানন্দ অধৈত গোরাঙ্গ” কীর্তন করিতে লাগিলেন । হঠাৎ সুধিয়া আসিয়া কীর্তনের মধ্যে গড়াগড়ি দিতে লাগিল । দেখিয়া সকলে বিস্ময়াবিত ! তখন বাবাজী মহাশয় সুধিয়ার কর্ণে মন্ত্র প্রদান করিলে সঙ্গিগণ প্রেমাম্বল উদ্ভূত নৃত্য করিতে লাগিলেন । সুধিয়াও সেই সংকীর্তনের মধ্যে বাবাজীদের সঙ্গে ঘুরিয়া বেড়াইতে লাগিল । এইরূপে বহুক্ষণ সংকীর্তনের পর কীর্তন সমাপ্তি করতঃ গোবিন্দদেবের মহাপ্রসাদ পাইয়া সকলে বিশ্রাম করিলেন ।

বলদেবজীউর দর্শন ।

একদিন বাবাজী মহাশয় প্রাতঃকৃত্য সমাপন করিয়া সঙ্গিগণসহ নাম করিতে করিতে বলদেব জীউর দর্শনে বাহির হইলেন । শ্রামসম্পন্ন বারুদের বাড়ী হইতে বলদেব জীউর বাড়ী গায় একক্রোশের অধিক হইবে । তবে যাতায়াতের জন্ত বাঁধা রাস্তা রহিয়াছে । ক্রমে বহুলোক আসিয়া সঙ্গে মিলিত হইতে লাগিল । বলদেব জীউর বাল্যভোগ অস্ত্রে কেবল দর্শন খোলা হইয়াছে, এই সময় গিয়া সকলে উপস্থিত হইলেন । মদঘূর্ণিত রক্তনেত্র এবং নৃত্যভঙ্গিতে দণ্ডায়মান সেই অবিশাল অপূর্ণ মধুর মূর্তিখানি দর্শনমাত্র বাবাজী মহাশয় ভাবে বিভোর হইয়া এক একবার তাঁহার মুখপানে তাকাইতেছেন, আর ফুলিয়া ফুলিয়া কাঁদিতেছেন । অপ্রকল্পাদি সাধিক বিকারগণ সমকালীন ইহার দেহ অধিকার করিল । কত কি যেন বলিতে ইচ্ছা করিতেছেন ; কিন্তু কণ্ঠরোধ হওয়ায় কিছুই বলিতে পারিতেছেন না । কিছুক্ষণ পরে অতি কষ্টে কিঞ্চিৎ ভাব সম্বরণ করিয়া গদগদকণ্ঠে গাহিতে লাগিলেন :—

রজত গিরির, গরব গরাসি, ধবল বরণ খানি ।

রাজা ছটা আঁখি, ঢুলু ঢুলু দেখি, অরুণ কমল জিনি ॥

নীল পটুখটি, কটিতটে আঁটি, কিঙ্কণী তাহে বেড়া ।

মদে মাতোয়াল, নাহিক সন্তাল, গমন গজেন্দ্র পারা ॥

বৈজয়ন্তী মালা, করিয়াছে আলা, বিশাল হিয়ার মাঝে ।

চরণে নুপুর, মধুর মধুর, রুহুর রুহুর বাজে ॥

শিঙ্গা বাম করে, কিবা শোভা করে, এক কুণ্ডল কাণে ।

হা-রে-রে-রে ভাঞা, কা-কা-কা কাহাঞা, বলি ডাকে ঘনে-ঘনে ॥

ধেছুক মারিয়া, তাল ফল দিয়া, তুঘিলে সবার মন ।

কাঁধেতে চরিয়া, প্রলম্বে নাশিয়া, রাখিলে রাখালগণ ॥

দেব হলধর, সর্বগুণাকর, রোহিণী-নন্দন রাম ।

জীবের লাগিয়া, কলিতে আসিয়া, হৈলা নিত্যানন্দ রাম ॥

(ভব) গুণের গরিমা, দিতে নারে সীমা, পঞ্চানন পঞ্চমুখে ।

মুণ্ডি ছার অতি, শিশু অল্পমতি, কি কহব একমুখে ॥

ওহে সঙ্কর্ষণ, করি নিবেদন, করুণা-বারিধি তুমি ।

করহে করুণা, না করিহ ঘৃণা, অধম পতিত আমি ॥

ঘরে ঘরে গিয়া, যাচিয়া যাচিয়া, বিলাইলে প্রেমধন ।

অভিমান বশে, বঞ্চিত এ দাসে, না পাইয়া এক কণ ॥

এইভাবে বহুক্ষণ নানারূপ পদাবলী কীর্তন করিতে লাগিলেন ।

আনন্দের পাথার বহিয়া যাইতে লাগিল । লোকে লোকার্ণ্য । বাবাজী

মহাশয়ের দেহে সমকালীন নানারূপ সাত্ত্বিক ভাবের বিকাশ, অপূর্ণ

নৃত্য এবং অনির্বচনীয় আকর্ষণী শক্তি দর্শনে আগন্তুক লোকসকল বিমুগ্ধ

হইলেন । ক্রমে বাবাজী মহাশয় সংকীর্তন সমাপ্তি করিয়া কিঞ্চিৎ বিশ্রাম

করিলে শ্রামজ্ঞানর বাবুদের চেষ্টায় এবং সেবক পাণ্ডাদিগের বিশেষ আগ্রহে

সকলে বলদেব জীউর মহাপ্রসাদ পাইলেন । শ্রামসুন্দর বাবু ইচ্ছা যে
 রাত্রে বলদেব জীউর বিশেষরূপে ভোগরাগের ব্যবস্থা করিয়া সেই স্থানেই
 ইহাদিগের প্রসাদ পাওয়া হয় । বাবাজী মহাশয়ের নিকট এই অভিপ্রায়
 প্রকাশ করা হইলে ইনি বলিলেন, “আচ্ছা বলাই দাদাকে বেশ মনের মতন
 করিয়া ভোগ লাগাও ত ; তারপর আমাদের ভাগ্যে হয় আমরাই প্রসাদ
 পাইব, না হয় বাহার ভাগ্যে থাকে সেই পাইবে ।” বাবাজী মহাশয়ের
 আশ্বাসবাক্য পাইয়া শ্রামসুন্দর বাবু ভোগের ব্যবস্থা করিলেন । বলদেব
 জীউর অমৃতরসাবলী নামক একটি ভোগ হয়, সেইটী অতি উপাদেয়
 ভোগ । যদিও ঘনাবর্ত দুগ্ধ, ছানা, চিনি, কর্পূর, এলাইচ প্রভৃতির দ্বারা
 ভোগটী প্রস্তুত হয়, কিন্তু ওরূপ অপ্রাকৃত সুস্বাদু বা আনন্দন আর
 কোথাও হয় না । এমন কি, বলদেব জীউর ঐ পাণ্ডাগণ অপর স্থানে
 বাইয়া ঐ ভোগ প্রস্তুত করিলে ওরূপ সুস্বাদু হইবে না । এই ভোগটী
 দাউজীর একটি রূপাশক্তির চিহ্ন । শ্রামসুন্দর বাবুও অত্যাশু ভোগ অপেক্ষা
 অমৃতরসাবলীই কিছু অধিক পরিমাণে ভোগ লাগাইলেন । ক্রমে সন্ধ্যা
 হইলে আরতি হইতে লাগিল । বাবাজী মহাশয় আবিষ্টভাবে মদমস্ত
 বলাইচাঁদের ভুবনমোহন রূপখানি দেখিতেছেন, আর চুইটী চোখের জলে
 ইহার মুখ বুক ভাসিয়া বাইতেছে । আরতি শেষ হইলে ভাবে বিভাবিত
 হইয়া গান ধরিলেন :—

আরতি শ্রীধলবীর কি কিস্তে ।

তমু মন প্রাণ নিছাড়িয়া দিয়ে ॥

পহিরণ নীল পটাঘর শোহে ।

মত্ত বলাইরূপে জিভুবন মোহে ॥

রক্ত গিরির গুরু গৌরবহারী ।

এক শ্রবণে এক কুণ্ডল ধারী ॥

কাদম্বরী মদ ঘৃণিত নেত্র ।
 শ্রীকরে শোভিত রঞ্জিম বেত্র ॥
 ঢল ঢল শ্রীমুখচন্দ্রকী শোভা ।
 ইন্দু বিনিমিত মুনি মনোলোভা ॥
 রুঞ্চ সেবামৃত সঙ্গত রঙ্গ ।
 দীন হীনে দেহি সোই প্রসঙ্গ ॥

এইরূপে বহুক্ষণ পর্য্যন্ত সংকীৰ্ত্তন হইতে লাগিল । সেবকগণ পরস্পর
 বলাবলি করিতে লাগিলেন, “আমরা অনেক কীৰ্ত্তন শুনিয়াছি ; কিন্তু
 কখনও বলদেব জীউর এইরূপ তত্ত্বপূর্ণ কীৰ্ত্তন শুনি নাই । আজ আমাদের
 পরম সৌভাগ্য ।” ইত্যাদি নানাবিধ সমালোচনা হইতে লাগিল । রাত্র
 আন্দাজ দশটার সময় সংকীৰ্ত্তন সমাপ্তি করিয়া সকলে বলদেব জীউর
 মহাপ্রসাদ পাইতে বসিলেন । আনন্দময় বাবাজী মহাশয় যখন যে কার্য্য
 করিতে প্রবৃত্ত হন, সেই কার্য্যই যেন এক নূতন ধরণের পরমানন্দজনক
 ব্যাপার । কেহ নিতাইর গুণ কেহবা গৌরগুণ-সম্বলিত নানারূপ পদ
 দৌহাছন্দে ধ্বনি দিতে লাগিল । মহাপ্রসাদ পাইতে বসিয়াই আনন্দের
 পাখার বহিয়া যাইতে লাগিল । এইরূপ পরমানন্দের সহিত মহাপ্রসাদ
 পাইয়া সকলে নাম করিতে করিতে বাসায় আসিয়া বিশ্রাম করিলেন ।

বারিমূল ও নিকরাই গমন ।

একদিন অপরাহ্ন সময় বাবাজী মহাশয় বহুভক্তগণ সঙ্গে শ্রামসুন্দর বাবুদের দোতলার উপর বসিয়া আছেন, হঠাৎ শ্রামসুন্দর বাবুকে ডাকিয়া বলিলেন, “দেখ শ্রামসুন্দর ! তোমাদের জমিদারীর মধ্যে না কি কয়েকটা পাহাঙ্গু আছে ?”

শ্রামসুন্দর । আজ্ঞে হ্যাঁ, বড়ই সুন্দর দৃশ্য ; আর বেশ চলাফেরার রাস্তাও আছে ।

বাবাজী । একবার সেই পাহাঙ্গু দেখিতে গেলে হয় না ?

শ্রামসুন্দর বাবু অতি দৃষ্টচিতে বলিয়া উঠিলেন, “আজ্ঞে তাহা হইলে জানিলাম যে এতদিনে উড়িষ্যার তুর্দশা দূর হইয়া শুভদিন উপস্থিত হইল । যদি আদেশ হয় ত আমি অতীত সমস্ত ব্যবস্থা করি ।”

বাবাজী । নিতাইচাঁদের ইচ্ছায় তাহাই হইবে । আগামী কল্য প্রত্যুষেই এখান হইতে বাহির হওয়া যাক । কেন্দ্রাপাড়া নিবাসী অনেকের আপত্তি হইতে লাগিল । তাঁহারা বলেন, “আরও কিছুদিন এখানে থাকিয়া পরে গেলেই ভাল হইবে ।” বাবাজী মহাশয় তাঁহাদের এই প্রস্তাবে সন্মত না হইয়া মিষ্টবাক্যে সকলকে সান্ত্বনা করতঃ পরদিন প্রত্যুষে বাহির হওয়া স্থির করিলেন ।

পথপ্রদর্শনের জন্ত একজন লোক সঙ্গে লইবার ব্যবস্থা হইল । ইত্যবসরে বারিমূলনিবাসী শ্রীযুক্ত শরৎচন্দ্র ঘোষ আসিয়া বাবাজী মহাশয়কে তাঁহাদের গ্রামে লইয়া যাইবার জন্ত বিশেষ আগ্রহ প্রকাশ করিতে লাগিলেন । বাবাজী মহাশয় তাঁহার প্রস্তাবে স্বীকৃত হইলে তিনি বলিলেন, “আজ্ঞে নৌকা ঠিক করা হইয়াছে । একেবারে নৌকায় গেলেই সুবিধা

হইবে ।” দেখিতে দেখিতে রাজি প্রভাত হইল । কেক্সাপাড়াবাসী আবাল-
বৃদ্ধ-বনিতা সকলের মনেই আজ নিরানন্দের ছায়া—সকলেরই মুখ স্নান
—চক্ষু হলহল । এতদিন পর্য্যন্ত তাহারা কি যেন এক অনির্বচনীয়
আনন্দসাগরে নিমগ্ন ছিল, আজ হঠাৎ সেই সাগর শুষ্ক হইয়া গেলে ।
আনন্দের পরিবর্তে নিরানন্দের বাতাস বহিতে লাগিল । বাবাজী মহাশয়
প্রাতঃকৃত্য সমাপন পূর্বক গোবিন্দদেবের অঙ্গনে গিয়া দাঁড়াইলেন ।
চারিদিকে বহুলোক একদৃষ্টে বাবাজী মহাশয়ের মুখপানে তাকাইয়া
রহিয়াছে ; সজ্জিগণ খোলকরতাল লইয়া উপস্থিত হইলে বাবাজী মহাশয়
“ভজ নিতাই গৌর রাধে শ্রাম । জপ হরে কৃষ্ণ হরে রাম ॥” এই নাম
ধরিলেন । কিছুক্ষণ গোবিন্দদেবের সম্মুখে নাম করিয়া যেন তাঁহারই
আদেশক্রমে দণ্ডবৎ প্রণামপূর্বক নাম করিতে করিতে গোবরা নদীতে
আসিয়া নৌকায় উঠিলেন । মধ্যাহ্নকৃত্য বারিমূলেই হইবে স্থির হইল ।
শরৎ বাবু ইহাদের সঙ্গে সঙ্গেই রহিয়াছেন । কেক্সাপাড়া হইতে বারিমূল
আন্দাজ তিন মাইল । নৌকাখানি খুব বড় ; কাজেই একটু বিলম্ব হইতে
লাগিল । বাবাজী মহাশয় নৌকার মধ্যেই কীৰ্ত্তন করিতে লাগিলেন ।
যথাসময়ে শরৎ বাবু বড়ীতে গিয়া উপস্থিত হইলেন । তাঁহার ইচ্ছা যে
বাবাজী মহাশয় একটু কীৰ্ত্তন করেন ; কিন্তু সময় অতি সংক্ষেপ দেখিয়া
বলিতে সাহস পাইতেছেন না । অন্তর্ধ্যামী বাবাজী মহাশয় উহার মনে
ভাব বুঝিয়া মধ্যাহ্নকৃত্য সমাপনপূর্বক কীৰ্ত্তন আরম্ভ করিলেন ।

আনন্দের আর অবশিষ্ট নাই । যে ব্যক্তি যে ভাব বা প্রশ্ন মনে করিয়া
আসিতেছে, সংকীৰ্ত্তনমধ্যে প্রবেশ করিবামাত্র বাবাজী মহাশয় কীৰ্ত্তনে
ঠিক সেই সেই কথার বিশদ ব্যাখ্যা করিতেছেন ও নিয়া বারিমূলনিবাসী
ভক্তগণ বিম্বিত ও স্তম্ভিত হইলেন । একটা বৃদ্ধ ব্রাহ্মণ মনোভাব গোপন
রাখিতে না পারায় বলিয়া উঠিলেন, “আমি এত বৃদ্ধ হইয়াছি ; কিন্তু আজ

পর্যন্ত একরূপ মহাশক্তিসম্পন্ন বৈষ্ণব আমার চোখে পড়িত হয় নাই । আজ আমাদের বারিমূল গ্রাম ধন্ত হইল ।, কেহ বলিতেছেন “ইনি মনুষ্য নহেন • কারণ আমি যে কথাটা জিজ্ঞাসা করিব বলিয়া মনে করিয়াছিলাম, কি আশ্চর্য্য । আসিয়া শুনি ঠিক সেই কথাটাই কীর্ত্তনে ব্যাখ্যা করিয়া বুঝাইতেছেন । আর বুঝাইবারই বা কি সুন্দর প্রণালী । আমার বিশ্বাস, বালক-বুদ্ধ-স্ত্রীপুরুষ কেহই বুঝিতে বাকি নাই ।” ইত্যাদি যাহার যেক্রপ মনের ভাব, সে সেইরূপ বলিতেছে । এ দিকে বেলা অতিরিক্ত হওয়ায় সকলের কষ্ট হইবে ভাবিয়া অনিচ্ছাসত্ত্বেও কীর্ত্তন সমাপ্তি করিলেন ।

ক্ষণকাল বিশ্রামান্তে মহাপ্রসাদ পাইবার ব্যবস্থা হইতে লাগিল । ইত্যবসরে কেন্দ্রাপাড়া হইতে বলদেব জীউর এবং গোবিন্দ দেবের মিষ্টি মহাপ্রসাদ আসিয়া উপস্থিত হইল । বাবাজী মহাশয় মহাপ্রসাদ দর্শনমাত্রে উঠিয়া দাঁড়াইলেন এবং সাক্ষ্যগদগদকণ্ঠে বলিতে লাগিলেন, “ধন্ত করুণাময়ের করুণা । আমরা ছাড়িলেও তিনি ছাড়িতে চাহেন না ।” এইরূপ পরমানন্দে মহাপ্রসাদ পাওয়া শেষ হইলে কিঞ্চৎ কাল বিশ্রামান্তে বসিয়া আছেন, এই সময় কেন্দ্রাপাড়া হইতে অত্যন্ত লোক-সকল আসিতে লাগিল । বলরাম বাবু, শ্রীমসুন্দর বাবু, বুদ্ধাবন বাবু, গোকুল বাবু, লক্ষ্মীনারায়ণ জগদেব প্রভৃতি সকলেই বাবাজী মহাশয়ের সঙ্গে উড়িয়া দেশ ভ্রমণ করিতে বাহির হইয়াছেন । দশখানা পাক্কী সঙ্গে সঙ্গে চলিল । শ্রীমসুন্দর বাবু প্রভৃতি সকলেই বাবাজী মহাশয়কে পাক্কীতে উঠিবার জন্য বিশেষ অনুরোধ করিতে লাগিলেন ; কিন্তু ইনি কিছুতেই সম্মত হইলেন না; কাজে কাজেই আর কাহারও পাক্কীতে উঠা হইল না । এক একখানা পাক্কীতে সত্তর জন করিয়া বেহারা । সকলেই খালি পাক্কী কাঁধে করিয়া সঙ্গে সঙ্গে চলিয়াছে । শরৎ বাবু বারিমূলে একদিন থাকিবার জন্য

ইহাদিগকে বিশেষ অনুরোধ করিতে লাগিলেন ; কিন্তু কিছুতেই বাবাজী মহাশয়ের মত হইল না; কাজেই বেলা আন্দাজ চারিটার সময় নাম করিতে করিতে বারিমূল হইতে রহনা হইলেন । পথপ্রদর্শকগণ সঙ্গে সঙ্গে রহিয়াছে বটে ; কিন্তু কাহাকেও কিছু জিজ্ঞাসা করা নাই—বাবাজী মহাশয় নাম ধরিয়া চরণে চরণ রাখিয়া নাচিতে নাচিতে অতি সুপরিচিতের গায় যাইতেছেন । এইরূপে রাত্রি অনুমান আটটার সময় গিয়া নিকরাই কাছারিতে উপস্থিত হইলেন । তথায় হনুমান্ জীউর সেবা রহিয়াছে । মহাবীর জীউর মূর্তি দর্শন করিয়া বাবাজী মহাশয় পরমানন্দে নৃত্য করিতে লাগিলেন । কিছুক্ষণ উদ্দগু নৃত্যের পর করবোধে পদ ধরিলেন :—

নমো নমো কপিরাজ ভক্তচূড়ামণি ।
 প্রভু লাগি সর্বভ্যাগ হেন নাহি গুনি ॥
 তোমা হেন নিষ্ঠাবান্ আর কেবা আছে ।
 তাই নিষ্ঠাভক্তি মোবা যাচি তুয়া কাছে ॥
 মহাবীর-শিরোমণি তুমি ভক্তভূপ ।
 বক্ষচিরি দেখাইলে সীতারামরূপ ॥
 নামের মহিমা তুমি দেখা'লে সবারে ।
 রাম ব'লে অবহেলে গেলা সিদ্ধপারে ॥
 প্রভু লাগি অসাধ্য সাধন বহু কৈলে ।
 তোমার স্মরণে জীবের নিষ্ঠা ভক্তি মিলে ॥
 তোমার করুণা হ'লে অধমেও পায় ।
 তাই কোটি পরণাম করি তুয়া পায় ॥

ইত্যাদি নানারূপ পদ কীর্ত্তন করিতে করিতে বাবাজী মহাশয় সাষ্টাঙ্গ হইয়া একবারে ভূতলে পতিত হইলেন । কিছুক্ষণ পরে কীর্ত্তন সমাপ্তি

করিয়া উপবেশন পূর্বক বিশ্রাম করিতে লাগিলেন । এদিকে ঠাকুরদের ভোগরাগের যোগাড় হইতে লাগিল । যথাসময়ে প্রসাদ পাইয়া সেই কাছারিতেই সকলে সে রাত্রি যাপন করিলেন ।

নামসম্প্রদায়-সংশোধন ।

পরদিবস প্রভাতে বাবাজী মহাশয় প্রাতঃকৃত্য সমাপন পূর্বক গ্রাম-সুন্দর বাবুকে জিজ্ঞাসা করিলেন, “গ্রামসুন্দর ! এস্থান হইতে কোথায় বাইবার ব্যবস্থা করিয়াছ ?” গ্রামসুন্দর বাবু বলিলেন, “আজ্ঞে এস্থানে হইতে পলেই কাছারি অট মাইল দূরে অবস্থিত । উক্ত কাছারির অতি সরিকটে ওলাসনি নামক একটি পাহাড় আছে । আজ ঐ কাছারিতে গেলে ভাল হয় ।” শুনিয়া বাবাজী মহাশয় “ভজ নিতাই গৌর রাধে গ্রাম । জপ হরে কৃষ্ণ হরে রাম,” এই নাম ধরিয়া রওনা হইলেন । বলরাম বাবু প্রভৃতি বহুলোক বাবাজী মহাশয়কে পাক্ষীতে উঠিবার জন্য বিশেষভাবে অনুরোধ করিতে লাগিলেন ; কিন্তু ইন কিছুতেই স্বীকার করিলেন না । সকলেই নগর পরিক্রমা করিয়া কীর্তন করিতে করিতে যথাসময়ে গিয়া পলেই কাছারিতে উপস্থিত হইলেন । কাছারির তহশীলদার এবং অন্যান্য কর্মচারিগণ পরমানন্দে ইহাদিগকে বিশেষভাবে বন্দ করিতে লাগিলেন । ইহাদের সঙ্গে চারিজন পূজারী রহিয়াছে । ঠাকুরের ভোগ হইতে বেলা অবসান হইয়া গেল ; কাজেই সে দিন আর কোথাও যাওয়া হইল না । সন্ধ্যার পর আরতিকীর্তন আরম্ভ হইল । স্থানীয় অনেক লোক আসিয়াছে ; কিন্তু হুগুখের বিষয় কেহই বাজালা ভাষা বুঝিতে পারিতেছে না । কিঞ্চিৎকাল পরে অন্তর্যামী বাবাজী

মহাশয় সকলের অন্তরের ভাব বুঝিয়াই যেন নামকীর্তন আরম্ভ করিলেন । তখন আবালবৃদ্ধ সকলেই নামকীর্তনে যোগ দিতে লাগিল । রাত্র প্রায় এগারটা পর্য্যন্ত উদ্গু নৃত্য ও কীর্তন হইল । সকলেই পরমানন্দলাভ করিল কীর্তন সমাপ্তির পর সকলেই মহাপ্রসাদ পাইয়া বিশ্রাম করিলেন ।

পরদিবস প্রাতঃকালে বাবাজী মহাশয় প্রাতঃকৃত্য সমাপনপূর্ব্বক শ্রামসুন্দর বাবুকে বলিলেন, “চল, একবার পাহাড় দেখিয়া আসি ।” শুনিয়া সকলেই পরমানন্দিত চিত্তে ওলাসনি পাহাড় দেখিতে যাইবার জন্ত প্রস্তুত হইলেন । বাবাজী মহাশয় সদলে নাম করিতে করিতে চলিলেন । পাহাড়ের উপর উঠিবারাত্রই কয়েক মূর্ত্তি বৈষ্ণব আসিয়া বাহির হইলে বাবাজী মহাশয় বৈষ্ণবোচিত সম্মান প্রদর্শন পূর্ব্বক উহাদিগকে দণ্ডবৎ প্রণাম করতঃ উহাদের গাদিঘরের সম্মুখে যাইয়া বসিলেন । উহাদের মধ্যে মধুসূদনদাস নামক একমূর্ত্তি বৈষ্ণব আসিয়া বাবাজী মহাশয়ের সহিত আলাপ করিতে লাগিলেন, “নাম ভিন্ন কলিকীর্ত্তনের উদ্ধারের উপায়স্তর নাই । মহাপ্রভু বলিয়াছেন, নাম ভজ নাম চিন্ত নাম কর সার । নাম বিহু কলিকালে গতি নাহি আর ॥ থাইতে থাইতে যথা তথা নাম লয় । কাল দেশ নিয়ম নাই সর্ব্ব সিদ্ধি হয় ॥ নাম নামী অভিন্ন । নামী হইতে নাম বড় । নাম বাঞ্চাকল্পকর । নামের নিকট যে যাহা চাহিবে, নাম তাহাই দিতে সমর্থ । কল্পিযুগে নামই সাধন, নামই ভজন, নামই কীর্ত্তন, নামই অবলম্বন ।” বাবাজী মহাশয় এক একটা নামের ব্যাখ্যা শুনিতেছেন, আর ইহার সর্গাদেশে পুলক হইতেছে, ঝরু ঝরু করিয়া চোখে জল ঝরিতেছে এবং গদগদকণ্ঠে বলিতেছেন, “আজ আমি ধন্য হইলাম । বহুদিন এক্রপ নামনিষ্ঠ সম্প্রদায়ী মহাশ্রাদিগের সহিত দেখা বা সঙ্গলাভ আমার ভাগ্যে প্রভু মিলান নাই ; আজ আমার পরম সৌভাগ্য এবং সুপ্রভাত ।”

মধুসূদন । আচ্ছা ! মহাপ্রভু যখন একমাত্র নামই কলিজীবের
অবলম্বন এই বিধান করিয়াছেন, তখন সেই নাম পরিত্যাগ করিয়া জীব
অন্যদিকে খাবিত হয় কেন ?

বাবাজী । জীব অন্য পথে চলে কেন ? এ কথার উত্তর নাই ।
অর্জুন শ্রীকৃষ্ণকে জিজ্ঞাসা করিয়াছিলেন :—

অথ কেন প্রযুক্তোহয়ং পাপং চরতি পুরুষঃ ।

অনিচ্ছন্নপি বাঞ্চ্যে'য় বলাদিব নিয়োজিতঃ ॥

অর্থাৎ হে কৃষ্ণ ! জীব কাহার কর্তৃক প্রেরিত হইয়া ইচ্ছা না
থাকিলেও বলপূর্বক নিযুক্তের ন্যায় পাপ আচরণ করিয়া থাকে ? কৃষ্ণ
বলিলেন,—

কাম এষ ক্রোধ এষ রজোগুণসমুদ্ভবঃ ।

মহাশনো মহাপাপ্মা বিজ্ঞানমিহ বৈরিণম্ ॥

অর্থাৎ হে অর্জুন ! এই কাম এবং ক্রোধ রজোগুণসমুদ্ভব ; জীবের
সংপথে চলিবার বিষয়ে ইহাদিগকেই পরম শত্রু বলিয়া জানিবে । ইহার
উভয়েই মহাশন (মহা পেটুক) অর্থাৎ ইহাদিগের ভোগ্য বিষয় স্বত
প্রকার করিয়াই দেওয়া হউক না কেন, ইহাদিগের তৃষ্ণার নিবৃত্তি বা
শান্তি নাই । তাহাতে আবার মহাপাপ মা অর্থাৎ ঘোরপাপী, দেশ-কাল
পাত্রাপাত্র বা সম্বন্ধাদির কোন বিচার নাই ; ভোগ্যবস্তু পাইলেই হইল ।
অন্যেই ভাবিয়া দেখুন, মহাপ্রভু জীবের জ্ঞাত কত কষ্ট স্বীকার করিয়াছেন
এবং সাধনের উচ্চ সোপানে আরোহন করিবার স্বর্গম পন্থা সুস্পষ্টভাবে
উপদেশ করিয়াছেন :—

হর্ষে প্রভু কহে গুন স্বরূপ রাম রায় ।

নামসংকীৰ্ত্তন কলৌ পরম উপায় ॥

সংকীৰ্ত্তন-যজ্ঞে করে কৃষ্ণ আরাধন ।

সেই ত হুমেধা পায় কৃষ্ণের চরণ ॥
 নামসংকীৰ্ত্তন হইতে সৰ্বানর্থনাশ ।
 সৰ্ব গুণোদয় কৃষ্ণে পরম উল্লাস ॥
 সংকীৰ্ত্তন হইতে পাপ সংসার নাশন ।
 চিত্তগুহ্মি সৰ্ব ভক্তি সাধন উদগম ॥
 কৃষ্ণপ্রেমোদগম প্রেমায়ত আনন্দন ।
 কৃষ্ণপ্রাপ্তি সেবামৃত সমুদ্রে মজ্জন ॥
 অনেক লোকের বাঞ্ছা অনেক প্রকার ।
 কৃপাতে করিলা অনেক নামের প্রচার ॥
 ষাইতে গুইতে যথা তথা নাম নয় ।
 কাল দেশ নিয়ম নাই সৰ্বসিদ্ধি হয় ॥
 সৰ্বশক্তি নামে দিলেন করিয়া বিভাগ ।
 আমার হৃদৈব নামে নাহি অনুরাগ ॥

এত রূপাসঙ্কেত যখন আমাদের নামে অনুরাগ নাই, অতএব এষিষয়ে আমাদের হৃদৈব ব্যতীত আর কি বলা ষাইতে পারে ? কি করুণা ! পাছে আমাদের রুচি না হয় এই ভাবিয়া বহু বহু নামের সৃষ্টি করিয়াছেন । বাহার যেটা ভাল লাগিবে, সে সেই নামটা বাছিয়া লইবে । যেন কেহ বঞ্চিত না হয় ।

মধুসূদন । কেন ? 'নাম' শব্দটা যে সম্প্রদায়ী লোকেই উচ্চারণ করুক না কেন, তাহার শব্দগত পার্থক্য হইবে কিরূপে ?

বাবাজী । বাবা ! নাম শব্দের ত কোনই কথা হয় নাই । নাম শব্দের সহস্র পদের কথা হইয়াছে । যেমন হরি, কৃষ্ণ, রাম, গোবিন্দ, গোপাল, নিতাই, গৌর প্রভৃতি একজনেরই শত সহস্র নাম রহিয়াছে । এই যে এক একটা নামগত শব্দ ইহার ত পার্থক্য অবশ্যই আছে । যেমন

আপনার নাম কৃষ্ণদাস, একজনের নাম হরিদাস অপর একজনের নাম রামদাস ইত্যাদি। এই হরি-কৃষ্ণ-রাম-গত বা দাসভগত পার্থক্য না থাকিলেও ব্যক্তিগত পার্থক্য ত স্বীকার করিতেই হইবে? রামদাস বলিয়া ডাকিলে আপনি উত্তর দিবেন কি? অথবা কেবল দাস বলিয়া ডাকিলে কেহই সাড়া দিবেন কি?

মধুসূদন। আপনি যাহাই বলুন না কেন, নিজ নিজ সম্প্রদায়ের মত কেহ ছাড়িয়া দেয় কি?

বাবাজী। আমি কোনও সম্প্রদায়ের মত পরিত্যাগ করাইতে আসি নাই বাবা! আমি আপনাদের নিকট শিক্ষা লইতে আসিয়াছি। আমাকে অনুগ্রহ করিয়া যদি আপনাদের সম্প্রদায়ের উপাসনা-প্রণালীটী একবার বলেন, তবে আমি বড়ই সুখী হই। আর যদি কোন আপত্তি বা গুরু-পরম্পরায় কোনও নিষেধ থাকে, তাহা হইলে আমি অনুরোধকরি না।

মধুসূদন। না, আমাদের উপাসনা-প্রণালী কাহাকেও প্রকাশ করিতে গুরুদেব নিষেধ করেন নাই।

এই বলিয়া নিজের গলা হইতে একখানি পদক বাহির করতঃ বাবাজী মহাশয়ের হাতে দিলেন। বাবাজী মহাশয় হাতে করিয়া দেখেন পদকের উপর “নাম” এই দুইটি অক্ষর লেখা রহিয়াছে। তখন একটু বিস্মৃতভাবে সেই মহাত্মাকে জিজ্ঞাসা করিলেন, “এইটী দ্বারা আমি ত কিছুই বুঝিতে পারিলাম না, আমাকে একটু স্পষ্ট ভাবে বুঝাইয়া দিন।”

মধুসূদন। আপনি ঐ পদকের উপর যাহা দেখিতেছেন, ঐটাই আমাদের উপাসনা—ঐটাই আমাদের পূজার বস্তু—ঐটাই আমাদের ধ্যেয়; ঐ মন্ত্রই আমরা মালায় জপ করি।

বাবাজী। আপনাদের গুরুদেবের কিরূপ আদেশ?

মধুসূদন। গুরুদেব বলিয়াছেন, “নাম ভিন্ন কলিকালে আর নীতি

নাই । এই নামই একমাত্র সাধন—নামই জপ কর—নামই ধ্যান কর ।

বাবাজী । তিনি কি “নাম” এই দুইটা অক্ষর উপাসনা করিতে বলিয়াছেন, না কোনও নির্দিষ্ট নাম করিতে আদেশ করিয়াছেন ?

মধুসূদন । আমাদের পরম গুরুদেব পর্বেতের উপর এই আশ্রমটী স্থাপন করিয়াছিলেন । পঞ্চাশ বৎসরকাল হইল এই আশ্রম স্থাপিত হইয়াছে । তাঁহার হাতেরলেখা একখানি গ্রন্থ আছে । ঐগ্রন্থ দেখিয়া আমাদের গুরুদেব আমাদেরকে উপাসনা-প্রণালীপ্রস্তুত করিয়া দিয়াছেন ।

বাবাজী । আচ্ছা আপনার পরম গুরুদেবের গ্রন্থখানি আমি কি একবার দেখিতে পারি ?

মধুসূদন । ‘সচ্ছন্দে’ বলিয়া গাদিঘর হইতে গ্রন্থখানি লইয়া আসিলেন এবং নিজেই তাহার আবরণ মোচনপূর্বক পাঠ করিতে লাগিলেন । গ্রন্থখানি সংগ্রহগ্রন্থ—তালপাতার উপর হস্তের লেখা । সংক্ষেপে মোটামুটি সংগ্রহ হইলেও গ্রন্থখানি নির্দোষ ; একমাত্র নাম-গত কালপ্রভাবে নামের বিশেষণ লোপ হইয়া একমাত্র বিশেষ্য পদে দাঁড়াইয়াছে ।

বাবাজী ! কই বাবা ! আপনার গ্রন্থে ত “নাম” এই দুইটা অক্ষর ভজিবার কথা কোথাও নাই । ইহার মধ্যে যাবতীয় কথা বা শ্লোক সমস্তই ভগবৎ-নামগত তবে আপনারা এ সিদ্ধান্ত কোথায় পাইলেন ?

মধুসূদন । আমরা কখনও এই গ্রন্থ খুলিয়া দেখি নাই বা প্রয়োজন বোধ করি নাই কিংবা উপাসনা লইয়া কাহারও সহিত সমালোচনাও হয় নাই । আজ আপনার সহিত আলোচনার বাহা বুঝিলাম, তাহাতে ত আমাদেরই বুঝিবার ভুল বলিয়া মনে হয় । তবে সম্প্রতি কি করা যাইবে ?

বাবাজী । এসম্বন্ধে করিবার ত আর কিছুই নাই ; কারণ উপাসনা সম্বন্ধে জেদ করা বা সম্প্রদায়-অভিরোধ প্রকৃত তত্ত্বের অপলাপ করা সম্পূর্ণ

ভুল। আপনাদের উপাসনা ত আর কোনই অত্যাচারণ হয় নাই ; কেবল “নাম” এই দুইটি অক্ষর জপ না করিয়া আপন আপন রুচি অনুসারে হরেকৃষ্ণ, গোবিন্দ, গোপাল, নিতাই, গৌর, রাম, নৃসিংহ, শিব দুর্গা প্রভৃতি কোনও একটা নাম জপ কীর্ত্তন করিলেই হইবে।

তিনিয়া মধুসূদন দাস বড়ই আনন্দিত হইলেন এবং বাবাজী মহাশয়কে দণ্ডবৎ প্রণামপূর্বক বলিলেন, “আপনি আমার পরম উপকার সাধন করিলেন। আপনার রূপায় আমি আজ প্রকৃত উপাসনার মৰ্ম্ম বুঝিতে সমর্থ হইলাম। সম্প্রতি আপনার চরণে বিনীত প্রার্থনা যে, আর যেন কোনরূপ প্রলোভনে পতিত হইয়া প্রকৃত তত্ত্বের অপলাপ না করি।” এইরূপভাবে নানাবিধ দীনতা-সূচক বাক্যে প্রাণের আবেগ জানাইতে লাগিলেন। বাবাজী মহাশয় নামসংকীৰ্ত্তন আরম্ভ করিলেন। ক্রমে নাম সম্প্রদায়ের অস্তিত্ব বৈষ্ণবসকল আসিয়া সংকীৰ্ত্তনে নৃত্য করিতে লাগিলেন। পর্বতের উপর আজ যেন নামের সাগর উথলিয়া উঠিল। সকলেই আত্মহারাভাবে নাম করিতেছেন। নামের করুণায় এবং মহাপুরুষের সঙ্গপ্রভাবে সকলেরই চৈতন্য হইল—সকলেরই প্রাণে অহুতাপানল ধু ধু করিয়া জ্বলিয়া উঠিল। উহার নাম করিতেছেন, আর উচ্চৈঃস্বরে রোদন করিতেছেন। কেহ কেহ অধীরভাবে সংকীৰ্ত্তনের মধ্যে গড়াগড়ি দিতেছেন। আবার কেহ কেহ বা বাবাজী মহাশয়ের চরণ ধরিয়া কাদিতে কাদিতে নিজের উদ্ধারের উপায় উপদেশ করিবার জন্য প্রার্থনা করিতেছেন। এইরূপে বেলা আন্দাজ এগারটা পর্য্যন্ত পাহাড়ের উপর কীর্ত্তন করিয়া নাম করিতে করিতে নিকরাই কাহারিতে উপস্থিত হইয়া ক্রমে আনাহিকাদি করিয়া মহাপ্রলাদ গ্রহণপূর্বক বিশ্রাম করিলেন। অপরাহ্নে কাহারির গোমস্তা বলিল, “আজ্ঞে এই অশিক্ষিত অতি দরিদ্র ক্ষুদ্র গ্রামবাসিনের মধ্যে একবার ত্রীচরণ অর্পণ করিলে ভাল

হয় না কি ? আবালবৃদ্ধ-বনিতা গ্রামবাসী সকলেই আপনাদর্শনপ্রার্থী । একবার তাহাদের মনোবাসনা পূর্ণ করিতেই হইবে ।” বাবাজী মহাশয় গোমস্তার কথার এবং গ্রামবাসী সর্বসাধারণের মানসিক আর্তি শ্রবণে পরম প্রীত হইয়া নাম করিতে করিতে বাহির হইলেন । পাড়া গাঁ—রাস্তা ঘাট তত পরিষ্কার না হইলেও গ্রামবাসী বালক-বৃদ্ধস্ত্রীপুরুষ সকলেরই মন অতি নিশ্চল । উহারা প্রাণের আবেগে স্ব স্ব গৃহকার্য্য পরিত্যাগ পূর্ব্বক সংকীৰ্ত্তনের আশুপাছু ছুটাছুটি করিয়া ঘাইতে লাগিল । উহাদের অপূর্ব্ব সরলতাপূর্ণ ভাব দর্শনে বাবাজী মহাশয় একেবারে বিমুগ্ধ হইয়া গেলেন । গ্রামবাসীদিগের উৎকণ্ঠাহেতু সংকীৰ্ত্তনে এতই আনন্দ হইতে লাগিল যে, বাবাজী মহাশয় এবং ইহার সঙ্গিগণ সকলেই প্রেমোন্মত্ত—কাহারই বাহন্বৃতি নাই । অত বড় গ্রামখানির প্রত্যেক গলিগলি ভ্রমণ করিয়াও ক্লান্তিবোধ নাই । রাত্র হইয়া গিয়াছে ; কিন্তু কাহারও সংজ্ঞা নাই । ক্রমেই দ্বিগুণতর আনন্দ হইতে লাগিল । কাহারই বাসায় ফিরিবার কথা মনে নাই দেখিয়া কৌশলী গোমস্তা গ্রামের মধ্যস্থ একটা সোজা রাস্তা দিয়া সংকীৰ্ত্তনের দলসহ কাছারিবাড়ীতে আসিয়া পৌঁছিলেন ; বাবাজী মহাশয় উদ্ভণ্ড নৃত্য করিতেছেন । সঙ্গিগণ ভাবে বিভোর । কাছারিবাড়ীতে তিলান্ন স্থান নাই—লোকে লোকারণ্য । সকলেই আত্মহারাভাবে বাবাজী মহাশয়ের মুখপানে তাকাইয়া আছে । রাত্র অল্পমান এগারটার সময় বাবাজী মহাশয় টলিতে টলিতে যে ঘরে ইহার থাকিবার স্থান নির্দিষ্ট হইয়াছিল, সেই ঘরের মধ্যে গিয়া বসিলেন । তখন সূচতুর নবদীপদাস ঘরের কবাট বন্ধ করিয়া দিলেন ।

কণকাল পরে বাবাজী মহাশয় ঠিক বালকের জায় বলিয়া উঠিলেন, “আমি খাব ।” তখন নবদীপদাসের আদেশে ললিতাদাসী ফলের ঝুড়ি হইতে কমলানেবু ছাড়াইয়া বাবাজী মহাশয়ের হাতে দিতে লাগিল, ইন্নিও

বালকের ত্রায় খাইতে খাইতে নানারূপ আবদার করিতে লাগিলেন । অপূৰ্ণ ভাবাবেশ ! অপূৰ্ণ কষ্টস্বর ! বাহির হইতে যাহারা শুনিতেছে, তাহারা মনে করিতেছে যেন কোন বালক নিজ আত্মীয় স্বজনগণের নিকট আবদার করিতেছে ! এক একবার এক এক-জনের কোলের উপর বসিয়া পড়িতেছেন । সেও মন্ত্রমুগ্ধকণ্ঠে ইহাকে কোলে লইয়া বালকের ত্রায় ইহার মুখে নানাবিধ খাণ্ডদ্রব্য তুলিয়া দিতেছে, আর আপনাকে ধন্য মনে করিতেছে । এইরূপে প্রায় দেড়ঘণ্টা কাল বালক আবেশে উপস্থিত লোকসকলকে বাৎসল্য-রসে ডুবাইয়া রাখিলেন । ইঠাৎ একটী লোক আসিয়া যেমন ইহার চরণে হাত দিল, অমনি ভাবান্তর হইল । তখন “নিতাই নিতাই” বলিয়া চারিদিকে একপভাবে তাকাইতে লাগিলেন যেন কোন অপরিচিত স্থানে আসিয়া উপস্থিত হইয়াছেন । কিছুক্ষণ পরে প্রকৃতিস্থ হইয়া নবদ্বীপ দাদাকে আদেশ করিলে তিনি গিয়া কীৰ্ত্তন সমাপ্তি করিলেন । তখন গ্রামবাসী সকলেই স্ব স্ব স্থানে গমন করিল । ইহারাও যথাসময়ে মহাপ্রসাদ পাইয়া বিশ্রাম করিলেন ।

পরগম্বর পাহাড় দর্শন ।

পরদিন প্রভাতে বাবাজী মহাশয় প্রাতঃকৃত্যাদি শেষ করিয়া শ্রামসুন্দর বাবুকে জিজ্ঞাসা করিলেন, “শ্রামসুন্দর ! এখান হইতে কোথায় যাইতে হইবে ?”

শ্রামসুন্দর বাবু বলিলেন, “আজ্ঞে এস্থান হইতে চারিদিকল কাছারি যাইবার মনস্থ করিয়াছি । ঐ কাছারির নিকটে একটী পাহাড় আছে । উহার নাম পরগম্বর পাহাড় । ঐ স্থানটী লইয়া বহুদিন হইতে হিন্দু-মুসলমানে বিবাদ চলিয়া আসিতেছে । হিন্দুরা বলেন, “বলদেব জীউ

পশ্চিমাভিমুখী হইয়া কেক্সাস্বরকে বধ করিয়াছিলেন।” মুসলমানেরা বলেন “ঊর্দাহাদের পরগছর সাহেব নামাজ করিয়াছিলেন। মুসলমান-পক্ষই প্রবল। তাই সে স্থানে মুসলমানদিগেরই সেবা বর্তমান আছে। তবে সময় সময় হিন্দুরা দর্শন করিতে যান এবং উহার ভোগ দিয়া সেই প্রসাদও গ্রহণ করেন।” গুনিয়া বাবাজী মহাশয় অতি দৃষ্ট চিত্তে নাম করিতে করিতে চারিনঙ্গল যাইয়া উপস্থিত হইলেন। কিঞ্চিত্ত বিশ্রামান্তে বলিলেন, “শ্যামসুন্দর! চল, এই অবস্থাতেই পরগছর সাহেবকে দর্শন করিয়া আসা বাউক।” গুনিয়া সকলেই পরমানন্দে নাম করিতে করিতে পাহাড়ের উপর মন্দিরের নিকট উপস্থিত হইলে বাবাজী মহাশয় মন্দিরের সম্মুখে গমন পূর্বক সাষ্টাঙ্গ দণ্ডবৎ প্রণাম করিলেন। দেখিয়া সকলে অবাক্। মুসলমানগণ পরস্পর বলাবলি করিতে লাগিল, কি আশ্চর্য্য! এইরূপ সর্বত্র সমদৃষ্টিসম্পন্ন সাধু ত আমরা কখনও দেখি নাই।” কিছুক্ষণ পরে বাবাজী মহাশয় একটা সেবাইত মুসলমানকে জিজ্ঞাসা করিলেন, “ভাই! এ কার সেবা?”

সেবাইত। আজ্ঞে এই সেবা সম্বন্ধে হিন্দুদিগের সহিত বহুদিন হইতে আমাদের বাদানুবাদ চলিয়া আসিতেছে। হিন্দুরা বলেন, কেক্সাস্বরকে বধ করিবার সময় বলদেবজিউ এইরূপভাবে হাঁটু ভাঙিয়া বসিয়াছিলেন। আমরা বলি আমাদের পরগছর সাহেব নামাজ পড়িতেছেন। ঊর্দাহারই নামে পাহাড়ের নাম “পরগছর পাহাড় হইয়াছে; কাজেই আমরা সেবা করি। তবে মাঝে মাঝে হিন্দুরা দর্শন করিতে আসিয়া থাকেন।

বাবাজী মহাশয় সেবাইতের কথা গুনিয়া অতি দৃষ্টচিত্তে কিঞ্চিৎ মিষ্টি আনারস পূর্বক উহাকে ভোগ দিয়া প্রসাদ পাইলেন। সন্নিগণও সকলেই অধরাযুত পাইলেন। তখন জগদীশ বাবু বাবাজী মহাশয়কে

বলিতে লাগিলেন, “আপনার এই কার্য্যটি আমি তত সঙ্কত বলিয়া মনে করি না ; কারণ আপনি যেরূপ আচরণ করিবেন, অপর লোক ত অবিচারে সেইরূপ আচরণ করিবে ! গীতাষ ভগবান্ বলিয়াছেন,—

“যদ্ যদাচরতি শ্রেষ্ঠন্তদেবেত্তরো জনঃ ।

স যৎ প্রমাণং কুরুতে লোকন্তদনুবর্ততে ॥”

বাবাজী । কেন, আপনাদের মতে যখন ইনি বলদেব, তখন ইহার প্রসাদ পাইতে দোষ কি ?

জগদীশ । যদিও ইনি বলদেব হন ; কিন্তু যবনস্পর্শ হইয়াছে ত ! অস্পৃশ্যস্পর্শে ঠাকুরের অভিষেক না হইলে গুহ্য হন না বা তাঁহার পূজাদি নিষেধ ।

বাবাজী । তাহা হইলে বুঝাগেল, ভগবানকে যদি কোন নীচজাতি স্পর্শ করে, তবে তিনি অপবিত্র হন । বেশ কথা ! সামান্য একটা নীচ-জাতির স্পর্শেই যিনি অপবিত্র হইয়াগেলেন, তিনি যে ঘোর পাপী পতিত পাবণকে উদ্ধার করিতে পারিবেন, ইহা কিরূপে বিশ্বাসযোগ্য হইতে পারে ? স্বয়মসিদ্ধঃ কথমপরান্ সাধয়তি ? তাহা হইলে আপনাদের মতে যবনের সৃষ্টিকর্তা এবং হিন্দুর সৃষ্টিকর্তা পৃথক ; কারণ যিনি যবন সৃষ্টি করিতেছেন, তিনি আবার ব্রাহ্মণ সৃষ্টি করিবেন কিরূপে ?

জগদীশ । তবে কি আপনি জাতি ভেদটা কুসংস্কার বলিতে চান ?

বাবাজী । ইহার মধ্যে ত জাতিভেদের কোন কথাই হয় নাই ; আমাদের কি ভুল ধারণা ! আমরা আমাদের জাতিকুলগত দলাদলিটা ভগবানে পর্য্যন্ত পৌঁছাইয়াছি । ভক্তিমার্গের কথা ত দূরে—স্বাভাবিক রাজ্যের কথাই ভাবিয়া দেখুন, ভগবানেই যদি স্পর্শদোষ বা জাতিগত বিচার রহিল তবে তাহার ভগবত্তা কোথায় থাকে ? তাহা হইলে ভগবানের কাহাকেও কৃপা করিতে হইলে একজন পরিচিত লোক সঙ্গে

রাখা উচিত ; কারণ ভুলক্রমে যদি তিনি কোনও যবনের বাড়ী গিয়া উপস্থিত হন, তবে ত আর হিন্দুর বাড়ী যাইতে পারিবেন না ! আমরা মুখে পাঠ করিয়া থাকি—“অপবিত্রঃ পবিত্রোবা সর্কীবস্থাং গতৌহপি বা । যঃ স্মরেৎ পুণ্ডরীকাকং স বাহ্যভ্যন্তরঃ শুচিঃ ॥” একবার ঠাঁহার নাম স্মরণ করিলে বাহ্যভ্যন্তর শুচি হইয়া যায়, তাঁহাকে স্পর্শ করিলে তিনি অপবিত্র হইবেন ?

জগদীশ । ঠাঁহার নাম করিলে ত শুচি হইবে ? যবনে ত আর ভগবানের নাম করে না !

বাবাজী । ভগবানের নাম আপনি কাহাকে বলিতে চান ? কেবল কি রাম, কৃষ্ণ, কালী, দুর্গা, শিব, ব্রহ্ম বলিলেই ভগবানের নাম হইবে ? আর আল্লা, খোদা, পীর, পরগম্বর, যিশু, মহম্মদ বলিলে হইবে না ? প্রকৃত পক্ষে তাহা নহে । শব্দই ব্রহ্ম ; জগতে যাবতীয় শব্দ আছে, সমস্তই ভগবত প্রতিপাদ্য । কেবল ভাষা মাত্রেরই পার্থক্য । তাই শ্রীচৈতন্য ভাগবতে যবনসভায় হরিদাস ঠাকুর বলিয়াছেন :—

“নাম মাত্র ভেদ করে হিন্দুয়ে যবনে ।

পরমার্থে এক কহে কোরাণে পুরাণে ॥

এক শুদ্ধ নিত্যবস্তু অখণ্ড অব্যয় ।

পরিপূর্ণ হই বৈসে সভার হৃদয় ॥

সেই প্রভু যারে যেন লগ্নায়োন মন ।

সেই মত কর্ম করে সকল ভুবন ॥

সে প্রভুর নাম গুণ সকল জগতে ।

বোলেন সকল মাত্র নিজ শাস্ত্র মতে ॥

যে ঈশ্বর সে পুনি সভার ভার লয় ।

হিংসা করিলেও সে ঠাঁহার হিংসা হয় ॥”

ঐচ্ছিকচরিতায়ুতে :—

এক দিন প্রভু হরিদাসেরে মিলিলা ।
 তাঁরে লইয়া গোষ্ঠী করি তাঁহারে পুছিলা ॥
 হরিদাস ! কলিকালে যবন অপার ।
 গো ব্রাহ্মণ হিংসা করে মহা ছুরাচার ॥
 ইহা সবার কোন মতে হইবে নিস্তার ।
 তাহার হেতু না দেখিয়ে এ দুঃখ অপার ॥
 হরিদাস কহে প্রভু চিন্তা না করিহ ।
 যবনের সংসার দেখি দুঃখ না ভাবিহ ।
 যবন সকলের মুক্তি হবে অনায়াসে ।
 হারাম হারাম তারা কহে নামাভাসে ॥”

এখানে ত তাহাও নয় ; কারণ ইহারা আপনাদেরই ঠাকুরকে ভজিজেছে । ইহাদিগকে বরং আপনাদের আরও বিশেষ উৎসাহ দেওয়া উচিত । ভগবদধরায়ুত যখন স্পর্শদোষে নষ্ট হয় না, তখন স্বয়ং ভগবানের ঐশ্বর্য্য যবনস্পর্শে অপবিত্র হইবে কেন ? ভেদটা প্রযুক্তির ব্যবহার লইয়া । প্রত্যেক জাতির মধ্যেই ব্রাহ্মণ, ক্ষত্রিয়, বৈশ্য, শূদ্র এই চারিটা বর্ণ আছে গুণের ক্রিয়া অনুসারে জাতির নির্ণয় হইয়াছে । তাই ভক্তিশাস্ত্র বলিয়াছেন :—

“সর্ববর্ণেহপি তে শূদ্রা যে ন ভক্তা জনাৰ্দ্দনে ।”

অন্ততঃ :—

“চণ্ডালোহপি দ্বিজশ্রেষ্ঠো হরিভক্তিপরায়ণঃ ।

হরিভক্তিবিশীনস্ত দ্বিজহপি স্বপচাধমঃ ।”

ভগবান্ কাহারই বাধা নহেন ; তিনি ভাবগ্রাহী । কেবল বিপুল ভাব হইলেই গ্রহণ করিয়া থাকেন । দেখুন, ইহারা তাঁহার উদ্দেশ্যে নিজ

নিজ ভোগ বিলাস সুখৈশ্বর্যাদি পরিত্যাগপূর্বক এই পার্শ্বত্ব ভূমিতে বাস করিয়া ত্রিসন্ধ্যা তাঁহারই উপাসনা করিতেছে—তাঁহারই সেবা পরিচর্যা করিয়া বিপুলভাবে জীবন যাপন করিতেছে। ইহাদিগকে সাধু বলিব না, আর আমরা হিন্দুকুলে জন্মগ্রহণ করিয়া স্নেহের জ্ঞান আচার ব্যবহার করিতেছি ; ঠাকুরকে সম্মুখে রাখিয়া নানারূপ অত্যাচার অনাচার, জীবহিংসা, প্রবঞ্চকতা, ব্যবসা প্রভৃতি করিলেও আমরা সাধু ; যেহেতু আমরা হিন্দু, আমাদের সব ক্ষমতা আছে ! ইহাকে পক্ষপাতিত্ব না বলিয়া আর কি বলা যাইতে পারে ? এই ভাবের ভেদকে শ্রীমদ্রহস্যপ্রভু অতি তুচ্ছ মনে করিয়াছেন। তিনি গুণের পক্ষপাতী। তিনি শ্রীমুখে বলিয়াছেন—

কিবা বিপ্র কিবা গ্রাসী শূদ্র কেনে নয় ।

যেই কৃষ্ণতত্ত্ববেত্তা সেই গুরু হয় ॥”

জগদীশ। তাহা হইলে অভিষেকের ব্যবস্থা বাহা শাস্ত্রে নির্দেশ করিয়াছেন, উহাকে কি আপনি ভুল বলিতে চান ?

বাবাজী। শাস্ত্রের যত কিছু বিধি বিধান বা শাসন সমস্তই আশ্রয় শোধনের জন্য। আমাদের চিন্তের পবিত্রতা সাধন করাই শাস্ত্রের উদ্দেশ্য। শাস্ত্রের এই শাসনই যদি না থাকিত, তবে এতদিন ব্যভিচার-দোষে আমাদের ধর্ম উচ্ছৃঙ্খলতা প্রাপ্ত হইয়া যাইত। গুণের বিচার করা আমাদের জ্ঞান কলির জীবের পক্ষে সম্পূর্ণ অসম্ভব। তাই এই সমস্ত সমাজ-শাসন, শাস্ত্র-শাসন, জাতিভেদ, ক্রিয়াভেদ প্রভৃতির বিধান রহিয়াছে ॥ তবে ভক্তিপথে অগ্রসর হইতে হইলে বিধিশাস্ত্রের সকল আদেশ পালন করিতে গেলে চলে না।

বাবাজী মহাশয়ের মুখে শাস্ত্র এবং যুক্তিপূর্ণ তত্ত্বকথা শ্রবণে জগদীশ বাবু পরম প্রীতিলাভ করিলেন। কিছুক্ষণ এইরূপ তত্ত্ব আলোচনার

পর বাবাজী মহাশয় নামকীর্তন আরম্ভ করিলেন । মুসলমান কয়েকটা বড়ই শাস্ত ; এতক্ষণ স্থিরভাবে বসিয়া বাবাজী মহাশয়ের মুখে তত্ত্বকথা শুনিতেছিলেন, আবার যখন নাম আরম্ভ হইল, তখনও নিশ্চলভাবে একাগ্রচিত্তে নাম শুনিতে লাগিলেন । এইরূপে মন্দির পশ্চিমক্রমা করিয়া নাম করিতে করিতে পাহাড়ের চারিদিক্ দর্শন করিতে লাগিলেন । বহুক্ষণ ভ্রমণান্তে সেস্থানের সেবক মুসলমানদিগের সহিত নানারূপ মিষ্ট ব্যবহার করিয়া নীচে নামিলেন । চারিদিক্ কাছারিতে বিশেষ-ভাবে ভোগরাগের যোগাড় হইয়াছিল । বাবাজী মহাশয় সগণে তথায় উপস্থিত হইলে ঠাকুরের ভোগ লাগিল । ইহাও কিছুক্ষণ পরে স্নানাদি করিয়া মহাপ্রসাদ গ্রহণপূর্বক বিশ্রাম করিলেন ;

এইরূপে সে দিন কাটিয়া গেল । পরদিবস প্রাতঃকালে বাবাজী মহাশয় প্রাতঃকৃত্যাদি সমাপনপূর্বক শ্রামসুন্দর বাবুকে কোন্ দিকে যাইতে হইবে জিজ্ঞাসা করায় তিনি বলিলেন, “আজ্ঞে এখান হইতে লক্ষ্মীনারায়ণ দাদার এলাকা গোপালপুর ছয় মাইল হইবে । এ বেলা সেই কছারীবাড়ী গেলেই ভাল হয় । সেস্থান হইতে কাল খণ্ডগিরি বৌদ্ধমুষ্টি এবং অন্যান্য দেবদেবীগণকেদর্শন করিতে যাওয়া হইবে । গোপালপুর হইতে খণ্ডগিরি দুই মাইল রাস্তামাত্র ।” তাহাই হইল । বাবাজী মহাশয় নাম ধরিয়া নাচিতে নাচিতে শ্রামসুন্দর বাবুর প্রদর্শিত পথে গোপালপুর রওনা হইলেন । ইহাদের সঙ্গেই বহুলোক ; তৎপর আবার যখন যে গ্রামে যাইতেছেন, সেই গ্রাম হইতে দুই চারিজন করিয়া সঙ্গে চলিতেছে । সকলেই পরমানন্দিত—সকলেই নৃত্যপরায়ণ—সকলেই উচ্চৈঃস্বরে নাম করিতেছেন, আর প্রাণ খুলিয়া বাবাজী মহাশয়ের জয় দিতেছেন ।

ক্রমে বেলা আন্দাজ নয়টার সময় গিয়া গোপালপুর কাছারিতে পৌঁছিলেন । পূর্ব হইতে কাছারিতে সংবাদ দেওয়া হইয়াছে ; কাজেই

বাবাজী মহাশয়ের বা ইহার সঙ্গিগণের বাহা কিছু প্রয়োজন, সমস্তই প্রস্তুত । কাছারিতে উপস্থিত হইয়া প্রায় দেড়ঘণ্টা কাল উদ্দগ্ধ নৃত্য কীর্ত্তন করিতে লাগিলেন । লোকে লোকারণ্য ! গ্রামবাসী ইতর-ভদ্র, হিন্দু-যবন সকলেই সমবেত হইয়াছে । অপূৰ্ণ আকর্ষণ ! কৃষক কৃষিকার্য্য পরিত্যাগ করিয়া, চাষী লাঙ্গল ছাড়িয়া, বালক খেলা ত্যজিয়া, গৃহস্থ বাজারে যাইতে যাইতেই একেবারে কাছারীবাড়ীতে উপস্থিত । সকলেই হাতে তালি দিয়া সংকীৰ্ত্তনে নৃত্য করিতে লাগিল । এইরূপে বহুক্ষণ সংকীৰ্ত্তনের পর সকলে কিঞ্চিৎ বিশ্রামপূৰ্ব্বক স্নান করিতে চলিলেন । এদিকে ঠাকুরের ভোগরাগ শেষ হইলে বাবাজী মহাশয় তিলক-আঁহিকাদি করিয়া মহাপ্রসাদ গ্রহণপূৰ্ব্বক বিশ্রাম করিলেন ।

গোপালপুর গ্রামখানি বেশ সমৃদ্ধিশালী এবং বহু জনতাপূর্ণ । বাবাজী মহাশয় অপরাহ্নে বসিয়া আছেন, এই সময় কয়েকজন গ্রামবাসী লোক আসিয়া বলিল, “আজ্ঞে আমাদের বড়ই বাসনা যে, গ্রামের মধ্যে একবার শ্রীচরণ অর্পণ করা হয় ।” বাবাজী মহাশয় বলিলেন, “সে ত আমার ভাগ্যের কথা ভাই ! তবে চল, সংকীৰ্ত্তন লইয়াই যাওয়া যাক্ ।” তখন লক্ষ্মীনারায়ণবাবু বলিলেন, “আজ্ঞে কীর্ত্তন লইয়া গেলে গ্রামের শোভাও দেখা হয় না, গ্রামবাসী লোকও প্রাণ ভরিয়া আপনার শ্রীচরণ দর্শন করিতে পারে না । অতএব শুধু বেড়াইতে গেলে ভাল হয় না ?” বাঙ্গা-কল্লতরু প্রভু ভক্তের ইচ্ছাতেই সম্মত হইয়া বেড়াইতে বাহির হইলেন এক এক বাড়ী বা বাড়ীর নিকটবর্ত্তী গলি দিয়া যাইবার সময় সেই পাড়ার লোকদিগের আর্তিপূর্ণ সরল ব্যবহার দর্শনে বিমুগ্ধ হইয়া যাইতেছেন । এইরূপ বহুক্ষণ ভ্রমণের পর সন্ধ্যার সময় কাছারীবাড়ীতে আসিয়া আরতি-কীর্ত্তন করিতে লাগিলেন । রাজ প্রায় এগারটা পর্য্যন্ত নাম কীর্ত্তন করিয়া মহাপ্রসাদ গ্রহণপূৰ্ব্বক শয়ন করিলেন ।

দ্বিতীয়বার খণ্ডগিরিতে মহোৎসব ।

পরদিবস প্রাতঃকালে উঠিয়াই বাবাজী মহাশয় খণ্ডগিরি দর্শনে যাইবার প্রস্তাব করায় লক্ষ্মীনারায়ণবাবু বলিলেন, আজ্ঞে আমার ইচ্ছা যে, মধ্যাহ্নে এই স্থানেই ঠাকুরের ভোগ দিয়া প্রসাদ গ্রহণপূর্বক পাহাড়ে উঠিলে ভাল হয় । কারণ সেস্থানে একরাত্রি না থাকিলে স্ববিধা হইবে না । বিশেষতঃ এই পাহাড়ে দেখিবার জিনিষ অনেক আছে ।” বাবাজী মহাশয় এই প্রস্তাবে সন্মত হইয়া স্নান-আস্থিকাদি করিতে লাগিলেন । বেলা একটার সময় সকলে মহাপ্রসাদ গ্রহণ করিয়া নাম করিতে করিতে খণ্ডগিরি রওনা হইলেন । ইতিপূর্বেই লক্ষ্মীনারায়ণবাবু সকলের রাত্রিবাসের জন্ত একটি খুব বড় তাঁবু খাটাইয়া তাহার এক পার্শ্বে বাবাজী মহাশয়ের সজ্জা-লোকদিগের থাকিবার ব্যবস্থা করতঃ অপর পার্শ্বে শ্রামশুল্করবাবু প্রভৃতির থাকিবার বন্দোবস্ত করিয়াছিলেন । বাবাজী মহাশয় সংকীৰ্ত্তন করিতে করিতে পাহাড়ের উপর ভ্রমণ করিতে লাগিলেন ।

পার্শ্বস্থ পল্লীগ্রামনিবাসী ব্রাহ্মণদিগের মনের ধারণা যে, বাবাজী মহাশয় জাতিভেদ একেবারে মানেন না এবং এই জাতিভেদ প্রথা দূর করিবার জন্তই দেশে দেশে ভ্রমণপূর্বক মহোৎসবাদিতে আচণ্ডালকে একসঙ্গে আহ্বার করান হয় তাই আজ কয়েকজন মিলিয়া প্রকৃত মৰ্ম্ম বুঝিবার জন্ত পাহাড়ের উপর বাবাজী মহাশয়ের নিকট আসিয়া, উপস্থিত হইলেন । বাবাজী মহাশয় দূর হইতে উহাদিগকে দেখিবামাত্রই সাষ্টাঙ্গ দণ্ডবৎ প্রণাম পূর্বক বিনীতভাবে অভ্যর্থনা করিলেন । একজন ব্রাহ্মণ বলিলেন, “আপনি মহাপুরুষ ; আমরা বেদাদি অধ্যয়ন বা আচারাদিশূদ্ধ গৃহী ব্রাহ্মণ । আমাদের আপনাকে আপনার ঐরূপ সম্মান করা যুক্তিযুক্ত নহে ।”

বাবাজী মহাশয় করষোড়ে বলিলেন, “আজ্ঞে—বর্ণানাং ব্রাহ্মণো গুরুঃ ।
আবার ভগবান্ নিজে বলিয়াছেন—‘অবিষ্টো বা সবিষ্টো বা ব্রাহ্মণো
মামকী ভনুঃ ।’ আপনাদের ব্যবহার দেখা অপরের অধিকার নাই,
আপনারা যাহাই কেন হউন না, আমাদের গুরুস্থানীয় ।” ব্রাহ্মণগণ
আর কোনও উত্তর করিতে না পারিয়া উপবেশন করিলেন । উহাদের
মধ্যে স্মৃতিরত্ন উপাধিধারী একটা প্রাচীন স্মার্ত পণ্ডিত বাবাজী মহাশয়কে
প্রশ্ন করিলেন, “আচ্ছা জাতিভেদটা সৃষ্টিকর্তার সৃষ্টি না জীব-কল্পিত ?”

বাবাজী । ভগবান্ বলিয়াছেন :—“চাতুর্কর্মাণ্যং ময়া সৃষ্টং গুণকর্ম-
বিভাগশঃ” আবার অগ্নত্র—“মুখবাহুরূপাদেভ্যঃ পুরুষস্তাশ্রমৈঃ সহ ।
চত্বারো জজিরে বর্ণা গুণৈর্বিপ্রাদয়ঃ পৃথক্ ॥” অগ্নত্র—“অস্ত্যজানসৃজৎ
ব্রহ্ম তামসান্ শ্রমজীবিনঃ ।” যখন ভগবান্ গুণকর্মাদিভেদে পৃথক্
পৃথক্ভাবে ব্রাহ্মণ, ক্ষত্রিয়, বৈশ্য, শূদ্র ও অস্ত্যজ রূপে সৃষ্টি করিয়াছেন
এবং তাহাদের আশ্রমাদিও নির্দিষ্ট হইয়াছে, তখন জাতিভেদটা আধুনিক
বলিলে চলিবে কেন ?

স্মৃতিরত্ন । আজকাল শিক্ষিত সমাজে—এমন কি, অনেক সাধক-
গণের মধ্যেও দেখা যায় যে, তাঁহারা এই জাতিভেদপ্রথাটা উচ্ছেদ
করিবার জন্ত বহু প্রয়াস পাইতেছেন ।

বাবাজী । অনাদিসিদ্ধ বস্তুকে উচ্ছেদ করিবার চেষ্টাকে সম্পূর্ণ ভ্রম
ভিন্ন আর কি বলা যাইতে পারে ?

স্মৃতিরত্ন । গুণিনাছি চৈতন্যদেব নাকি জাতিভেদ মানিতেন না ।
তাই তাঁহার গণেরাও মানেন না ?

বাবাজী । ঐগৌরাজ মহাপ্রভু মর্যাদাপুরুষোত্তম । জগতে একপ
কোন পদার্থই নাই যাহা তিনি না মানেন । তবে তিনি সারপ্রাণী,
শব্দের বাহ্য সার মর্ম্ম সেইটী তিনি নিরপেক্ষভাবে পালন করিয়াছেন ।

তবে ভগবন্তুক্ত সম্বন্ধে শাস্ত্রে বলিয়াছেন :—

“চণ্ডালোহপি দ্বিজশ্রেষ্ঠো হরিভক্তিপরায়ণঃ ।

হরিভক্তিবিশীনস্ত দ্বিজোহপি স্বপচাধমঃ ॥

তথা। ভাগবতে—“বিপ্রাঙ্গিষড়্গুণযুতাদরবিন্দনাভ-পাদারবিন্দ-বিমুখাৎ স্বপচং বরিষ্ঠং । মত্তো তদর্পিতমনো বচনে হিতার্থঃ প্রাণং পুনর্নাতি সকুলং ন তু ভুরিমানঃ ॥

এই সমস্ত শাস্ত্রের সার মর্ম গ্রহণ করিয়াই মহাপ্রভু ভগবন্তুকের সহিত ব্যবহার করিয়া থাকেন ; তাই লোকে বাস্তব দৃষ্টিতে মনে করে, তিনি জাতিভেদ মানেন না ।

স্বতিরত্ন । আপনাদের মধ্যে যেরূপ আহারাদির ব্যবস্থা দেখা যায়, তাহাতে যে জাতি বলিয়া কথাটা জগতে আছে, আমাদের ত সেরূপ বোধ হয় না । মানুষ ত দূরের কথা—কুকুরের উচ্ছিষ্ট পর্য্যন্ত রাক্ষসাদি গ্রহণ করিতেছেন । এ কি একাকার কাণ্ড !

বাবাজী । বাবা ! আপনারা কখনও কি শ্রীকৃষ্ণের ধামের ব্যাপার অনুসন্ধান করিয়া দেখেন নাই ? না দেখিলেও আপনারা সুপণ্ডিত । শাস্ত্রাদি ত কাহারও অবিরুদ্ধ নাই । একটু অনুসন্ধান করিয়া দেখুন, পদ্ম পুরানে বলিয়াছেন :—

“শুদ্ধং পর্য্যুষিতং বাপি নীতং বা দূরদশতঃ ।

প্রাপ্তমাত্রেন ভোক্তব্যং নাত্র কালবিচারণা ॥

ন দেশনিয়মস্তত্র ন কালনিয়মস্তথা ।

প্রাপ্তমগ্নং কৃতং শিষ্টৈর্ভোক্তব্যং হরিরব্রবীৎ ॥”

অতএ—কুকুরাণাং মুখাদভ্রষ্টং তদগ্নং পাবনং মহৎ ।

“কৃষ্ণেনিবেদিত বস্তুর প্রসাদ আখ্যান ।

বৈষ্ণবোচ্ছিষ্ট হয় মহাপ্রসাদ নাম ॥

স্পর্শদোষে কৃষ্ণপ্রসাদ নষ্ট নাহি হয় ।

নষ্টদোষ ঘটাইলে নরক নিশ্চয় ॥

এইরূপে বাবাজী মহাশয় নানাপ্রকার প্রমাণাদির দ্বারা মহাপ্রসাদের শ্রেষ্ঠত্ব প্রতিপাদন করিতে লাগিলেন । পাহাড়ের নিকট একখানি গ্রামে একটা রামাইত বৈষ্ণবের মঠ আছে । ঐ মঠে রামসীতার সেবা রহিয়াছে । মঠের মহাস্ত্র বাবাজী কার্তিকী পূর্ণিমায় মহাসমারোহের সহিত তাঁহাদের ইষ্টদেবতা রামসীতার মূর্তি লইয়া এই খণ্ডগিরিতে আগমন পূর্বক রাসলীলা করিয়া থাকেন । তিনি যেমন গুনিলেন যে বাবাজী মহাশয় সংকীৰ্ত্তনের দল সহ বহুলোক সমভিব্যাহারে খণ্ডগিরি আগমনপূর্বক একরাত্র সেই স্থানে বাস করিবেন, অমনি গ্রাম্যলোকদিগকে খবর দিলেন যে, আজই আমার ঠাকুর খণ্ডগিরি যাইবেন । অনেক লোক আসিতে লাগিল । একজন তদ্রূপে আসিয়া মহাস্ত্রকে জিজ্ঞাসা করিলেন, “মহাস্ত্র মহারাজ ! আপনার রাসঘাট কার্তিকী পূর্ণিমার দিন হইত না ?”

মহাস্ত্র । বাবা ! যখন মহাত্মা বৈষ্ণব আগমণ করিবেন, তখন আজই আমার সেই কার্তিকী পূর্ণিমা ।

তখন আর কেহ কিছু না বলিয়া অতিশয় উৎসাহের সহিত ঠাকুরকে লইয়া চলিলেন । অপূৰ্ণ আকর্ষণ ! চারিদিক্ হইতে নানাভাবে গানের দল আসিতে লাগিল । মহা ছলছল ব্যাপার ! কোথাও মৃদঙ্গ, কোথাও মাদল, কোথাও পাখোয়াজ, কোথাও ঢোলক, কোথাও ধমক, কোথাও খঞ্জনি প্রভৃতি বাজাইয়া কীৰ্ত্তন হইতেছে । চারিদিকে নানারূপ দোকান পসার বসিয়াছে । অনেক রকম খেলা ও তামাসা আসিয়াছে । অতিবিস্তৃত

স্থান ; লোকসংখ্যা প্রায় পাঁচ হাজার হইয়াছে । লক্ষ্মীনারায়ণ বাবু অতুমান চারি পাঁচ শত লোকের পরিমাণ রান্নার যোগাড় করিয়াছিলেন । তাঁহার মনের ধারণা ছিল যে, একে পাহাড়ের উপর, তাহাতে রাত্রিকাল, বোধ হয় বেশী লোক হইবে না ; কিন্তু অতিরিক্ত লোকসংখ্যা হওয়ায় লজ্জিতভাবে একথানা পাল্কির মধ্যে গিয়া পলাইয়া রহিলেন ।

ক্রমে রাত্রি হইল । চারিদিকে মশাল জ্বলিতেছে । নানাপ্রকার গান বাজ এবং লোকের গোলমালে দশদিক্ মুখরিত । সকলেই আনন্দে মাতোয়ারা, কে কাহাকে লক্ষ্য করে ? তাঁবুর মধ্যে বাবাজী মহাশয় কীৰ্ত্তন করিতে লাগিলেন । লোকে লোকারণ্য ; কিন্তু আশ্চর্যের বিষয় এই যে, কহারও মুখে কথা নাই—সকলেই নীরবে সংকীৰ্ত্তন শুনিতেছে ।

রাত্রি আনাজ এগারটার সময় কীৰ্ত্তনসমাপ্তি হইলে শ্রামসুন্দর বাবু আসিয়া বাবাজী মহাশয়কে বলিলেন, “আজ্ঞে লক্ষ্মীনারায়ণ দাদা চারি পাঁচশত লোকের পরিমাণে রান্না করাইয়াছেন । উপস্থিত লোকসংখ্যা প্রায় পাঁচ হাজার হইবে । দেখিয়া শুনিয়া তিনি ত পলাইয়া আছেন । এদিকে ঠাকুরের ভোগও হইয়া গিয়াছে । কিরূপ করা যাইবে ? বাবাজী মহাশয় বলরাম ভ্রমরবরকে ডাকিয়া বলিলেন, “দেখ বলরাম ! যে স্থানে রান্না হইতেছে, তাহার নিকট গিয়া করষোড়ে মা অন্নপূর্ণাকে বল, “মাগো করুণা ময়ী ! ক্ষুধার্ত্ত অনেক লোক উপস্থিত হইয়াছে । একে রাত্রি তাহাতে পার্কৃত্য ভূমি ; অল্প কোনও রূপ যোগাড় করার সাধ্য নাই ; অতএব এই বস্তুর দ্বারা তাহাতে সকলের পরিপূর্ণ হয় তাহাই করুণ ।” এদিকে সকলকে এক সঙ্গে বসাইয়া দাও এবং পূজারীদিগকে বল যেন ভাল তরকারী অন্ন প্রভৃতি প্রত্যেক জিনিষের এক পাশ হইতে খরচ করে । আমিও যাই-তেছি ।” বলরাম বাবু বিনা বিচারে বাবাজী মহাশয়ের আদেশানুসার কার্য করিতে লাগিলেন । ইত্যবসরে বাবাজী মহাশয় যেখানে ভোগ

হইয়াছে, সেখানে গমনপূর্বক প্রেমগদগদকণ্ঠে “জয় নিতাই” বলিয়া হুঙ্কার করতঃ পূজারীদিগকে অভয় দিয়া বলিলেন, বাবা ! নিতাইটাদের রূপায় কোনই অভাব হইবেনা ; মা জাহ্নবাকে স্মরণপূর্বক একপাশ হইতে পরিবেশন কর ।” এই বলিয়া পদ্মভের মধ্যে গমন করিলেন । সকলকে পাতা দেওয়ার সময় দেখেন যে, পাতা কম আছে । তখন উপস্থিত দোকানীদের দোকানে বাহা ছিল আনাইলেন । বাকি কেহ কেহ মাটির পাত্রে কেহ বা কাপড় পাতিয়া মহাপ্রসাদ পাইতে বসিলেন ! পূর্বোক্ত ব্রাহ্মগণকে বাবাজী মহাশয় জিজ্ঞাসা করিলেন, “আজ্ঞে আপনাদের ত এতরায়ে বাড়ী যাওয়া কঠিন ; তবে কিছু জলখাবার আনাইয়া দেওয়া যাক্ ।” ব্রাহ্মগণ সম্মত্রে বলিয়া উঠিলেন, “আপনি এইমাত্র মহাপ্রসাদের এত মাহাত্ম্য ব্যাখ্যা করিলেন, আবার আমাদিগকে জলখাবার দিবেন কেন ?”

বাবাজী । দেখুন সেটা, আপনাদের রুচি ; কারণ বিশ্বাস ত আর অপরের কথামত চলে না ! অল্পগ্রহ করিয়া যদি আদেশ করেন, তবে সেইরূপ ব্যবস্থা করা যাইতে পারে ।

ব্রাহ্মগণ মহাপ্রসাদ পাইতে স্বীকৃত হইলে বাবাজী মহাশয় শ্রামসুন্দর বাবুকে ডাকিয়া বলিলেন, “ইহাদিগকে বিশেষ যত্নপূর্বক পৃথক স্থানে বসাইয়া মহাপ্রসাদ দিবার ব্যবস্থা করিয়া দাও ।” শ্রামসুন্দর বাবু সেইরূপ ব্যবস্থাই করিলেন বটে ; কিন্তু একে লোকের সংখ্যা অধিক, তাহাতে রাত্রি ; যতই পৃথক করিয়া বসান হউক না কেন, নানাজাতীয় লোক মিয়া উহাদের নিকট বসিতে লাগিল । শ্রামসুন্দর বাবু তাহাদিগকে উঠাইতে গেলে ব্রাহ্মগণ নিষেধ করিয়া বলিলেন, “বাবু ! এ মহাপ্রসাদ ইহাতে আবার জাতিবিচার কি ? ইহাতে স্পর্শদোষ হইতে পারে না ।” শুনিয়া সকলেই বিস্মিতভাবে বাবাজীমহাশয়ের শক্তির প্রশংসা করিতে লাগিলেন ।

ক্রমে পরিবেশন আরম্ভ হইল। পূজারীগণ বাবাজী মহাশয়ের আদেশমত একপাশ হইতে দিতে লাগিলেন। অপরূপ নিষ্ঠাইচ্ছাদের খেলা! অলঙ্কৃতভাবে উপস্থিত সর্বসাধারণ লোকের পরিপূর্ণভাবে মহাপ্রসাদ পাওয়া হইল। তখন লক্ষ্মীনারায়ণবাবু, বলরামবাবু, গ্রামসুন্দর বাবু প্রভৃতি পরমানন্দে বাবাজী মহাশয়ের চরণে দণ্ডবৎ প্রণামপূর্বক বলিলেন, আজ্ঞে এত লোকের পরিপূর্ণভাবে প্রসাদ পাওয়ার পরেও এখন প্রায় পঁচিশ জনের প্রসাদ অবশিষ্ট আছে। কি আশ্চর্য্য! এ কিরূপে হইল আমরা অনুসন্ধান পাইলাম না।”

বাবাজী। ভগবৎশক্তির খেলা কাহারও বোধগম্য হইতে পারে কি? দ্রোপদীর এক কণা শাকে দশ হাজার ঋষির যিনি উদর পূরণ করাইয়াছিলেন, তাঁহার নিকট পাঁচ শত লোকের অন্তে পাঁচ হাজার লোক খাওয়ান, এ ত অতি যৎসামান্য কথা। জগতে এমন কোনও অসম্ভব কার্য্য নাই, বাহা তাঁহার রূপাকটাক্ষে সম্ভব হইতে না পারে। কেবল আমাদের নিজ নিজ বিশ্বাসের অভাবেই আমরা অভাব বোধ করিয়া থাকি।

এইরূপ নানাবিধ উপদেশ বাক্য দ্বারা সকলের মনে প্রবোধ দিয়া বা নিজ প্রতিষ্ঠার ভয়ে ঐর্ষ্যাভাব গোপন করিয়া সকলকে মহাপ্রসাদ পাইবার আদেশ করতঃ নিজে মহাপ্রসাদ পাইলেন। সকলেই বাবাজী মহাশয়ের অধরামৃত লইয়া মহাপ্রসাদ গ্রহণপূর্বক বিশ্রাম করিলেন। আগন্তুক লোকসকল আর কেহ সে রাত্রে কোথাও না গিয়া নানারূপ আমোদ প্রমোদে রাত্রি যাপন করিতে লাগিল।



বাকশাই গমন ।

পরদিন প্রভাতে বাবাজী মহাশয় প্রাতঃকৃত্য সমাপনপূর্বক সগণে নাম করিতে করিতে রওনা হইলেন । যে গ্রামে সংকীৰ্ত্তন উপস্থিত হইতেছে, সেই গ্রামবাসী বালকবৃদ্ধ স্ত্রীপুরুষ সকলেই উধাও হইয়া ছুটিয়া আসিতেছে । কি আশ্চর্য্য ! যুবতি কুলবধু একরূপ অবস্থায় আসিয়া সংকীৰ্ত্তনের নিকট উপস্থিত হইতেছে যে, কুলমর্যাদা বা গুরুজনভীতি অথবা নিজ সঙ্কোচাদির কথা যেন একেবারেই ভুলিয়া গিয়াছে । এক গ্রামের সীমা পর্য্যন্ত না পৌছাইতেই অপর গ্রামের লোক আসিয়া উপস্থিত হইতেছে । আনন্দের পাথর বহিয়া যাইতেছে । এইরূপে নানা স্থানে ভ্রমণ করিতে করিতে বেলা আন্মাজ দশটার সময় বাকশাই কাছারিতে গিয়া উপস্থিত হইলেন । স্থানটা শ্রামসুন্দর বাবুদের এলাকায় । পূৰ্ব্ব হইতেই ঠাকুরের ভোগ রান্নার যোগাড় করা হইয়ছিল । বাবাজী মহাশয় উপস্থিত হইয়া জিজ্ঞাসা করিলেন, “শ্রামসুন্দর ! এখানে কোন প্রসিদ্ধ ঠাকুরসেবা আছে কি ?”

শ্রামসুন্দর । আজ্ঞে, এই গ্রামে গোপাল জীউ আছেন । অপূৰ্ব্ব বিগ্রহ এবং বহুদিনের প্রাচীন সেবা ।

বাবাজী । এই সময় একবার দর্শন করিতে গেলে হয় না ?

শ্রামসুন্দর । আজ্ঞে বেলা অতিরিক্ত হইয়াছে । গোপালজীউর ভোগের সময় উপস্থিত প্রায় । অতএব বৈকাল বেলা গেলে বড়ই আনন্দ হইবে ।

বাবাজী মহাশয় শ্রামসুন্দর বাবুর কথায় সন্তুষ্ট হইয়া নানাদি সমাপন পূর্বক মধ্যাহ্নকীৰ্ত্তন করিতে লাগিলেন । এদিকে রান্না শেষ হইলে ঠাকুরের ভোগ দেওয়া হইল । ইহারাও সংকীৰ্ত্তন সমাপনান্তে মহাপ্রসাদ পাইয়া কিঞ্চিৎ বিশ্রাম করিলেন ।

অপরান্ন চারিটার সময় নাম কীৰ্ত্তন করিতে করিতে গোপাল জীউর দর্শনে চলিলেন। নিজ সঙ্গেই অনেক লোক, তৎপর আবাস গ্রামবাসী বহুলোক ইহাদের অভিনব অপ্রাকৃত আনন্দময় সঙ্গ পাইয়া স্ব স্ব কার্য্য পরিচ্যাগ পূর্ব্বক সঙ্গে সঙ্গে চলিয়াছেন। গোপালজীউর সেবা এই কথা শুনিয়া প্রথমে সকলেই মনে করিয়াছিলেন যে, হয়ত বাগগোপাল মূর্ত্তি ; কিন্তু উপস্থিত হইয়া দেখেন যে, রাধামদনগোপালজীউ। অপূর্ব্ব দর্শন রাধা-মদনগোপাল উভয়েরই যেন নূতন রকমের ভাব-নূতন রকমের ভঙ্গি। দর্শন মাত্রই বাবাজী মহাশয় জেমে বিভোর হইয়া নানারূপ পদ পদাবলী কীৰ্ত্তন করিতে লাগিলেন। যত্বেপি উপস্থিত লোকসকল প্রায়ই পল্লিগ্রামবাসী ; বাঙ্গালা ভাষা কখনও তাহাদের প্রতিগোচর হইয়াছে বলিয়া বোধ হয় না, তথাপি বাবাজী মহাশয়ের মুখে সরল ভাষায় মধুময় পদাবলী শ্রবণে আবালবৃদ্ধ স্ত্রীপুরুষ সকলেই বিমুগ্ধ। সকলেই যেন আনন্দ সাগরে হাবুডুবু খাইতে লাগিল। এক একবার মনে হইতেছে, মদনগোপাল জীউ যেন আনন্দে উৎফুল্ল হইয়া নৃত্য করিতেছেন। বহুক্ষণ এইরূপ কীৰ্ত্তনানন্দে সকলকে আনন্দিত করিয়া নাম করিতে করিতে বাসায় প্রত্যাবর্ত্তন করিলেন।

এইরূপ পরমানন্দে দিনের পর দিন যাইতে লাগিল। একদিন অপরান্নে খান্ন মিঞা নামক একটা মুসলমানগায়ক, বাবাজী মহাশয়কে গান শুনাইতে আসিলেন। বাকশাই কাছারী-বাড়ীর একপ্রান্তে বাগিচার মধ্যে অপূর্ব্ব একটা বৃক্ষ আছে। ঐ বৃক্ষটা স্বভাবতই এমনভাবে সৃষ্ট হইয়াছে যে, দেখিলে ঠিক্ একটা নিকুঞ্জ বলিয়া বোধ হয়। উচ্চপ্রদেশ হইতে বৃক্ষের শাখাগুলি একরূপভাবে ভূমিতল স্পর্শ করিয়াছে যে, একটু কষ্ট করিয়া কেহ বৃক্ষের মূলপ্রদেশে প্রবেশ করিলে বাহির হইতে আর তাহাকে দেখা যায় না। খান্ন মিঞা এবং স্ত্রীমহাশয়

বাবু প্রভৃতি কয়েকজনকে সঙ্গে লইয়া বাবাজী মহাশয় সেই বৃক্ষমূলে গিয়া উপবেশন করিলেন । খান্নু মিঞা নিজ রচিত পদে অতি মধুর ভাবে রাধাকৃষ্ণলীলা বর্ণন করিয়াছেন : যেমন স্নগলিত পদাবলী, তেমনই উহার মধুময় কণ্ঠস্বর । এক একটা গান করিতেছে, আর বাবাজী মহাশয় ও অন্যান্য শ্রোতৃবৃন্দ আনন্দে আত্মহারা হইয়া যাইতেছেন ।

এইরূপে বহুক্ষণ ধরিয়া কীর্তন হইতেছে; হঠাৎ বাবাজী মহাশয় আনন্দবিহ্বলভাবে খান্নুকে আলিঙ্গনপূর্বক উহার কণ্ঠে হরিনামমন্ত্র প্রদান করিলেন । তখন খান্নু মিঞা আনন্দে বিভোর হইয়া বাবাজী মহাশয়ের চরণ ধারণপূর্বক প্রেমগদগদকণ্ঠে বলিতে লাগিল, “আজ আমার জীবন ধন্য হইল । এতদিন যে আমি কৃষ্ণলীলাগুণ কীর্তন করিয়া বেড়াইয়াছি আজ তাহা সার্থক হইল । আজ আমি জানিলাম যে, প্রভু আমাকে অঙ্গিকার করিলেন ।” শ্রামসুন্দর বাবু প্রভৃতি সকলেই খান্নু মিঞার প্রতি বাবাজী মহাশয়ের অবাচিত রূপাদর্শনে সমস্বরে উহার সৌভাগ্যের প্রশংসা করিতে লাগিলেন । খান্নু বিনীত বাক্যে সকলের আশীর্বাদ প্রার্থনা করিয়া বাবাজী মহাশয়ের চরণে দণ্ডবৎ প্রণামপূর্বক ইহার আদেশে স্বস্থানে প্রস্থান করিল । বাবাজী মহাশয় শ্রামসুন্দর বাবুকে বলিলেন, “দেখ শ্রামসুন্দর ! এই স্থানটা এমন মনোমুগ্ধকর যে, এস্থান ছাড়িয়া আমার স্থানান্তরে যাইবার ইচ্ছা হইতেছে না ।” এইরূপ কথোপকথনে সায়ংকাল উপস্থিত হইলে কাহারিবাড়ীতে আসিয়া সন্ধ্যা আরতি কীর্তন আরম্ভ করিলেন । ক্রমে রূপ, অভিসার ও মিলন কীর্তনান্তে যথাসময়ে মহাপ্রসাদ পাইয়া বিপ্রাম করিলেন ।

পরদিবস অতি প্রত্যুষে বাবাজী মহাশয় প্রাতঃকৃত্য সমাপনপূর্বক কাহারিবাড়ীর অঙ্গনে নাম কীর্তন আরম্ভ করিলেন । ক্রমে চারিদিক হইতে বহুলোক আসিয়া সমবেত হইতে লাগিল । বেলা অল্পমান সাড়ে

আটটার সময় অন্ধনে রোজ পতিত হওয়ায় বাবাজী মহাশয়ের কষ্ট হইতেছে দেখিয়া শ্যামসুন্দর বাবু বলিলেন, “আজ্ঞে ঘরে গিয়া কীৰ্ত্তন করিলে ভাল হয় না ?” বাবাজী মহাশয় বলিলেন, “না, আজ এই অন্ধনেই উদয়াস্ত নামকীৰ্ত্তন হইবে।” শুনিয়া শ্যামসুন্দর বাবু অতি দৃষ্টচিন্তে উপরে আচ্ছাদন করিয়া দিলেন ।

অপূৰ্ব আকর্ষণ ! বেংলার সঙ্গে কীৰ্ত্তনানন্দও বৃদ্ধি পাইতে লাগিল । বাড়ীতে তীলার্দ্ধ স্থান নাই । চারিদিক লোকে .লোকারণ্য । প্রায় ছয় সাত শত লোক উপস্থিত হইয়াছে । কাছারীবাড়ীর একপ্রান্তে একখানি ঘরে একটা বড় সত্বর* বাধা ছিল । বেলা আন্দাজ বারটার সময় সে ছট্‌ফট করিতে লাগিল । কিছুতেই ঘরে থাকিতেছে না দেখিয়া বাবাজী মহাশয় বলিলেন, “উহাকে ছাড়িয়া দাও ।” তখন একজন উহাকে ছাড়িয়া দিবামাত্র সে অতি দ্রুত বেগে বাবাজী মহাশয়ের কাছে আসিয়া ইহার গা চাটিতে লাগিল । তখন বাবাজী মহাশয় উহার কর্ণে মন্ত্রপ্রদান করিয়া কহিলেন, “যাও বাবা সুস্থ হইয়া ঘরে থাক এবং মনে মনে নাম কর ; প্রভু অচিরে তোমাকে রূপা করিবেন ।” বলিয়া যেমন বাম হস্তে সত্বরটার পিঠের উপর একটা চাপড় মারিলেন, অমনি সে ধীরে ধীরে নিজগৃহে চলিয়া গেল । সকলে দেখিয়া অতিশয় বিস্মিতভাবে পরস্পর বলাবলি করিতে লাগিল, “আমরা কখনও এরূপ মহাপুরুষ দেখি নাই— দেখিব বলিয়া আশাও নাই ।” ক্রমে সন্ধ্যা উপস্থিত হইলে বাবাজী মহাশয় নামের সহিত আরতি-কীৰ্ত্তন করিতে লাগিলেন । রাত্রি অল্পমান দশটার সময় মহাপ্রসাদ গ্রহণপূর্বক শয়ন করিলেন ।



মহাপ্রসাদের মিলন ।

একদিন সকালবেলা সকলে বসিয়া আছেন, হঠাৎ বাবাজী মহাশয় শ্যামসুন্দর বাবুকে সম্বোধন করিয়া বলিলেন, “দেখ শ্যামসুন্দর ! আজ বড়ই শুভদিন । এমন দিন প্রায়ই ঘটেনা ।”

শ্যামসুন্দর । আজ্ঞে এমন কি আশ্চর্য্য ঘটনা হইল যে আপনি এত প্রশংসা করিতেছেন ?

বাবাজী । আজ একটা অপূৰ্ণ সম্মিলন হইবে ।

শ্যামসুন্দর । আজ্ঞে আমরা দেখিতে পাইব ত ?

বাবাজী । পাইবে বই কি ! সকলের সমক্ষেই হইবে ।

এই কথা শুনিয়া সকলেই অতি উৎকণ্ঠিতভাবে সেই সন্ধ্যার প্রতীক্ষা করিতে লাগিলেন । বাবাজী মহাশয় স্নানাদি সমাপনপূৰ্ব্বক মধ্যাহ্ন কীর্ত্তন করতঃ মহাপ্রসাদ গ্রহণান্তর কিঞ্চিৎ বিশ্রাম করিলেন । বেলা অল্পমান চারিটার সময় একজন লোক তার কাঁধে লইয়া তথায় আসিয়া উপস্থিত হইল । বাবাজী মহাশয় তাহাকে জিজ্ঞাসা করিলেন, “বাবা । তোমার বাক্যে কি আছে ?”

ভারী । শ্রীজগন্নাথস্বর মহাপ্রসাদ আউ কেছাপাড়া বলদেব জীউ, গোবিন্দ জীউ ও গোপীনাথ জীউস্বর মহাপ্রসাদ বিজয় করু অচ্ছত্তি ।

শুনিবামাত্র বাবাজী মহাশয়ের সৰ্ব্বাঙ্গ পুলকিত এবং নয়ন দুইটা সজল ও আরক্তিম হইল । আশ্চর্য্য ব্যাপ্তে উঠিয়া মহাপ্রসাদের সম্মুখে সাষ্টাঙ্গ দণ্ডবৎ প্রণামপূৰ্ব্বক ভিতর আঙ্গিনায় লইয়া গিয়া নিজহস্তে খুলিতেছেন, এই সময় একজন পূজারী আসিয়া বলিল, “আজ্ঞে গোপাল জীউর কিঞ্চিৎ মহাপ্রসাদ আনিয়াছি ।” শুনিবামাত্র বাবাজী মহাশয়

শশব্যস্তে উঠিয়া পূর্ববৎ প্রণাম বন্দনা করতঃ নিজহস্তে উহা একপার্শ্বে রাখিলেন। ইত্যবসরে এক সঙ্গে দুইজন লোক আসিয়া উপস্থিত হইল। উহাদের মধ্যে একজন বলিল, “আজ্ঞে চারিনঙ্গলের মহাশয় লক্ষ্মীনারায়ণ জীউর প্রসাদ পাঠাইয়াছেন।” অপর ব্যক্তি বলিল, “আজ্ঞে কয়েরপুরের শ্যাম বাবু তাঁহাদের বিনোদ বিহারী জীউর, কুয়াপালের শ্রোপীনাথজীউর এবং মাহাঙ্গার গোবিন্দজীউর কিঞ্চিৎ কিঞ্চিৎ মহাপ্রসাদ পাঠাইয়াছেন।” এবার বাবাজী মহাশয়ের ধৈর্য্য রহিল না। আনন্দে অধির হইয়া নৃত্য করিতে লাগিলেন। কিছুক্ষণ পরে কিঞ্চিৎ স্থির হইয়া মহাপ্রসাদের আবরণ মোচন পূর্বক একটা পাত্রে সমস্ত মহাপ্রসাদ একত্রিত করিতে লাগিলেন। ইত্যবসরে ললিতাদাসী সকল প্রসাদ হইতে পৃথক্ পৃথক্ ভাবে কিছু কিছু লইয়া একখানি থালায় একটা পারশ করিল। বাবাজী মহাশয় সকলকে একত্রে বসিবার আদেশ করিয়া নিজহস্তে পরিবেশন করিতে আরম্ভ করিলে ললিতাদাসী বলিল, “আজ্ঞে আপনি এই মধ্যস্থানে বসুন, আমি সকলকে পরিবেশন করিয়া দেই।” তাহাই হইল। বাবাজী মহাশয় মধ্যস্থলে বসিলেন। ললিতাদাসী সেই পারশের থালাখানি ইহার সম্মুখে দিয়া অপরাপর সকলকে পরিবেশন করিতে লাগিল। উপস্থিত ভক্তমণ্ডলী লীলাময়ের এই বিচিত্র লীলাদর্শনে একেবারে বিস্ময়-সাগরে নিমগ্ন হইলেন। যেন আনন্দের পাথার বহিয়া যাইতে লাগিল। বাবাজী মহাশয় শ্যামসুন্দর বাবুকে বলিলেন, “শ্যামসুন্দর ! জগন্নাথের ভারীকে জিজ্ঞাসা কর ত তাহাকে কে এখানে পাঠাইল ?” শ্যামসুন্দর বাবু ভারীকে জিজ্ঞাসা করায় সে বলিল, “আজ্ঞা পঅর দিন বড় সিদ্ধার ভোগ হালা উত্তরু জনে কালিয়া ব্রাহ্মণ বড় দেউলরু ভারিয়া বলি ডাকিলে মু পংছিবাক মোহর হাতরে দেড়টা টঙ্কা দেই কহিলে তু এহি মহাপ্রসাদ নেই নেয়ালী বাটে ঝঙ্কর দেই কেজাপাড়া পংছি সেঠু শ্যামসুন্দর বাবুকে

ইলাকারে অলর্তিঠারে বাকশাই চরণদাস বড় বাবাজী অছি তাকু দে বু ।
 এহি দেড় টকা বাটরে খর্চ করিবু ; তোহর মজুরি সেটা মাগিলে সে দেই
 দেবে । ইহা বলি সে চালি গলা, যু বি ভার নেই রহনা হইলি যেমতি
 কেশ্রাপাড়া আপনা ওয়াসকু পঁহছিলু ঠিক সেহি সময়রে বলদেবঙ্কর
 মহাপ্রসাদ আসি বিজয় কলে । মোহর এহি কথা শুনি সমস্তে আনন্দ হোই
 সেই বলদেবঙ্কর প্রসাদ আউ গোবিন্দদেবঙ্কর প্রসাদ ও লক্ষ্মীনারায়ণ
 জগদেবঙ্কর গোপীনাথ জীউঙ্কর প্রসাদ মোহর হাতরে দেই গোটিয়ে লোক
 সঙ্গে এটি পাঠাই দেবা হেলে ! যু আউ কোন কহিবি 'জগন্নাথঙ্কর
 অন্নগ্রহরে মুখে এত্তে বাট চালি আসিলি মোহর টকিয়ে কষ্ট বা পরিশ্রম
 বোধ হোই নাহি ।" ভারীয়া কথা শুনিয়া সকলেই অতিশয় আশ্চর্যান্বিত
 হইলেন । বাবাজী মহাশয় জগন্নাথদেবের কৃপা ও স্নেহ-ভালবাসার কথা
 মনে করিয়া অঝোরনয়নে কাঁদিতে কাঁদিতে বলিলেন, "হা প্রভু ! নরাধম
 যদিও তোমাকে ছাড়িয়া দূরদেশে আসিয়াছে, তথাপি তোমার কি এতই
 কৃপা ! ধন্য ধন্য করুণাময় !" বলিয়া আনন্দে নৃত্য করিতে লাগিলেন ।
 ইহার তাত্‌কালিক অবস্থা দর্শনে উপস্থিত ভক্তমণ্ডলী আনন্দ-বিহ্বলভাবে
 'জয় জগন্নাথ' বলিয়া কেহ বা নৃত্য কেহ বা উচ্চৈঃস্বরে রোদন করিতে
 করিতে সেই স্থানে গড়াগড়ি দিয়া নিজেকে কৃতার্থ মনে করিতে
 লাগিলেন । এইরূপ মহাপ্রসাদ মিলনানন্দে বহুক্ষণ কাটিয়া গেল ।
 শ্রামসুন্দর বাবু জগন্নাথের ভারীকে কিছু দিয়া বিদায় করিলেন । সন্ধ্যার
 সময় বাবাজী মহাশয় আরতি কীর্ত্তন আরম্ভ করিলেন । ক্রমে রূপ,
 অভিসার ও মিলন কীর্ত্তনান্তে মহাপ্রসাদ পাইয়া সকলে বিশ্রাম করিলেন ।



কুয়াপাল, মাহাজা ও কয়েরপুর গমন ।

একদিন কুয়াপাল নিবাসী শ্রীযুক্ত গোলকচন্দ্র বসু মহাশয় তাঁহার বাড়ীতে বাবাজী মহাশয়কে লইয়া ষাইবার জন্ত লোক পাঠাইলে ইহান সকলে নাম করিতে করিতে তথায় গিয়া উপস্থিত হইলেন । গোলক বাবুর ঠাকুরবাড়ীতে প্রায় তিনঘণ্টাকাল মাতামাতি উদ্দগ্ধ কীর্ত্তন হইল এবং অনেক লোক বাবাজী মহাশয়ের নিকট হইতে মন্ত্রগ্রহণ করিল ।

সেস্থানে একদিন থাকিয়া তথা হইতে মাহাজা শ্রীযুক্ত বাবু আনন্দচন্দ্র ব্রহ্মের বাড়ীতে গমন করিলেন । আনন্দবাবু বিশেষ যত্নাগ্রহের সহিত সকলের সেবাশ্রদ্ধা করিতে লাগিলেন । তাঁহার বিশেষ চেষ্টা যে সগণে বাবাজী মহাশয়কে অন্ততঃ কিছুদিন ওস্থানে রাখেন ; কিন্তু তাঁহার সে চেষ্টা ফলবতী হইল না ; কারণ বাবাজী মহাশয়ের ইচ্ছা যে একবার উড়িষ্যা প্রদেশ ভ্রমণ করেন । সুতরাং একস্থানে বহুদিন থাকা হইতেছে না । দুইদিন মাহাজা থাকিয়া শ্রীযুক্ত বাবু গ্রামচরণ সেন মহাশয়ের বিশেষ আগ্রহে কয়েরপুর তাঁহাদের ঠাকুরবাড়ীতে গমন করিলেন । ঠাকুরের নাম “বিনোদ বিহারী ।” ঠাকুরের বামে শ্রীমতী এবং দক্ষিণে ললিতাজীউ রহিয়াছেন । অপূৰ্ণ দর্শন এবং বড়ই প্রীতির সেবা । গ্রামচরণ বাবুরা জাতিতে বৈষ্ণব । উহাদের বংশাবলীর মধ্যে সকলেই বিনোদগন্তপ্রাণ.. জীলোকেরা নানাপ্রকার ফুলের সাজ প্রস্তুত করিয়া বিনোদবিহারী জীউকে সাজাইয়া থাকেন । ইহাদের বাটীস্থ জীপুরুষ সকলের মধ্যে আর একটি মধুর জিনিষ বর্তমান ; সেটা হিংসা বা ঈর্ষ্যা, অর্থাৎ কেহ যদি বিনোদকে ফুলের চুড়া প্রস্তুত করিয়া দিলেন, অপর একজন দেখিবামাত্র তিনি ফুলের আঁচলা, কাণবালা

ইত্যাদি প্রস্তুত করিয়া পরাইলেন । অপর একজন আবার তাহা অপেক্ষাও উৎকৃষ্ট ফুলের গহনা প্রস্তুত করিয়া দিলেন । কেবল যে সাজাইবার বিষয়েই এইরূপ, তাহা নহে ; ভোগের সম্বন্ধেও এইরূপ । পরস্পর পরস্পরকে পরাস্ত করিবার চেষ্টা । মোট কথা—আবালবুদ্ধ বনিতা সকলেই বিনোদবিহারীজীউকে আত্মসমর্পণ করিয়াছেন । তাঁহাদের সমস্ত চেষ্টা বিনোদবিহারীকে লইয়া । আজ বাবাজী মহাশয়কে পাইয়া সকলেই পরমানন্দিত ; কোনও নৈমিত্তিক লীলার অনুরোধেই হউক অথবা বাবাজী মহাশয়ের দর্শনার্থেই হউক বিনোদবিহারী শ্রীমতী এবং ললিতা দেবীকে লইয়া বাহিরে বিজয় করিলেন । বিনোদবিহারীর সর্বাঙ্গ চন্দনে চর্চিত এবং নানারূপ ফুলসাজে সজ্জিত । উহার চারিদিকে নানাবিধ সুগন্ধি পুষ্পগুচ্ছসকল বিরাজিত । অপূর্ণ শোভা ! বাবাজী মহাশয় বিনোদবিহারীজীউকে দর্শন করিয়া আনন্দে আত্মহারা হইলেন । এক একবার ললিতাদেবী ও শ্রীমতীর অপূর্ণ ভাব ও সৌন্দর্য্য দর্শনে অঝোর নয়নে বুরিয়া কঁাদিতে লাগিলেন । কিছুক্ষণ পরে একটা বালককে জিজ্ঞাসা করিলেন, “বাবা ! বিনোদবিহারীজীউ আজ বাহিরে কেন ?” বালক বলিল, “আজ কেবল আপনাকে দর্শন দিবার জন্তই ঠাকুর বাহিরে বিজয় করিয়াছেন ।” শুনিবামাত্র প্রেমপুলকিতভাবে নৃত্য করিতে করিতে বলিলেন, “প্রভু ! ধন্য তোমার করুণা ! আমি তোমাকে না চাহিলেও তুমি আমার জন্ত এত ব্যস্ত ! আমাকে দর্শন দিবার জন্ত তুমি কিনা নিজ সিংহাসন পরিত্যাগপূর্ব্বক বাহিরে আসিয়া বসিয়াছ ! কি আর বলিব ? বলিবার ভাষা নাই ।” ইত্যাদি নানারূপ দীনতাপূর্ণ বাক্য বলিয়াও প্রাণের আবেগ মিটাইতে না পারায় কীৰ্ত্তন ধরিলেন :—
(হের দেখ) বিনোদ নাগর, বিনোদ নাগরী, বিনোদ মোহন রূপ ।

বিনোদ হেলন, বিনোদ দোলন, বিনোদ রসের কুণ ॥

বিনোদ বচন, বিনোদ রচন, বিনোদ মুখের হাসি ।
 বিনোদ নয়নে, বিনোদ চাহনৌ, মরমে রহল গশি ॥
 দক্ষিণে ললিতা, বামে ভানুসুতা, মাঝে শোহে নটরাজ ।

(কিবা) নব জলধরে, যত্ন সৌদামিনী, মদনমোহন সাজ ॥

(দৌহার) নাশায় মুকুতা, কঙ্কিতে কিঙ্কিনী, চরনে নুপুর বাজে ।
 আধ নীল সাড়ী, আধ পীতবাস, জিনি মনমথ রাজে ॥
 আধ শিরে শোহে, ময়ূর মুকুট, ঈষৎ বামেতে হেলা ।
 আধ শিরে বেণী, যত্ন ভুজঙ্গিনী, ময়ূর সহিতে মেলা ॥
 আধ গলে শোহে, গজমতি হার, আধগলে বনমালা ।
 আধ বরণ, কষিল কাঞ্চন, আধ চিকন কালা ॥
 রাইর কপালে, সিন্দূর তিলক, শ্রামের চন্দন বিন্দু ।
 সোনার কমলে, ভানুর উদর, নব জলধরে ইন্দু ॥
 আহা মরি মরি, কিরূপ মাধুরী, ছটায় ভুবন ভুলে ।
 কনক লতিকা, জহু জড়াওল, নবীন তমাল কোলে ॥

প্রায় দুই ঘণ্টাকাল এইরূপ নানাবিধ জুমধুর পদাবলী কীর্তনে জন-
 সাধারণকে আনন্দ-সাগরে ভাসাইয়া কীর্তন সমাপ্তি করতঃ শ্যামবাবু এবং
 অন্যান্য ভক্তগণের বিশেষ যত্নাগ্রেহে পরমানন্দে মহাপ্রসাদ সেবা করিয়া
 বিশ্রাম করিলেন ।

চক্রবর্তীর সন্দেহভঞ্জন ।

পরদিবস প্রাতঃকালে বাবাজী মহাশয় প্রাতঃকৃত্যাদি সমাপন
 পূর্বক ঠাকুরবাড়ীতে বসিয়া আছেন, এই সময় রাসবিহারী চক্রবর্তী
 নামক জনৈক ব্রাহ্মণ আসিয়া উপস্থিত হইলে ইনি বিশেষ সন্মানের

সহিত ঠাঁহাকে নিকটে বসাইলেন । তখন তিনি ইহাকে প্রশ্ন করিলেন,
“আচ্ছা, ভগবানে বৈষ্ণব্য বা পক্ষপাতিত্ব দোষ আছে কিনা ?”

বাবাজী । বাবা ! ভগবান্ সৰ্ব্বেশ্বর, সৰ্বাস্তব্যামী, সৰ্বব্যাপী, সৰ্ব-
ভূতহিতে রত, সমদর্শী । ঠাঁহার শত্রু বা মিত্র কেহই নাই । তিনি
গীতায় নিজমুখে বলিয়াছেন :—

“সমোহং সৰ্বভূতেষু ন মে দ্বেষোহস্তি ন প্রিয়ঃ ॥”

চক্রবর্তী । কিন্তু ঐ গীতায়ই আবার ভগবান্ বলিয়াছেন :—

পরিজ্ঞানায় সাধুনাং বিনাশায় চ দুষ্কৃতাং ।

ধর্মসংস্থাপনার্থায় সম্ভবামি যুগে যুগে ॥”

আবার পুতনা, অঘাসুর, বকাসুর, তৃণাবর্ত, দম্ববজ্র, শিশুপাল,
কংস, জরাসন্ধ প্রভৃতিকে নিধন করিলেন । রামাবতারে রাবণকে
মারিয়া বিভীষণকে রাজ্যপ্রদান, বালিকে মারিয়া সুগ্ৰীবকে রাজ্যকরা
ইত্যাদি কার্য যাহা শাস্ত্রে পাওয়া যায়, ইহাতে ত সম্পূর্ণ পক্ষপাতিত্ব
রহিয়াছে বলিয়া বোধ হয় ।

বাবাজী । এই অসুর-বিনাশাদি কার্যে আপনি অনুগ্রহনিগ্রহের
পরিচয় কি পাইলেন ?

চক্রবর্তী । কেন, কাহাকেও সবংশে ধ্বংস করিলেন, আবার অতি
নিষ্ঠুরভাবে কাহারও জীবন বিনাশ করিলেন । আর যে ঠাঁহার ভক্ত
অর্থাৎ তোষামোদকারী, তাহাকে রাজত্ব প্রদান করিলেন । ইহাতে
ঠাঁহাকে কি বলা যাইতে পারে ? ইন্দ্রের ইন্দ্রত্ব প্রদানের জন্য বামনরূপে
অবতীর্ণ হইয়া চলনা দ্বারা অত্যন্ত বড় দাণ্ডাশিরোমণি বলিরাঞ্জের সর্বস্ব
অপহরণ করিলেন । এমন কি, অবশেষে তাহাকে বন্ধন করিয়া পাতালে
পর্যন্ত প্রেরণ করিলেন, ইহাতেও কি ভগবান্কে সমদর্শী বা দয়ালু বলিতে
হইবে ?

বাবাজী । আমাকে যদি ইহার উত্তর করিতে বলেন, তবে আমি বলিব, যদি দয়াল বলিতে হয় তবে এক ভগবান্ ভিন্ন জগতে আর কেহই হইতে পারেনা । কারণ তাঁহার দয়ায় কালাকাল, পাত্ৰাপাত্ৰ, পাপ বা অপরাধের বিচার নাই । আপনি এক একটা করিয়া ভাবিয়া দেখুন । পুতনা বালঘাতিনী রাক্ষসী—হিংসাপরায়ণা, ক্রুরা ; সে নিজ স্তনে বিষ মাখাইয়া কৃষ্ণের প্রাণবিনাশের জন্ত গমন করিয়াছিল । পরমদয়াল শ্রীকৃষ্ণ তাহার অশেষ অনারজিত পুঞ্জ পুঞ্জ মহা মহা পাপরাশির সহিত সেই ক্রুরবৃত্তিসম্পন্ন প্রাণ বিনাশ করিয়া তাহাকে নিজ বাৎসলাময়ী ধাত্রীদিগের যোগ্য স্থান প্রদান করিলেন । দম্ববক্র, শিশুপাল, কংস প্রভৃতি অসুরগণ গো, ব্রাহ্মণ, দেবতা এবং বৈষ্ণবদিগের দ্রোহাচরণ করিয়া এতই মহাপাপ সঞ্চয় করিয়াছিল যে, অনন্ত জীবন নরক-যন্ত্রণা ভোগ করিতে হইত ; পরম দয়াল ভগবান্ নিজহস্তে তাহাদিগকে নিধন করিয়া সালোক্য, সারূপ্য বা সাযুজ্য মুক্তি প্রদান করিলেন । ভাবিয়া দেখুন, বহুকাল তপস্তা করিয়া যে মুক্তি প্রাপ্ত হওয়া কঠিন, আজ কি না অসুরগণ ভগবানের সহিত দ্রোহাচরণ করিয়া অনায়াসে সেই মুক্তি প্রাপ্ত হইল । ভাবিয়া দেখিলে ভগবান্ বরং পাপী ও পতিত দিগের প্রতি বিশেষ অনুগ্রহই করিয়া থাকেন । রাবণ কুম্ভকর্ণ ভগবানের সহিত তিন জন্ম শত্রুতা আচরণ করিয়া ব্রহ্মশাপ হইতে মুক্তির প্রার্থনা করায় ভগবান্ তাহাদের প্রার্থনা পূরণ করিয়াছিলেন । বলিরাজ মদগর্ভে গর্ভিত হইয়া ভগবানের পাদপদ্ম ভুলিয়া গিয়াছিল । রূপাময় ভগবান্ তাহার দাবতীয় বন্ধন মোচন করিয়া পাতালে স্থান দিলেন । দেখুন বলির প্রতি এতদূর অনুগ্রহ যে নিজে তাহার দ্বারে দ্বারী হইয়া চিরকালের জন্ত তাহার প্রেমে আবদ্ধ রহিলেন ।

চক্রবর্তী । তাহা হইলে ভক্তগণ তাঁহাকে ভক্তবৎসল বলেন কেন ?

বাবাজী । এইটাই ত ভগবানের ভগবত্তা । অল্পগ্রহ পতিত পাষণ্ডের প্রতি ; কিন্তু ভক্তগণ মনে করেন ভগবান্ আমাদিগকেই কৃপা করিলেন ।

চক্রবর্তী । এইটা না হয় আপনি অম্মুর প্রভৃতির উপর দেখেছিলেন ; কিন্তু সামান্য জীবের প্রতি তাঁহার বৈষম্য নাই কি ?

বাবাজী । কিরূপ বৈষম্য আপনি অনুভব করিলেন প্রকাশ করিয়া বলুন ।

চক্রবর্তী । জীবে এবং ঈশ্বরে সম্বন্ধ কি ?

বাবাজী । জীব অংশ তিনি পূর্ণ । জীব দাস তিনি প্রভু ! জীব অম্মু তিনি মহান্ । শাস্ত্রে বলিয়াছেন :—“কেশাগ্রশতভাগশ্চ শতধা কল্লিতশ্চ চ । ভাগে জীব ইতি খ্যাতঃ স চানন্তায় কল্পতে ॥” জীবের কোনই স্তম্ভ ক্ষমতা নাই । তিনি যাহা করাইবেন, জীব ইচ্ছায় হউক অনিচ্ছায় হউক তাহাই করিতেছে ।

চক্রবর্তী । বেশ কথা ! তাহা হইলে একজনকে দিয়াই বা কেন তিনি নানারূপ অসং কার্য্য করাইয়া অশেষ যন্ত্রণাদায়ক নরক ভোগ করান, আর একজন দ্বারা বা কেন অতি সুখময় বৈকুণ্ঠাদি—নিজলোক-প্রাপক কার্য্য করাইয়া তাঁহার নিকট প্রাবন্ধ হন ? একজন হয় ত দয়া, ক্ষমা ও শাস্তি পরিপূর্ণহৃদয়, আর একজন হয় ত ঘোর অত্যাচারী, পরপীড়ক পাষণ্ড । একজন হয় ত পরহৃৎথে হুঃখী, দাতার শিরোমণি, অপর একজন হয় ত পরশ্রীকাতর, পরবিত্তাপহারক । যদি তিনিই জীবের চালক হন, তবে এরূপ বৈষম্যদোষ ঘটে কেন ?

বাবাজী । জীব প্রবৃত্তির বশতাপন্ন হইয়া যখন অসং পথে অগ্রসর হইতে চায়, ভগবান্ তখন নানারূপ বাধাবিঘ্ন দ্বারা সেই অসং পথ হইতে তাহাকে প্রতিনিবৃত্ত করিবার চেষ্টা করিয়া থাকেন ! তথাপি জীব যখন চৈতন্য লাভ না করিয়া পুনঃ পুনঃ সেই কার্য্যে প্রবৃত্ত হয়, তখন তিনি

জীবের ক্ষমতা বুঝাইবার জন্য একটু শিথিলভাবে আড়ালে থাকেন, তাই জীব নানারূপ সুখ দুঃখ ভোগ করিয়া থাকে ।

চক্রবর্তী । জীবের এইরূপ প্রবৃত্তি জন্মে কেন ?

বাবাজী । ইহার মূল কারণ অহংকার । প্রকৃতিই যাবতীয় কার্য করেন ; কিন্তু জীব মিথ্যা অহংকার করিয়া কষ্ট পায় । তাই ভগবান্ গীতায় বলিয়াছেন :—

প্রকৃতে: ক্রিয়মাণানি গুণৈ: কৰ্ম্মাণি সৰ্ব্বশ: ।

অহংকারবিমুক্তাত্মা কর্ত্তাহমিতি মন্যতে ॥

এই অহংকারের বলেই জীব যত অনর্থ ঘটায় । মনে করুন, কোনও এক রাজা একটা কর্মচারীকে শাস্তিবিধানের জন্য নিযুক্ত করিয়াছেন । কিন্তু সে কার্যে প্রবৃত্ত হইয়াই নিজেকে কর্ত্তা মনে করত: যাহা ইচ্ছা করিতেছে । তখন তাহার উপরে যে কেহ আছে, এই কথাই তাহার মনে নাই । রাজা যখন কর্মচারীর এইরূপ ব্যবহার অবগত হইবেন, তখন তাহাকে গুরুতর শাস্তিভোগ করিতে হইবে না কি ?

চক্রবর্তী । জীবের এই যে কর্ত্তৃত্ব ইহা ত ভগবদন্ত, তবে জীবের দোষ কি ? তিনি যদি জীবকে এরূপ ক্ষমতা না দিতেন, তবে ত জীব আর এইরূপ অহংকার করিত না ।

বাবাজী । না, এই কর্ত্তৃত্ব ভগবদন্ত নহে । গীতায় বলিয়াছেন :—

“ন কর্ত্তৃত্বং ন কৰ্ম্মাণি লোকস্ত সৃষ্টিতি প্রভু: ।

ন কৰ্ম্মফলসংযোগং স্বভাবস্ত প্রবর্ত্ততে ॥”

চক্রবর্তী । বেশ কথা ! এই যে স্বভাব, ইহাও ত জীবের নিজস্ব নহে ; কারণ পূৰ্ণজ্ঞানার্জিত স্রষ্টার বা স্রষ্ট্রীর ফলেই ত ভগবান্ আমাদের এইরূপ প্রবৃত্তি বা স্বভাব প্রদান করিয়াছেন ।

বাবাজী। এইটীও ত ভগবদ্বাক্ত হইতে পারেনা—এটা অজ্ঞানকৃত গীতায় বলিয়াছেন :—

“নাদন্তে কন্তুচিং পাপং ন চৈব স্মৃতিং বিভূঃ ।

অজ্ঞানেনাবৃতং জ্ঞানং তেন মুহুস্তি জন্তব্য ॥”

চক্রবর্তী। জীবের এই অজ্ঞান কোথা হইতে আসিল? কেনই বা জীব এইরূপ ভগবদ্-বহিমুখ হইয়া থাকে?

বাবাজী। ভগবদ্-বিশ্বুতিই এই বহিমুখতার কারণ। চরিতামৃত বলিয়াছেন :—

“কৃষ্ণ ভুলি যেই জীব অনাদিবহিমুখ ।

অতএব মায়ী তারে দেয় সংসারদুখ ॥

কভু স্বর্গে উঠায় কভু নরকে ডুবায় ।

দণ্ডে জনে রাজা যেন নদীতে চুবায় ॥”

এই বহিমুখতা যে কতদিন হইয়াছে, তাহা কেহই নির্দিষ্ট করিতে সমর্থ হয় না। তাই বলিলেন, অনাদি কাল হইতেই জীব এইরূপ ভোগ করিয়া আসিতেছে। জ্ঞান-অজ্ঞান, সুখ-দুঃখ, আলো-অন্ধকার, সকলই প্রভুনির্মিত; তবে অজ্ঞান সৃষ্টি করিবার উদ্দেশ্য জীবকে মোহিত করিয়া কষ্ট দেওয়া নহে। কেবল জ্ঞানের সুখময়ত্ব ও সর্বশক্তিমত্তা বুঝাইবার জন্তই বোধ হয় ভগবান্ অজ্ঞানের সৃজন করিয়াছেন। জ্ঞান-মন্দ যাবতীয় বস্তু জগতে বর্তমান আছে। প্রত্যেক বস্তু প্রত্যেকের জন্ত নহে; সকল বস্তুরই অধিকারী-ভেদ রহিয়াছে। ইহাতে ভগবানের উপর দোষারোপ করা আমাদের সম্পূর্ণ ভুল। এ বিষয়ে একটা গল্প মনে পড়িল—একদিন একটা লোক কোন ডাক্তারখানায় গিয়া দেখিলেন যে, ডাক্তার বাবুর ঔষধের আলমারীর মধ্যে একটা

শিশির উপর ‘বিষ’ লেখা রহিয়াছে । তিনি ডাক্তার বাবুকে জিজ্ঞাসা করিলেন, “এই শিশিতে কি আছে ?”

ডাক্তারবাবু বলিলেন, “উহাতে ভয়ানক উগ্রভেজ বিষ রহিয়াছে । আপনি উহাতে হাত দিবেন না ; কারণ চোখে বা কোনও স্থানে উহা সংলগ্ন হইলে বড়ই অনিষ্ট হইবে !” তিনি ডাক্তার বাবুকে বলিলেন, “মহাশয় ! আপনারা চিকিৎসক ; পরের উপকার করিবেন, তবে অনিষ্টকারী বস্তু কাছে রাখিবার প্রয়োজন কি ?” ডাক্তার বাবু বলিলেন, “বাবা ! সময়ে ঐ বিষই অমৃতত্বে পরিণত হয় ।” লোকটি ডাক্তার বাবুর কথা অবিশ্বাস করতঃ ডাক্তার পরগীড়ক মূৰ্খ মনে করিয়া বাড়ী আসিলেন । ঘটনাক্রমে পরদিবস আবার তিনি ডাক্তার-খানায় গিয়াছেন, এই সময় কোনও রোগীর বাড়ী হইতে ডাক্তার-বাবুর ডাক আসিল । তিনি তাড়াতাড়ি ঐ বিবের শিশিটা সঙ্গে লইয়া চলিলেন এবং ঐ লোকটিকেও সঙ্গে লইয়া গেলেন । রোগীর অবস্থা দেখিয়া তাহাকেই বলিলেন, “দেখুন মহাশয় ! আপনি এই শিশিটা হইতে তিন কৌটা ঔষধ কিঞ্চিৎ জলের সহিত মিশাইয়া ইহাকে খাওয়াইয়া দিন ।” ভদ্রলোকটি তখন মনে মনে ভাবিতেছেন, “কি আশ্চর্য্য ! রোগীর প্রাণরক্ষার জন্ত ডাক্তার আনা হইল ; কিন্তু এ ডাক্তার রোগীকে বিষ খাওয়াইয়া মারিয়া ফেলিতে ইচ্ছা করিতেছে ! আমি কেন পাপের ভাগী হইতে যাইব ? যাহা হউক একবার রোগীর অবস্থাটা দেখা যাক ।” ভাবিয়া রোগীর নিকট গিয়া দেখেন যে রোগী মৃত্যুশর্য্যায় শায়িত ; কথা কহিবার সাধ্য নাই, হাতের নাড়ীও বসিয়া গিয়াছে । ডাক্তার বাবু তাহাকে পুনর্বার সেই বিষ দিবার জন্ত অহুরোধ করিলে অগত্যা ডাক্তার বাবুর অহুরোধে তিনি সেই বিবের শিশি হইতে তিন কৌটা কিঞ্চিৎ জলের সহিত রোগীটিকে খাওয়াইয়া দিলেন । তিন চারি

মিনিটের মধ্যেই রোগীটী বেশ কথা কহিতে লাগিল ; নাড়ীর অবস্থারও পরিবর্তন হইল। মোট কথা—রোগীর ভাবগতিক দেখিয়া সকলেরই মনে আশার সঞ্চার হইল যে আর প্রাণের ভয় নাই। ডাক্তার বাবু ঐ বিষের শিশি হইতেই আরও দুই দাগ ঔষধ দিয়া আসিলেন। লোকটী দেখিয়া অবাক্। তখন ডাক্তার বাবু বলিলেন, “কেমন মহাশয়, বিষ যে অবস্থানুসারে অমৃত হয়, আপনি বুঝিলেন ?” লোকটী বলিল, “বুঝিলাম কেন, প্রত্যক্ষ অনুভবই করিলাম।” তবেই ভাবিয়া দেখুন, মঙ্গলময় ভগবানের সৃষ্ট বস্তুর মধ্যে সমস্তই মঙ্গল-প্রদ ; কিন্তু অধিকারভেদে বা অবস্থা-অনুসারে যেটুকু বৈপরীত্য দেখা যায়, সেইটী কেবল ব্যবস্থার দোষ ভিন্ন আর কিছুই নহে।

চক্রবর্তী। এই ব্যবস্থাপক কে ?

বাবাজী। শ্রীগুরুদেব।

চক্রবর্তী। আবার সনেহ জন্মিল। আচ্ছা গুরু যদি মূৰ্খ বা অনুপযুক্ত হন, তবে শিশুর উপায় কি ?

বাবাজী। গুরু মূৰ্খ বা অনুপযুক্ত এই কথাটাই অসঙ্গত ; কারণ ভগবান্ বলিয়াছেন :—

আচার্য্যঃ মাং বিজানীয়াৎ নাবমত্তেত কহিচিৎ ।

ন মর্ত্যবুদ্ধ্যাস্থয়েত সৰ্বদেবময়ো গুরুঃ ॥

অবেই দেখুন, গুরুকে মূৰ্খ বলাও যা, ভগবান্কে মূৰ্খ বলাও তাই।

চক্রবর্তী। আমি ব্যবহারগত যাহা সাক্ষাৎ দেখিতেছি তাহা বলিতে দোষ কি ? গুরু আসিয়াই বার্ষিক লইয়া ব্যস্ত। শিশুর ধর্ম বা পরমার্থের প্রতি বিন্দুমাত্রও লক্ষ্য নাই এবং লক্ষ্য রাখিবার বা করিবার ক্ষমতাও নাই ; এখানে কি বলা যাইবে ?

বাবাজী। গুরু বস্তুটা শব্দগত নহে—বিশ্বাসগত। শিষ্য যদি

গুরুতে ভগবদ্‌বুদ্ধি করিতে পারেন, তাহা হইলে সেই গুরু হইতেই সৰ্বার্থ-
সিদ্ধি হইবে । একলব্য বিশ্বাসের বলে মৃত্তিকানিশ্চিত্রিত দ্রোণ হইতে
যাবতীয় অস্ত্রবিদ্যা শিক্ষা করিয়াছিল বলুন দেখি, সেই মৃত্তিকানিশ্চিত্রিত,
দ্রোণের মূর্ত্তিতে কোনও শক্তি ছিল কি ? সেইরূপ গুরুদেহেতে যদি
কোনও গুণ নাও থাকে ; কিন্তু যদি আমার সেই গুরুতে ভগবদ্‌বুদ্ধি থাকে
তবে নিশ্চই আমি অভীষ্ট ফল লাভ করিতে পারিব । এ বিষয়ে একটি
গল্প মনে পড়িল—কাশীধামে দশাশ্বমেধঘাটে একটি ব্রাহ্মণ নিত্য প্রাতঃস্নান
ও সন্ধ্যা আহ্নিক করিয়া থাকেন । একটি বেষ্ঠাও গঙ্গার অপার পার
হইতে পার হইয়া প্রত্যহ প্রাতঃকালে ঐ ঘাটে গঙ্গাস্নান করিতে আসে ।
ব্রাহ্মণটি বড়ই শাস্ত প্রকৃতি । বেষ্ঠাটি রোজই স্নান করিয়া উঠিবার
সময় বলে “ঠাকুর ! আমাকে একটা মস্ত্র দিতে হইবে ।” ব্রাহ্মণ কোনই
কথা বলেন না ; কিন্তু মনে মনে বড়ই ক্রোধ করিয়া থাকেন । এইরূপে
প্রায় তিন মাস কাটিয়া গেল ; বেষ্ঠাটির কিন্তু ঐ এক বুলি । একদিন
ব্রাহ্মণ ক্রোধ সত্ত্বরণ করিতে না পারিয়া বলিলেন, “তুই কি বলিতেছিস ?”

বেষ্ঠা । ঠাকুর ! আমাকে একটা মস্ত্র দাও না ।

ব্রাহ্মণ । তুই মহা পাপীয়সী, মস্ত্র নিয়া কি করুবি ?

বেষ্ঠা । ঠাকুর ! মস্ত্র না নিলে নাকি ভবপারে যাইতে পারা যায়
না । তাই বলি ঠাকুর আমাকে একটা মস্ত্র দাও ।

ব্রাহ্মণ মনে মনে বলিলেন, “তুই যদি ভবপারে যাবি তবে নরক
ভোগ করিবে কে ?” প্রাকাশে বলিলেন, “কি আর মস্ত্র দিব, যা ঢেঁকি
ভজিবি ।”

শুনিবামাত্র বেষ্ঠা আনন্দে ব্রাহ্মণ ঠাকুরকে প্রণাম বন্দনা করিয়া
গৃহে গমন করিল । সেইদিন হইতে ব্রাহ্মণ সেই ঘাট পরিত্যাগ পূর্ব্বক
অপর ঘাটে স্নান করিতে লাগিলেন । বেষ্ঠা কিন্তু একাগ্রমনে সৰ্বদার

তবে “ঢেঁকি ঢেঁকি” এই মন্ত্র জপ করিতে লাগিল। একদিন মনে মনে ভাবিতে লাগিল, “গুরু কর্ণধার হইয়া ভবসাগর পার করিবেন। তবে আমি সামান্য গজা পার হইতে নৌকা অবলম্বন করি কেন?” ভাবিয়া শ্রীগুরুদেবের চরণ চিন্তা করতঃ ঢেঁকি ঢেঁকি জপ করিতে করিতে অনায়াসে হাঁটিয়া গজার অপর পারে গেল। এইরূপ প্রত্যাহই গমনাগমন করিতে লাগিলে ক্রমে লোকের দৃষ্টি পড়ায় পরস্পর বলাবলি করিতে লাগিল যে, “একটা বেশ্যা পারে হাঁটিয়া গজা পার হইয়া থাকে।” ব্রাহ্মণটি শুনিয়া মনে মনে ভাবিলেন যে, আমার নিকটে যে একটা বেশ্যা মন্ত্র চাহিতেছিল, সে কি রকম আছে একবার খোঁজ করিয়া দেখি না কেন! ভাবিয়া পরদিবস দশাঙ্কমেধ ঘাটে স্নান করিতে গেলেন। ক্ষণকাল পরে দেখেন, সেই বেশ্যাটি কর জপ করিতে করিতে গজাপার হইয়া আসিতেছে। ঘাটে আসিয়া ব্রাহ্মণকে দর্শন করিবামাত্র গললয়ীকৃতবাসে তাঁহার চরণে প্রণাম করিলে ব্রাহ্মণটি জিজ্ঞাসা করিলেন, “তুমি গজাপার হইলে কিরূপে?”

বেশ্যা বলিল, “কেন প্রভো! আপনি কর্ণধার হইয়া ভবসমুদ্র পার করিবেন, এ ত সামান্য নদী! আপনার এতই দয়া যে, আপনার দত্ত মন্ত্র জপ করিতে করিতে আমি অনায়াসে চলিয়া আসি। আপনি যে কেমন করিয়া পারে আনেন তাহা আপনিই জানেন।”

ব্রাহ্মণ একটু বিস্মিতভাবে মনে করিলেন যে, হয়ত ঐ ঢেঁকি শব্দটার কোনও গুণ থাকিবে, আচ্ছা একবার পরীক্ষা করিয়াই দেখা যাক। তখন প্রকাশ্যে বলিলেন, “তুমি কেমন করিয়া পারে যাও আমাকে দেখাও ত!”

বেশ্যা বলিল, “প্রভো! আপনিই ত আমাকে পার করিয়া দেন। আজ চলুন, একবার দাসীর বাড়ীতে পদার্পণ করিবেন।” বলিয়া বেশ্যা

ঢেঁকি ময়ূর জপ করিতে করিতে নির্ভীকচিত্তে জলের উপর হাঁটুয়া পায় হইতে লাগিল। ব্রাহ্মণ কিন্তু ঢেঁকি ঢেঁকি জপ করিতে করিতে ভীতভীতচিত্তে এক এক পা অগ্রসর হইতে লাগিলেন। কিঞ্চিৎ দূর যাইতে না যাইতেই ব্রাহ্মণ অপ্রাধ জলে পড়িয়া হাবুডুবু খাইতে লাগিলেন। তাই বলি, গুরুর বোগ্যযোগ্যতা বা মন্ত্রের শুদ্ধাশুদ্ধতার বিচার করিলে কোনই লাভ নাই। একমাত্র শিষ্টের বিশ্বাসের গুণে ফলাফল হইয়া থাকে।

এতক্ষণে চক্রবর্তী মহাশয়ের চোখে জল আসিল—উঠিয়া বাবাজী মহাশয়কে আলিঙ্গন পূর্বক স্থানে গ্রহণ করিলেন। বাবাজী মহাশয়ও বেলা অতিরিক্ত হওয়ার স্নানাদি সমাপন করিয়া মহাপ্রসাদ গ্রহণপূর্বক বিশ্রাম করিলেন।

সিদ্ধাপুর যাত্রা

পরমানন্দে বাকসাহি কাহারিতে পনের দিন কাটিয়া গেল। মধুপুর রাজ্যের ম্যানেজার বাবু গোপীমোহন রায় মহাশয় তাঁহাদের সিদ্ধাপুর কাহারিতে বাবাজী মহাশয়কে লইয়া যাইবার জন্ত প্রায়ই লোক পাঠাইয়া থাকেন। একদিন নিজে আসিয়া বিশেষ অনুরোধ করিতেছেন, এই সমস্ত বাকসাহি হইতে অনুমান দুইমাইল দূরবর্তী বহুডিহি গ্রামনিবাসী কোত্তার বাবু রঘুনাথ মহান্তিও সগণে বাবাজী মহাশয়কে নিমন্ত্রণ করিতে আসিলেন। বাবাজী মহাশয় রঘুনাথ বাবুকে জিজ্ঞাসা করিলেন, “রঘুনাথ! তোমাদের গ্রাম কি সিদ্ধাপুর যাইবার রাস্তায়?”

রঘুনাথ বাবু বলিলেন, “আজ্ঞে হ্যাঁ।” তখন ইনি বলিলেন, “আচ্ছা আগামী কল্য রাতে তোমার বাড়ী থাকিছা পরদিন এখানে সিদ্ধাপুর

মাওয়া যাইবে ।” রথুনাথ বাবু তাহাতেই সন্তুষ্ট হইলেন । গোপীবাবুও পরমানন্দিতচিত্তে বাবাজী মহাশয়ের চরণে প্রণাম করিয়া বিদায় গ্রহণ পূর্বক গমন করিলেন ।

ক্রমে রাত্র প্রভাত হইলে বাবাজী মহাশয় বাকসাহিনিবাসী আবাল-বৃদ্ধবনিতা সকলের নিকট বিদায় গ্রহণ করিতে লাগিলেন । সে এক অপূর্ণ ব্যাপার ! বালক-বৃদ্ধ-যুবা সকলেই একবাক্যে বলিতেছে, “মহাপ্রভু ! আউ কিচ্ছি দিন এঠি রহি করি আন্না মানস্কর হৃদয় শুদ্ধ করি তেবে জীবা হেবে ।” বাবাজী মহাশয় সকলকে স্নমিষ্টবাক্যে প্রবোধ দিয়া অপরাহ্ন পাঁচটার সময় বঙ্কডিহি রওনা হইলেন । এদিকে বাকসাহি কাছারির ছামুকরণ (তহশীলদার বিশেষ) ক্ষেত্রবাসী মাহান্তি মনে মনে সংকল্প করিয়াছে যে, “বাবাজী মহাশয় আমাকে নিজে ডাকিয়া যেদিন অধরায়ুত দিবেন বা ত্রীচরণ সেবা করিতে বলিবেন, সেইদিন জানিব যে আমার প্রতি কৃপা হইল ; তাহার পূর্বে আমি কখনও যাচিয়া অধরায়ুত পাইব না বা চরণ সেবা করিব না ।” একথা আর কাহাকেও না বলিয়া মনে মনেই রাখিয়াছে । বঙ্কডিহি যাইবার সময় বাবাজী মহাশয় বলিলেন, “ক্ষেত্রবাসী ! আমাদের সঙ্গে চল ।” ক্ষেত্রবাসী “বে আন্না” বলিয়া সঙ্গে চলিল । বঙ্কডিহি রথুনাথ মোক্তারের বাড়ীতে গিয়া রাজ্যে খুব সংকীর্ণ হইল । তাঁহার বাড়ীর সকলে এবং গ্রামবাসী অনেক ত্রীপুরুষ সেদিন বাবাজী মহাশয়ের নিকট মন্ত্রগ্রহণ করিল । রাজ্য আন্দাজ এগারটার সময় কীর্তন সমাপ্তি করিয়া মহাপ্রসাদ পাইবার পর বাবাজী মহাশয় শ্যামসুন্দর বাবুকে বলিলেন, “দেখ শ্যামসুন্দর ! তোমরা কেহই এ পাতায় না বসিয়া ক্ষেত্রবাসীকে ডাকিয়া দাও, সে বসুক ।” বলিয়া শয়ন করিতে গেলেন । বাবাজী মহাশয়ের কথা শুনিয়া ক্ষেত্রবাসী দ্রুতচিত্তে সেই পাতায় বসিয়া অধরায়ুত পাইল । কণকাল পরে বাবাজী

মহাশয় উহাকে ডাকিয়া বলিলেন, “ক্ষেত্রবাসী ! তুমি নাকি বেশ পা টিপিতে পার, এস ত !” ক্ষেত্রবাসীর একদিনেই দুই বাসন। পূর্ণ হওয়ার সে প্রেমানন্দে বিভোর হইয়া বাবাজী মহাশয়ের চরণ ধারণপূর্বক কাদিতে কাদিতে সকল কথা নিবেদন করিল ।

পরদিবস প্রভাতে বাবাজী মহাশয় প্রাতঃকৃত্যাদি সমাপন করিয়া সন্ধ্যা সিন্ধাপুর যাত্রা করিলেন । বন্ধুডিহি হইতে অহুমান এক মাইল ব্যবধান চাঁদপুর গ্রামে পহঁছিয়া দেখেন যে, পশ্চিমধ্যে একটা খোলা জায়গার জমী-পুরুষ, বালক-বৃদ্ধ-যুবা বহুসংখ্যক লোক ইহাকে দর্শন করিবার মানসে একত্র সমবেত হইয়াছে । সকলেরই দর্শনোৎকর্ষা প্রবল বুদ্ধিতে পারিয়া এমন এক ঐশ্বর্য্যভাব প্রকাশ করিলেন যে, একসময়ে বালক-বৃদ্ধ-যুবা সকলেই সমভাবে দর্শন পাইয়া পরিতৃপ্ত হইল । গ্রামবাসী লোকের বিশেষ আগ্রহে অগত্যা সে বেলা সেইস্থানে অবস্থান করিলেন ।

এদিকে মধুপুর রাজার ম্যানেজার বাবু গোপীমোহন রায় তাঁহার কাহারিবাড়ী হইতে অহুমান এককোশ পথ পর্য্যন্ত অপূর্বভাবে সুসজ্জিত করিয়াছেন । রাস্তার দুই পার্শ্ব সারি সারি কদলীবৃক্ষ ও নানা বর্ণের পতাকা এবং গ্রথিত আশ্রপত্র ও পুষ্পাদি দ্বারা সুশোভিত হইয়াছে । স্থানে স্থানে পূর্বকৃত্ত স্থাপিত হইয়াছে । ম্যানেজার বাবু অতি উৎসাহভরে রাস্তার উভয় পার্শ্বে নানারূপ আলোর বন্দোবস্ত করিতেছেন, আর মনে চিন্তা করিতেছেন যে, বাবাজী মহাশয় যদি রাজ্যে গুণাগমন করেন, তবে বড়ই আনন্দ হয় । ইত্যাদি নানারূপ কল্পনা করিতে করিতে বাবাজী মহাশয়কে আনিবার জন্ত যাত্রা করিলেন । চাঁদপুর ঘাইবামাত্র বাবাজী মহাশয় বলিলেন, “গোপী ! তুমি বাহা মনে ভাবিয়াছ, তাহাই হইবে আমি সন্ধ্যার পরেই কাহারিবাড়ী পৌঁছিব ।” শুনিয়া গোপী বাবু অভিযয় বিস্মিত হইলেন । বাবাজী মহাশয় স্বথাসময়ে স্নানাদি করিয়া

সংকীৰ্ত্তন আরম্ভ করিলেন । চারিদিকে লোকে লোকারণ্য । সংকীৰ্ত্তনের রোলে দশদিক মধুরিত । বালক-বৃদ্ধ-যুব সকলেই কীৰ্ত্তনে নৃত্য করিতেছে । এইরূপ পরমানন্দময় সঙ্গ ছাড়িয়া কিরূপে গৃহে প্রত্যাবৰ্ত্তন করিবেন, এই ভাবিয়া শ্যামসুন্দর বাবু হঠাৎ উচ্চৈঃস্বরে রোদন করিতে করিতে ভূতলে পতিত হইলেন । তাঁহার সেই আৰ্ত্তি—সেই কান্না শুনিলে পাষাণহৃদয়ও দ্রব হইয়া যায় । শ্যামসুন্দর ভাবী বিরহে ব্যাকুল হইয়া গড়াগড়ি দিতেছে দেখিয়া বাবাজী মহাশয় হঠাৎ তাহার পৃষ্ঠের উপর উঠিয়া নৃত্য করিতে লাগিলেন । কিছুক্ষণ নৃত্য করিয়া অর্ধমুদ্রিত নেত্রে স্থিরভাবে দাঁড়াইয়াছেন, এই সময় বহুলোক মস্ত গ্রহণের জন্য অতিশয় ব্যাকুলভাবে প্রার্থনা করায় ইনি ভাগ্যবান শ্যামসুন্দর বাবুর পৃষ্ঠদেশে দণ্ডায়মান থাকিয়াই বহুলোককে মস্ত প্রদান করিলেন । বেলা অতিরিক্ত হইয়াছে দেখিয়া ভক্তগণ মহাপ্রসাদ পাইবার জন্য নানারূপ অনুরোধ করায় সংকীৰ্ত্তন সমাপ্তি করিয়া মহাপ্রসাদ গ্রহণপূর্বক কিঞ্চিৎ বিশ্রাম করিলেন ।

বেলা অল্পমান চারিটার সময় চাঁদপুর হইতে কীৰ্ত্তন করিতে করিতে সিদ্ধাপুর কাছারি অভিমুখে রওনা হইলেন । শ্যামসুন্দর বাবু প্রভূতি করেকজন বাবাজী মহাশয়ের অপ্রাকৃত আনন্দময় সঙ্গ পরিত্যাগ করিয়া গৃহে প্রত্যাবৰ্ত্তন করিতে অনিচ্ছুক হইলেও বাবাজী মহাশয় নানারূপ মিষ্ট বাক্যে উহাদিগকে সাশ্রনা করতঃ এই স্থান হইতেই গৃহে পাঠাইয়া সন্ধ্যার পর সিদ্ধাপুর কাছারিতে গিয়া পহুছিলেন । পরম প্রেমিক গোপী বাবুর আদর অত্যর্থনায় সকলেই পরিতৃপ্ত হইলেন । বাবাজী মহাশয় কীৰ্ত্তন করিতে করিতে কাছারি-গৃহের মধ্যে প্রবেশ করিলেন । প্রায় দুই ঘণ্টা কাল তথায় উদ্ভূত নৃত্য কীৰ্ত্তন হইল । গোপী বাবুর যত্ন-আগ্রহে নিকট-বর্ত্তী স্থান হইতে অনেক পণ্ডিতমণ্ডলী ও বাবুভায়াগণ সংকীৰ্ত্তন শুনিবার

জন্ত আসিয়াছেন। বাবাজী মহাশয়ের দর্শনে ও কীর্ত্তন শ্রবণে সকলেই পরমানন্দিত হইলেন। বহুক্ষণ কীর্ত্তনের পর কিঞ্চিৎ বিশ্রাম করিয়া মহাপ্রসাদ ভক্ষণ পূর্ব্বক শয়ন করিলেন।

পরদিন প্রভাতে উঠিয়া প্রাতঃকৃত্য ও স্নানাদি করিয়া নগরকীর্ত্তনে বাহির হইলেন। গ্রামখানির দৃশ্য অতি মনোরম। পরমানন্দে সংকীর্ত্তন করিতে করিতে নগর ভ্রমণ করিয়া বেলা অল্পমান এগারটার সময় প্রত্যাবর্ত্তন করিলেন। এই সময় গোপী বাবু অনেকগুলি স্মৃতিষ্ট ডাব নারিকেল ঠাকুরের ভোগ দিয়া বাবাজী মহাশয় এবং ইহার সঙ্গীগণকে দিতে লাগিলেন। বাবাজী মহাশয় একটা ডাব নারিকেলের জল পান করিয়া কিঞ্চিৎ অবশেষ “শ্যামসুন্দর খাও” বলিয়া মৃত্তিকায় ঢালিয়া দিলেন। তখন ললিতাদাসী বলিল, “আজ্ঞে শ্যামসুন্দর ত এখানে নাই।” বাবাজী মহাশয় বলিলেন “ছেলেটা বড়ই ভাল, এই সজ ছাড়া হইয়া বড়ই কষ্ট পাইতেছে। এখন পর্য্যন্ত শুইয়া আছে। প্রভুর অধরামৃত নারিকেলের জল খাইয়া কিঞ্চিৎ সুস্থ হইবে।” এদিকে শ্যামসুন্দর বাবু পূর্ব্ব হইতেই বাবাজী মহাশয়ের অধরামৃত লইবার মানসে একজন লোক পাঠাইয়াছিলেন। সে ব্যক্তি উপস্থিত ঘটনা সকল স্বচক্ষে দেখিয়া অবাক্। ক্রমে বাবাজী মহাশয় মহাপ্রসাদাদি সেবা করিয়া কিঞ্চিৎ বিশ্রাম করিলেন।

শ্যামসুন্দর বাবুর প্রেরিত লোক বাবাজী মহাশয়ের অধরামৃত ও চর্কিত তাম্বুল প্রভৃতি লইয়া বাকসাহি কাছারিতে শ্যামসুন্দর বাবুর নিকট উপস্থিত হইল। এদিকে শ্যামসুন্দর বাবু গৃহমধ্যে শয়ন করিয়া ছিলেন, হঠাৎ তাঁহার মুখ অতি স্মৃতিষ্ট নারিকেলের জলে পরিপূর্ণ হইয়া গেল। তিনি সেই জল গলাধঃকরণ করিয়া ভাবিলেন, “এ কি আশ্চর্য্য! আমি ঘরের মধ্যে শুইয়া আছি। আমার মুখে একরূপ ডাব নারিকেলের

জল কোথা হইতে আসিল ? তবে কি এইটা স্বপ্ন ? তাহাই বা কিরূপে বলি ? কারণ আমি ত নিদ্রিত ছিলাম না । তবে কি এইটা শ্রীগুরুদেবের কৃপা ? মনে মনে এইরূপ নানা কথা আন্দোলন করিতেছেন, এই সময় প্রেরিত লোকটি আসিয়া বখাষথ সমস্ত বৃত্তান্ত বর্ণনা করিল । শ্যামসুন্দর বাবু শ্রীগুরুদেবের অর্হেতুকী কৃপার কথা শুনিয়া উচ্চৈঃস্বরে রোদন করিতে লাগিলেন । বাবাজী মহাশয় গোপী বাবুর বিশেষ আগ্রহে সিদ্ধাপুর কাছারিতে পরমানন্দে কয়েক দিন অতিবাহিত করিলেন ।

ধনেশ্বর গমন ।

একদিন বাবাজী মহাশয় সিদ্ধাপুর কাছারিতে বসিয়া গোপী বাবুকে বলিলেন, “দেখ গোপী ! এখান হইতে ধনেশ্বর কতদূর ?”

গোপী । আজ্ঞে অনুমান দশ মাইল হইবে ।

বাবাজী । একবার ধনেশ্বর বাইবার জন্ত বড়ই ইচ্ছা হইতেছে ।

গোপী । আজ্ঞে আর কয়েকদিন এখানে থাকি হউক । আমি লোক পাঠাইয়া ধনেশ্বরবাসীদিগকে সংবাদ দেই । তাহারা আসিয়া লইয়া যাইবে ।

বাবাজী । সংবাদ দিবার কোন প্রয়োজন নাই । নিতাইর ইচ্ছায় আজই বৈকাল বেলা সেখানে বাওয়া যাউক ।

গোপী বাবু অন্ততঃ আর দুই চারিদিন সেখানে থাকিবার জন্ত বিশেষ অনুরোধ করিতে লাগিলেন ; কিন্তু বাবাজী মহাশয় মিষ্টবাক্যে তাহারক প্রবোধ দিয়া অপরাহ্ন বেলা তিনটার সময় নাম করিতে করিতে ধনেশ্বর রওনা হইলেন । এই গ্রামে করণ কায়স্থের বাসই অধিক । ইহাদের পূর্বপুরুষগণ একটা শ্রীগোবিন্দ বিগ্রহ স্থাপন করতঃ তাঁহার সেবার জন্ত জমা জমির বন্দোবস্ত করিয়া দিয়াছেন । মহাপ্রভুর সেবাইত শ্রীগোবিন্দ

বল্লভ দাস অধিকারী মহাশয় মহাপ্রভুর বাড়ীতেই সগণে বাবাজী মহাশয়ের থাকিবার ব্যবস্থা করিলেন । স্থানীয় ভদ্র লোকের মধ্যে চতুর্ভুজ দাস প্রভৃতি কয়েক জন সম্ভ্রান্ত বড়লোক বাবাজী মহাশয়ের প্রতি বিশেষভাবে আকৃষ্ট হইয়া পড়িলেন । এই স্থানে পুরী ঝাঁজপীঠা মঠস্থ শ্রীশ্রীরাধাকান্ত দেবের কিঞ্চিৎ জমি ইহাদেরই তত্ত্বাবধানে রহিয়াছে । ঝাঁজপীঠা মঠের অধিকারী কৃষ্ণদাস বাবাজী মহাশয়ের অমনোযোগ বা অনবধানতা বশতঃ বহুদিন হইতে উক্ত জমির খাজনা আদি আদায় হয় না । বাবাজী মহাশয়ের দর্শন পাইবামাত্র সমস্ত প্রজাগণ আপনা আপনি খাজনা দিতে লাগিল । এমন কি চতুর্ভুজ বাবুর চেষ্টায় প্রজাগণ নিজ নিজ দেয় খাজনার পরিমাণ বৃদ্ধি করিয়া অর্দ্ধাংশ খাজনা এবং অর্দ্ধাংশ ধাতু দিতে স্বীকৃত হইল । একদিন গোবিন্দবল্লভ অধিকারী, বাবাজী মহাশয়কে বলিলেন, “আজ্ঞে ঝাঁজপীঠা মঠের অধিকারী কৃষ্ণদাস বাবাজী মহাশয় এই স্থানেই দেহ রাখিয়াছেন ।” শুনিয়া বাবাজী মহাশয় বলিলেন, “তিনি এই স্থানেই দেহ রাখিয়াছেন ? তাঁহার কোন সংস্কারাদি করা হইয়াছে কি ? যে স্থানে দেহ রাখিয়াছেন, সেই স্থানটা আমাকে দেখাইতে পার কি ?

গোবিন্দবল্লভ অধিকারী মহাশয় ‘আজ্ঞে চলুন’ বলিয়া ইহাকে সেই স্থানে লইয়া গেলেন । বাবাজী মহাশয় সংকীৰ্ত্তন করিতে করিতে অধিকারী মহাশয়ের অস্থি লইয়া মহাপ্রভুর বাটস্থ পুষ্করিণীর ঈশান কোণে একটা স্থান নির্দেশ পূর্বক সমাধি দিলেন । এবং নিজ গণের মধ্যে একজনকে বলিলেন, “যতদিন তোমরা এইস্থানে থাকিবে, ততদিন রীতিমত ভাবে এই সমাধির সেবা ও মহাপ্রভুর মহাপ্রসাদ সমর্পণ করিবে ।” সেও সেইদিন হইতে বাবাজী মহাশয়ের আদেশানুসারে কার্য করিতে লাগিল ।

একদিন মধুপুর রাজ্যের ম্যানেজার গোপী বাবু এবং অজ্ঞাত অনেক ভক্তলোক মহাপ্রভুর বাড়ীর পূর্ব পার্শ্বস্থ মাঠে বসিয়া বাবাজী মহাশয়ের নিকট নানারূপ তত্ত্ব সম্বন্ধীয় প্রশ্ন করিতেছিলেন। বাবাজী মহাশয়ও হাসিমুখে অতি জটিল জটিল প্রশ্নের উত্তর সরল ভাষায় বুঝাইয়া দিয়া তাহাদের সন্দেহ ভঞ্জন করিতেছিলেন। একজন ভক্ত প্রশ্ন করিলেন, “আজ্ঞে নিত্য শব্দের অর্থ কি ?”

বাবাজী। ‘ত্রিকালসত্যং নিত্যং’ অর্থাৎ যে বস্তু পূর্বে ছিল, বর্তমানে আছে এবং ভবিষ্যতেও থাকিবে, তাহাকেই নিত্য বলা যায়।

ভক্ত। তবে ব্রজলীলা বা নবদ্বীপলীলা কিরূপে নিত্য হয় ? করিণ দ্বাপর যুগে ব্রজলীলা যেরূপ সর্ব নয়নগোচর হইয়াছিল, এখন তা সেরূপ দেখা যায় না ! আবার কলিযুগে এই চারিশত কত বৎসর পূর্বে সপরিচয়ে ঐগোঁরাঙ্গদেব যে লীলা করিয়াছেন, আজ তা সেই লীলা সর্বনয়নগোচর হইতেছে না। তবে লীলা যে নিত্য এ কথা কিরূপে বলি ?

বাবাজী। এই নিত্য সম্বন্ধে আচার্য্যগণ বহুপ্রকার সিদ্ধান্ত করিয়াছেন। কেহ বলিয়াছেন :—

“প্রকট অপ্রকট লীলার দুই ত বিধান।

প্রকট লীলায় করেন প্রভু নিজে নৃত্য গান ॥

অপ্রকটে নামরূপে সাক্ষাৎ ভগবান্।

কীৰ্ত্তন বিহারী রূপে সদা বর্তমান ॥”

অতঃ—“অতাপিহ সেই লীলা করে গৌর রায়।

কোন কোন ভাগ্যবান্ দেখিবারে পায় ॥”

আমরা প্রত্যক্ষ দেখিতে পাই না বলিয়াই যে সে বস্তু নাই, এ কথা হইতে পারে না ! মনে কর, দিবসে আমরা তারা দেখিতে পাই না ; তাই বলিয়া কি বুঝিতে হইবে যে আকাশে তারা নাই ?

ভক্ত । প্রত্যক্ষ না হইলে আছে বলিয়াই বা বিশ্বাস করি কিরূপে ?
 বাবাজী । জগতের বাবভীয় বস্তুই যে প্রত্যক্ষগম্য তাহা নহে ।
 কতকগুলি প্রত্যক্ষগম্য এবং কতকগুলি অদৃশ্যময় । এই অদৃশ্যমান আবার
 অনেক প্রকারে হইয়া থাকে । তন্মধ্যে কতকগুলি বা লক্ষণাধারা,
 কতকগুলি বা আশ্রয় বাক্যে বিশ্বাস দ্বারা । পূর্ণগ্রাস সূর্যাগ্রহণ সময় যখন
 আকাশে তারকামণ্ডলী দৃষ্ট হয়, তখন নিশ্চয়ই অদৃশ্যমান করিতে হইবে যে,
 চন্দ্র, সূর্য্য, গ্রহ, নক্ষত্রগণ নিত্য বিরাজমান । এইরূপ ভাবে প্রেমের
 বিকাশ বা জীব-উদ্ধার প্রভৃতি কার্য্য দেখিলেই মনে করিতে হইবে যে
 সেইখানে নিতাই-গৌরাক্ষের আবির্ভাব হইয়াছে । তাঁহারা ইচ্ছাময়
 স্বতন্ত্র পুরুষ । যখন সর্বনয়নগোচর হইতে ইচ্ছা করেন, তখন তাহাই
 হইয়া থাকেন । আবার যখন লুক্কায়িত হইতে চান, তখন কে তাহার
 প্রতিরোধ করিবে ? মোট কথা—ভগবৎলীলা কুর্মান্ববৎ অর্থাৎ কুর্শের
 অঙ্গসকল বাহিরে প্রকাশিত হইলে সর্বনয়নগোচর হইয়া থাকে, আবার
 যখন ভিতরে প্রবিষ্ট হয় তখন বহির্দৃষ্টির গোচর থাকে না, ভগবৎ-স্বরূপ
 ঠিক সেইরূপ । ইচ্ছাময় ইচ্ছা করিয়া প্রকট হইলে সর্বনয়নগোচর হইয়া
 থাকেন ; আবার যখন অপ্রকট হন তখন কেবলানুভব-স্বরূপ ।

ভক্ত । আচ্ছা ! এ কথা না হয় স্বীকার করিলাম ; কিন্তু
 গোস্বামিগণ বলিলেন, শ্রীরাধাগোবিন্দ উভয়ে মিলিত হইয়া শ্রীগৌরান্বরূপে
 নবদ্বীপধামে অবতীর্ণ হইয়াছেন । বৃন্দাবনের সমীপবর্তীগণই নবদ্বীপে
 গৌরান্ব-পরিকরণ রূপ ধারণ করিয়াছেন । অর্থাৎ বৃন্দাবনে এবং নবদ্বীপে
 অভিন্ন রূপ । তাহাই যদি হইল, তবে বৃন্দাবনের নিত্যস্থ কোথায় রহিল ?
 অর্থাৎ যেমন দুই দধিরূপে পরিণত হইলে দুই বলিয়া আর একটা পৃথক্
 বস্তু থাকে না, সেইরূপ বৃন্দাবনলীলাই যখন নবদ্বীপলীলা রূপে পরিণত
 হইল, তখন বৃন্দাবনলীলা বলিয়া পৃথক্ বস্তুত ত আর থাকিতে পারে না ।

মেট কথা—যখন বৃন্দাবনলীলার সদ্ভাব, তখন নবদ্বীপলীলার অভাব ; আবার যখন নবদ্বীপলীলার সদ্ভাব, তখন বৃন্দাবনলীলার অভাব ঘটিয়া থাকে । তবে ত্রীগোরাঙ্গদেব ভক্তভাব অঙ্গিকার কবিত্তা রাধাকৃষ্ণ উপাসনা শিক্ষা দিলেন কিরূপে ?

বাবাজী । বাবা তুমি যে কথা বলিলে, সেইটা প্রাকৃত বস্তু সঙ্কল্পে । ভগবৎলীলা সঙ্কল্পীয় কথা অন্তরূপ । ভগবদ্ভিষ্মায় গোলোক, বৃন্দাবন, মথুরা, দ্বারকা এবং নবদ্বীপলীলা সমকালীন সর্বত্র বর্তমান । যদি বল কিরূপে ? এ কথার উত্তর একমাত্র ভগবদ্ভিষ্মা ; তাই গোস্বামিগণ সিদ্ধান্ত করিয়াছেন, গোলোকলীলাও নিত্য, বৃন্দাবনলীলাও নিত্য, বৃন্দাবন-লীলাও নিত্য এবং দ্বারকা, মথুরা ও নবদ্বীপলীলাও নিত্য । ইহার সমাধান একমাত্র ভগবদ্ভিষ্মা বা যোগমায়ার প্রভাব ।

বলিতে বলিতে বাবাজী মহাশয়ের চক্ষু দুইটা রক্তবর্ণ এবং সর্কাজ পুঙ্কিত ও কম্পিত হইতে লাগিল । অতি অল্প সময়ের মধ্যেই একেবারে মুচ্ছিত হইয়া ভূতলে পতিত হইলেন । শিবনেত্র ও হস্তদ্বয় মুষ্টিবদ্ধ । দেখিয়া সঙ্গিগণ বিস্মিত ; দেহখানি এরূপ দৃঢ়ভাব ধারণ করিয়াছে যে, বোধ হইতেছে যেন একটা লৌহদণ্ড পড়িয়া আছে । এমন কি একখানি চরণ ধরিয়া তুলিলে সর্ব্বশরীর উঠিয়া আসে । বিশেষ অনুসন্ধান করিয়া দেখিলে শ্বাস বহিতেছে বলিয়া বুঝা যায় । সকলে উচ্চৈঃস্বরে ‘নিতাই গৌর রাধে শ্রাম । হরে কৃষ্ণ হরে রাম ॥’ নাম করিতে লাগিলেন । আগন্তুক ভক্তগণ বাবাজী মহাশয়ের এইরূপ অপূর্ব ভাব দর্শনে পরমানন্দিত ও বিস্মিত হইলেন ।

এইরূপে বহুক্ষণ কাটিয়া গেল । সঙ্গিগণের বিশেষ চেষ্টা ও বহু সন্তর্পণে বাবাজী মহাশয় জুহুতলাভ করিলেন । এইরূপ নামানন্দে ধনেশ্বর গ্রামে কয়েকদিন অতিবাহিত হইল । ক্রমে একদিন কোড়াই, তুলতী দলা

প্রভৃতি নিকটবর্তী গ্রামবাসী ভক্তগণ সঙ্কীৰ্ত্তন করিবার জন্ত বাবাজী মহাশয়কে নিমন্ত্রণ করিয়া লইয়া যাইতে লাগিলেন । যেদিন যে গ্রামে গমন করিতেছেন, সেই গ্রামবাসী আবালবৃদ্ধবলিতা সকলেই সংকীৰ্ত্তনানন্দে বিভোর হইয়া যাইতেছে ।

একদিন অপরাহ্নে বাবাজী মহাশয় চতুর্ভুজ বাবুর বাড়ী বসিয়া নানারূপ তত্ত্বকথার আলোচনা করিতেছেন ; উপস্থিত লোকসংখ্যা প্রায় চল্লিশ পঞ্চাশ জন—সকলেই ইহার মুখপানে তাকাইয়া রহিয়াছে, ইনিও হাসিমুখে কলিষুগে একমাত্র নামসংকীৰ্ত্তন হইতেই যে সৰ্বসানর্থনাশ, সৰ্বশুভোদয় এবং ভগবৎপ্রেম পর্য্যন্ত প্রকাশ হইয়া থাকে এই সিদ্ধান্ত করিতেছেন । জনৈক ভক্ত বলিলেন, “আজ্ঞে সংকীৰ্ত্তন ত অনেক দিন হইতে করিতেছি ; কিন্তু প্রেম কাহাকে বলে তাহা ত আজ পর্য্যন্ত জানিলাম না । এমন কি, শোক তাপ ব্যতিরেকে একদিন এক কোঁটা চোখে জলও আসিল না ।”

বাবাজী, বাবা ! নামে প্রেম ত নিহিতই রহিয়াছে ; কিন্তু আকাজ্জা বা আগ্রহ না থাকার দরুণ প্রকাশমান বস্তুরও অলুভব হয় না । যেমন নানাবিধ উপাদেয় খাদ্যদ্রব্য সম্মুখে উপস্থিত হইলেও ক্ষুধা না থাকার দরুণ সে সমস্ত বস্তুতে আগ্রহ হয় না বরং উপেক্ষাই হইয়া থাকে, এও ঠিক সেইরূপ । প্রাণে আকাজ্জা জন্মাও, প্রেম বস্তুই যে আমাদের প্রয়োজনীয় প্রেম না থাকিলে যে আমরা এক মুহূর্ত্তও এ সংসারে থাকিতে পারি না, প্রেমই যে আমাদের ইহ এবং পর জগতের একমাত্র অবলম্বন, এই কথা জ্ঞদয়ে দৃঢ় ধারণা করিয়া আগ্রহ কর, অভীষ্ট বস্তু লাভ হইবে ।

ভক্ত । আজ্ঞে হরে কৃষ্ণ নামে কি প্রেমের উদয় হয় না ?

বাবাজী । কেন বাবা ? মহাপ্রভু ত এমন কোনও কথা বলেন নাই যে অমুক নামে প্রেম হইবে, অমুক নামে হইবে না । তিনি

বলিয়াছেন—“খাইতে শুইতে যথা তথা নাম লয় । কাল দেশ নিয়ম নাই সর্বসিদ্ধি হয় ।” এত প্রত্যক্ষ ফল । বেশ ত তোমরা এখানে বাহারা উপস্থিত আছ, সকলে মিলিয়া উচ্চকণ্ঠে ‘হরে কৃষ্ণ হরে কৃষ্ণ কৃষ্ণ কৃষ্ণ হরে হরে । হরে রাম হরে রাম রাম রাম হরে হরে ॥’ এই নাম কীর্ত্তন কর । এখনই বৃষ্টিতে পারিবে ।

বলিবা মাত্রই সকলে সম্মুখে হরে কৃষ্ণ নাম কীর্ত্তন করিতে লাগিলেন এবং ইনি সংখ্যা রাখিতে লাগিলেন । আহা মরি কি অপার করুণা ! অপরূপ দৃশ্য ! অনুমান পাঁচ সাত মিনিট যাইতে না যাইতেই সকলের চোখে জল আসিল—সকলেরই কণ্ঠ গদগদ ; এক একবার প্রেমে কণ্ঠরোধ হইয়া যাইতেছে । ক্রমে কম্প পুলক প্রভৃতি সাত্ত্বিক বিকারগণ সকলের দেহ অধিকার করিল । আবালবৃদ্ধযুবা সকলেই প্রেমে বিভোর—সকলেরই চোখে জল, মুখে নাম, প্রাণে প্রবল আকাজকা-মিশ্রিত হা ছতাপ । প্রায় দেড়ঘণ্টাকাল এইরূপ ভাবে কাটিয়া গেল । কাহারই খেয়াল নাই । পূর্বোক্ত ভক্তটী প্রেমে অধীর হইয়া একবারে বাবাজী মহাশয়ের শ্রীচরণ ধারণপূর্বক উচ্চৈঃস্বরে রোদন করিতে লাগিলেন । বাবাজী মহাশয় তাঁহাকে আলিঙ্গন প্রদানে সন্মত করিলেন । ক্রমে সন্ধ্যা উপস্থিত হইলে নাম করিতে করিতে মহাপ্রভুর বাড়ী আসিয়া সন্ধ্যা আরতিকীর্ত্তন আরম্ভ করিলেন । আরতিকীর্ত্তন ত রোজই হইয়া থাকে ; কিন্তু আজকার ভাষা যেন অন্তরূপ । আজ যেন সকলের হৃদয় হইতেই আনন্দের ফোয়ারা ছুটিতেছে । রাত্র প্রায় এগারটা পর্য্যন্ত সংকীর্ত্তন করিয়া যথাসময়ে মহাপ্রসাদ গ্রহণপূর্বক সকলে বিশ্রাম করিলেন ।

সংকীৰ্ত্তন-মহাৰাস ।

কিছুদিন পূৰ্বে শ্ৰীধাম বৃন্দাবন হইতে রামানন্দ দাস নামক একমুৰ্ত্তি বৈষ্ণব আসিয়া ধনেশ্বরে বাস করিতেছেন । বাহুদৃষ্টিতে দেখিতে গেলে বাবাজীটী একটু অপ্ৰকৃতিহ । কখন হাসি, কখন কাশা, কখন নৃত্য, আবার কখনও বা একেবারে নীরবভাবে অবস্থান করিতেন । একদিন অপরান্ন সময় একজন ভক্ত, বাবাজী মহাশয়কে বলিলেন, “আজ্ঞে এই রামানন্দ বাবাজী ভিক্ষা করিয়া আমাদের গোচর মাঠে অশ্বখ গাছতলার মহোৎসব করিয়াছিলেন । সে দিন খুব আনন্দ হইয়াছিল ।” শুনিবামাত্র বাবাজী মহাশয় দৃষ্টচিন্তে বলিলেন, “চল বাই সকলে সেই স্থানটী দেখিয়া আসি !” বলিয়া নাম করিতে করিতে সকলের সঙ্গে সেই স্থানে গিয়া উপস্থিত হইলেন । স্থানটী অতি মনোরম, অশানঘাটের নিকটবৰ্ত্তী । চারিদিক খোলা, একটা মাত্র প্রকাণ্ড অশ্বখবৃক্ষ রহিয়াছে । অশ্বখতলার বাইরাই বাবাজী মহাশয় সকলকে বলিলেন, “দেখ, সকলেই মণ্ডলীবন্ধনে হাত ধরাধরি করিয়া নাম করিতে করিতে নৃত্য কর । এই স্থানটি বড়ই সুন্দর ; দেখিবামাত্রই রাসস্থলীর উদ্দীপন হয় । অতএব আজ সংকীৰ্ত্তন মহাৰাস করা যাক্ ।” বলিয়া কীৰ্ত্তন ধরিলেন :—

নাচ ত গোরা নটরায় ।

পারিষদগণ যত, গোপিকা মণ্ডলী শত,

চৌদিকে ঘিরিয়া দাঁড়ায় ॥

তকত মণ্ডলী মাঝে, নাচে গোরা নট রাজে,

ভাবে বিবশ ভেল অজ ।

হরি হরি হরি বলি, যন দেই করতালি,
বাটল প্রেম তরঙ্গ ॥

অক্লগ কমল জাঁখি, ভাবে ঢুলু ঢুলু দেখি,
মুখ জিনি শশী ষোলকলা ।

চৌদিকে ভকতগণ, নাচতহি অগগন,
যহু শোহে চাঁদকি মালা ॥

(দাঁড়ায়) চরণে চরণ থুঞা, ললিত ত্রিভঙ্গ হইয়া,
যেন ব্রজ নব যুবরাজ ।

বরজ রমণীগণ, বৈছন নিমগন,
তৈছন ভকত সমাজ ॥

দক্ষিণে শ্রীনিত্যানন্দ, পরম আনন্দ-কন্দ,
বামে গদাধর রাধারূপ ।

অগ্রে দেব দেবাবৈষ্ণব, দক্ষিণেতে ছত্রহস্ত,
শ্রীবাস পণ্ডিত ভক্তভূপ ॥

নরহরি রামানন্দ, মুকুন্দ গোবিন্দানন্দ,
বান্ধুদেব ষোষ বক্রেশ্বর ।

হরিদাস শিবানন্দ, নাচে রায় ভবানন্দ,
গাওত স্বরূপ দামোদর ॥

শ্রীশচী নন্দন, জুবন আনন্দন,
করু কত সুখদ বিলাস ।

কীর্ত্তন রাসকেলি, কলারসে নিমগন,
বদন কমলে মুছ হাস ॥

ভাবাবেশে এইরূপ কত যে পদাবলী গান করিতে লাগিলেন, কে
তাহার ইয়ত্তা করিবে? সঙ্গিগণ সকলেই প্রেমে বিভোর। বাবাজী

মহাশয় মধ্যস্থলে থাকিয়া নানারূপ পদকীৰ্ত্তন করিতেছেন, আর মধুর মধুর নৃত্য করিতেছেন। খোলা মাঠে আজ যেন আনন্দের বাজার বসিয়াছে। কাহারই বাহুস্বৃতি নাই ; সকলেই যেন মহাপ্রভু পার্শ্বদৰূপে মণ্ডলীবন্ধনে নৃত্য করিতেছেন। মধ্যস্থলে বাবাজী মহাশয় চরণে চরণ রাখিয়া অর্ধমুদ্রিত নেত্রে ভাবাবেশে একরূপভাবে নৃত্য করিতেছেন যে, দেখিবামাত্রই বোধ হইতেছে যেন ইহার আগে আগে কে নাচিয়া যাইতেছে ; ইনিও আবেশে প্রকুলচিত্তে তাঁহার সঙ্গে বেড়াইতেছেন। কে বলিবে নামরূপে প্রভু সাক্ষাৎ বর্তমান নহেন ? ‘অত্মাপিহ সেই লীলা করে গোরারায়’ এ কথাটা যেন আজ সকলের প্রত্যক্ষগোচর হইল। নিজ নিজ ভাবানুসারে কেহ ব্রজলীলার রাসমণ্ডলী দেখিতেছেন, কেহ বা সপরিবারে ঐগোঁরাঙ্গের সংকীৰ্ত্তন-মহারাস দর্শন করিতেছেন। এইরূপে বহুরূপ নৃত্যকীৰ্ত্তনের পর বাবাজী মহাশয় বলিলেন, “দেখ, এই স্থানটা নবঘাট এবং এই রজ সপরিবার ঐগোঁরাঙ্গদেবের চরণরজ। ইহার প্রতি রেণুতে রেণুতে প্রেম নিহিত রহিয়াছে।” এই বলিয়া একমুষ্টি রজ সকলের উপর ছড়াইয়া দিবামাত্র ভক্তগণ প্রেমাবেশে কেহ বা রজে গড়াগড়ি কেহ বা অপর কাহারও গায়ে রজ মাখাইয়া দিতে লাগিলেন। বাবাজী মহাশয় যতদিন ধনেখরে ছিলেন, প্রায়ই অবকাশ পাইলে এই অখঞ্চ বৃক্ষের তলায় আসিয়া বসিতেন। এইরূপে ধনেখরে বাইশদিন কাল অবস্থানপূর্বক নানারূপ লীলাখেলা আচরণ করতঃ গ্রামবাসীগণকে আনন্দ-সাগরে নিমগ্ন করিয়া স্থানান্তরে যাইবার মন করিলেন।

পুরুষোত্তমপুর গমন ।

বাবাজী মহাশয় অনেকদিন হইতেই গোপীবাবু এবং গোপাল বাবুর নিকট তাহাদের দেশ পুরুষোত্তম পুরে যাইবার জন্ত প্রতীক্ষিত আছেন । আজ আবার গোপীবাবু আসিয়া বিশেষ অনুরোধ করার যাইবার মন করিয়া ভক্তগণকে বলিলেন, “ধনেশ্বরবাসীদিগের বড়ই অকপট ভালবাসা ; অতএব নাম করিতে করিতে গ্রামের মধ্য দিয়া সকলের নিকট বিদায় গ্রহণ পূর্বক যাইতে হইবে ।” তাহাই হইল । নাম করিতে করিতে গ্রামের মধ্যে প্রবেশ পূর্বক প্রত্যেক ঘরের দরজায় বালকবৃদ্ধ, স্ত্রীপুরুষ বাহাকে দেখিতেছেন, তাহারই নিকট বিদায় গ্রহণ করিতেছেন । তাহারাও প্রাণের আবেগে উচ্চৈঃস্বরে রোদন করিতে করিতে আসিয়া ইহার চরণে পড়িতেছে । কান্নার রোল উঠিল । আর যেন কাহারও ঘরে থাকিতে মন হইতেছে না । এতদিন উহারা যত আনন্দ উপভোগ করিয়াছে, আজ যেন তাহার শত গুণ অধিক দুঃখ আসিয়া উপস্থিত হইল । কি ভীষণ হৃদয় বিদারক দৃশ্য ! সকলেই গৃহ পরিত্যাগপূর্বক উচ্চৈঃস্বরে কাদিতে কাদিতে বাবাজী মহাশয়ের সঙ্গে সঙ্গে যাইতে লাগিল দেখিয়া ইনি সকলকে স্নমধুর বাক্যে আশ্বস্ত করতঃ একটু জরতপ্তি ধরন করিলেন । বাবাজী মহাশয় দৃষ্টিপথ অতিক্রম না করা পর্যন্ত গ্রামবাসী লোকসকল ইহার প্রতি চাহিয়া রহিল । অদৃশ্য হইলে সকলে শূন্যমনে গৃহে প্রত্যাবর্তন করিল । কেহ কেহ বা বাবাজী মহাশয়ের সঙ্গে সঙ্গে পুরুষোত্তম পুরে গমন করিল । গোপীবাবুর জ্যেষ্ঠ ভ্রাতা ক্ষেত্রমোহন রায় এবং লালবিহারী রায় প্রভৃতি বিশেষ বয়সহকারে সঙ্গে বাবাজী মহাশয়কে তাহাদের গ্রামে লইয়া গিয়া সংকীর্ণনানন্দ ও মহোৎসব করিতে

লাগিলেন যে দিন যে গ্রামে গমন করিতেছেন, সে দিন সে গ্রামের আপামরসাধারণ সকলেই প্রেমানন্দে মাতোয়ারা। অতি বড় পাখণ্ড হইলেও যে একবার ইহার সঙ্কীৰ্ত্তন বা ত্রীমুখের উপদেশাবলী শুনিতেছে, সেই বিমুখ হইয়া যাইতেছে। গোপাল বাবুর বাড়ী এই পুরুষোত্তমপুরে। বাবাজী মহাশয় তাঁহাদের গ্রামে গিয়াছেন শুনিয়া তিনি পুরী হইতে ছুটি লইয়া যে দিন বাড়ী আসিলেন, তৎপরদিনই সদলেবাবাজী মহাশয়কে তাঁহার নিজ বাড়ীতে লইয়া গেলেন! সেদিনকার আনন্দের কথা লিখিবার বা বলিবার ভাষা নাই। পুরুষোত্তমপুরবাসী লোকসকল বলিতে লাগিল, “এই কয়দিন বাবাজী মহাশয় সঙ্কীৰ্ত্তন করিতেছেন; কিন্তু যে দিনই শুনিতেছি, সেই দিনই নূতন বলিয়া বোধ হইতেছে এবং উত্তরোত্তর আনন্দের মাত্রা অধিকতর বৃদ্ধি পাইতেছে।”

জাজপুর গমন ও ঠাকুরের অন্তর্ভোগ।

বাবাজী মহাশয় সঙ্গিগণসহ পরমানন্দে কিছুদিন পুরুষোত্তমপুরে আশ্রয় লইয়া লালুবাবুর বিশেষ অনুরোধে জাজপুর গমন করিলেন। জাজপুরের অন্তর্গত গোপালপুরে লালুবাবুর স্বস্ত্রালয়। লালুবাবুর স্বস্ত্র বর্তমান নাই। বৃদ্ধা শান্তীদেবী এবং তাঁহার ঠাকুর সেবা রক্ষণাবেক্ষণের জন্য তিনি সপরিবারে স্বস্ত্রবাড়ীতেই বাস করিয়া থাকেন। লালুবাবুর বৃদ্ধা শান্তীদেবী সদলে বাবাজী মহাশয়কে পাইয়া পরমানন্দিত হইলেন। বাবাজী মহাশয় এবং অন্তর্ভুক্ত সকলেই বৃদ্ধাকে মাতৃসম্বোধন করিয়া থাকেন। বাবাজী মহাশয়ের সঙ্গিগণ বৃদ্ধাকে ‘মা মা’ বলিয়া তাঁহার

নিকট নানারূপ আকার করিতেছেন—বুদ্ধাও সানন্দে ছেলেদিগকে লইয়া নানারূপ কোঁতুক করিতেছেন । বুদ্ধার বাড়ীতে শ্রীশ্রীরাধাগোবিন্দ সেবারহিয়াছে এবং উক্ত সেবার জ্ঞাত একজন ব্রাহ্মণও নিযুক্ত আছেন । উঁহার জাতিতে কায়স্থ । দেশপ্রথা-অনুসারে কায়স্থের বাড়ীতে ঠাকুরের অন্নভোগ হয় না ; সুতরাং আতপ চাউল, কলা প্রভৃতি ঠাকুরের ভোগ হইয়া থাকে । একদিন বাবাজী মহাশয় কয়েকটা সঙ্গী এবং লালুবাবুর বুদ্ধা শান্তদীর সহিত ঠাকুর দর্শনে গিয়াছেন । ভগবদ্ভিষ্মায় ঠিক সেই সময় ঠাকুরের ভোগ লাগিয়াছে । বাবাজী মহাশয় বলিলেন, ‘মা ! এত সকালে ঠাকুরের ভোগ হইল, রান্না হয় কোথায় ?’

বুদ্ধা । বাবা ! আমাদের কি এমন ভাগ্য হইবে যে আমাদের ঠাকুর অন্নভোগ গ্রহণ করিবেন ! আমরা কায়স্থ জাতি ; আমাদের ঠাকুর চিরদিন আতপ চাউল কলা ভোগ গ্রহণ করেন ।

বাবাজী । হ্যাঁ মা ! সে চাউল কলা কি হয় ?

বুদ্ধা । আমার দাদাশুণ্ডর একটা ব্রাহ্মণকে পুজারী পদে নিযুক্ত করিয়াছিলেন । তাঁহারই বংশধরগণ ঐ চাউলকলা নিয়া ঘরে রান্না করিয়া খান ।

বাবাজী । কেন মা ! তোমাদের কি ঠাকুরের প্রসাদ পাইতে নাই ?

বুদ্ধা । কি করিব বাবা ! আমরা ত আর ঐ চাউল খাইয়া থাকিতে পারি না !

বাবাজী । আচ্ছা মা ! তুমি যে বস্ত্র খাইতে পার না, সেই বস্ত্র ঠাকুরকে কিরূপে দাও ?

বুদ্ধা । কি করিব বাবা ! বংশপরম্পরায় চলিয়া আসিতেছে ; কাজেই আমরাও সেইরূপ করি ।

বাবাজী ইহাতে তোমাগের প্রাণে কি আঘাত লাগে না ? যে মুখে

মা যশোমতী নবনী দিতেও ভয় করিতেন, সেই মুখে আশ্রিত চাউল কলা দিয়া তোমরা' করে নানাবিধ বস্তু রাখিয়া থাইতেছ ! বল দেখি, এইরূপ সেবা করিবার প্রয়োজন কি ?

বুঝা। বাবা ! পূর্ব পুরুষদের মুখে শুনিয়াছি যে যদি গুরু বা পুরোহিতের নামে ঠাকুর প্রতিষ্ঠা করা হয়, তবেই অন্নাদি ভোগ লাগিতে পারে। তাহা না হইলে শূজাদির বাড়ীতে, ঠাকুরের অন্ন ভোগ হইতে পারে না ; যদিও এক এক সময় মনে বড়ই আঘাত লাগে ; কিন্তু কি করিব ! কোন উপায়ান্তর নাই ; কাজেই বাধ্য হইয়া চাউলকলা ভোগ দিতে হয়।

বাবাজী। আচ্ছা অন্ন ভোগ দিতে কি তোমাদেরই আপত্তি, না অন্ত কাহারও আপত্তি আছে ?

বুঝা। প্রথম ব্রাহ্মণেরাই ভোগ দিতে আপত্তি করেন। কাজেই আমরাও কোনরূপ প্রতিবাদ করি না।

শুনিয়া ললিতাদাসী বলিল, “আচ্ছা আমরা যতদিন এখানে থাকিব, ততদিন রান্না করিয়া ঠাকুরকে ভোগ দিব। শেষে তোমাদের যেমন ইচ্ছা তেমনি করিও।”

বাবাজী মহাশয়ও আনন্দচিত্তে এই কথাই সায় দিলেন। বুঝা কিন্তু কিছুই বলিলেন না। পরদিন প্রাতঃকালে উঠিয়াই ললিতাদাসী বুঝাকে বলিল, “মা ! আমি রান্না করিব, আমায় সব যোগার করিয়া দাও।”

বুঝা হাসিতে হাসিতে বলিল, “মা ! সকলই তোমাদের। ঠাকুরও তোমাদের, আমিও তোমাদের ; এ' করে যাহা কিছু আছে সেও তোমাদের। তোমাদের বাহা ইচ্ছা কর।” তখন ললিতাদাসী মনের আনন্দে নানাবিধ অন্ন ব্যঞ্জনাদি প্রস্তুত করতঃ বেলা নয়টার সময় ঠাকুর-মন্দিরে ভোগ লাগাইয়া বাবাজী মহাশয়কে ডাকিলে বাবাজী মহাশয়

ঠাকুরের কাছে বসিয়া উহাকে বলিলেন, “দেখ, ঠাকুরকে বেশ প্রাণের সহিত ভোগ লাইবে। বেন আবার আতপ চাউল না খান।” ঠাকুরের চাউল খাওয়া সকলের প্রাণে বাজিয়াছে, তাই সকলেই যাহাতে চাউল ভোগ উঠিয়া যায় সেই জন্ত চেষ্টিত। ক্রমে ঠাকুরের ভোগ হইয়া গেল। বাবাজী মহাশয় প্রসাদ পাইলেন। তৎপর ললিতাদাসী বিশেষ আগ্রহের সহিত লালুবাবুর বৃদ্ধা শাওড়ীকে প্রসাদ পাওয়াইয়া বলিল, “মা ! আপনার জীবনে কোনও দিন আপনাদের ঠাকুরের প্রসাদ পাইয়াছেন কি ?”

বৃদ্ধা বলিলেন, “না মা ! সেটা কখনও আমার ভাগ্যে ঘটে নাই। আজ আমার জীবন ধন্ত হইল। জীবনে অনেক প্রসাদ পাইয়াছি ; কিন্তু আজিকার এই প্রসাদের দ্বারা এমন সুস্থাত প্রসাদ আর কখনও খাই নাই। তাই বলি মা ! তোমরা যতদিন এখানে থাকিবে, রোজ এইরূপ ভোগলাগাইবে।” ললিতাদাসী বলিল, “মা ! আমরা না হয় লাগাইলাম কিন্তু বারমাস যাহাতে লাগিতে পারে, সেই চেষ্টা করা আপনার উচিত।” বৃদ্ধা এই কথা শুনিয়া কাদিতে কাদিতে বলিলেন, “ঠাকুর কি আমার এমন শুভ দিন দিবেন যে এই বাড়ীতে তাঁহার অন্নভোগ লাগিবে !”

এইরূপে ক্রমে তিন চারি দিন যায়, একদিন শেষ রাত্রে বৃদ্ধা শয়ন করিয়া আছেন, এই সময়ে স্বপ্নে দেখেন যে, পূজারী ব্রাহ্মণ ঠাকুরের অন্নভোগ লাগাইয়াছেন এবং তিনি নিজে ঠাকুরের সম্মুখে বসিয়া আছেন। এই সময় ঠাকুর হাসিতে হাসিতে বলিতেছেন, “মা ! আমি এই কয়েক দিন বড়ই সুখে আছি, দেখ বেন আর আমাকে এ সুখ হইতে বঞ্চিত করিও না। তোমার যাহা দিয়া ইচ্ছা এবং যেরূপ ভাবেই হউক, আমাকে দুইটা অন্নভোগ দিতেই হইবে।” বৃদ্ধা কাদিতে কাদিতে বলিলেন, “বাবা আমার আত্মীয়স্বজনগণ যে আমাকে নিন্দা করিবে ! তাহার আমি কি উপায় করিব ? ঠাকুর বলিলেন, “মা ! তোমার

মারারাজ্যের বন্ধুবান্ধব আত্মীয়স্বজন বড়, না আমি বড় ? তাহাদের কথায় তোমার কি হইবে ? মা ! জগতের কথার প্রক্তি লক্ষ্য করিতে গেলে পরমার্থ নষ্ট হইয়া যায় ; অতএব কাহারও কথা না শুনিয়া এই পূজারী ব্রাহ্মণ দ্বারা আমাকে প্রত্যহ অন্নভোগ দিবে, এই প্রতিজ্ঞা কর ।” বুদ্ধা আর কিছু বলিতে না পারিয়া বলিলেন, “বাবা ! তোমার যাহা ইচ্ছা কর আমি বুদ্ধ হইয়াছি ।” বলিতে বলিতে নিদ্রা ভঙ্গ হইল ।

প্রাতঃকালে উঠিয়া বুদ্ধা বাবাজী মহাশয়ের নিকট কাতরভাবে আমূল বৃত্তান্ত নিবেদন করিলে ইনি সাশ্রুদগদগদকণ্ঠে বলিলেন, “মা তুমি পরম ভাগ্যবতী, তাহা না হইলে ভগবান্ এইরূপভাবে তাহারও নিজট খাইতে চাহেন কি ? তাই বাল, সামান্য সমাজ ভয়ে বা দুই চারি জন লোকের কথায় যেন এ সৌভাগ্য হইতে বঞ্চিত না হও ।” বুদ্ধা কাঁদিতে ক্রুদ্ধিতে বলিলেন, “বাবা ! আপনি একবার পূজারী ব্রাহ্মণকে বুঝাইয়া বলুন, তিনি যদি কোনও আপত্তি না করেন, তবে আর আমার কোনও ভয় নাই ।” বাবাজী মহাশয় লালুবাবুকে বলিয়া পূজারীকে ডাকাইলেন । পূজারীটি ছেলে মানুষ । বাবাজী মহাশয় তাহাকে জিজ্ঞাসা করিলেন, “বাবা ! তুমিই কি এই ঠাকুরের সেবা কর ?”

পূজারী । আজ্ঞে হ্যা ! আমার পিতামহকে ইহারা এই পদে নিযুক্ত করিয়াছিলেন । সেই হইতেই আমাদের হাতে এই সেবা চলিতেছে ।

বাবাজী । আজ্ঞা বাবা ! ঠাকুরকে চাউল কলা ভোগ দিবার সময় তোমার মনে কোনওরূপ কষ্ট হয় না কি ?

পূজারী । বাবা ! কষ্ট সুখ বিশেষ কিছু অনুভব করি না । চিরদিন যেমন নিয়মে কার্য চলিয়া আসিতেছে, আমিও সেইরূপ করিতেছি । তবে এক এক দিন মনে হয়, চাউল নিয়া আমরা রান্না করিয়া খাই ; কিন্তু ঠাকুরটি যদি আমাদের নিজেদের হইত, তবে চাউল ভোগ না

দিয়া সেই চাউলের অন্ন ভোগই দিতে পারিতাম । আবার মনে বিচার করি, যাহাদের ঠাকুর, তাহাদের বেরূপ ইচ্ছা তাই করা হইতেছে, আমার উহা ভাবিবার দরকার কি ?

বাবাজী । আচ্ছা, যদি ইহারা ঠাকুরের অন্নভোগ দিতে ইচ্ছা করে, তবে তোমার কিছু আপত্তি আছে কি ?

পূজারী । আমি এ কথার কোন উত্তর দিতে পারিব না ; কারণ আমার মা আছেন । আমি তাঁহাকে জিজ্ঞাসা করিয়া তিনি যাহা বলেন, তাহা আপনাকে বলিব ।

এই বলিয়া পূজারী তাহার মাতাঠাকুরাণীর নিকট গমনপূর্বক আমূল বৃত্তান্ত বলিলে তাঁহার মা বলিলেন, “বাবা ! তোমার পিতা পিতামহ কেহই এরূপ করেন নাই, তুমি কিরূপে করিবে ? অত্যাচার ব্রাহ্মণের সঙ্গেই বা কিরূপভাবে চলাচল করিবে ? আবার বাবাজী মহাশয় অত বড় মহাত্মা ; তাঁহার কথাই বা কিরূপে লঙ্ঘন করিবে ? আমি ত বাবা উভয় সঙ্কটের মধ্যে পড়িলাম । যাহা হউক তুমি এক কাজ কর বাবা ! তুমি তোমার ভাল মন্দের ভার বাবাজী মহাশয়ের উপর দাও । তিনি যাহা বলেন, তুমি তাহাই করিবে ।” পূজারী ব্রাহ্মণটি মায়ের কথায় বড়ই আনন্দ পাইয়া পুনরায় বাবাজী মহাশয়ের নিকট আগমন পূর্বক মাতা ঠাকুরাণীর সমস্ত কথা ইহাকে বলিলেন । ইনিও লালুবাবুকে এবং তাঁহার শাস্ত্রীকে ডাকিয়া যাহাতে পূজারীর কোনওরূপ অসুবিধা না হয়, সে বিষয়ে চেষ্টা করিতে বলিলেন । ইত্যবসরে কয়েকজন গ্রামবাসী লোক আসিয়া বাবাজী মহাশয়ের এই প্রস্তাবে কেহ বা সম্মত কেহ বা অসম্মত, কেহ বা সম্ভট, কেহ বা অসম্ভট হইয়া নানারূপ বাদামূল্যবাদ করিতে লাগিল । বাবাজী মহাশয় যুহু হাসিয়া সকলের কথার যথাযথ প্রত্যুত্তর দিতে লাগিলেন । ক্রমে সকলেই একবাক্যে বলিতে লাগিল যে এ কার্যটি

রাজা যেরূপ আইন বিধান করিয়াছেন, কর্মচারীকে সেই আইনানুসারে চলিতেই হইবে ; কিন্তু ভগবান্ ত আর কাহারও অধীন নহেন ! তিনি ত নিজের ইচ্ছানুসারে ভালমন্দ সমস্তই করিতে পারেন । তবে তাঁহার দোষ হইবে না কেন ?

বাবাজী : আচ্ছা, আপনি কি বলিতে চান যে রাজা আইনের বাধ্য নহেন ? বে-আইনি কার্য্য করিলে রাজার কিছু দোষ হইবে না ? এ কখনই হইতে পারে না ; কারণ ভগবান্ নিজে বলিয়াছেন :—

উৎসীদেয়ুরিমে লোকা ন কুর্য্যাৎ কৰ্ম্ম চেদহং ।

মম বজ্রানুবর্তন্তে মনুষ্যাঃ পার্থ সৰ্ব্বশঃ ॥

তবেই দেখুন, ভগবান্ স্বতন্ত্র কি পরতন্ত্র । ভগবান্ নিজকৃত আইনের এতই বাধ্য যে, জীব বরং তাঁহার আইন লঙ্ঘন করিয়া চলিতে পারে কিন্তু তিনি কখনও বে-আইনি কার্য্য করিতে পারেন না । কাজেই জীব যেরূপ কর্ম্ম করে, ভগবান্ ও তদনুযায়ী শাস্তি বিধান করিয়া থাকেন ।

বাবু । জীব এমন কি বে-আইনী কার্য্য করে—যে, পরমদয়াল ভগবান্ ও তাহাদের প্রতি কঠোর শাস্তি প্রদান করিতে কুণ্ঠিত বা উঃখিত হন না ?

বাবাজী । জীব যে কি বে-আইনী কার্য্য করে, তাহার আর আমি আর কত সংখ্যা করিব ? তবে মোটামুটি কয়েকটির কথা বলিতেছি । জীব যখন মাতৃগর্ভে থাকিয়া অসহ্য যন্ত্রণায় প্রাণের আবেগে ভগবান্কে ডাকে, ভগবান্ তখন জীবের কাতর ক্রন্দনে করুণাপরবশ হইয়া নিজ সুখময় স্বরূপ প্রদর্শন পূর্বক তাহাদের শত জন্মার্জিত যাবতীয় পাপপুণ্যের কথা স্মরণ করাইয়া দেন । জীব তখন ভীত হইয়া ভগবানের নিকট প্রতিজ্ঞা করে যে, “প্রভো ! এবার ভূমিষ্ঠ হইয়া আর কখনও তোমার ঐ অভয় চরণ বিষ্মত হইব না ।” কিন্তু ভূমিষ্ঠ হইবামাত্রই মহামায়ার

সুখময় ক্রোড় স্পর্শে সকল কথা ভুলিয়া যায় । এমন কি, কালে কালে একেবারে ভগবৎসভা পর্য্যন্ত লোপ করিয়া নিজ নিজ প্রভুত্ব স্থাপন করিবার জন্ত চেষ্টিত হইতে থাকে । ভগবান্ এতই দয়াল যে তবুও জীবকে চেতন করিবার জন্ত এক একবার নান রূপ বাধাবিঘ্ন, রোগশোকাদি প্রদান করিয়া থাকেন । কি দুর্দ্দৈব ! সমস্ত বাধাবিঘ্নের কারণ যে একমাত্র ভগবদ্বিশ্বাস্তি, জীব ক্ষণকালের জন্তও তাহা মনে করে না ; কাজেই হুঃখ পায় । তাই ত্রিচৈতন্যচরিতামৃতে বলিয়াছেন :—

কৃষ্ণ ভুলি যেই জীব অনাদিবহিমুখ ।

অতএব মায়া তারে দেয় সংসারহুখ ॥

কভু স্বর্গে উঠায় কভু নরকে ডুবার ।

দণ্ডে জনে রাজ্যে যেন নদীতে চুবার ॥

বাবু । জীব কৃষ্ণকে ভুলিয়া যায় কেন ?

বাবাজী । জীব নিজ নিজ কর্ম্মাম্বসারে তদমুখ্যায়ী দেহ প্রাপ্ত হইয়া আবার এরূপ কর্ম্ম করিতে থাকে যে, ক্রমে মহামায়ার মোহজালে পতিত হইয়া অনন্তকাল নানারূপ জালাযন্ত্রণাময় সংসারে যাতায়াতরূপ হুঃখ ভোগ করে ।

বাবু । আচ্ছা, জীবের এই অসংপথে চলিবার বুদ্ধিদাতা বা অসং বস্তুর স্রষ্টাও ত ভগবান্ ; হুতরাং তিনি যদি জীবকে অসংপথে চলিবার বুদ্ধি প্রদান বা অসদ্বস্তুর স্রষ্টি না করিতেন, তবে ত আর জীব এত হুঃখ পাইত না । অতএব ভগবান্‌ই, এই সুখ হুঃখের দাতা নন কি ?

বাবাজী । জীবের এই সমস্ত সুখ হুঃখ প্রাপ্তির মূল কারণ মন । শাস্ত্র বলিয়াছেন :—

মন এব মনুষ্যাণাং কারণং বন্ধমোক্ষয়োঃ ।

সংকল্পবিকল্পান্বিতা বৃত্তিকে মন বলে । মনই জগতের বাবভীষ

কর্মের কর্তা এবং ইন্দ্রিয়গণের অধীশ্বর । ইন্দ্রিয়গণ আবার দুইভাগে বিভক্ত,—জ্ঞানেন্দ্রিয় ও কর্মেন্দ্রিয় । /মন ইন্দ্রিয় দ্বারে সুখ দুঃখের হেতু যে কর্ম তাহা আচরণ করিয়া থাকে । কাজেই ভগবান্ সুখদুঃখের দাতা হইতে পারেন না ।

বাবু । মন ত জড় পদার্থ ; মনের চালক একজন চৈতন্যময় পুরুষ না থাকিলে মন কখনও কার্য্য করিতে পারে কি ?

বাবাজী । না, তা পারে না । বুদ্ধি-উপহিত চৈতন্য যিনি তিনিই মনের চালক, তিনিই প্রকৃত সদস্য কার্য্য করাইবার কর্তা এবং তিনিই সুখদুঃখের ভোক্তা ।

বাবু । তবেই ত ভগবান্ সুখদুঃখের দাতা হইলেন । কারণ এই বুদ্ধি-উপহিত যে চৈতন্য তিনিও সেই বৃহৎ চৈতন্যের অংশ ভিন্ন আর কিছুই নন ?

বাবাজী । বুদ্ধি-উপহিত চৈতন্য যে পূর্ণ চৈতন্যের অংশ এ কথা সত্য ; কিন্তু বিকারী, স্মৃতরাং অবিষয়ক : অতএব নির্বিকার নিষ্ক্রিয় বিস্কৃত চৈতন্য হইতে পৃথক্ ভাবে অবস্থিত । ইহাকেই বলা যায় জীব । জীব সুখ দুঃখের ভোক্তা, পরমাত্মা দ্রষ্টা অর্থাৎ সাক্ষীরূপ । এই জীব যখন ভগবৎ বিমুখ হয়, তখনই দুঃখ ভোগ করে ; আবার যখন ভগবৎ-উন্মুখ হয়, তখনই অনন্ত সুখ-সাগরে সন্তরণ করিয়া থাকে ।

বাবু । আত্মা কতদিন হইতে জীব এইরূপ ভগবৎ-বিমুখ হইয়াছে ?

বাবাজী । কত দিন হইতে হইয়াছে ইহার সংখ্যা কেহই করিতে পারেন না । তাই শাস্ত্রকারগণ বলিয়াছেন—অনাদি বহিমুখ অর্থাৎ বাহ্যের আদি নির্দেশ করা যায় না ।

বাবু । এই অনাদি বহিমুখ জীব ভগবৎ-উন্মুক্ত হইবে কিরূপে ? কারণ ইহাদের ত আত্মচৈতন্য নাই যে নিজেদের মোহপাশ ছেদন করিবে !

বাবাজী । একমাত্র ভগবৎ-কৃপা ভিন্ন জীবের এই মোহশাশ হেমন
হইবার আর উপায় নাই । এই ভগবৎ-কৃপার মূল একমাত্র সাধু-কৃপা ।

তাই শ্রীমদ্বাহাপ্রভু সনাতন গোস্বামীকে বলিয়াছেন :—

সেই বিভিন্নাংশে জীব দুই ত প্রকার ।

এক নিত্য মুক্ত একের নিত্য সংসার ॥

নিত্য-মুক্ত নিত্য কৃষ্ণ-চরণে উদ্ভূত ।

কৃষ্ণ-পারিষদ নাম ভুঞ্জে সেবাসুখ ॥

নিত্যবদ্ধ কৃষ্ণ হইতে নিত্যবহিস্মুখ ।

নিত্য সংসার ভুঞ্জে নরকাদি দুখ ॥

সেই দোষে মায়ী পিশাচী দণ্ড করে তারে ।

আধ্যাত্মিক তাপত্রয় তারে জারি মারে ॥

কাম ক্রোধের দাস হঞা তার লাখি ধায় ।

ভ্রমিতে ভ্রমিতে যদি সাধু বৈষ্ণব পায় ॥

তার উপদেশ মস্ত্রে পিশাচী পলায় ।

কৃষ্ণভক্তি পাঞা তবে কৃষ্ণ নিকটে যায় ॥

বাবু । আপনার এই পন্থারে আবার আমার মনে সন্দেহ উপস্থিত
হইল । আপনি বলিলেন, জীব দুই প্রকার—এক নিত্যবদ্ধ, এক নিত্য-
মুক্ত । নিত্যবদ্ধের নিত্য সংসার । বন্ধনটী যদি নিত্যই হইল, তবে আর
সেই বন্ধন মোচন হয় কিরূপে ? কারণ ‘ত্রিকালসত্যং নিত্যং’ ।
নিত্যবস্তুর উৎপত্তি এবং বিনাশ অসম্ভব ।

বাবাজী । বাবা ! ভড়ই জ্বলন্ত প্রহর হইয়াছে । ঐ শ্রীচৈতন্যচরিতামৃতের
একস্থানে বলিয়াছেন :—

“কৃষ্ণ ভুলি যেই জীব অনাদিবহিস্মুখ ।

অতএব মায়ী তারে দেয় সংসারদুখ ॥”

অপর স্থানে বলিলেন :—“নিত্যবদ্ধ ক্রম হইতে নিত্যবহিস্মুখ ।
 নিত্য সংসার ভুঞ্জে নরকাদি দুখ ।” এক মুখের দুইটি বাক্য পরস্পর
 বিরুদ্ধভাবেব্যঞ্জক হইলে দোষ ঘটে । অতএব এই নিত্য শব্দে অনাদি
 বৃষ্টিতে হইবে । অর্থাৎ সাহার আদি নির্দেশ করা জীবের সাধ্যাতীত ;
 কিন্তু আদি আছে এটা নিশ্চয় । অন্নায়ু, মায়ামুখ, দুর্কল, জ্ঞান-বিশ্বাস-
 বিহীন কলিহত জীবগণ নানাপ্রকার ভ্রমপ্রমাদে পড়িয়া সূত্ৰলভ মানব-
 জীবন বুঝা অতিবাহিত করিতেছে দেখিয়া প্রেমদাতা পরমদয়াল নিতাই-
 চাঁদ দ্বারে দ্বারে ঘরে ঘরে জনে জনে সাধিয়া ঘটয়া প্রেমধন বিতরণ
 করিয়াছেন । হায় আমরা এমনই বহিস্মুখ জীব যে তবুও এমন দয়াল
 প্রভুর সেই অভয় পাদপদ্ম তুলিয়া অনিত্য সংসারমুখে মত্ত হইয়া আছি !

বলিতে বলিতে ইহার চক্ষু দুইটি আরক্তিম এবং অশ্রুপূর্ণ হইল—
 অমনি “বোল শ্রীনিভ্যানন্দ” বলিয়া একলক্ষে উঠিয়া নৃত্য করিতে
 লাগিলেন । যে স্থানে বসিয়াছিলেন, তাহার অহুমান পাঁচ ছয় হাত
 উপরে একখানি টানা পাখার তক্তা ঝুলান ছিল । যেমন ইনি উঠিয়াছেন,
 অমনি ঐ তক্তাখানি ইহার মাথায় বাজিয়া প্রায় তিন চারিহাত উর্দ্ধে
 উঠিয়া গেল । ঐ তক্তার নিয়ন্ত্রণে যে ছক ছিল, উহার একটা মাথায়
 লাগিয়া ব্রহ্মরক্ত হইতে দরদরিত ধারে রক্ত পড়িতে লাগিল । ইহার কিন্তু
 খেয়াল নাই—সমান ভাবেই নৃত্য করিতেছেন । অস্তান্ত সকলেও নৃত্য
 করিতেছে । খোল করতাল বাজিতে লাগিল ; কিন্তু নবদ্বীপদাদা ঐ রক্ত
 দেখিবামাত্র গৌঁ গৌঁ শব্দে হুঙ্কার করিতে লাগিলেন । কাহার সাধ্য
 তাঁহাকে স্থির করে ? মোহিনী বাবু এবং অস্তান্ত বাবুগণ বাবাজী
 মহাশয়ের এইরূপ ভয়ঙ্কর দর্শনে একেবারে মোহিত হইলেন । সঙ্গিগণ
 ঐ রক্ত বন্ধ করিবার জন্য নানারূপ চেষ্টা করিতে লাগিলেন ; কিন্তু
 বাবাজী মহাশয় এতই উদ্ভক্ত নৃত্য-পরায়ণ যে কাহার সাধ্য ইহার মন্তক

স্পর্শ করে ? সঙ্গিগণ নবদ্বীপদাদার ঐক্লপ ব্যাকুলতা এবং বাবাজী মহাশয়ের অবস্থা দর্শনে অধীর ভাবে পরস্পর বলাবলি করিতে লাগিলেন, “যদি কোনও উপায়ে রক্তটা বন্ধ করা যাইত, তবে আর ভাবনা ছিল না।” কিছুক্ষণ উদ্ভগু নৃত্যের পর বাবাজী মহাশয় স্থির হইলে সকলেই নিকটে গিয়া দেখেন যে, আপন। আপনিই রক্ত বন্ধ হইয়া গিয়াছে। তখন ললিতাদাসী পূর্বপতিত গণ্ডস্থলের সেই রক্তধারা নিজ অঞ্চল দ্বারা মুছিয়া দিলে বাবাজী মহাশয় জিজ্ঞাসা করিলেন, “কি হইয়াছে?” ললিতাদাসী মস্তিষ্কের ক্ষতস্থান দেখাইবার জন্ত অঙ্গসঙ্কান করিতে গিয়া দেখে কোথাও কিছু চিহ্ন নাই। সকলে অবাক! বাবুভায়াগণ ইহার মন্তকে পাখার আঘাত লাগা এবং দুইটা গণ্ডদেশ বহিয়া রক্তধারা পতন হ্রস্বে দেখিয়াও ক্ষত স্থানের সঙ্কান না পাওয়ায় বিস্মিতভাবে বাবাজী মহাশয়কে জিজ্ঞাসা করিলেন, ‘আজ্ঞে আপনার কি কিঞ্চিন্মাত্রও কষ্ট হয় নাই?’

বাবাজী মহাশয় বলিলেন, “বাবা! আমি ত জানি না যে কোথায় আঘাত লাগিয়াছে। যদি তোমরা দেখিয়াও থাক এবং যথার্থও হয়, তবে প্রভুর কৃপায় কি মুহূর্ত্তমধ্যে ভাল হইয়া যাইতে পারে না? যে প্রভু আমাদিগকে সর্বদার তরে কোলে করিয়া রক্ষা করিতেছেন, তাঁহার পক্ষে এ অতি যৎসামান্য কার্য।” শুনিয়া সকলে বাবাজী মহাশয়ের চরণে প্রণাম করিলেন। ক্ষণকাল পরে সকলে পরমানন্দে মহাপ্রসাদ গ্রহণ পূর্বক কিঞ্চিৎ বিশ্রাম করিয়া নাম করিতে করিতে বাসায় প্রত্যাবর্ত্তন করিলেন।

বর্ণ বিচার।

একদিন লালুবাবুর খণ্ডরবাড়ীর সন্নিকটস্থ একটা বাড়ীতে বাবাজী মহাশয় বসিয়া আছেন এবং কয়েকটা ভক্তলোক নানারূপ প্রশ্ন করিতেছেন। ইনিও হাসিমুখে সকলের প্রশ্নের উত্তর প্রদান করিতেছেন। এই সময় হঠাৎ একটা ব্রাহ্মণ আসিয়া উপস্থিত হইলেন। ব্রাহ্মণটা জাজপুর অঞ্চলের মধ্যে বড় পণ্ডিত এবং খুব সম্ভ্রান্ত। আসিবামাত্রই বাবাজী মহাশয় উঠিয়া দণ্ডবৎ প্রণাম পূর্বক বিশেষ সম্মানের সহিত তাঁহাকে উপবেশন করাইলেন। ব্রাহ্মণটাও বাবাজী মহাশয়কে আগ্রহ সহকারে নিজের পার্শ্বে বসাইলেন। ব্রাহ্মণের আসিবার উদ্দেশ্য—বাবাজী মহাশয়ের সহিত উপাসনা লইয়া কিছু বিচার করা; কিন্তু মনে যে ভাব লইয়া আসিয়াছিলেন, ইহার দর্শন এবং ব্যবহারে সে ভাবের সম্পূর্ণ পরিবর্তন হইয়া গেল। ব্রাহ্মণ ধীরে ধীরে বলিলেন, “আচ্ছা বাবা! আপনারা যে কৃষ্ণের উপাসনা করেন, ঐ কৃষ্ণ কে?”

বাবাজী। আন্তে ব্রহ্মেন্দ্রনন্দন শ্রীকৃষ্ণ সর্ব-অবতারী পূর্ণ পূর্ণতম।

শাস্ত্রে বলিয়াছেন :—

ঈশ্বরঃ পরমঃ কৃষ্ণ সচ্চিদানন্দবিগ্রহঃ।

অনাদিরাদির্গোবিন্দঃ সর্বকারণকারণং॥”

শ্রীমদ্ভাগবতে বলিয়াছেন :—

“এতে চাংশকলাঃ পুংসঃ কৃষ্ণস্ত ভগবান্ স্বয়ং ॥

ইন্দ্রারিব্যাকুলং লোকং মৃডয়ন্তি যুগে যুগে ॥”

ইহারই আভ্যাসবর্তী হইয়া ব্রহ্মা ব্রহ্মাণ্ডের দ্বারা জগৎ সৃষ্টি করিতেছেন, বিষ্ণু সজগৎের দ্বারা পালন করিতেছেন এবং শিব ভ্রমোণ্ডের

ধারা সংহার করিতেছেন । ভগবৎ-আজ্ঞানুযায়ী হইলেও ইহার প্রত্যেকেই স্বতন্ত্র ঈশ্বর ।

ব্রাহ্মণ । সৃষ্টি-স্থিতি-প্রলয় ত আপনামা আপনাই হইতেছে । বস্তুর আকর্ষণ এবং বিকর্ষণে পরস্পর সংযোগ হয় । এই সংযোগই বস্তু উৎপত্তির কারণ । বস্তু হ্রস্বরূপে উৎপন্ন হইয়া নানারূপ কোশলে শব্দ, স্পর্শ, রূপ, রস, গন্ধ গ্রহণপূর্বক বর্দ্ধিত হয় এবং কালে আবার লয় প্রাপ্ত হয় । ইহার জন্ত এক একজন ঈশ্বর কর্ত্তব্য করার প্রয়োজন কি ?

বাবাজী । আচ্ছা, সামান্য একটা কথা আমি আপনাকে জিজ্ঞাসা করি । যে জ্ঞানের বলে আপনি এই সমস্ত কথা বলিতেছেন, এই জ্ঞান কোথা হইতে জন্মিল ?

ব্রাহ্মণ । নানারূপ শাস্ত্র আলোচনাধারা বুদ্ধি পরিমার্জিত হয় । এই পরিমার্জিত বুদ্ধির কোশলে শাস্ত্রের হ্রস্বত্ব অহুসঙ্কান জন্মে । এই হ্রস্ব-তত্ত্বাহুসঙ্কানেই জ্ঞানের উৎপত্তি হইয়া থাকে ।

বাবাজী । বেশ ! এই শাস্ত্রের উৎপত্তি হইল কিরূপে ?

ব্রাহ্মণ । চিন্তাশক্তি ধারা বেদের অপৌরুষেয় বাক্যকে পরিশুদ্ধ করিয়া সাধারণের বোধগম্য করিবার মানসে পূর্ব ঋষিগণ যে বাক্য করিয়াছেন, তাহাকেই শাস্ত্র বলে ।

বাবাজী । বেদের উৎপত্তি কোথা হইতে হইল ?

ব্রাহ্মণ । বেদ স্বয়ং প্রকাশ ।

বাবাজী । আচ্ছা আপনি বেদ মানেন ?

ব্রাহ্মণ । বেদ না মানিলে চলিবে কেন ?

বাবাজী । বেদ বলিয়াছেন :—সত্যং জ্ঞানমনন্তং ব্রহ্ম, শাস্ত্রবোনিষ্ঠাং সচ্চিদানন্দধনরসময়ব্রহ্ম । তবে আপনি কেন ঈশ্বর মানিবেন না ? ঈশ্বরের অস্তিত্ব বিষয়ে বহু বহু প্রমাণ রহিয়াছে । সে সমস্ত আমি আর

কত দেখাইব ? আমার বিশ্বাস—বাহার সামান্য বর্ণজ্ঞান আছে, তিনি কখনও ভগবৎ-সত্তা লোপ বা অস্বীকার করিতে পারে না ।

ব্রাহ্মণ । এতক্ষণ শান্তভাবেই ছিলেন ; কিন্তু এইবার একটু গরম হইয়া বলিলেন, “আজ্ঞা আপনিই না হয় আমাকে বর্ণজ্ঞান শিখাইয়া দিন, যে বর্ণজ্ঞানে ভগবৎ-সত্তা স্বীকার করা যায় ।”

বাবাজী । আপনি ক্রোধ করিবেন না ; একটু ভাবিয়া দেখুন, অকারাদি হকারান্ত সাতচল্লিশটা বর্ণ । ঐ বর্ণে-বর্ণে যোগ হইলে শব্দের উৎপত্তি হয় । বেদ এবং পুরাণাদি শব্দাত্মক । শব্দের মূল বর্ণ । ঐই বর্ণের আদি অকার । প্রত্যেক বর্ণের ভিত্তরে এই অকার রহিয়াছে ; অ না থাকিলে কোনও বর্ণ উচ্চারিত হইতে পারে না । যথা—ক বলিতে ক্+অ, এইরূপ খ্+অ=খ, চ্+অ=চ-ইত্যাদি ।

ব্রাহ্মণ । এত ব্যঞ্জনবর্ণ । ব্যঞ্জনবর্ণ পরাধীন ; স্বরবর্ণ স্বাধীন । স্বরবর্ণের মধ্যে ত আর অকার থাকিতে-পারে না ।

বাবাজী । কেন, আমি ত পূর্বেই বলিয়াছি, বাবতীয় বর্ণের মধ্যেই অকার আছে । শেষ হইতে ধরুন—অকারে এবং ওকারে মিলিত হইয়া ঔকারের উৎপত্তি হইয়াছে ; তবে ঔকারের ভিত্তরে অকার আছে । এইরূপ অকারে উকারে ওকার, অকারে একারে ঐকার, অকারে ইকারে একার হইয়াছে ।

ব্রাহ্মণ । আজ্ঞা-ইকার-ও উকারে-মধ্যে অকার কোথায় ?

বাবাজী । ই এবং ঔ এর উচ্চারণ স্থান তালু, উ এবং ঔ এর উচ্চারণ স্থান গুঠ । ইকারের উৎপত্তিস্থান বকার এবং উকারের উৎপত্তিস্থান বকার । তবেই ভাবিয়া দেখুন, ই এবং ঔ ইহার ভিত্তর অকার রহিয়াছে ; কাজেই ইকার উকারের ভিত্তরেও অকার আছে । আপনি পণ্ডিত, একটু অধ্যয়ন করিয়া দেখিলে আরা অপেক্ষ । আপনিই অনেক বেশী বাহির

করিতে পারিবেন সন্দেহ নাই। তবে দুই একটা দেখাইতেছি—বেমন ইষ্ট, ইজ্য। প্রভৃতি স্থানে বন্ ধাতুর ব স্থানে ই হইয়াছে। এই বকারের মধ্যে যে অকার ছিল, তাহাও ঐ ইকারের মধ্যে প্রবেশ করিয়াছে ত? এইরূপ উষ্ট্র এবং উক্ত প্রভৃতি স্থানে বণ্ এবং বচ্ ধাতুর ব স্থানে উ হইয়াছে। এই বএর অকার ঐ উকারের ভিতর আছে ত? এইরূপ পৃচ্ছতি, বৃচ্ছতি, ভৃচ্ছতি প্রভৃতি স্থানে প্রচ্ছ, ব্রচ্ ও ব্রস্জ্ ধাতুর ব স্থানে ঞ্ হইয়াছে। সূতরাং ঐ বএর অকার ঞ্এর মধ্যে রহিয়াছে।

ব্রাহ্মণ এবার একটু স্তম্ভিত ও বিস্মিত ভাবে ধীরে ধীরে বলিলেন, “না হয় প্রতি বর্ণের মধ্যে অকার আছে স্বীকার করিলাম, ইহাতে ভগবতা সঙ্কে কি হইল?

বাবাজী। প্রতি বর্ণের মধ্যে অকার স্বীকার করিলেই ভগবতা স্বীকার করা হইল! শাস্ত্রে আছে—

“অকারো বিকুরুদ্ধিষ্ট উকারস্ত মহেশ্বরঃ ।

মকারেণোচ্যতে ব্রহ্মা প্রণবেন জয়ো মতাঃ ॥”

একাক্ষর কোষাভিধান বলিয়াছেন,—“অকারো বায়ুদেবঃ তাদাকারশ্চ পিতামহঃ” সূতরাং প্রতি বর্ণের মধ্যে যদি অকাররূপে বিকু রহিলেন, তাহা হইলে বর্ণে বর্ণে শব্দের বোঝনা হেতু শব্দের মধ্যেও বিকুরূপী ভগবান্ আছেন। শব্দে থাকিলেই স্পর্শ, রূপ, রস, গন্ধাদিতেও আছেন; কাজেকাজেই পার্শ্বভৌতিক বস্তুমাঝেই বিকু আছেন।

ব্রাহ্মণ। তাহা হইলে আপনার কথার বুঝা গেল যে, সমস্তজগতের অধীশ্বর পালনকর্তা বিকুই প্রত্যেক বস্তুর মধ্যে বর্তমান আছেন।

বাবাজী। এই বিকু শব্দে সর্বেশ্বর, সৃষ্টাতীত অখচ গুণময় ভগবান্কে লক্ষ্য করা হইয়াছে। বিকু শব্দের ধাতুগত অর্থ—‘বিব ব্যাপ্তৌ’ অর্থাৎ ‘মিহি বিব্রজ্যামাস’ অর্থাৎ ‘দুল্লভ্যং বাবতী’র বস্তুতে ব্যাপক রূপে বর্তমান

আছেন, তাঁহাকেই বিষ্ণু বলা যায় । অতএব এই বিষ্ণুশব্দ এবং ব্রহ্মশব্দ একার্থবাচক ।

এতক্ষণে ব্রাহ্মণের চোখে জল আসিল—হৃদয় দ্রব হইল—গদগদকণ্ঠে বলিতে লাগিলেন, “বাবা ! এতদিন আমি শাস্ত্রালোচনায় বহু লোকের নিকট জয়লাভ করতঃ অভিমানমধ্যে ‘বসিষ্ঠাছিলাম । জানিতাম আমি ধুব, জ্ঞানী ও পণ্ডিত ; কিন্তু আজ—আপনার মুখে সরল ভাষায় অপূৰ্ণ ভগবন্ত্ববিষয়ক সুসিদ্ধান্তশ্রবণে মনে হইতেছে যে, এতদিন আমি বৃথা কালক্ষেপ করিয়াছি । আপনি মহাত্মা ; আমার অন্তরের ভাব সকলই বুঝিতে পারিতেছেন । আপনার নিকট আমার আর কিছুই বলিবার নাই ; এইমাত্র প্রার্থনা যেন প্রত্যেক বস্তুর মধ্যে ভগবৎ-সত্তা অনুভব করিতে পারি ।” বাবাজী মহাশয় করযোড়ে বলিলেন, “নিতাই নিতাই ! বাবা, আমি নিতান্ত অজ্ঞ ; আপনি পণ্ডিত, তাহাতে ব্রাহ্মণ । আপনারা জগদগুরু, আপনাদের কৃপাকটাক হইলে জগৎবাসী নরনারী ভগবৎকৃপার অধিকারী হইতে পারে ।” ইত্যাদি নানারূপ আলোচনায় বহুকাল অতিবাহিত হইল । বেলা অতিরিক্ত হইয়াছে দেখিয়া লালুবাবু স্নানাদি করিবার জন্ত অনুরোধ করিলে বাবাজী মহাশয় স্নান করিতে গেলেন । উপস্থিত লোকসকল স্বীয় স্বীয় বাসায় প্রস্থান করিলেন ॥ বাবাজী মহাশয়ও যথাসময়ে স্নানাদি করিয়া মহাপ্রসাদ গ্রহণপূর্বক বিশ্রাম করিলেন ।

উকীল ব্রহ্মানন্দবাবু।

দিনের পর দিন যাইতে লাগিল। জাজপুরের শিক্ষিত ভদ্রলোকগণ ক্রমে বাবাজী মহাশয়ের প্রতি বিশেষভাবে আকৃষ্ট হইতে লাগিলেন। চারিদিকেই ইহার বিষয় আলোচনা—ইহার কথিত স্তুতীমাংসার প্রশংসা—ইহার গানের ব্যাখ্যা, নৃত্যভঙ্গির আশ্চর্য্য এবং ইহার সরলতা ও সম্ভাবহার প্রভৃতির যশ ঘোষণা চলিতে লাগিল। বাবাজী মহাশয়ের চিরন্তন স্বভাব যে, যে স্থানে প্রতিষ্ঠা বা প্রশংসা হইবে, সেই স্থানে কখনই থাকিবেন না। আজও তাহাই হইল; সকালে উঠিয়াই লালুবাবুকে বলিলেন, “দেখ লালবিহারী! বহুদিন হইল জাজপুরে আসা হইয়াছে। এইবার একবার পুরী যাওয়া দরকার; অতএব আগামী কল্য পুরী রওনা হওয়া বাচ্।” লালুবাবু বিশেষ অনুরোধ করিয়া বলিতে লাগিলেন, “আজ্ঞে আমাদের একান্ত অভিলাষ যে আরও কয়েকদিন এইস্থানে থাকিয়া উপদেশামৃতসিক্তনে আমাদের হৃদয়-মরুভূমি একটু সরস করিয়া দেন!” বাবাজী মহাশয় বলিলেন, “আচ্ছা ভাই! নিতাইচাদের ইচ্ছার না হয় আবার আসা যাইবে, এ যাত্রা আর থাকিতে মন হইতেছে না।” ইত্যাদি নানা কথোপকথন হইতেছে এই সময় দুই তিনটা ভদ্রলোক সঙ্গে উকীল ব্রহ্মানন্দবাবু আসিয়া উপস্থিত হইলেন। দেখিবামাত্রই বাবাজী মহাশয় অতি সমাদরের সহিত সকলকে বসাইলে ব্রহ্মানন্দবাবু করবোড়ে বলিলেন, “বাবা! আমার বড়ই অভিলাষ হইয়াছে, একবার সদলে আমার বাড়ীতে গিয়া একটু কীর্ত্তনানন্দ করা হয়।

বাবাজী। বাবা! আমার ত কোনই আপত্তি নাই। তবে পুরী

বাইবার জন্ত মনটা একটু ব্যস্ত হইয়াছে । আবার যদি কখনও প্রভু এইস্থানে লইয়া আইসেন তখন দেখা যাইবে ।

ব্রহ্মানন্দবাবু সাশ্রুদগদগদকণ্ঠে বলিলেন, “আজ্ঞে আপনি কতই বলুন না কেন, এ নরাধমের আশা পূর্ণ করিতেই হইবে । সেদিন মোহিনী বাবুর বাড়ীতে আপনাকে দর্শন করা অবধি আমার মনে আশা জন্মিয়াছে । যদিও আমি নিতান্ত নরাধম, অসচ্চরিত্র, কিন্তু আপনি ত পরম দয়াল, অদোষদর্শী, পতিতপাবন ।

বাবাজী । বাবা ! আমি পতিতপাবনও নই, পরমদয়ালও নই ; তবে তাঁর দাস বটি ।

ব্রহ্মানন্দ । আজ্ঞে আপনি বাহাই হউন না কেন, আমি ত আপনাকেই জানি ।

বাবাজী । কবে তোমার ওখানে যাইতে হইবে ?

ব্রহ্মানন্দ । আপনার যেদিন ইচ্ছা হয় ; আমি ত মনে করিয়াছিলাম যে আজ হইলেই ভাল হইত ।

বাবাজী । বেশ কথা ! আজ তোমাদের বাড়ী কীৰ্ত্তন করিয়া কাল পুরী রওনা হইলেই ভাল হইবে ।

ব্রহ্মানন্দবাবু পরমানন্দিত মনে বাবাজী মহাশয়কে প্রণাম করিয়া নিজ বাসার প্রস্থান করিলেন । এই সময় সালুবাবু আসিয়া বলিলেন, “আজ্ঞে ব্রহ্মানন্দবাবুর বাড়ী যাওয়া আমার মতে যুক্তিসঙ্গত নহে ; কারণ সে ভয়ানক মাতাল এবং ঘোড় পাবণ । বিশেষতঃ সাধুবৈষ্ণবের প্রতি একেবারেই শ্রদ্ধা-বিশ্বাস-বিহীন ।

বাবাজী । বেশ ; ভাল কথা ! তবে তোমাদের মতে কেবল ভক্ত এবং বিশ্বাসী লোকের বাড়ীতেই যাওয়া উচিত । নিতাইচাঁদ প্রকট লীলার জগাই মাধাই প্রভৃতি বহু পতিত পাবণাদিগকে উদ্ধার করিয়া-

ছিলেন ; অপ্রকটে নামরূপে কি একজন লোকেরও মতি পরিবর্তন করিতে অক্ষম হইবেন ? কখনই নয় । অগতঃ পরিবর্তনশীল ; কাহারও সাময়িক অসদবৃত্তি দর্শন করিয়া তাহাকে অবজ্ঞা করা উচিত নহে । আজ যে ব্যক্তি ঘোর পাবণ্ড, কাল হয় ত প্রভুর কৃপায় সে একজন পরম সাধু হইতে পারে । আবার আজ যিনি পরম সাধু, কালপ্রভাবে হয়ত তিনি অসংপথাবলম্বী অবিদ্বানসী ঘোর পাবণ্ড হইতে পারেন ।

এইরূপ কথোপকথনে বহুকাল কাটিয়া গেল । বাবাজী মহাশয় স্নানাদি শেষ করিয়া মহাপ্রসাদ গ্রহণপূর্বক কিঞ্চিৎ বিশ্রাম করিলেন । অপরাহ্নে ইহাদিগকে লইয়া বাইবার জ্ঞাত ব্রহ্মানন্দ বাবুর বাড়ী হইতে লোক আসিলে বাবাজী মহাশয় পুরী বাইবার মানসে সকলের নিকট বিদায়গ্রহণপূর্বক সগণে নাম করিতে করিতে ব্রহ্মানন্দবাবুর বাড়ী রওনা হইলেন ।

এদিকে ব্রহ্মানন্দবাবু জাজপুরস্থ বহু উকীল মোক্তার এবং অন্যান্য বন্ধুগণকে নিমন্ত্রণ করিয়াছেন । বাবুভায়াগণ বাবাজীমহাশয়ের আগমন প্রতীক্ষা করিতেছেন, এমন সময় ইহারা উদ্দগুত্ব করিতে করিতে একেবারে ব্রহ্মানন্দবাবুর বৈঠকখানা ঘরের মধ্যে গিয়া প্রবেশ করিলেন । বৈঠকখানা ঘরটা ফরাস, স্তম্ভদ্বিজ এবং নানারূপ আলোছারা সুসজ্জিত করা তইয়াছে । বাবুভায়াগণ সকলেই শশব্যস্তে উঠিয়া দাঁড়াইলেন । মাতামাতি কীৰ্ত্তন হইতে লাগিল । ব্রহ্মানন্দবাবু করষোড়ে একপার্শ্বে দাঁড়াইয়া সংকীৰ্ত্তন শুনিতেছেন, আর চোখের জলে ভীহার মুখ বুক ভাসিয়া যাইতেছে । অপূৰ্ণ পরিবর্তন ! দুই দিন পূর্বে যিনি মঞ্চপানে উন্নত হইয়া সাধুবৈষ্ণব দেখিলে অবজ্ঞাভরে অপমান করিয়া বা দুইটা কটু কথা বলিয়া নিজেকে পরম বুদ্ধিমান্বোধে গরবে জগতের জীবনমূহকে নগণ্য মনে করিতেন, যিনি নাম সংকীৰ্ত্তন ও দূরের কথা, ভক্তিমাধান আত্মদৈন্ত-পরিপূর্ণ, অল্পভাগহৃৎক পদকীৰ্ত্তন শুনিয়া কর্ণে হস্তার্ণন করিতেন,

ভিনি আজ কয়েকটা বাবজীর ভালমান-রহিত নামসকীর্তন এবং উদ্ভট
নৃত্যে আত্মহারাতাবে অঝোরে বুরিতেছেন । কিছুকণ উদ্ভট-নৃত্য-কীর্তনের
পর বাবাজী মহাশয় বাবুভায়াগণের মন জানিয়াই যেন উপবেশনপূর্বক
কীর্তন ধরিলেন :—

ও মন এখনও কি কর কাম ।

জান না কি বলি, শমন খাতায়, লিখিয়া আইলেন নাম ॥
যখন এখানে, যে কাজ করিছ, দূতে জানাইছে সাটে ।
তখনই সেখানে, কাগজে ধরিয়া, পলকে পলকে জাঁটে ॥
উলটি পালাটি, নাড়িছে দেখিছে, যখন ফুরাবে জমা ।
জাঁটিয়া সাঁটিয়া, বাধিয়া লইবে, বুঝিয়া দেরে ভাই ক্রমা ॥
কামেতে চঞ্চল, হইয়া বিফল, কুকাজ করিছ কত ।
পূরব স্মরিয়া, দেখনারে ভাই, আপন বিচার মত ॥
ব্যাপারে আসিয়া, মূল হারাইলি, ধরিয়া মানব দে ।
আপন গরবে, আপনি ডুবিছ, তোরে বুঝাইবে কে ॥
আইন লইয়া কত, বিচার করিছ, দিবস রজনী জাগি ।
আপন বিচার, করিয়া দেখনা, কে তোর পাপের ভাগী ॥
একাল গরিছ, পাছু না ভাবিছ, আপনা আপনি দড় ।
ভাবিছ শমনে, কাকি দিবে ভাই, নিজেই চতুর বড় ॥
এ বর এ বাড়ী, যত টাকা কড়ি, এ মোর ও মোর কথা ।
কণেকে সকল, হইবে বিফল, তুমি বা থাকিবে কোথা ॥
হারা হুত লয়ে, আমোদ প্রমোদে, কাটালি সকল দিন ।
মরন মুদিয়া, ভাবিয়া দেখনা, পরমায়ু কতদিন ॥
যন্ত কলিহুগে, জনম পেয়েছ, তারত জুমেতে বাস ।
হেলায় প্রকার, হরি হরি বল, পুত্রিকেশনের আশ ॥

এইরূপভাবে বহুক্ষণ নানারূপ মনঃশিক্ষাশূচক পদ কীর্তন করিতে লাগিলেন। বাবুভায়াগণ একেবারে স্তম্ভিত। ব্রহ্মানন্দবাবু এক পার্শ্বে বসিয়া অঝোরে ঝুরিতেছেন, আর এক একবার হায় হায় বলিয়া উচ্চৈঃস্বরে চীৎকার করিয়া উঠিতেছেন। কিছুক্ষণ পরে কীর্তন সমাপ্তি হইলে ব্রহ্মানন্দবাবু ব্যাকুলভাবে কাদিতে কাদিতে আসিয়া বাবাজী মহাশয়ের চরণতলে পতিত হইলে ইনি উহাকে উঠাইয়া আলিঙ্গনপূর্বক নানারূপ সান্ত্বনাসূচক উপদেশ প্রদান করিতে লাগিলেন। ইত্যবসরে মহাপ্রসাদ পাইবার ব্যবস্থা হইলে সকলেই মহাপ্রসাদ পাইতে বসিলেন। ব্রহ্মানন্দ বাবু একটু দূরে দাঁড়াইয়া আছেন; হঠাৎ বাবাজী মহাশয় ডাকিলেন, “এস বাবা! আমার কাছে এস।”

ব্রহ্মানন্দ। আজ্ঞে আমি ইহার ভিতরে যাইবার বোগ্য নহি।

বাবাজী। কেন বাবা! এত মহাপ্রসাদ—চিন্ময় বস্তু। ইহাতে স্পর্শ দোষ হইতে পারে না। সুতরাং তুমি নিঃশঙ্কোচে আমার নিকট আসিয়া বস।

ব্রহ্মানন্দবাবু বাবাজী মহাশয়ের কথা অবহেলা করিতে না পারিয়া অগত্যা সেইস্থানে ইহার নিকটে গিয়া বসিলেন। বাবাজী মহাশয়ের আদেশে একজন ইহাকে একখানা পাতা আনিয়া দিলে পূজারী পরিবেশন করিতে লাগিল। ব্রহ্মানন্দবাবু যেন কেমন একপ্রকার হইয়া গেলেন। প্রসাদ পাইবেন কি, বাবাজী মহাশয়ের যে ব্যবহারটা তাঁহার নয়নপথে পতিত হইতেছে, তাহাতেই যেন উহার মন হরণ করিতেছে। কেবল বাবাজী মহাশয়ের দিকে তাকাইয়া ইহার ভাব ভঙ্গিই লক্ষ্য করিতেছেন। কিছুক্ষণ পরে মহাপ্রসাদ পাওয়া শেষ হইলে সকলেই বৈঠকখানা করে বিশ্রাম করিতে লাগিলেন। পার্শ্বস্থ একটা কুঠরীতে বাবাজী মহাশয়ের শয়নের ব্যবস্থা করিয়া দেওয়া হইল। অতি প্রত্যুষে প্রাতঃকৃত্য শেষ করিয়া গুণ্ডা হইবেন, এই সময় ব্রহ্মানন্দবাবু অতি বিনীতভাবে বলিলেন,

“আজ্ঞে আজকার দিনটী এইস্থানে বিশ্রাম করিয়া অধিকের পণ্ডজীবন উদ্ধার করিয়া দিন। আমি বোর পায়ণ্ড। শাস্ত্রে অজ্ঞানিল, রত্নাকর, জগাই, মাধাই প্রভৃতির নাম উল্লেখ আছে; কিন্তু আমি তাহাদের অপেক্ষা কোটীগুণে নিকৃষ্ট। আমাকে উদ্ধার করিতে আপনি ভিন্ন আর যে কেহ আছে বা হইতে পারে, একথা আমার বিশ্বাস হয় না। অতএব এ পণ্ডিতের গতি করিতেই হইবে।” বাবাজী মহাশয় একটু চিন্তা করিয়া বলিলেন, নিতাইচাঁদ পণ্ডিতপাবন। তাঁহার ইচ্ছা হইলে কিছুই বিচিন্ন নহে। আজ আর আমাদিগকে এস্থানে রাখা বোধ হয় নিতাইচাঁদের অভিপ্রায় নহে। তুমি ছুঃখ করিওনা বাবা! প্রভুর ইচ্ছা হইলে সমস্তের আবার দেখা হইবে।” বলিয়া “নিতাই গৌর রাধে শ্রাম। হরে কৃষ্ণ হরে রাম” এই নাম করিতে করিতে রওনা হইলেন।

পূর্বেই বলা হইয়াছে, বাবাজী মহাশয় কখন কাহাকেও রাস্তার পরিচয় জিজ্ঞাসা করেন না। চরণে চরণ দিয়া নাচিতে নাচিতে গমন করিতেছেন। সঙ্গিগণও সঙ্গে সঙ্গে নৃত্য করিতে করিতে বাইতেছে। ব্রহ্মানন্দবাবু সঙ্গেই আছেন। প্রায় এক মাইল দূরে একটা গাছতলার হঠাৎ বাবাজী মহাশয় থমকিয়া দাঁড়াইলেন। অর্ধনিমিলিত নেত্রদ্বয় হইতে দয়দরিত ধারে অশ্রুবিসর্জন হইতেছে—সর্বদা পুলক, গণ্ডদ্বয় জ্বলন্ত রক্তিম ও কম্পিত। এদিকে ব্রহ্মানন্দবাবু সঙ্কীর্ণন দলের পশ্চাদভাগ হইতে রোদন করিতে করিতে চুক্ষাকৃষ্ট লোহের জ্বায় ক্রন্তগতি আসিয়া বাবাজী মহাশয়ের চরণে পতিত হইলে ইনি চমকিতভাবে চরণের দিকে চাহিয়া ব্রহ্মানন্দবাবুকে দেখিবামাত্র বলিয়া উঠিলেন, “আহা মরি কি করুণা! লীলাময়ের লীলার বাংলাই বাই।” এই বলিয়া ব্রহ্মানন্দবাবুকে উত্তোলন-পূর্বক আলিঙ্গনদানে কৃতার্থ করতঃ কর্ণে মন্ত্রপ্রদান করিলেন। সঙ্গিগণের আনন্দ আর ধরে না। ব্রহ্মানন্দবাবু পুনরায় ইহার চরণজলে পড়িয়া

বলিতে লাগিলেন, “প্রভো! আমি ঘোর মন্তপারী, অসচ্চরিত্র নারকী। আমার বিশ্বাস আমাকে উদ্ধার করিতেই আপনার অবতার। প্রভু! আমি আমার নিজের অবস্থা বলিয়া বুঝাইতে ভাষা পাই না। আপনি অন্তর্যামী, সকলই জানেন বা জানিতেছেন! আমি আর কি বলিব? অধমের ভার অঁচরণে লাগিল।” বলিয়া বালকের জায় উচ্চৈঃস্বরে কাদিতে লাগিলেন। বাবাজী মহাশয় নানারূপ সাঙ্ঘনাবাক্যে উহাকে প্রবোধ দিয়া বাসায় পাঠাইয়া দিলেন, নিজেও পুনরায় নাম করিতে করিতে বৈতরণী ষ্টেশনের দিকে গমন করিলেন। ষ্টেশনের নিকটবর্তী একখানি গ্রামে যেমন উপস্থিত হইয়াছেন, অমনি কয়েকজন ভক্ত আসিয়া বিশেষ আগ্রহ সহকারে বলিলেন, “আজ্ঞে! আমাদের সকলের অভিলাষ যে অন্ততঃ এবেলা এইস্থানে বিশ্রাম করিয়া আমাদের কৃতার্থ করেন। অল্পমতি হয় ত ঠাকুরের ভোগের যোগার করিয়া দেই।” বাবাজী মহাশয় ভক্তের অনুরোধে অগত্যা তাহাই স্বীকার করিলেন। সূচতুর সঙ্গিগণ অতি অল্প সময়ের মধ্যেই রান্না শেষ করিয়া ঠাকুরের ভোগ দিবেন। ইত্যবসরে বাবাজী মহাশয় স্নানাদি করিয়া “জয় জয় নিত্যানন্দাষ্টে” কীৰ্ত্তন করিতে লাগিলেন। গ্রামখানি যদিও অতি ক্ষুদ্র, তবু দ্বীপুরুষ, বালক-বৃদ্ধ সকলেই ভক্ত। সকলেই স্ব স্ব গৃহকার্য্য পরিত্যাগ করিয়া সেই বৃক্ষতলে উপস্থিত হইয়াছেন। ক্রমে সঙ্কীৰ্ত্তনসমাপ্তি করিয়া মহাপ্রসাদ গ্রহণপূর্বক সকলে ষথাসময়ে ষ্টেশনে উপস্থিত হইলেন। প্রায় আধঘণ্টা পরে গাড়ী আসিয়া পৌঁছিলে সকলেই গাড়ীতে উঠিয়া শ্রীধাম পুরী রওনা হইলেন।

শ্রীধামপুরী প্রত্যাবর্তন ও শ্রীরাধারমণকুঞ্জে অবস্থিতি ।

রাত্রি অল্পমান এগারটার সময় গাড়ী আসিয়া পুরী ষ্টেশনে উপস্থিত হইলে বাবাজী মহাশয় সগণে গাড়ী হইতে অবতরণ করিয়া সকলকে বলিলেন, “আমার সঙ্গে কেহই থাকিও না, তোমরা সকলে নাম করিতে করিতে ঝাঁজপিটা মঠে গমন কর । আমি এ যাত্রায় রাধারমণকুঞ্জে থাকিব । সকলেই ইহার সঙ্গ ছাড়িয়া যাইতে প্রথমে অনিচ্ছা প্রকাশ করিতে লাগিলেন ; কিন্তু ইনি যখন বিশেষ করিয়া বলিতে লাগিলেন তখন অগত্যা সকলেই নাম করিতে করিতে রওনা হইলেন । জাজপুর হইতে ষ্টেশনে আসিবার সময় ললিতাদাসীর পায়ে একটি কাঁটা বিদ্ধ হওয়ায় সে আন্তে আন্তে চলিতে লাগিল । তাহার মনের ভাব যে কোনও কোশলে বাবাজী মহাশয়ের সঙ্গে সঙ্গে যাইবে । বাবাজী মহাশয় ষটী হাতে করিয়া ষ্টেশন হইতে সমুদ্রের দিকে যে রাস্তা গিয়াছে, ঐ রাস্তায় যাইতে লাগিলেন । ললিতাদাসীও ধীরে ধীরে ইহার অনুগমন করিতে লাগিল । ক্রমে একটি পুলের নিকট গিয়া বাবাজী মহাশয় পূর্বদিক্‌বর্তী মাঠের মধ্যে প্রবেশ করিলেন । ললিতাদাসী পুলের উপর দাঁড়াইয়া রহিল । ক্ষণকাল পরে ইনি যেমন উপস্থিত হইয়াছেন, অমনি একটি পুলিশ কন্‌ষ্টেবল আসিয়া ইঁহাকে যাত্রিক জ্ঞানে বলিতে লাগিল, “আপ্‌ কোন্‌ হো, হিঁয়া টাটি গিয়া ? চল্‌ অব্‌ থানামে জানে হোগা ।” বাবাজী মহাশয় একটু অপ্রতিভের ভান দেখাইয়া বলিলেন, “বাবা ! কি করিব ? আমারতু প্রয়োজন হইরাছে বাহে গিয়াছি ; এখন নিতাইচাঁদের

ইচ্ছায় তোমার বাহা মনে হয় কর । খানায় যাইতে হয় চল । আমারও একটু সুবিধা হয় ; কারণ অনেক দিন-বন্ধিমবাবু, পূর্ণবাবু প্রভৃতির সহিত দেখা হয় নাই । এই উপলক্ষে সে কার্যটিও সম্পন্ন হইবে ।” জ্যোৎস্না রাত্রি ; কন্ঠেবলটি একটু নিকটে গিয়া যেমন বাবাজী মহাশয়কে চিনিতে পারিল অমনি বলিল, “আজ্ঞে মহাপ্রভু ! মূ চিহ্নি পারি নাহি, মোহর অপরাধ ঘেনিবে নাহি” বলিয়া দ্রুতপদে চলিয়া গেল । তখন বাবাজী মহাশয় মুহূ হাসিয়া গমন করিতে লাগিলেন । ললিতাদাসীও পশ্চাৎ পশ্চাৎ যাইতে লাগিল । যথাসময়ে রাধারমণকুঞ্জ মঠে গিয়া উপস্থিত হইলেন । মঠের অধীশ্বর শ্রীশ্রীরাধারমণ জীউ শয়নে ছিলেন বলিয়া আর তাঁহাকে জাগান হইল না । ললিতাদাসী বাবাজী মহাশয়ের বিছানা করিয়া দিল । আহারাদির কথা জিজ্ঞাসা করার বাবাজী মহাশয় কিছুই খাইতে অনিচ্ছা প্রকাশ করিলেন । কাজেই আর কোনও যোগ্যতা করা হইল না । বাবাজী মহাশয় শয়ন করিলেন ; অত্যন্ত দুই একজন বাহার সঙ্গ ছিল, তাহারাও স্ব স্ব অভিপ্রায় মতে বিশ্রাম করিল ।

বালমুকুন্দ বাবুর সহিত মিলন

কাঁজপিটা মঠের সেবার ভার কুমুমমঞ্জরী দাসী সখীর উপর দেওয়া হইয়াছে । সেই স্থানে থাকিয়া বাবাজী মহাশয়ের সঙ্গী মধুসূদন দাস ডিন্কা করেন । রাধারমণ কুঞ্জে কুঞ্জদাস বাবাজী, ললিতাদাসী এবং রসরঞ্জিনী দাসী সখী এই কয়েকজন বাবাজী মহাশয়ের সঙ্গ থাকেন । শ্রীশ্রীরাধারমণ দেবের সেবার জন্ত একসের চাউল রান্নার ব্যবস্থা করা

হইয়াছে। স্থানীয় ডেপুটী বালমুকুন্দ বাবু প্রায়ই বাবাজী মহাশয়ের কীর্তন শুনিবার জন্য ইচ্ছা প্রকাশ করেন ; কিন্তু বিশেষ সুযোগ পট্টয়া উঠে না। একদিন উহার বাসায় সগণে বাবাজী মহাশয়ের নিমন্ত্রণ। ললিতাদাসী এবং কুসুম দাসী রান্না করিতে গিয়াছেন। বেলা আন্দাজ দশটার সময় বাবাজী মহাশয় সঙ্কীৰ্তন লইয়া উহার বাসায় গিয়া উপস্থিত হইলেন। সে দিন রবিবার—বাবুর অফিস বন্ধ ; কাজেই কীর্তন শুনিবার বিশেষ সুযোগ হইল। বালমুকুন্দ বাবু যদিও বৈষ্ণবধর্মে দীক্ষিত নহেন, কিন্তু শ্রদ্ধাবান্ এবং অতি মুহু স্বভাব। কোমল জিনিষে সহজেই অপর বস্তুর সহযোগ ঘটয়া থাকে। আজ বালমুকুন্দ বাবুর কোমল হৃদয়েও ভগবৎ-প্রেমের ছাপ পড়িল—সঙ্কীৰ্তনে হৃদয় যেন আরও দ্রব হইয়া গেল—চোখে জল আসিল—ভগবদ্‌পাসনা জানিবার জন্য উৎকণ্ঠা জন্মিল। ব্যগ্রতার সহিত বাবাজী মহাশয়কে দীক্ষার কথা বলিতে লাগিলেন। বাবাজী মহাশয়ও তাঁহার মধুর ভাবে মুগ্ধ হইয়া আলিঙ্গন পূর্বক উহার হৃদয়ের উৎকণ্ঠার মাত্রা আরও কিঞ্চিৎ বৃদ্ধি করিবার মানসে মহাপ্রসাদ গ্রহণ করতঃ বাসায় প্রত্যাবর্তন করিলেন।

ক্রমে বালমুকুন্দ বাবুর উৎকণ্ঠা বৃদ্ধি পাইতে লাগিল। একদিন বিশেষ আগ্রহ প্রকাশ করার উহাকে দীক্ষামাত্র প্রদান করিলেন। সেই হইতে বালমুকুন্দ বাবু প্রত্যহ একবার কুঞ্জমঠে আসিয়া বাবাজী মহাশয়ের অধরাবৃত্ত গ্রহণপূর্বক অফিসে গমন করেন। ঘটনাক্রমে ম্যাজিষ্ট্রেট সাহেব উহার উপর একটু বিরূপ হইয়া পড়িলেন ; কারণ বালমুকুন্দ বাবু একটু স্বাধীনচেতাঃ। কাছারিতে বাইবার সময় কোন কোন দিন হয় ত নাকে তিলক করিয়া বান। উহার মুখে বেশ গোঁপ ছিল। একদিন বাবাজী মহাশয় বলিলেন, “দেখ বালমুকুন্দ ! এই গোঁপেতে তোমাকে ঠিক ব্রজগোপের ভায় দেখা বাইতেছে। দেখ যেন গোঁপটা ফেলিয়া

দিও না ।” আনি না বাবাজী মহাশয়ের ঐ বাক্যটা বালমুকুন্দ বাবু কি ভাবে গ্রহণ করিলেন । পরদিবস প্রাতে গোঁপ কামাইয়া আসিয়া উপস্থিত হইলে বাবাজী মহাশয় বলিলেন, “কিরে পাগলা ! গোঁপ ফেলিতে বারণ করিলাম ! এ কি ?” সে বলিল, “বাবা বেশ হইয়াছে । গলায় তুলসীর মালা, আর মুখে গোঁপ ; ও যেন কেমন ভাব বিরুদ্ধ বলিয়া আমার মনে হইতেছিল । আজ মনটা বেশ প্রসন্ন হইয়াছে ।” অতঃপরে কথা শুনিয়া বাবাজী মহাশয় উঁহাকে আলিঙ্গন প্রদান করিলেন । সাহেব উঁহার ব্যবহারে কেন যেন ক্রমেই অধিক পরিমাণে বিরক্ত হইয়া কিছু মাহিনা কামাইবার জন্য চেষ্টা করিতে লাগিলেন । একদিন বালমুকুন্দবাবু বেলা নয়টার সময় অফিসের পোষাকে কুঞ্জমঠে উপস্থিত হইয়াছেন । দৈবক্রমে ক্ষণকাল পূর্বে একজন পাণ্ডা একগাছি জগন্নাথদেবের প্রসাদী গ্যাঁদাফুলের মালা বাবাজী মহাশয়ের গলায় দিয়া গিয়াছেন । বালমুকুন্দবাবু প্রণাম করিবামাত্র ইনি ঐ মালাগাছটি উহার গলায় দিয়া রাধাবিনোদকে উহার কপালে তিলক করিয়া দিবার জন্য আদেশ করিলেন । সেও বেশ মোটা করিয়া একটা তিলক করিয়া দিল । তখন বালমুকুন্দবাবু বাবাজী মহাশয়ের কিঞ্চিৎ অধরামৃত গ্রহণ পূর্বক অতি আনন্দভরে কাছারীতে গমন করিলেন । একেই ত সাহেব একটু চটা, তাহাতে আবার আজ মালাতিলক ধারণ করিয়া কাছারি গিয়াছেন ! দেখিবামাত্র সাহেব ক্রুদ্ধভাবে বলিলেন, “এ কি ?”

বালমুকুন্দ । সাহেব ! এটি আমাদের ভগবানের প্রসাদী মালা ।

সাহেব । অফিসে এসব আন। নতান্ত অন্তায় ।

বালমুকুন্দ । কেন সাহেব ! অফিসের সঙ্গে কি ধর্মের কোন সংজ্ঞা নাই ।

সাহেব । থাকিলেও ঐরূপ পোষাকে আসা উচিত নহে ।

বালমুকুন্দ । কেন সাহেব ! তুমি ত তোমার পোষাক পরিয়া আসিয়াছ । আমিও আমার পোষাক পরিয়া আসিয়াছি । ইহাতে কি কোন দোষ হইতে পারে ? আমি যদি কোনও বেআইনী বা রাজ্যের অনিষ্টকর কোন কার্য করি, তবে আমার দোষ হইতে পারে ।

ইত্যাদি নানারূপ কথোপকথন হইতে লাগিল । কিছু সময় পরে সাহেব বলিলেন, “আমি তোমার মাহিনা কমাইয়া দিব ।”

গুলিয়া বালমুকুন্দবাবু বলিলেন, “সাহেব ! আমার মাহিনা কমাইবার ইচ্ছা হয় কমাও কোনই আপত্তি নাই ; আমি কিন্তু আমার স্বধর্ম ত্যাগ করিতে পারিব না ।” সন্তদয় সাহেব উহার স্বধর্মনিষ্ঠা দর্শনে অত্যন্ত সন্তুষ্ট হইয়া বাহাতে উহার কিছু বেতন বৃদ্ধি হয় সে বিষয়ে চেষ্টিত হইলেন । বালমুকুন্দবাবুর প্রতি সাহেবের যে বিদ্বেষভাব ছিল, সেই দিন হইতে তাহা দূর হইয়া পরম শ্রীতিভাবের সঞ্চার হইল । নানাকারণে বালমুকুন্দবাবুর ভক্তিভাব দিন দিন বৃদ্ধি পাইতে লাগিল । উহার স্বভাবটী ঠিক বালকের ত্রায় । বাবাজী মহাশয়কে দূর হইতে দেখিবামাত্র অতি দ্রুতগতি আসিয়া দণ্ডবৎ প্রণাম করতঃ অন্ততঃ চারি পাঁচ মিনিট সময় ইহার পেটের উপর মাথাটী রাখিয়া পরমানন্দলাভ করিতেন । কেহ জিজ্ঞাসা করিলে বলিতেন, “.য দিন আমি বাবার পেটে মাথা দিতে না পারি, সেদিনটী আমার স্বশাস্তিতে যায় ।” এইরূপ ভাবে পরমানন্দে দিন অতিবাহিত হইতে লাগিল ।

ললিতাদাসীর পরীক্ষা ।

রাধারমণ কুঞ্জ একসের কবী । চাউল রান্না হয় এবং শ্রীরাধারমণ দেবের ভোগ লাগলে বাবাজী মহাশয় প্রসাদ সেবা করার পর অন্ততঃ

ভক্তগণ কিঞ্চিৎ কিঞ্চিৎ অধরায়ুত পান । ঝাঁজপিটা মঠে ভোগ হইলে তথাকার বৈষ্ণব সেবার পর কুসুমমঞ্জরীদাসী মহাপ্রসাদ লইয়া আইসেন । সেই মহাপ্রসাদ ললিতাদাসী, রসরঞ্জিনীদাসী ও কুসুমমঞ্জরীদাসী প্রভৃতি সেবা করেন । একদিন বাবাজী মহাশয়ের কি খেয়াল জন্মিল—প্রথম একসের চাউল রান্না হইয়া রাধারমণদেবের ভোগ লাগিল, ঐ মহাপ্রসাদ নিজে তিন চারিজন ভক্তসঙ্গে সমস্ত সেবা করিলেন । হঠাৎ কয়েকজন ভক্ত আসিয়া উপস্থিত হইলে বলিলেন, “দেখ, আর দুইটা চাউল রান্না করিয়া রাধারমণের ভোগ দাও ত ?” “তুনিবামাত্র নবদ্বীপ দাদা পার্শ্বস্থ কৰ্জাবহারী রায়ের বাড়ী হইতে দুই সের চাউল ভিক্ষা করিয়া আনিবে ললিতাদাসী তাহা হইতে একসের চাউল রান্না করাইয়া রাধারমণের ভোগ দিল । ভোগের পর বাবাজী মহাশয় কিঞ্চিৎ গ্রহণ করিলে ভক্তগণ সেই অধরায়ুত পাইয়া যেমন উঠিবেন, এই সময় আবার কয়েকজন ভক্ত আসিলেন । বাবাজী মহাশয় পূর্ববৎ রান্না করিতে বলায় ললিতাদাসী অবশেষ চাউল দুইটা রান্না করাইল । ইত্যবসরে ঝাঁজপিটা মঠ হইতে মহাপ্রসাদের পারশ আসিলে বাবাজী মহাশয়ের আদেশে উভয় প্রসাদ মিশ্রিত করিয়া ভক্তগণকে দেওয়া হইল । যাহা কিছু অবশেষ ছিল, কুসুমদাসী এবং রসরঞ্জিনীদাসীকে পাইবার আদেশ করিলেন । তাহারা একবার বলিল, “দিদি এখনও কিছু খায় নাই ।” তুনিয়া বাবাজী মহাশয় যেন একটু ক্রুদ্ধভাবে বলিলেন, “আচ্ছা তোমরা পাও, তাহার জন্ত ভাবিতে হইবে না ।” কাজেই বাহা কিছু অবশেষ ছিল উহারা দুইজনে পাইল ।

বাবাজী মহাশয় ললিতাদাসীকে একরূপ কাজের আদেশ করিতেছেন যে, ইচ্ছা থাকিলেও সে কোনওরূপ প্রসাদাদি পাইতে পারিতেছে না । সকলের প্রসাদাদি পাওয়ার পর বাবাজী মহাশয় শয়ন করিলেন ।

ইত্যবসরে জেনার্মাট হইতে কিছু চিড়াভাজা, ঘনাবর্ত দ্রব্য ও মিষ্টি আসিল বাবাজী মহাশয় নিদ্রাভিত্ত জ্ঞানিয়া লোকটী অতি সন্তুর্পণে যেমন রাধারমণের অঙ্গনে উপস্থিত হইল, অমনি ইনি ঘর হইতে বলিয়া উঠিলেন, “দেখ, ঐ সমস্ত বস্তু ঠাকুর জাগিলে পরে ভোগ লাগিবে । এখন সমস্ত আমার ঘরে আনিয়া রাখ । তখন ললিতাদাসী বুকিল যে আজ ইহার মনে কোন খেয়াল উদয় হইয়াছে ; কাজেই হাসিতে হাসিতে উক্ত দ্রব্যসকল বাবাজী মহাশয়ের দরে রাখিল ।

বেলা চারিটার সময় পূর্বোক্ত ঘৃতে ভাজা চিড়া, ঘনাবর্ত দ্রব্য ও মিষ্টি সহযোগে রাধারমণজীউকে ভোগ লাগান হইল । বাবাজী মহাশয় হাত মুখ ধুইয়া উক্ত প্রসাদ কিঞ্চিৎ গ্রহণ পূর্বক উপস্থিত ভক্তমণ্ডলীকে নিজ হস্তে সমস্ত বাটিয়া দিলেন ; কিন্তু ললিতাদাসী বাদ পড়িয়া গেল । তখন ললিতাদাসীর মুখপানে তাকাইয়া একটু মৃদু হাসিয়া বলিলেন, “ও ! তাইত ইহাকে ত ভুল হইয়া গেল । আচ্ছা এই বাসন প্রভৃতিতে যাহা লাগিয়া আছে, উহাতেই ইহার যথেষ্ট হইবে ।” ললিতাদাসীও হাসিতে হাসিতে অঙ্গুলিদ্বারা কিঞ্চিৎ অধরামৃত গ্রহণপূর্বক বাসন পরিষ্কার করিয়া ফেলিল । বলা বাহুল্য যে তাহাতেই উহার ক্ষুধা নিবৃত্তি ও পরম পরিভূষ্টি হইল ।

সন্ধ্যার প্রাক্কালে বাবাজী মহাশয় জগন্নাথ দর্শনে বাহির হইলেন । যাইবার সময় ভুবন সাউর বাড়ী হইতে কিছু পুরী, কচুরী এবং মোহন-ভোগ প্রসাদ পাঠাইয়া দিলেন এবং একখানি পুরীর একপাশ ছিঁড়িয়া তাহার বড় ছেলেকে বলিয়া দিলেন, “বল্‌বি আমার অধরামৃত ।” সেও কুঞ্জমঠে গিয়া বাবাজী মহাশয়ের আদেশানুযায়ী কার্য্য করিল । এদিকে বাবাজী মহাশয় ললিতাদাসীকে বলিয়া গিয়াছেন, “আমার জন্ম যদি কোনও খাবার আইসে, সাবধান যেন খরচ করিও না ।” ললিতাদাসী

ভুবন সাউর বড় ছেলে নিতাইদাসের হাত হইতে থালাখানি লইয়া গৃহান্তরে রাখিয়া দিল । ক্রমে বাত্র অমুমান নয়টার সময় বাবাজী মহাশয় আসিয়া ললিতাদাসীকে জিজ্ঞাসা করিলেন, “আমার জন্ত যে খাবার আসিয়াছিল ?”

ললিতা । কেন সে যে অধরামৃত ! আমি সমস্ত পাইয়াছি ।

বাবাজী । কে বলিল অধরামৃত ?

ললিতা । কেন আপনিই ত নিতাইদাসের নিকট বলিয়া দিয়াছিলেন ?

বাবাজী । সে যে মিথ্যা কথা ! আমি তোদের পরীক্ষার জন্ত বলিয়াছি ।

ললিতা । আচ্ছা আপনারই কথা যদি মিথ্যা হইতে পারে, তবে না হয় আমারও কথা মিথ্যা হইল ।

এই বলিয়া হাসিতে হাসিতে সেই পুরী-কচুরীর থালাখানা আনিয়া বাবাজী মহাশয়ের সম্মুখে দিল । বাবাজী মহাশয় ঐ থালা দেখিয়া একটু বিস্মিতভাবে কিঞ্চিৎ নিজে গ্রহণ করিয়া ললিতাদাসীকে খাইবার আদেশ করিলেন । ললিতাদাসী নিজ কার্যের অবকাশমতে উপস্থিত সকলকে লইয়া সেই অধরামৃত পাইল ।



টোটাগোপীনাথের নটবরবেশ ।

এইরূপ পরমানন্দে দিনের পর দিন অতিবাহিত হইতে লাগিল । ক্রমে বাবাজী মহাশয় কীৰ্ত্তনানন্দে সপরিকর শ্রীশ্রীগোরাঙ্গদেবকে সঙ্গ লইয়া শ্রীশ্রীজগন্নাথদেবের স্নানযাত্রা, গুণ্ডিচামার্জন ও রথযাত্রা প্রভৃতি

লীলা পূর্ববৎ আশ্বাদন করিতে লাগিলেন। দেখিতে দেখিতে কার্তিক মাস উপস্থিত হইলে শ্রীশ্রীজগন্নাথদেবের নটবরবেশ ও বালধূপ নামক ভোগ হইতে লাগিল। একদিন বাবাজী মহাশয় সঙ্গিগণসঙ্গে টোটাগোপীনাথ দর্শনে গিয়াছেন। গোপীনাথজীউর সহিত শ্রীগোরাঙ্গদেবকে রাধাভাবাবেশে মিলন করাইয়া কি মনে মনে ভাবিলেন ইনিই জানেন—পূজারীকে জিজ্ঞাসা করিলেন, “তুমি কি গোপীনাথের নটবরবেশ করিতে পারিবে?” পূজারী বলিল, “আজ্ঞে আপনার রূপা থাকিলে পারিব বই কি?” শুনিয়া হৃষ্টচিত্তে বাসায় প্রত্যাবর্তন করিলেন।

পরদিন প্রাতে প্রাতঃকৃত্যাদি সমাপন পূর্বক বলরাম বাবুকে ডাকাইয়া বলিলেন, “দেখ বলরাম! শ্রীগোপীনাথজীউর নটবরবেশ করিবার জন্ত আমার অভিলাষ জন্মিয়াছে; অতএব আজ ভিক্ষায় বাহির হইব মনে করিয়াছি। বলরাম বাবু বলিলেন, “আজ্ঞে নটবরবেশে আর কি খরচ হইবে। উহার জন্ত আবার ভিক্ষা করিবার প্রয়োজন কি?” বাবাজী মহাশয় একটু মুহু হাসিয়া বলিলেন, “দেখ বলরাম! ভিক্ষালব্ধ বস্ত্রদ্বারা ভগৎসেবায় যত প্রীতি জন্মে, কোনও একজনের অর্থ দ্বারা সেইরূপ প্রীতি হইতে পারে না; অতএব চল সকলে মিলিয়া ভিক্ষা করা যাক্।” বলিয়া ‘ভজ্জ নিতাই গৌর রাধে শ্যাম। জপ হরে কৃষ্ণ হরে রাম॥’ এই নাম করিতে করিতে ভিক্ষায় বাহির হইলেন।

সঙ্গে অনেক লোক—খাল কর্তাল বাজিতেছে। প্রথমে পুরীবাসীগণ মনে করিয়াছিলেন যে বাবাজী মহাশয় নগরকীৰ্ত্তনে বাহির হইয়াছেন, পরে যখন দেখিলেন যে ইহার কাঁধে বোলা, তখন সকলেই শশবাস্তে বলরাম বাবুকে জিজ্ঞাসা করিতে লাগিলেন, “আজ কি উপলক্ষে বাবাজী মহাশয় ভিক্ষায় বাহির হইয়াছেন?” বলরামবাবু বলিলেন, “টোটাগোপীনাথের নটবরবেশ করিবার মানসে ভিক্ষায় বাহির

হইয়াছেন ।” শুনিবামাত্র সকলে নিজ নিজ রুচি-অনুসারে কেহ পাঁচ, কেহ দশ, কেহ বা দুই এক টাকা করিয়া ভিক্ষার ঝোলায় দিতে লাগিলেন । ইচ্ছাময়ের ইচ্ছায় কিছুক্ষণ ভ্রমণের পর কাঁজপিটা মঠে প্রত্যাবর্তন করিয়া ঝোলা নামাইলে বলরাম বাবু গণিয়া দেখেন যে, বিরানব্বই টাকা চারি আনা হইয়াছে । তখন বাবাজী মহাশয় উহাকে বলিলেন, “দেখ বলরাম ! গোপীনাথ জিউর নটবরবেশের দরুণ কাপড় প্রভৃতি ষাহা ষাহা প্রয়োজন হয় তাহা সংগ্রহ কর ।” নবদ্বীপ দাদা হাসিতে হাসিতে বলিলেন, “কেবল নটবর বেশ করিলেই ত হইবে না । লীলাকীৰ্ত্তন, নাচ এবং বৈষ্ণব সেবা চাই ত !” বাবাজী মহাশয় বলিলেন, “আচ্ছা তোমরা সরল প্রাণে প্রার্থনা কর, নিতাইর ইচ্ছায় টাকার অভাব হইবে না ।” বলরাম বাবু বলিলেন, “এক দল আখড়া-পিলার নাচ আনাইলে ভাল হয় না কি ?

বাবাজী । কোথাকার দল ভাল হইবে ?

বলরাম । আজ্ঞে সত্যবাদীর বিহারীওতার দলটি বড়ই ভাল । তাহার ছেলেটি বেশ নৃত্য করে ।

বাবাজী । বেশ ত ! তাহাদিগকে খবর দাও ।

বলরাম বাবু অতি স্তম্ভচিত্তে সত্যবাদিতে লোক পাঠালেন । এদিকে বলরাম বাবু নানারূপ বেশভূষার যোগাড় করিতে লাগিলেন । বাবাজী মহাশয় শিবদাসকে ডাকাইয়া গোপীনাথের বাড়ী দুইমণ ছন্ধের স্নজির পায়াস এবং একশত টাকার জগন্নাথের ভোগের ব্যবস্থা করিতে বলিয়া দিলেন । পুরীবাসী সমস্ত বৈষ্ণব নিমন্ত্ৰণ করা হইল । মহা ধূম ধাম ব্যাপার । পরদিবস অতি প্রত্যুষে নবদ্বীপদাদাকে বেশ করিবার জন্ত পাঠান হইল এবং সকলে স্নানাদি করিয়া বেলা আন্দাজ আটটার সময় নাম করিতে করিতে গমন করিলেন । এদিকে বলরাম বাবু সত্যবাদীতে

বিহারীওতার দল আনাইবার জন্ত লোক পাঠাইলেন। গোপীনাথজীউর ভোগ রান্না হইতে লাগিল। এদিকে নবদ্বীপ দাদা এবং একজন পূজারী ঠাকুরের বেশ করিতে লাগিলেন।

বেলা আন্দাজ দশটার সময় গোপীনাথ জীউর দর্শন খোলা হইল। লোকে লোকারণ্য। অপূর্ব দর্শন! যে একবার গোপীনাথজীউর চক্ষু বদন দর্শন করিতেছে, সে যেন জন্মের মতন বিকাইয়া যাইতেছে। কেহ বা আনন্দে নৃত্য করিতেছে। কেহ কেহ বা গোপীনাথজীউর বদনপানে চাহিয়া অঝোরে রুরিয়া কাঁদিতেছে। যথাসময়ে গোপীনাথের ভোগের যোগাড় হইলে ভোগ-আরতি কীৰ্ত্তনান্তে শয়ন দেওয়া হইল; ইহারাও মহাপ্রসাদ পাইয়া কিঞ্চিৎ বিশ্রাম করিতে লাগিলেন।

এদিকে বিহারী বাবুর দল আসিয়া পৌঁছিলে গান আরম্ভ হইল। বিহারীর ছেলেটি অতি অপূর্ব গান ও নৃত্য করে। বাবাজী মহাশয় প্রেমে বিভোর হইয়া গান শুনিতে লাগিলেন। সঙ্কীৰ্ত্তনের ভাবের সঙ্গে সঙ্গে নৃত্যকারী বালকটি এমনই অপূর্ব অভিনয় করিতেছে যে দেখিয়া সকলেই বিস্ময়সাগরে নিমগ্ন হইয়া যাইতেছে। রাত্র আন্দাজ সাতটার সময় গান শেষ হইল। এ দিকে বৈষ্ণবমণ্ডলী আসিয়া উপস্থিত হইলে মহাপ্রসাদের পদ্ধতি আরম্ভ হইল। শ্রীশ্রীগোপীনাথজীউর এমনই অপূর্ব শোভা হইয়াছে যে, যে একবার দর্শন করিতেছে, সেই মুগ্ধ হইয়া যাইতেছে। সকলের মহাপ্রসাদ পাওয়া শেষ হইলে বাবাজী মহাশয়ের মনে কি ভাবের সঞ্চার হইল—নিজে কীৰ্ত্তন আরম্ভ করিলেন;—

ব্রজ-অভিসারিণীর, ভাবে বিভাবিত,

রসময় গৌর কিশোর ।

স্বরূপের করে ধরি, কহে গুন সহচরি,

কাঁহা মোর রসিকশেখর ॥

না হেরি সে চাঁদমুখ, বিদরিয়া যায় বুক,
 ক্ষণে যুগ সম মোর লাগে ।

চুড়ার ময়ূরপুচ্ছ, মল্লিকা মানতি গুচ্ছ,
সদাই হিয়ার মাঝে জাগে ।

(সই) কি ক্ষণে হেরিনু রূপখানি।

মদন মোহন ঠাম, জিনি কত কোটা কাম,
তাঁহে আধ বন্ধিম চাহনি ॥

গলে বনমালা দোলে, রমণীর মন ভুলে,
কট্রিতে কিক্বিণী ভাল সাছে ।

কপালে চন্দন চাঁদ, ভুবন মোহন ফাঁদ,
চরণে নপুর ঘন বাজে ॥

পীতবাস করে শোভা, বিজুরী জিনিয়া আভা,
নটবর নাগর রাজ ।

রজনী অধিক ভেল, গুরুজন ঘুমাওল,
চল সবে না কর বেয়াজ ॥

বাম অঙ্গুলি বাম নাসিকাতে দিল !

শ୍ରୀହରି ମଞ୍ଜୁରି ବାମ ପଦ ବାଡ଼ାହିଲ ॥

স্বরূপ রামানন্দ দৌহে চলে দুই পাশে ।

চলিতে চলিতে পঁহু' কহয়ে তরাসে ॥

অবশ হইল গা চলিতে না পারি :

କତ ଦୂରେ ବୁନ୍ଦାବନ କହ ମହର୍ଚ୍ଚରି ॥

স্বরূপ কহয়ে আরি বহু দূর নয় ।

শ্রাম-অঙ্গ সৌরভ গন্ধ নাসিকাতে বয় ॥

শুনিয়া আনন্দে পহু বিভোর হইয়া ।

প্রবেশিল বৃন্দাবনে জয় জয় দিয়া ॥

বৃন্দাবনে প্রবেশিয়া চারু পানে চায় ।

নিকুঞ্জ মাঝারে শ্রাম দেখিবারে পায় ॥

গোপীনাথের বামে দাঁড়াইল গৌরহরি ।

নবীন জলদে জহু থির বিজুরী ॥

শ্রাম বামে কিবা শোভা রসের মঞ্জরী ।

সখীগণে জয় দেয় হুঁহু রূপ হেরি ॥

ইত্যাদি নানারূপ পদ গান করিয়া নিজেও আনন্দে নৃত্য করিতে লাগিলেন, উপস্থিত জনগণকেও আনন্দ-সাগরে নিমগ্ন করিলেন । রাত্রি অধিক হইয়াছে দেখিয়া অনিচ্ছাসত্ত্বেও সংকীৰ্ত্তন সমাপ্তি করার পর পূজারী ঠাকুরের শয়ন দিবার জন্ত উদ্যোগ করিতেছেন, এমন সময় বাবাজী মহাশয়ের সঙ্গী শীতলদাস ও ব্রজেন্দ্রদাস এই দুই জনে একটু আড়ালে থাকিয়া মৃদুস্বরে গাহিতে লাগিল,—

তনু তনু মিলল রসের আবেশে ।

প্রিয় সহচরীগণ রহু চারিপাশে ॥

কি দিব উপমা রূপের কি দিব উপমা ।

কাহু মরকত মণি রাই কাঁচা সোনা ॥

অঙ্গে অঙ্গ হেলাহেলি বয়ানে বয়ান ।

চাঁদ চকোর পারা নয়ানে নয়ান ॥

নব জলধর কিয়ে সৌদামিনী কোলে ।

রসের ভ্রমরা কিয়ে কনক কমলে ॥

আধশিরে মোহন চূড়া আধশিরে বেণী ।

শিখিকোরে দোলে জহু কালভুজঙ্গিনী ॥

পদটি শেষ হইতে না হইতেই বাবাজী মহাশয় একটা হুঙ্কারধ্বনি করতঃ ভাবে অচৈতন্ত হইয়া পড়িলেন । বিশেষ অল্পধাবন না করিলে খাস আছে বলিয়া বুঝা যাইতেছে না । যেন একটা কাষ্ঠপুত্তলিকার ছায় ভূমিতলে পড়িয়া আছেন । তখন নবদ্বীপদাদা প্রভৃতি চারিজনে পাশাপাশি উপবেশনপূর্বক আস্তে আস্তে ইহার দেহখানি কোলের উপর শোয়াইয়া রাখিলেন এবং শীতলদাদাকে পুনর্ব্বার ঐ গানটা গাহিতে বলিলেন । বালক শীতলদাস বাবাজী মহাশয়ের ঐরূপ অবস্থা দর্শনে অতিশয় ভীত হইয়া পড়িল ; সুতরাং আর গান করিতে সম্মত হইতেছে না দেখিয়া নবদ্বীপদাদা বাবাজী মহাশয়ের এই অবস্থা যে অতি আনন্দপ্রদ এই কথা উহাকে বুঝাইয়া দেওয়ার পর বালক আবার গান করিতে লাগিল । ক্ষণকাল পরে ইনি অধৈর্য্যভাবে ঠিক বালকের ছায় উচ্চৈঃস্বরে রোদন করিতে করিতে গড়াগড়ি দিতে লাগিলেন । গোপীনাথের বারান্দার পাথরগুলি অসমান । স্থানে স্থানে এমন অবস্থা যে কোন যায়গায় লাগিলে রক্তপাত না হইয়া যায় না । কোশলী সঙ্গীগণ কোশল করিয়াও বাবাজী মহাশয়কে স্থির করিতে পারিতেছে না । ইহার সর্ব্বাঙ্গ ক্ষতবিক্ষত হইয়া যাইতেছে । এমন কি ইহাকে রক্ষা করিতে গিয়া উহাদেরও ঐরূপ দশা হইতেছে । এদিকে রাত্রি অধিক হওয়ার গোপীনাথ জীউর শয়নের জন্ত পূজারীগণ ব্যস্ত : কাজেই নবদ্বীপদাদার পরামর্শে সকলে একত্রিত হইয়া বাবাজী মহাশয়কে ধরাধরি করতঃ বাহিরে একটা বটবৃক্ষতলে লইয়া শয়ন করাইলেন । ১৭/ইনি সে স্থানে কিছুক্ষণ স্তম্ভিতভাবে থাকিয়া আবিষ্টভাবে শ্রীমন্নিত্যানন্দ প্রভুর প্রতি নিজের জীবনের কতকগুলি ইতিবৃত্ত অর্থাৎ “আমি ঘরে একভাবে ছিলাম, তুমি নানারূপ চক্রান্ত করিয়া আমাকে ঘর ছাড়াইলে, আবার বহু দেশদেশান্তরে ভ্রমণ করাইতেছ । তোমার রূপগুণে মুগ্ধ করাইয়া আমার পাগল করিলে ;

কিন্তু এখন ধরা দিতেছ না। মনে নাই একদিন স্বপ্নে কত কি উপদেশ দিয়া আমাকে নীলাচলে আসিতে বলিলে? যখন আমি সাক্ষীগোপাল আসিলাম তখন আমার কর্ণে মন্ত্রপ্রদান করিলে। আবার যখন যে স্থানে থাকিতে বা যাইতে হইবে, সে সমস্তই সর্বদার তরে আদেশ করিতেছ; কিন্তু একবারও স্বাক্ষাৎ দর্শন দিতেছনা কেন?” ইত্যাদি কত যে আক্ষেপোক্তি করিতে লাগিলেন, কে তাহার ইয়ত্তা করিবে?

হঠাৎ বাবাজী মহাশয়ের ভাবান্তর উপস্থিত হইল। তখন আবিষ্ট ভাবে নূতন ধরণে শ্রীগোরাঙ্গদেবের অভিসার কীর্তন ধরিলেন। আনন্দের অবধি নাই। সকলেই আনন্দে আত্মহারাভাবে ইহার সঙ্গে সঙ্গে কীর্তন করিতে লাগিলেন। এইরূপে রাত্র প্রায় তৃতীয় প্রহর অতীত হইতে চলিল। ইনি কিঞ্চিৎ প্রকৃতিস্থ হইয়া কীর্তন সমাপ্তি করতঃ নাম করিতে করিতে মঠে প্রত্যাবর্তন করিলেন। এই ‘গোরা-অভিসার’ শ্রীযুক্ত রাধাকৃষ্ণ বসু নামক উড়িষ্যাবাসী একনিষ্ঠ জনৈক বাঙ্গালী যুবকের প্রতি বিশেষ রূপাশক্তি সঞ্চার পূর্বক যাহা স্মৃতি করাইয়াছিলেন, তাহা এই স্থানে উদ্ধৃত করা হইল :—

নীলাচলে গোরারায় সঙ্গেতে নিতাই ।

স্বরূপাদি রামরায় শ্রীবাস রামাই ॥

মুরারি মুকুন্দ নরহরি গদাধর ।

বাসুদেব বক্রেস্বর আদি সহচর ॥

সংকীর্তনাবেশে রাত্রিদিন নাহি জানে ;

কি ভাবে উঠয়ে কভু না যায় কখনে ॥

যখন থাকয়ে প্রভু কানীমিশ্রাবাসে ।

নিরন্তর মগ্ন রহে রাধাভাবাবেশে ॥

স্বরূপ রামানন্দ দৌহে দেখি সখীবোধে ।

ଲଳିତା ବିଶାଖା ବଳି ସଦାହି ସନ୍ତୋଷେ ॥

কাউটার ভয়ে যেন অন্তরে তরাস ।

কদাপি নাহিক শুনি মুখে উচ্চভাষ ॥

শ্রামের বিচ্ছেদ সদা হিয়ামাবে জাগে ।

শ্রামଣ୍ଡଳ ଆଳାପନ সদା ଭାବ ଲାଗେ ॥

হেন ভাবে সদা প্রভুর বিবশ হৃদয় ।

শারদীয় ঋতু আসি হইল উদয় ॥

শারদীয় শুভ নিশায় চন্দ্রিকা উজ্জ্বল।

প্রবাহিত স্রুভিত বায়ু মুশীতল ॥

নেহারি দ্বিগুণ উঠে ভাবের তরঙ্গ ।

অবশ হইল মনপ্রাণ সর্ব অঙ্গ ॥

দেখি সহচরগণ উৎকণ্ঠিত মন ।

প্রভুর রক্ষণে সদা করে সুযতন ॥

(একদিন) অপরাহ্নে গোরা শশী, কানীমিশ্রগৃহে বসি,

নথি ক্ষতি করয়ে লিখন ।

বাম করে গণ্ড রাখি, অধোমুখে মনোহুখী,

অকোরে ঝরয়ে ছনয়ন ॥

মলিন দেখিয়া মুখ, বিদগ্ধিয়া যায় বুক,

কিসের লাগিয়া প্রভু কান্দে ।

দেখিয়া স্বরূপ আমি, আথে ব্যথে কাছে বসি,

হৃদয়ে ধৈর্য নাহি বাধে ॥

বজ্রাঙ্কে নেত্রবারি, মুছাইয়া ধীরি ধীরি,

कान्न कर कर्त्तिना! शत्रुणः ।

মানি নন্দসহচরী, দ্বিগুণ নয়নবারি,
 উথলিল না যায় বারণ ॥
 স্বরূপের গলা ধরি, কাঁদে প্রভু গৌরহরি,
 ফুকরি ফুকরি মনোহুখে ।
 বাপ্পে কণ্ঠ হয় রুদ্ধ, বাক্য না নিঃসরে শুদ্ধ,
 নীরবে থাকয়ে অধোমুখে ॥

মনের বেদনা, কারে আমি কব, শুনলো ললিতা সেই ।
 জ্বামের বিরহে, মনপ্রাণ দহে, কিসে তার দেখা পাই ॥
 পূর্ব পীরিতি, তুমি জান সব, মম প্রাণবধু কালা ।
 কেমনে তাঁহারে, বারেক দেখিয়া, জুড়াই হিয়ার জ্বালা ॥
 নব জলধর, রসে চর চর, বরণ চিকণ কালা ।
 অঙ্গের ভূষণ, অমূল্য রতন, মণি মাণিকের মালা ॥
 নয়ন সূচাক, সূভঙ্গিম ভুরু, তেরছ চাহনি তায় ।
 অপাঙ্গ নেহারি, কুলবতী নারী, তেজে কুললাজ ভয় ॥
 হরঙ্গ অধরে, সূভঙ্গ মুরলী, বরষে ললিত রব ।
 কামিনী কুরঙ্গ, শুনি অবশঙ্গ, ধায় সেই দিকে সব ॥
 কৃষ্ণ কেশদাম, অতি অনুপাম, তাহে বাঁধিয়াছে চূড়া ।
 মল্লিকা মালতী, কুল নানাজাতি, চতুর্দিকে আছে বেড়া ॥
 তথি পড়ে উচ্চ, চারু শিখিপুচ্ছ, ঈষত বামেতে হেলা ।
 নেহারি কামিনী, আকুল পরাণি, অন্তরে অনঙ্গ জ্বালা ॥
 উন্নত নাসায়, গোরোচনা শোভে, ললাটে চন্দন বিন্দু ।
 সুনীল গগন, মাঝে শোভে জহু, অকলঙ্ক পূর্ণ ইন্দু ॥

পরিসর উরে, কিবা শোভা করে, চারু কুসুমের দাম ।
 সেরূপ নেহারি, আপনা খিঙ্কারি, মূরছিত হয় কাম ॥
 রাতা উতপল, জিনি করতল, ভুজ করিকর জিনি ।
 চম্পকের কলি, জিনিয়া অঙ্গুলি, নখে কোটি শশী মানি ॥
 কত না যতনে, রতন বলয়, পরিধান ভুজবাজে ।
 অঙ্গুলে অঙ্গুরি, শোভে সারি সারি, অতি সুললিত সাছে ॥ ✓
 পরিহিত নব, সুপাত বসন, পাত উত্তরীয় গলে ।
 নীল জীমূতে, খীর বিজুরি, শোভিছে গগন তলে ॥
 রক্ত কোকনদ, জিনি পদযুগ, রতন নুপুর সাছে ।
 চঞ্চল চরণে, হেলিতে তুলিতে, মধুর মধুর বাজে ॥
 জগমোহনিয়া, ত্রিভঙ্গিম ঠাম, কদম্বতলায় কাহ্ন ।
 রাধে রাধে রাধে, কিবা মন সাধে, ডাকিছে মোহন বেণু ॥
 সে রূপ মাধুরি, আহা মরি মরি, জাগিছে হিয়ার মাঝে ।
 ওই গুন সখি, মোহন মুরলী, গহন বিপিনে বাজে ॥
 আমি কুলবতী, নবীনা যুবতী, কাহ্নর পীরিতি তায় ।
 হিয়ার মাঝারে, জাগে নিরন্তরে, কহ করি কি উপায় ॥
 হাস পরিহাস, ললিত বিলাস, তেরছ চাহনি সই ।
 সঙরি সঙরি, ধৈরজ্য পাসরি, সদাই অধীরা হই ॥
 গুন গুন ওই, ও গো প্রাণসই, শ্রামের বাঁশরীরব ।

আবার, গৃহেতে এবার, না থাকিব একলব ॥

(আমি : চলিলু এখনি, যথা নীলমণি, বিপিনে বাঁশরী বায় ।

বিলম্ব না সয়, কি হ'তে কি কি হয়, যাবি তোরা যদি আয় ॥

বলিতে বলিতে, প্রভু শচীসুতে, রাখাভাবে হই ভোর ।

পাগলিনী প্রায়, ক্রন্তবেগে ধায়, যথা শ্রাম চিত্তচোর ॥

আথে ব্যথে উঠি, তখনে স্বরূপ, আঙ্গিনা মাঝারে গিয়া ।
 ডবাহু পসারি, নেত্রে বহে বারি, রহে পথ আগুলিয়া ॥
 সম্মুখে তাঁহারে দেখি গোরারায়, বলিছে বিনয় বাণী ।
 কেন গো ললিতে, মম প্রাণধিকে, নিষেধহ মো' । ম ॥

(আমার) মনের বেদনা, তুমি সব জান, এখনি ভুলিলে সব ।
 আকুল পরাণি, শুনিহু যখনি, শ্রামের বাশরীরব ॥
 তোমারে সতত, মম মনোমত, জানিতাম নিরন্তর ।
 মম কৰ্ম্মফেরে, নিঠুরা হইলে, নহে কেন ভাবান্তর ॥
 আমার পরাণ, করে আন চান, বিনে শ্রাম নীলমণি ।
 তাঁরে না দেখিয়া, পরাণ সংশয়, বাতিরায় হেন মানি ॥
 এই বাক্য ধর, মম হিত কর, তোমা ঠাঁঞি ভিক্ষা চাই ।
 পথ ছাড়ি দেহ, নাহি নিষেধহ, শ্রামের সমীপে ঘাই ॥
 যদি হিত চাহ, মোরে না বারহ, আর না-বিলম্ব সয় ।
 নতুবা অচিরে, পরাণ আমারি, রহে কিবা নাহি রয় ॥

স্বরূপের হাতে ধরি প্রভু গোরা রায় ।
 কাকুতি মিনতি করি সকাতরে চায় ॥
 কভু বা বিনয় করি বলে মুহু বাণী ।
 কভু বা সাদরে বলে প্রিয়সখী মানি ॥
 কভু ভয় কভু হুঃখ কভু করে ক্রোধ ।
 স্তব্ধ হই থাকে স্বরূপ না আইসে প্রবোধ
 ক্রণেক চিস্তিয়া মনে স্বরূপ বলয় ।
 কেমনে ঘাইবা ধনি নিকুঞ্জ নিলয় ॥

রাজার নন্দিনী তুমি কুলের কামিনী ;
 দিবসে কেমনে বনে যাবে একাকিনী ॥
 তাহাতে ব্রজের লোক কি বলিবে শুনি ।
 পথিমধ্যে আলুথালু যেন পাগলিনী ॥
 বাতুলীর প্রায় দেখি সবে উপহাসি ।
 কলঙ্ক রটাবে নামে ভাল নাহি বাসি ॥
 নবনীত সম তব তনু স্নকোমল ।
 প্রথর আতপতাপে হইবে বিকল ॥
 কমলের দল জিনি কোমল চরণে ।
 কুশাক্ষুর বিদ্ধ হবে ব্রজের বিপিনে ॥
 শুনি স্বরূপের বাণী বলে গোরারায় ।
 কে না জানে ব্রজে শ্রামকলঙ্কিনী রাই ॥
 যেদিন শ্রামের রূপে মজিয়াছে চিত ।
 তিলাঞ্জলি কুলে শীলে দিহু স্ননিশ্চিত ॥
 কি মোর কুলের লাজে কিবা লোকভয় ।
 এখনি ঘাইব চলি যথা শ্রামরায় ॥
 কি মোর শরীরে কাজ এ শূণ্য জীবনে ।
 কেমনে দেখিব আমি মুরলী বদনে ॥
 বৃথা নিবারণ মোরে না কর ললিতে ।
 বুঝিতে নারহ কিবা দুখ মোর চিতে ॥
 পায় ধরি বলি সই ছাড় মোর পথ ।
 বিলম্ব হইলে জান ঘটিব বিপদ ॥



মনেতে চিন্তিয়া, যুক্তি করিয়া, স্বরূপ বলিছে বাণী ।
 আছে এত বেলা, না হও উতলা, বলি শুন-কমলিনী ॥
 জটিল মুখরা, কুটিল প্রথরা, এখনি লাগাবে ঘন্দ ।
 কত না গঞ্জনা, সহিবে যাতনা, কত না বলিবে মন্দ ॥
 শুনিতাই মাত্র, প্রভু গোরারায়, জটিল কুটিল বোল ।
 চুপে চুপে গিয়া, গৃহে প্রবেশিয়া, নেত্রে ঘন বহে লোর ॥
 বিধিরে ধিক্কারি, প্রভু গৌরহরি, বিলাপয়ে মনে মনে ।
 বিধি নিরবোধ, নাহি বোধাবোধ, ভাবাভাব নাহি জানে ।
 শ্রাম রূপরাশি, হেরি দিবানিশি, মনে ছিল বড় সাধ ।
 মোরে নারীকূলে, জনম করায়, তাহে পড়িয়াছে বাধ ॥
 তাহে কুলবতী, নবীনা যুবতী, শান্তডী ননদী জালা ।
 কত ছলা করি, দিবস শর্বরী, হেরিতে চিকন কালা ॥
 এবারে মরিয়া, জনম লইব, ধরিব পুরুষ তনু ।
 যখনি ইচ্ছিব, তখনি দেখিব, যাইয়া নন্দের কান্থ ॥
 কাল ভুজঙ্গিনী, সম ননদিনী, শান্তডী ব্যাত্রীর পারা ।
 কতই বুঝিব, অন্তরে অন্তরে, হেরিতে ডকুল চোরা ॥
 গুমরিয়া কাঁদি, মুণ্ডি নিরবধি, ফুকারি কাঁদিতে নারি ।
 তুষানল যেন, মরম বেদনা, আর না সহিতে পারি ॥
 বলিতে বলিতে, হয় উছলিত, গোরার নয়ন লোর ।
 অঝোরে ঝরয়, নিবারণ নয়, রাধাভাবে হয় ভোর ॥

ভাবের আবেগ প্রভুর সহনে না যায় ।
 দণ্ডে দণ্ডে উঠিয়া আকাশপানে চায় ॥
 মুহূর্ত্তেক শত যুগ সম করি মানি ।
 কতক্ষণে অন্তমিত হয় দিনমণি ॥
 ভিতরে বাহিরে কোথা সোয়াথ না পায় ।
 কভু অধোমুখে বসি করে হায় হায় ॥
 কভু পূর্বমত বেগে উঠি চলি যায় ।
 বহু প্রবোধিয়া স্বরূপ প্রভুরে রহায় ॥
 কভু উদ্ধৃষ্টি রহে ছই কর্ণ ডেরী ।
 ছদয় ভরিয়া শুনে শ্রামের বাঁশরী ॥
 তিলে তিলে শতগুণ বাড়ে ব্যাকুলতা ।
 দেখিয়া স্বরূপ বড় মনে পায় ব্যথা ॥
 হেন কালে অন্তাচলে গত দিবাকর ।
 শারদ প্রদোষ আবির্ভাব ধরাপর ॥
 সঙ্ক্যা-আগমনে সব পারিষদগণ ।
 ক্রমে ক্রমে প্রভুপাশে কৈলা আগমন ॥
 শ্রীপাদ নিতাই আর রায় রামানন্দ ।
 শ্রীবাসাদি করি যত ছিলা ভক্তবৃন্দ ॥
 আর যত ভক্তগণ বাহিরে থাকিলা ।
 গম্ভীরাতে নিত্যানন্দ রামরায় গেলা ॥
 প্রভুর দেখিয়া ভাব নিতাইর উল্লাস ।
 ধীরে ধীরে ছইজনে বৈসে প্রভু পাশ ॥
 দৌহারে দেখিয়া প্রভুর উৎকর্ষা বাড়য় ।
 অনঙ্গ মঞ্জরী বিশাখিকা ভাব হয় ॥

আগ্রহে পুঙ্খ "তুমি ছিলে সব কতি ।
 পরাণ রাখহ মোর করিয়া যুক্তি ॥
 শ্রামের বিচ্ছেদানলে দগ্ধ হয় তুমি ।
 স্বরায় মিলাহ মোরে নন্দমুখ কান্থ ॥"
 বলিতে বলিতে প্রভুর ভাব উথলিল ।
 ছুই গলা ধরি উচ্চে কাঁদিতে লাগিল ॥
 সখীকণ্ঠ ধরি কাঁদে আকুল অন্তরে ।
 কাঁহা মোর প্রাণসখা শ্রাম নটবরে ॥
 কাঁহা মোর কান্থ বলি হয় কণ্ঠরোধ ।
 সখীগণে মিলি দেয় প্রভুরে প্রবোধ ॥

কিছুক্ষণ পরে, গোরার অন্তরে, অভিনব ভাবোদয় ।
 শ্রাম অভিসারে, বাইবে বিচারি, আনন্দে মাতিয়া রয় ॥
 বরজ রমণী, রাই বিনোদিনী, সাজেতে সাজিতে আশা
 নিপুণা সখীরে, আদেশিছে ধীরে, মনে মনে মহোল্লাস ॥
 ক্রন্দন সম্বর, বলে গৌরহরি, সখীগণে সম্বোধিয়া ।
 শ্রাম অভিসারে, বাইব সম্বরে, দেহ মোরে সাজাইয়া ॥
 যতন করিয়ে, বেণী-বিনাইয়ে, ছলাইহ পৃষ্ঠদেশে ।
 মালতীর হারে, তাহে ধরে ধরে, সাজাইহ চৌপাশে ॥
 কুঙ্কুমের বিন্দু, কপালে রচহ, সিন্দুরের বিন্দু পাশে ।
 চন্দনে চর্চ্চিত, কর সর্ব-অঙ্গ, পরাইহ শুভ্রবাসে ॥
 কুঙ্কুম রচন, করি আভরণ, সাজাইহ বখান্ধানে ।

(আমি) শ্রাম নটবরে, নবীন নাগরে, মিলিব গহন বনে ॥
 স্তবাসিত বারি, স্তবর্ণের কারি, ভরি লহ মোর সাথে ।

ভাষুলাদি ষত, উপহার শত, লই চল অলঙ্কিতে ॥

এতক বলিয়া, চলিল-উঠিয়া, অভিসারিকার ভাবে ।

(‘যেন’) নিকুঞ্জ ভবনে, শ্রাম দরশনে, চলে রাই অমুরাগে- ॥

কমলিনী ভাবে গোরা চলে অভিসারে ।

অলঙ্কিতে সশক্তিতে-গমন মস্থরে ॥

কানীমিশ্র বাটা ছাড়ি সমুদ্রের পথে ।

অভিসারে যায় গোরা টোটাগোপীনাথে ॥

ভক্তগণ আপনারে-সহচরী মানি- ॥

রাইয়ে ঘিরিয়ে চলে যেন বরজ-রমণী ॥

নির্মল শারদ নিশি ফুল চন্দ্রোদয় ।

স্বশীতল মন্দ মন্দ বহিছে মলয় ॥

পুষ্পোদ্ভানে চতুর্দিকে-কুসুম বিকাশ ।

জ্যোৎস্নাময়ী ধরা যেন পরা শুভ্রবাস ॥

তপ্ত স্বর্ণবর্ণ তনু-লিপ্ত মলয়জে ।

লাজে পূর্ণচন্দ্র বুঝি তাজে ধরামাঝে ॥

অঙ্গের ছটায় দীপ্তি পায়-নিশাপতি ।

মস্থরে চলয়ে শ্রাম অমুরাগে মাতি ॥

দক্ষিণে নিতাই চলে বামেতে স্বরূপ ।

গোরা-অভিসার করে অতি অপক্লপ ॥

আগে আগে রামরায় বিশাখার ভাবে ॥

নিকুঞ্জের পথে পথে যায় অমুরাগে ॥

চতুর্দিকে ভক্তগণ মণ্ডলী করিয়া ।

শ্রামগুণ গাই চলে ধনিরে ঘেরিয়া ॥

সমুদ্রের পথে নাহি লোক গতাপতি ।
 চক্রে করে বালুররাশি শোভাপায় অতি ॥
 সমুদ্র নিরখি প্রভুর যমুনা স্মরণ ।
 ভীরে বালু দেখি হয় পুলিন ভরম ॥
 শ্রামগুণ গানে প্রভু আনন্দেতে মাতি ।
 কভু ধীরে ধীরে যায় কভু দ্রুতগতি ॥
 নিতাই স্বরূপ গলে তুলি ঢুই কর ।
 বিবশ হইয়ে চলে গোরা নটবর ॥
 রামরায়ে পুছে শুন বিশাখা সুন্দরি ।
 কতদূরে কুঞ্জবন कह ত্বরা করি ॥
 চলিতে না পারি আর অবশ সর্বাঙ্গ ।
 হেনকালে পায় গোরা শ্রাম-অঙ্গ গঙ্গ ॥
 ফিরিয়া পরাণি যেন পাইলা শরীরে ।
 চলিতে লাগিলা গোরা অতি ধীরে ধীরে ॥
 চলিতে চলিতে গোপীনাথের সম্মুখে ।
 উপনীত গোরাচাঁদ হন মনস্থখে ॥

ওই গোরারায়—

শ্রীরাধাভাবে, দাঁড়ায় গোপীনাথে চায় ।
 গিয়ে গোপীনাথ আগে, দেখে গোরা অমরাগে,
 ভাবাবেশে ওষ্ঠাধর ইষত কাঁপায় ।
 প্রণয়মানিতে ভোলা, অপাঙ্গে নেহারে কালা,
 নীরবে দাঁড়ায় থাকি কিছু না বলয় ॥
 কভু দৈন্তে করে স্তুতি, বলে তুমি প্রাণপতি,
 তোমা না দেখিলে মোর জীবন সংশয় ।

বিষাদেতে গোরা রায় কভু করে হার হার,
মুই অভাগিনী নারী কিসে তোমা পাই ॥
নয়নে বহিছে ধারা, বলে কান্না চিতচোরা,
(আমি) তব পদে ক্রীতদাসী রাখ রাঙ্গাপায় ।
আমি নারী পরবশ, তুমি মোর সরবশ,
হিয়া মাখে থুয়ে তোমা জীবন জুড়াই ॥
শ্রাম কলঙ্কের ডালি, মাখে করি বনমালাী,
যেন সদা হই শ্রাম-কলঙ্কিনী রাই ।
প্রেষ্ঠ মানি অনুরাগে, আলিঙ্গহ সব আগে,
কিংবা অদর্শনে মম বিদর হৃদয় ॥
কিবা যথা তথা কুরু, তুমি লম্পটের গুরু,
তবু প্রাণনাথ মম অন্ত কেহ নয় ।
গোপীনাথে গোঁরহরি, আত্মসমর্পণ করি,
রাধাভাবে অনিমিখে দাঁড়াইয়া রয় ॥

টোটাগোপীনাথের সেবার ব্যবস্থা।

একদিন বাবাজী মহাশয় বাঁজপিটা মঠে বসিয়া আছেন, এই সময় উকীল শ্রীযুক্ত বাবু হরিবল্লভ বসু মহাশয় আসিয়া উপস্থিত হইলেন। দেখামাত্র পরস্পর প্রণাম ও প্রীতিসম্ভাষণ পূর্বক উপবেশন করিলেন। হরিবল্লভবাবু যেন কি বলিবার ইচ্ছা করিতেছেন; কিন্তু নানারূপ ভগবৎ-কথার আলোচনা হইতে থাকায় অবকাশ পাইতেছেন না। কিছুক্ষণ পরে বাবাজী মহাশয়কে জিজ্ঞাসা করিলেন, “বাবা! এই যে

মঠের অতি সুন্দর সেবা, এই সেবা কিরূপে চলে ?

বাবাজী । বাবা ! ঋণ সেবা তিনিই চালান ।

হরি । সে ত সত্য, তবুও একটা উপলক্ষ আছে ত ?

বাবাজী । একমাত্র ভিক্ষাদ্বারাই সমস্তই চলে ।

হরি । যদি কোনদিন ভিক্ষা না মিলে অথচ বহুমূর্ত্তি বৈষ্ণব উপস্থিত হন, তবে কিরূপ ব্যবস্থা হয় ?

বাবাজী । ইচ্ছাময় প্রভু যখন যাহাকে যে স্থানে আনিবেন, পূর্ব হইতেই তাহার আহার ব্যবহারাদির ব্যবস্থা করিয়া থাকেন । ভাবিয়া দেখুন, যখন আমরা মাতৃগর্ভে ছিলাম, তখন কোন্ বুদ্ধি বা বিজ্ঞান কৌশলে আহারাদির সংগ্রহ হইয়াছিল ? আবার যখন ভূমিষ্ঠ হইয়াছিলাম, তখন কে মাতৃস্তনে দুগ্ধ সঞ্চার করিয়াছিল ? তাই শাস্ত্র বলিয়াছেন,—

ভোজনানুচ্ছাদনে চিন্তা যথা কুর্কস্তি বৈষ্ণবাঃ ।

যোহসৌ বিশ্বস্তরো দেবঃ সৎকিং ভক্তানুপেক্ষতে ॥

হরি । কথা সত্য বটে কিন্তু দৃঢ় বিশ্বাস হওয়া চাই । আপনার বেক্রপ দৃঢ় বিশ্বাস হইয়াছে, সকলের একরূপ হওয়া ত আর সহজ কথা নয় !

বাবাজী । বাবা ! তিনি অন্তর্ধ্যামী, বিশ্বাস হইলেই যে দিবেন বিশ্বাস না হইলে যে দিবেন না, একরূপ কোন কথা নাই । ভাগ্যমন্দ যে কেহই হউক না কেন তিনি সকলকেই আহার দিয়া থাকেন । তবে বিশ্বাসীর পক্ষে সুগম বা সুখকর অবিশ্বাসীর পক্ষে একটু কষ্টকর ।

হরি । আচ্ছা, ধনের সার্থকতা কি ?

বাবাজী । সন্ধ্যা করা, দুঃখীর দুঃখ মোচন করা, ক্ষুধার্ত্তকে অন্ন দান করা এবং ভজনশীল ব্যক্তির ভজনানুকূল্য করা প্রভৃতিই অর্থের সার্থকতা ।

হরি । বেশ কথা ! এই আশ্রমে এত যে বৈষ্ণবমূর্ত্তি ভজন করিতেছেন, কোনও অর্থশালী ব্যক্তি যদি ইহাদের কিঞ্চিৎ ভজনানুকূল্য

করেন অর্থাৎ যাহাতে ইহাদের আহাঙ্গাদির জন্য কোনওরূপ চিন্তা করিতে বা উৎসেগ পাইতে না হয়, এইরূপ মাসিক কিছু বন্দোবস্ত করিতে ইচ্ছা করেন, তাহাতে আপনার কোন আপত্তি আছে কি? মোট কথা—বাবা! প্রভুর রূপায় আমার যথেষ্ট অর্থ রহিয়াছে, আমার ইচ্ছা এই স্থানে কিছু মাসিক বন্দানী করিয়া এই নিষ্কিঞ্চন বৈষ্ণবদিগের জ্ঞানের কিছু সাহায্য করি।

বাবাজী। দেখুন বাবা! আপনাকে প্রভু অর্থ দিয়াছেন। আপনার মনে এইরূপ বাসনার উদয় হওয়া অতিশয় আনন্দের বিষয়, তবে একটা কথা—আপনি সুবিজ্ঞ লোক, যে কার্য করিতে হয় তাহার ভালমন্দ ফলাফল বিচার করিয়া কার্য করা উচিত। আপনি যে ভাবে এই নিষ্কিঞ্চন বৈষ্ণব-দিগের উপকার করিতে ইচ্ছা করিয়াছেন, ইহাতে উপকার না হইয়া অপকারই হইবার সম্ভাবনা। প্রথম কারণ—যে দিন হইতে আপনি মাসিক বন্দোবস্ত করিবেন সেই দিন হইতেই আপনি তাহাদের উপাস্ত দেবতা হইবেন। মাসান্তে ইহারা স্বীয় অতীষ্টদেবকে না ভাবিয়া আপনাকেই চিন্তা করিবে। একদিন বিলম্ব হইলে আপনার উপর কল্লনা আনিবে। দ্বিতীয়দিন মনে হইবে—বাবু কি রকম ভদ্র লোক, মাসকাবার হইয়া গেল, কৈ আজ পর্যন্ত টাকা দিলেন না? কিরূপভাবে ঠাকুবসেবা চলিবে? এইরূপভাবে যতই অভাব হইবে, ততই আপনার উপর বৈষ্ণবের কটাক্ষ পড়িবে। দ্বিতীয় কারণ—ইহাদের মনে সঙ্কোচতা জন্মিবে অর্থাৎ বাবু যে টাকা মাসিক দিয়া থাকেন, এই টাকার মধ্যে যাবতীয় খরচ চালাইতে হইবে, ইহাতে বৈষ্ণব-সেবা হউক চাই নাই হউক। তবেই দেখুন, আপনার অর্থসাহায্য দ্বারা ভজনের আনুকূল্য-হইল, না প্রাণিকূল্য হইল? আর এই আকাশস্থিত্তিতে ইচ্ছা করিয়া হউক অনিচ্ছায় হউক ভগবৎ-নির্ভরতা আসিবে। আয়ের

নির্দিষ্ট বা পরিমাণ থাকিলেই ব্যয়ের সঙ্কোচতা আসিবে ।

হরি । এ কথাত সত্য, তবে কিরূপভাবে অর্থ সাহায্য করিলে উভয়কূল রক্ষা পাইতে পারে ?

বাবাজী । যখন ইচ্ছা হইবে সেই সময় সাহায্য করা বরং ভাল । সাময়িক দানে কাহারই অনিষ্ট হইবার আশঙ্কা নাই ।

এ কথা না হয় জীবিতকাল পর্য্যন্ত সম্ভব হইতে পারে ; কিন্তু যাহাতে চিরদিন একটা কার্য চলিতে পারে সেরূপ কার্য কি হইতে পারে ?

বাবাজী । আচ্ছা, তাহা হইলে এখানে কিছু না করিয়া শ্রীমদ্বহাশ্রমের রূপাদত্ত শ্রীগদাধর পণ্ডিত গোস্বামীর টোটাগোপীনাথ জীউর সেবার কিছু বন্দোবস্ত করিয়া দিলে ভাল হয় ।

শুনিয়া হরিবল্লভবাবু ছুটিচিতে বলিলেন, “বাবা ! টোটাগোপীনাথের সেবার জন্য প্রতিদিন দুই টাকা করিয়া বন্দোবস্ত করা হউক ; কিন্তু এই মঠের অন্য আরও কিছু আশা রহিল । যদি রূপা করিয়া অন্য কোনও আদেশ করেন তবে বড়ই সুখী হইব ।” বাবাজী মহাশয় একটু উদাস ভাবে বলিলেন, “আচ্ছা, সময়ান্তরে নিতাই যাহা বলান তাহাই হইবে ;” শুনিয়া হরিবল্লভবাবু হর্ষ-বিষাদিতভাবে বাসায় গমন করিলেন । ইনিও নিজ নিত্যকৃত্য করিতে লাগিলেন । এই হইতেই হরিবল্লভবাবু টোটাগোপীনাথজীউর সেবার জন্য প্রত্যহ দুইটা করিয়া টাকা বন্ধানী করিয়া দিলেন ।

আনন্দ মিত্রের সহিত মিলন ।

বাবাজী মহাশয় এইরূপ পরমানন্দে দিনের পর দিন কাটাইতে লাগিলেন । কয়েকদিন হইল নবদ্বীপদাঙ্গা কটকে গিয়াছিলেন । হঠাৎ একদিন অপরাহ্ন সময় তিনি এবং জনৈক ভদ্রলোক পুরীধামে আসিয়া

বাবাজী মহাশয়ের নিকট উপস্থিত হইলেন ; ভদ্রলোকটী ইহাকে দণ্ডবৎ প্রণামান্তর বলিলেন, “আজ্ঞে আমি আপনার নিকট একটি প্রার্থনা জানানাইতে ইচ্ছা করি ।”

বাবাজী । স্বচ্ছন্দে বাব । প্রাণ খুলিয়া বল ।

ভদ্র । আজ্ঞে আপনাকে একবার কটকে লইয়া যাইবার জন্য উকিল শ্রীযুক্ত আনন্দচন্দ্র মিত্র মহাশয় আমাকে পাঠাইয়াছেন । একবার অনুগ্রহ করিয়া যাইতে হইবে ।

বাবাজী । আনন্দ মিত্র কে ? কটকে আমরা যখন গিয়াছিলাম, তখন কি তাঁহার সহিত দেখা হয় নাই ?

ভদ্র । আজ্ঞে তিনি কে, আমি আর কি পরিচয় দিব ? তবে শাস্ত্রে জগাই মাধাই বা রত্নাকর প্রভৃতির নাম যাহা শুনা যায় তাহাদের সহিত তুলনায় কোনও অংশে তিনি কম ছিলেন না, তবে এই নবদ্বীপদাদার রূপায় তাঁহার অভাবনীয় পরিবর্তন দর্শনে আমরা মুগ্ধ হইয়াছি ; তাই দাদার কাছে আপনার কথা শুনিয়া আপনাকে দর্শন করিবার জন্য ব্যাকুল হইয়াছেন ।

বাবাজী । কিরূপ পরিবর্তন হইল ? একবার আমূল বৃত্তান্ত বল দেখি ?

ভদ্র । সে এক মহাভারত, শুনিতে অনেক সময় লাগিবে ।

বাবাজী । কোনও চিন্তা নাই, তুমি নিঃসঙ্কোচে বথাবথ বৃত্তান্ত সকল আমূল বর্ণনা কর ।

ভদ্র । আনন্দমিত্র অনুমান ৩৫।৩৬ বর্ষ বয়স্ক সুন্দর গৌরবর্ণ যুবাশ্রয় । ইহাদের পূর্বনিবাস রথুনাথপুর । ওকালতী পাশ করিয়া কটকের কাঠগড়ালগ্নিতে বাড়ী করিয়াছেন । প্রায় সর্বদাই কটকে থাকেন । ইহারা জাজিতে কার্যস্থ । কটকের মধ্যে বিশেষ সম্ভ্রান্ত ও বড়লোক ।

ওকালতীতেও অতি অল্প সময়ের মধ্যে তিনি বিশেষ প্রতিপত্তি লাভ করিয়াছেন। এমন কি এক এক সময় বড় বড় উকীলগণের অবুদ্ধ বিবর সকল অতি সহজে উদ্ধার করিতে আনন্দবাবুর জায় আর কেহই নাই। আনন্দবাবু নামমাত্র হিন্দু; কিন্তু ধর্ম বা মতামত সম্বন্ধে হিন্দুর সহিত কোনও সম্বন্ধ আছে বলিয়া আমাদের ধারণা কম। আহা! সম্বন্ধে চরম পন্থী—কিছুতেই বিমুখ নহেন। জাতিভেদটা কুসংস্কার বলিয়া ধারণা। প্রতিমাপূজা নিকৃষ্ট ধর্ম। সনাতন আর্ধ্যধর্মে কোন সারবত্তা আছে বলিয়াই তাঁহার বিশ্বাস নাই। তবে তাঁহার গুণের মধ্যে হৃদয়টি কোমল; পরের দুঃখ দেখিলে সময়ে তাঁহার প্রাণ কাঁদিয়া উঠে। কিন্তু আবার সঙ্গপ্রভাবে সেই ভাবটাকে অনেক সময় হৃদয়ের চূর্ণলতা বলিয়া পরিত্যাগ করিবার জন্ত চেষ্টা করিয়া থাকেন। আনন্দবাবু ঘোর বিলাসী। নিজের মনোবৃত্তিঅনুযায়ী সুখসচ্ছন্দতা ও আহা!বিহারাদি দ্বারা দেহের পুষ্টিসাধন এবং মনের আনন্দকেই মনুষ্য-জীবনের প্রধান কর্তব্য স্থির করিয়াছিলেন।

একদিন বেলা অল্পমান দশটা। আনন্দবাবু কাছারীর পোষাক পরিতেছেন, এমন সময় মহাত্মা পাগলপারা আলুখালু মলিন বেশে করতাল বাজাইয়া সহাস্ত বদনে “ভজ নিতাই গৌর রাধে শ্রাম। জপ হরে কৃষ্ণ হরে রাম॥” এই নাম করিতে করিতে আনন্দবাবুর বাড়ীতে প্রবেশ করিলেন। আনন্দবাবুর ভৃত্যগণ তাড়াতাড়ি তাহাদের বাবুর কুচিবিগর্হিত ওরূপ কার্য করিতে ইহাকে নিষেধ করিল। কিন্তু ইহার সে কথাই ভ্রূক্ষেপ নাই। ইনি আনন্দিতচিত্তে নাম করিতেছেন। আনন্দবাবু বৈঠকখানা হইতে বাহিরে আসিয়া জিজ্ঞাসা করিলেন, “এখানে কি চা’স?” ইহার খেয়াল নাই—আপন মনেই নাম করিতেছেন। আনন্দ বাবু একটু বিরক্ত হইয়া কর্কশভাবে বলিলেন, “এই পাগলা! কথা

তুহিস্ না, এখানে কি চাস্ ?” এইবার যেন ইহার কাণে কথাটা প্রবেশ করিল—একটু মুহু হাসিয়া বলিলেন, “কিছুই না ।”

আনন্দ । তবে কি করতে আসিয়াছিস্ ।

ইনি । জানি না ।

আনন্দবাবু তখন চারিটি পয়সা দিয়া ইহাকে বিদায় করিবার জন্য একজন ভৃত্যকে আদেশ করতঃ বৈঠকখানায় চলিয়া গেলেন । ভৃত্য চারিটি পয়সা লইয়া ইহাকে দিতে গেলে ইনি তাহা না নিয়া পূর্ববৎ নামই করিতে লাগিলেন । আনন্দবাবু তখন বৈঠকখানা হইতে চীৎকার করিয়া বলিলেন, “হারে ! পয়সা দিয়া উহাকে বিদায় করিয়া দেনা রে ?” ভৃত্য অতি দ্রুতভাবে বাবুর নিকট গমন করিয়া বলিল, “বাবু ! ও যে পয়সা নেয় না, যেতেও চায় না ।” বাবু তখন ক্রুদ্ধ হইয়া বলিলেন, “বেটা বদমায়েস ! এখানে বদমায়েসি পেয়েছো, দাঁড়া আমি বাচ্ছি ।” ভৃত্য তাড়াতাড়ি আসিয়া ইহাকে বলিল, “হারে ! বাবু আসছে, পালা, না হয় মার খাবি ।” ইনি সে কথায় একটু হাসিয়া আর একটু উচ্চ কণ্ঠে নাম করিতে লাগিলেন । আনন্দবাবু তখন কাছারি যাইবার জন্য বাহিরে আসিয়া ইহাকে বলিলেন, “হারে তুই কি চাস্ ?” ইনি কোনও কথা না বলিয়া কেবল প্রেমময় দৃষ্টিতে আনন্দবাবুর পানে চাহিয়া রহিলেন । আনন্দবাবু তখন ইনি যে পাগল ইহাই দৃঢ় ধারণা করিয়া একটু মুহুভাবে বলিলেন, “এই পয়সা নিয়ে চলে যা, কেন মিছামিছি আলাতন করুছিস্ ?” ইনি তাহাতেও যখন কোনও কথা কহিলেন না, তখন আনন্দবাবু বিশেষ বিরক্ত হইয়া ভৃত্যকে বলিলেন, “হারে চাবুক নিয়ে আর ত ! বেটার বদমায়েসী ভেঙ্গে দেই ।” বলিবামাত্র ভৃত্য কোচম্যানের নিকট হইতে চাবুক আনিয়া হাজির করিল ; কিন্তু ইনি তাহাতে কিছুমাত্র ভীত বা সঙ্কুচিত না হইয়া যেন আরও আনন্দে

মাতিয়া উঠিলেন । ইঁহার চক্ষু হইতে যেন কি এক আনন্দময় অপূর্ণ
জ্যোতিঃ বাহির হইতে লাগিল । বদন-মণ্ডল পুলকে উদ্ভাসিত হইয়া
ওষ্ঠাধর প্রীতিপূর্ণ মধুর হাস্তে নৃত্য করিতে লাগিল । আনন্দবাবু কিন্তু
বড়ই গৌলে পড়িয়া গেলেন । তিনি ইঁহাকে সেরূপ নগণ্য ভিক্ষুক মনে
করিয়াছিলেন, তাঁহার পরিমার্জিত বিচারবুদ্ধি যেন সেরূপ বলিতে চাহে
না । তাঁহার বিবেক যেন ইঁহাকে একটু অগ্র দৃষ্টিতে বলিল । তাই
তিনি একটু কোমল ভাষায় বলিলেন,—“তুমি কি চাও বল দেখি ?”
ইনি হাসিতে হাসিতে বলিলেন,—“আমায় কিছু খেতে দাও, আমি খাব ।”

আনন্দ । কি খাবে ?

ইনি । মুড়ি খাব ।

আনন্দবাবু চারিটা পয়সা বাহির করিয়া বলিলেন, “এই পয়সা নিয়ে
খাও, খাওগে ।”

ইনি । পয়সা কি হবে, পয়সা কি খাওয়া যায় ?

আনন্দবাবু বিস্মিতভাবে একটা সিকি ইঁহার সম্মুখে ফেলিয়া দিয়া
বলিলেন,—“এই নেও, মুড়ি কিনে খাওগে ।”

ইনি সেই রজত খণ্ডে ক্রক্ষেপ না করিয়া হাসিতে হাসিতে চলিয়া
গেলেন । আনন্দবাবু অনিমেঘনয়নে তাঁহার দিকে তাকাইয়া রহিলেন ।
কিছুক্ষণ পরে ইনিও অদৃশ হইলেন, আনন্দবাবুও কাছারী চলিয়া গেলেন ।
কাছারী পঁহুহান পর্য্যন্ত আনন্দবাবুর হৃদয়ে ইঁহারই হাবভাব ব্যবহারাদির
বিষয় লইয়া আন্দোলন চলিতে লাগিল ক্রমে কাছারিতে পঁহুছিয়া নানারূপ
বিষয়ব্যাপারে ভুলিয়া গেলেন ।

এই সপ্তনার দুইদিন পরে বেলা আটটার সময় আবার পূর্ববৎ—“ভজ
নিঁতাই গৌর রাধে শ্রমে । অপ হরে কৃষ্ণ হরে রাম ॥” এই নাম
করিতে করিতে ইনি গিয়া আনন্দবাবুর বাড়ীতে উপস্থিত হইলেন ।

আনন্দবাবু বৈঠকখানা ঘরে বসিয়া মকর্দমার কাগজপত্র দেখিতেছেন, ইহার কণ্ঠ শুনিবামাত্র যেন, কেমন হইয়া গেলেন। একজন ভৃত্যকে বলিলেন,—“ঐ পাগলকে ডাকিয়া আন ত ?” ভৃত্য হুকুমমত পাগলকে ডাকিয়া আনিল। সেদিন ইহার বেশ কিছু অগ্র রকম। নাসিকায় উর্দ্ধপুণ্ড্র-হরিমন্দির তিলক, চাদরখানা গায়ে বাঁধা। আনন্দবাবু দেখিবা-মাত্রই মুহূ হাসিয়া জিজ্ঞাসা করিলেন, “কি হে ! আজ আবার কি মনে করিয়া ? আজ যে আবার অগ্ররূপ ভব্য সভ্য বেশ দেখছি। গলায় মালা কপালে তিলক, দেখে ত বৈরাগী বলিয়া বোধ হয় ! তা কেন এলে বল দেখি ?”

ইনি নিরুত্তর ; কেবল মুহূ মুহূ হাসি ও সরলতাপূর্ণ দৃষ্টিতে আনন্দবাবুর হৃদয় দ্রবীভূত করিতে লাগিলেন। আনন্দবাবু কোনও উত্তর না পাইয়া বলিলেন,—“কি হে ! কিছু জবাব নাই যে ? এস এগিয়ে এস ?”

ইনি মস্তমুগ্ধের স্থায় আনন্দবাবুর টেবিলের নিকট গিয়া দাঁড়াইলেন। আনন্দবাবু একটু মুহূ হাসিয়া বলিলেন,—“ঐ চোঁকীতে বোস।” ইনি বলিলেন। আনন্দবাবু আবার জিজ্ঞাসা করিলেন, “কি হে ব্যাপারটা কি বল দেখি ?” ইনি নিরুত্তর।

আনন্দ। তোমার নাম কি ?

ইনি। (মুহূ হাসিয়া) অনেকে নবদ্বীপ দাস বলিয়া ডাকে।

আনন্দ। কি মনে ক’রে এখানে এসেছ ?

নবদ্বীপ। আমার কিছু খেতে দাও।

আনন্দ। কি খাবে ?

নবদ্বীপ। মুড়ি খাব।

আনন্দ। আচ্ছা, তা না হয় দিলাম। তুমি এখানে কোথায় থাক ?

নবদীপ । আমি কাকাল, আমার আবার থাকার নির্দিষ্টতা কি ?
যে দিন যে স্থানে আশ্রয় পাই সেই দিন সেই স্থানে থাকি ।

আনন্দ । খাও নাও কোথায় ?

নবদীপ । যেদিন যে স্থানে জোটে ।

আনন্দবাবু একটা টাকা ইঁহার নিকট ফেলিয়া দিয়া বলিলেন,—“এই
নেও, মুড়ি খেতে চাচ্ছিলে খাওগে ।”

নবদীপ । তা ত খাব, তুমি ত দিতে পারলে না । আমি চাচ্ছি
মুড়ি তুমি দিচ্ছ টাকা । সংসারটা এমনি বটে, এক চাই আর পাই ।

বলিয়া হাসিতে হাসিতে চোঁকী হইতে উঠিলেন । আনন্দবাবু একটু
ব্যস্ততার সহিত বলিলেন—“আরে শোন শোন বোসো, আমিই না হয়
মুড়ি আনিয়ে দিচ্ছি ।”

নবদীপ । আচ্ছা আর একদিন হবে ।

বলিয়া পূৰ্ণবৎ নাম করিতে করিতে দ্রুতপদে চলিয়া গেলেন ।
টাকাটা বেখানকার সেইখানেই পড়িয়া রহিল । আনন্দবাবু অতি
বিস্মিতচিত্তে ভাবিতে লাগিলেন,—“এ লোকটা কিরূপ ! অবস্থা ভিক্ষুকের
মতন ; কিন্তু টাকা পরসা নেয় না । প্রথমে ভাবিয়াছিলাম পাগল,
এখন কথাবার্তায় কোনরূপ মস্তিষ্কের বিকার ত লক্ষ্য হইতেছে না ।
বৈষ্ণবের বেশ ; কিন্তু বৈষ্ণবগণ যেমন অশিক্ষিত অসভ্য থাকে এত সেরূপ
নহে ॥ আমার কাছেই বা আসে কেন ? আমি ত কোন ধর্মের ধার
ধারি না ; তবে আমার কাছে কি প্রত্যাশায় আসে ? জিজ্ঞাসা করিলে
‘কেবল বলে, কিছু খেতে নাও ।’ সেও এক মুড়ি হাড়ি আর কিছু নয় !
এই দুই দিন এলো ঠিক একই কথা । সেও খেলে না, আমিও
সিলাম না ,

এইরূপ নানা কথা আন্দোলন করিতেছেন, এই সময় টং টং করিয়া

দড়িতে নয়টা বাজিল । কাজেই অল্প ব্যাপারে মন দিলেন । ক্রমে তিন চার দিন যায়, একদিন অপরাহ্ন আনন্দের ছয়টার সময় আনন্দবাবু কাছারী হইতে আসিয়া একখানি ইজিচেয়ারে বসিয়া সট্‌কার তামাক খাইতেছেন, অল্পবয়স্ক একটি বালিকা নিকটে খেলা করিতেছে, এই সময়ে নবদ্বীপদাস পূর্ববৎ করতাল বাজাইয়া “ভজ নিতাই গোর রাধে শ্রাম । জপ হরে কৃষ্ণ হরে রাম ॥” এই নাম করিতে করিতে আসিয়া উপস্থিত হইলেন । আজ আনন্দবাবু ইহাকে দেখিবামাত্রই অতিশয় ব্যগ্রভাবে বলিয়া উঠিলেন, “এই যে এস এস তোমাকেই আমি খুঁজিতেছিলাম ।” যেমন কোনও বস্তুর অনুসন্ধান করিতে করিতে হঠাৎ প্রাপ্ত হইলে অপ্রাপ্ত আকাঙ্ক্ষা এবং প্রাপ্তের ব্যগ্রতার সহিত প্রাপ্তির হর্ষ মিশ্রিত হইয়া একটা আনন্দের ভাব ফুটিয়া উঠে, আনন্দবাবুর তাৎকালিক অবস্থা দর্শনে ঠিক সেইরূপ বোধ হইতে লাগিল । ভৃত্যকে আর একখানা চেয়ার আনিতে আদেশ করিবামাত্র সে চেয়ার লইয়া আসিলে ইনি তাহাতে বসিলেন ।

আনন্দ । তবে ঠাকুর আজ কি মনে করিয়া বল দেখি ?

নবদ্বীপ । সে দিন ব’লে গিয়েছিলাম, তাই আজ মুড়ি খেতে এসেছি ।

আনন্দ । মুড়ি কেন, অল্প কিছু খাবার খাও, আনাইয়া দেই ।

নবদ্বীপ । না না মুড়ি খাব । দিতে পার ত বল না হস্ত চ’লে বাই ।

আনন্দ । আচ্ছা, তাই আনিয়া দিচ্ছি । হারে মুড়ি নিরে আরত রে !

আদেশ পাইয়া ভৃত্যটি শশব্যস্তে মুড়ি আনিতে গেল । এদিকে আনন্দবাবু নবদ্বীপদাসকে জিজ্ঞাসা করিলেন, “আচ্ছা তুমি রোজ রোজ আমার নিকট আস কেন ?

নবদ্বীপ । তুমি বলিতে পার, রোজ রোজ কাছারী যাও কেন ?

আনন্দ বাবু নবদ্বীপদাসের এই কথার একটু আশ্চর্য্যাবিত এবং ঈর্ষ্য

বিরক্তও হইলেন : কারণ তাঁহার জ্ঞান প্রতিষ্ঠাবান্ সুশিক্ষিত ধনী ব্যক্তিকে সামান্য একটা পথের কান্দাল বেরূপ নির্ভিকভাবে প্রশ্ন করিল, ইহাই আশ্চর্য্যঘটিত হইবার কথা । আনন্দবাবুর ধারণা—তিনি একজন বক্তা, সুমিমাংসক ও শিক্ষিত । আজ পর্য্যন্ত সংসারের সমস্ত ঘটনাই তাঁহার এই ধারণাকে পুষ্ট করিয়াছে । যে কেহই তাঁহার সহিত কোন বিষয় লইয়া বিচার করিতে আসে, সকলেই প্রায় তাঁহার তীক্ষ্ণ বুদ্ধির নিকট পরাভূত । অল্প বয়সে যে আনন্দবাবু ওকালতী বিষয়ে অনেক পক্কেশ, লক্ষ্যপ্রতিষ্ঠ প্রবীণ প্রবীণ ব্যক্তিকে এজলাসে নাস্তানাবুদ করিয়া নিজ প্রতিপত্তি বিস্তার করিয়া থাকেন, তিনি আজ একটা ভিক্ষকের প্রশ্নের উত্তর দিতে খতমত খাইলেন । এই সমস্ত অহঙ্কারের মূলে আঘাত পড়িবার দরুণই ঈষৎ বিরক্তি সহকারে বলিলেন, “আমি যে জ্ঞান কাহারীতে যাই, তুমিও কি ঠিক সেই জ্ঞান আমার নিকট আস ?”

নবদ্বীপ । তুমি লেখা পড়া জ্ঞান, আমি ত মুর্থ । তোমাদের বিজ্ঞান-শাস্ত্রে না বলে সবই এক নিয়মের অধীন । সেটা যদি সত্য হয় তবে এইটা হবে না কেন ?

আনন্দ । তুমি কি বলিতেছ আমি বেশ স্পষ্ট বুঝিতে পারিলাম না ।

নবদ্বীপ । তোমরা হয় ত ঈশ্বর মান না ; কিন্তু নিয়ম মান, বিজ্ঞান মান । বিজ্ঞানের মতেই ত বলিয়া থাকে, যে নিয়মে চন্দ্র, সূর্য্য, গ্রহ, প্রভৃতি ঘুরে বা আপন আপন স্থানে স্থির থাকে, ঠিক সেই নিয়মেই গাছের পাতা মাটিতে ঝুঁসে পড়ছে ।

আনন্দ । এত ঠিক কথা, ইহাকে বলে মধ্যাকর্ষণ শক্তি ।

নবদ্বীপ । তা যাই হউক, মনে কর তুমি না হয় একটা চন্দ্র সূর্য্যের জ্ঞান ; কারণ তুমি অত বড় উকীল—কত টাকা পরসী রোজগার কর—তোমার এত বড় বাড়ী—কত গাড়ীঘোড়া, চাকরচাকরাণী তোমার লোপে

খাটছে ; কাজেই তুমি না হয় তেয়ি মন্ত বড়, আর আমি ভিক্ষুক, পেটের দায়ে ঘরে ঘরে ঘুর বেড়াই । আমি একটি ছোট গাছের পাতা ; কিন্তু আমরা যে দুইজনেই সংসারে ঘুরছি, ইহার কারণ কি এক নয় ?

আনন্দবাবুর মুখখানি একটু আরক্তিম হইল । বিস্ফারিত নেত্রে নবদ্বীপদাসের দিকে তাকাইয়া বলিলেন “আমি ত কাছারীতে যাই টাকার জন্ত, তুমিও কি আমার কাছে সেই জন্ত আস ?”

নবদ্বীপ । হয় তুমি আমাকে ঠকাবার জন্ত এ কথাটা বলছ, না হয় তুমি তোমার মনের ভাব ঠিক করিয়া বৃথিতে পার নাই ।

আনন্দ । কেন ? টাকা বই কাছারীতে আর কি আছে ?

নবদ্বীপ । টাকার জন্তই যদি যাও তবে টাকা পাইয়াই চুপ ক’রে বসে থাক না কেন ?

আনন্দ । টাকা রোজগার করি অভাব পূরণের জন্ত ।

নবদ্বীপ । তাহা হইলেই দেখ টাকার জন্ত কাছারীতে যাও না, অভাবপূরণের জন্ত যাও !

আনন্দ । বেশ তাহাই না হয় হইল ।

নবদ্বীপ । এই অভাবটা কি ?

আনন্দ । খাওয়া দাওয়া, জীবনযাত্রা নির্বাহ করা ।

নবদ্বীপ । এই খাওয়া পরা, খাওয়ান পরানই কি শেষ, না ইহার মূলে আরও কিছু আছে ।

আনন্দ । আর কি থাকবে ?

নবদ্বীপ । বেশ ক’রে ভেবে দেখ, আমরা খাই পরি বা জীপুত্রাদিকে খাওয়াই পরাই কেন ?

— আনন্দ । তাহাতে আমার জুখ হইবে তাই করি ।

নবদ্বীপ । তাহা হ’লেই ভেবে দেখ, তাই ! তুমি যাবতীয় কার্য কর কিসের জন্ত ?

আনন্দ । তা সুখের জন্তই বটে ।

নবদ্বীপ । আমিও আমার সুখের জন্ত তোমার নিকট আসি । তোমার নাম আনন্দচন্দ্র শুনে আনন্দের একটু কিরণ পাইবার জন্ত আসি ।

এই সময় ভৃত্য মুড়ি লইয়া আসিলে আনন্দবাবু বলিলেন, “এই নেও তোমার মুড়ি এসেছে।” নবদ্বীপদাস আনন্দে উৎফুল্লভাবে ব্যগ্রতা সহকারে মুড়ির পাত্রটি হাতে লইয়া বলিলেন, “বা ! বেশ মুড়ি হয়েছে । বেশ ভাই ! আমার একটা গৌরামী আছে । এটা হয়ত তোমার ভাল লাগিবে না ; কিন্তু কি করি সংস্কার বা স্বভাব ছাড়া বড়ই মুন্সিল । আমার একটা তুলসীপত্র চাই ; কারণ এই মুড়িগুলি ভোগ না হইলে আমার খেয়ে সুখ হবে না । বোধ হয় এখানে পাওয়া কঠিন হবে ?”

আনন্দ । তা পাওয়া যাবে না কেন ? হারে তুলসীপাতা নিয়ে আরও ?

বলিবামাত্র ভৃত্য তুলসীপত্র আনিতে গেল । আনন্দবাবু চুপ করিয়া আছেন দেখিয়া নবদ্বীপদাসা বলিলেন, “কি ভাই ! তুমি কি ভাবছ ? আমার এই ভগবানকে নিবেদনটি কুসংস্কার মাত্র, এই না ?”

আনন্দ । ঠিক ঐ কথাটা না হইলেও অনেকটা ঐরূপ বটে ; কারণ বীহার অস্তিত্ব আমরা ধারণা করিতে পারি না বা অস্তিত্ব প্রমাণ করা পর্যন্ত আমাদের হুঃসাধ্য, তাঁহাকে আবার আবেদন নিবেদন কি ?

নবদ্বীপ । অতি সত্য কথা ; প্রকৃতই তাঁহার অস্তিত্ব নির্ণয় করা আমাদের দ্বারা হয় না ।

আনন্দ । তবে আবার এই সব করা কেন ?

নবদ্বীপ । আচ্ছা ভাই ! তোমার পিতা কি বর্তমান ?

আনন্দ । না ।

নবদ্বীপ । তাঁহার কথা তোমার কোল মনে আছে ?

আনন্দ । আছে বৈ কি !

নবদীপ । তোমার পিতামহকে তুমি দেখিয়াছ কি ?

আনন্দ । না ।

নবদীপ । প্রপিতামহকে বোধ হয় দেখ নি ?

আনন্দ । না ।

নবদীপ । এদের বিষয় তুমি কি বিশ্বাস কর ?

আনন্দ । কিরূপ বিশ্বাস ?

নবদীপ । এই একদিন এঁরা জীবিত ছিলেন—এক সময় তোমার মত পয়সা রোজগার করিতেন । তোমার প্রপিতামহের পুত্র তোমার পিতামহ, পিতামহের পুত্র তোমার পিতা, আবার তোমার পিতার পুত্র তুমি ইত্যাদি ।

আনন্দ । হ্যা, তা বিশ্বাস করি বই কি !

নবদীপ । কেন, কোন্ হুক্তি বা প্রমাণ অনুসারে তোমার প্রপিতামহের অস্তিত্বে বিশ্বাস কর ?

আনন্দ । (একটু চিন্তা করিয়া) আমি নিজে এবং এই চারিদিকের মানবসমাজই এই বিশ্বাসের প্রমাণ ।

নবদীপ । তাহা হইলে কোনও অপ্রত্যক্ষ বিষয় অথবা প্রত্যক্ষ বিষয় দেখে বিশ্বাস করা যেতে পারে, এটা স্বীকার কর ?

আনন্দ । হ্যা তা করিতে হয় বৈ কি !

নবদীপ । তবে জীবন সঞ্চয় এঁটা কর না বা করাটাকে কুসংস্কার মনে কর ।

আনন্দ । কেন ? কিসে ?

নবদীপ । নরত কি ? অপ্রত্যক্ষ তোমার প্রপিতামহ বা পিতামহের কথা প্রত্যক্ষ মানবসমাজ এবং তোমার নিজেকে দেখে বিশ্বাস

করিতে পার, আর পূর্ব, পশ্চিম, উত্তর, দক্ষিণ, উর্দ্ধ, অধঃ প্রভৃতি যে দিকে চাহিবে, সেই দিকে সর্বদা প্রত্যক্ষ আনন্দময়ের প্রকাশ দেখেও তাঁকে বিশ্বাস কর না ? প্রত্যক্ষ বাদ স্বীকার করিতে হইলে সর্বত্রই স্বীকার করা দরকার । কর্তা ব্যতীত কর্ম হইতে পারে কি ? এই যে স্বাবরজ্জন্ম, পশুপক্ষী, গিরিনদী, আকাশপাতাল, গ্রহনক্ষত্র, চন্দ্রসূর্য্য, তরুলতা, পত্রপুষ্প প্রভৃতি পরিবেষ্টিত বৈচিত্র্যময় অপূর্ব্বমহিমাম্বিত এই জগৎ, ইহার সৃষ্টিকর্তাকে মানিতে পার না কেন ? কেহ মানিলেও সেটা কুসংস্কার বলিয়া মনে হয় কেন ?

আনন্দবাবু আলবোলায় নলটী মুখে দিয়া চিত্রপুস্তলিকার দ্বারা ইহার কথা গুলিতেছেন, আর ক্রমে যেন কি রকম অভিভূত হইয়া পড়িতে লাগিলেন । ইহাকে সামান্য অকিঞ্চিৎকর ভিক্ষুকের পরিবর্তে সুশিক্ষিত জ্ঞানী বলিয়া তাহার মনে ধারণা হইতে লাগিল । ইত্যবসরে ভৃত্য তুলসীপত্র লইয়া আসিলে নবদ্বীপদাস তাহার নিকট হইতে তুলসী লইয়া মুড়িগুলি ভোগ দিতে লাগিলেন ।

আনন্দবাবু কিঞ্চিৎ কাল পরে বলিলেন, “আচ্ছা তোমরা যখনই কিছু খাও, তখনই কি ভগবান্কে ভোগ দিয়া খাও ?”

নবদ্বীপ । হাঁ ! আমার গুরুদেবের তাহাই আদেশ । সাধ্যমত তাঁর আদেশ পালনের চেষ্টা করি । তিনি বলেন “অন্নং বিষ্ঠা পয়ো মূত্রং যদ্ বিষ্ণোরনিবেদিতং । অনিবেদিত বস্তুর গ্রহণে অপরাধ হয় ।”

আনন্দ । আচ্ছা এক্ষণ করিবার উদ্দেশ্য কি ?

নবদ্বীপ । ভাই তুমি সুশিক্ষিত এবং আধুনিক সভ্যতার পক্ষপাতী । কৃতজ্ঞতা স্বীকার করাটা কি আধুনিক সভ্যতার লক্ষণ নয় ? আমরা সংসারে সকল বিষয়ে এমন কি নিজেদের জ্ঞ-পুত্র-পরিবার, চাকরবাকরের নিকট হইতেও কোন সাহায্য পাইলে অমনি হাতে হাত দিয়া ‘ধ্যাক্ষ ইউ’

ব'লে কৃতজ্ঞতা-পাশ হইতে নিজেকে মুক্ত করিয়া থাকি। আর যাহার দয়ার মাতৃগর্ভে আহার পাইয়া ছিলাম, আর ভূমিষ্ট হইবা মাত্র যে দয়াময় দয়া করিয়া আমাদের আহারের জন্ত মাতৃস্তনে দুগ্ধ সঞ্চার করিয়া দিয়াছেন, আবার প্রতিদিন জীবনের কত প্রকার উত্থান পতনের মধ্যে নিরন্তর যাহার রূপায় এ দেহ ধারণ করিতে সমর্থ হইতেছি, যিনি প্রতি মুহূর্ত্তে আমাদের ক্ষুধায় আহার, তৃষ্ণায় জল, শীতে আতুপ, গ্রীষ্মে বাতাস যোগাইতেছেন, তাঁহার প্রতি অন্ততঃ প্রতিদিন আহারের সময় একটু কৃতজ্ঞতা স্বীকার করাটা কি বিশেষ বর্ধরতা বা পাগলামী হইল? ভাই! একটু চোখ বুজ ভেবে দেখ, তিনি না দিলে কেহ কিছু দিতে বা খেতে পারে কি? এই ত ক দিন আমি তোমার নিকট হুঁটা মুড়ি খেতে চাহিতেছি, তুমি দিতে পারিলে কি? আমরা হয় ত মনে করিব, তোমার জায় একজন বড়লোক মনে করিলে আমার মত ভিখারীকে মুড়ি কেন বাহা ইচ্ছা খাওয়াইতে পার; কিন্তু সেটা সম্পূর্ণ ভুল। ভগবান্ না দিলে তুমি কোন্ হার! একজন সম্রাটও কাহাকে এক কপর্দক দিতে সমর্থ হন না। আজ তিনি দিয়াছেন, তাই তাঁহার প্রদত্ত দয়ার দান তাঁহাকে সমর্পণ করিয়া তাঁহার প্রসাদস্বরূপে গ্রহণ করা কি মনুষ্য মাত্রেরই কর্তব্য নয়? /

আনন্দ। এই কৃতজ্ঞতা স্বীকারই কি তোমাদের ভোগ দেওয়ার একমাত্র উদ্দেশ্য?

নবদ্বীপ। কোনও বিষয় জানুন্ বা বুঝতে হ'লে সে বিষয় তুমি গ্রহণ কর আর নাই কর, তাহাতে কিছু আসে যায় না; কিন্তু একটু স্থির চিন্তে সে বিষয়টির মর্ম্ম গ্রহণ করা মানুষমাত্রের কর্তব্য। কোনও ধর্ম্মসম্বন্ধে যদি আমার কিছু জানুতে বা বুঝতে ইচ্ছা হয়, আর প্রথম থেকেই যদি সে বিষয়ে অশ্রদ্ধাবান্ হইয়া সেটা কিছু নয় এই সিদ্ধান্ত মনে স্থির করি তবে সে ধর্ম্মমতে যতই সত্যতা থাক্ না কেন—সে মত যতই

বিকৃত হউক না কেন, ঐ সকল অনর্থের মূল অনর্থ অহঙ্কারই তাহার প্রকৃত মর্শ্ব বুঝিতে দেয় না । আমরা যদি অহঙ্কারের উচ্চ মঞ্চ হইতে নামিয়া বসিতে পারি, তাহা হইলে এ সংসারের প্রত্যেক বিষয় হইতেই কিছু না কিছু শিক্ষা লাভ করিতে কিংবা আনন্দ পাইতে পারি । তাহা না করিয়া কেহ বিড়ার, কেহ ধনের, কেহ পদমর্যাদার, কেহ রূপের, কেহ জ্ঞানের এবং কেহ সাধনের অহঙ্কারমদে মাতাল হইয়া হিতাহিত জ্ঞান শূন্যভাবে নিরন্তর ত্রিতাপজ্বালা ভোগ করিয়া থাকি । তাই বলি দাদা ! তুমি বৈষ্ণবধর্মাবলম্বী হও চাই নাই হও, তাহাতে কিছু আসে যায় না ; কিন্তু একটু গুচ্ছচিন্তে অর্থাৎ অবজ্ঞাহীন ও অহঙ্কার হীন হইয়া সরলতার সহিত প্রকৃত মর্শ্ব বুঝিতে চেষ্টা কর, নিতাই বুঝাইয়া দিবেন । এই সনাতন ধর্মের উপর বিশেষতঃ বৈষ্ণব ধর্মের উপর তোমার অত্যন্ত অশ্রদ্ধা ; কিন্তু আমি তোমায় জিজ্ঞাসা করি, এসম্বন্ধে তুমি কি কিছু আলোচনা করেছ বা শাস্ত্রাদি কিছু পড়েছ কি ? অন্ততঃ টাকা রোজগারের জন্য আইনশাস্ত্রাদি বেক্সপ আলোচনা করিয়াছ, বৈষ্ণবশাস্ত্রাদি সেক্সপ কিছু আলোচনা করিয়াছ কি ? যদি বা খুব বেশী পড়ে থাক সেও কতকগুলি বিজাতীয় প্রভাবে প্রভাবান্বিত পণ্ডিতের সঙ্কীর্ণ মতামত আলোচনা করিয়া হৃদয়টাকে শূন্য ক'রে ব'সে আছে এবং সর্বমঙ্গলময় বিশ্বজনীন ধর্মের প্রতি আস্থাশূন্য হইয়া আচারে, বিচারে, আহারে, ব্যবহারে বিকৃত ভাবাপন্ন হইয়া আত্মস্বার্থের লালসার নিরন্তর ভ্রমণ করিতেছ ।

আনন্দ । কথাটা বড় মিথ্যা নয় । আজ্ঞা, আমি সাধ্যমত সরল অন্তঃকরণে তোমার কণাগুলি বুঝিতে চেষ্টা করিব । আজ্ঞা ভগবান্কে ভোগ দেওয়ার প্রকৃত উদ্দেশ্য কি স্পষ্ট করিয়া বল দেখি ।

বব্বীপ । অল্প কারণ তুমি বিশ্বাস করিবে কি ?

আনন্দ । বিশ্বাস : বাগ্য হইলে কেন বিশ্বাস করিব না ?

নবদীপ । কার বিশ্বাসযোগ্য ?

আনন্দ । আমার ।

নবদীপ । তুমি কে ?

আনন্দ । আমি মানুষ ।

নবদীপ । মানুষ বলিলেই কি তুমি কে বলা হইল ? বেশ বুঝে বল ।

আনন্দ । এ আর বোঝাবুঝি কি ? আমি মানুষ হাড়া আর কি ?

নবদীপ । মানুষ ত বটেই। তবে মানুষ বলিলে তুমি কি বুঝ, আমি তাহাই জিজ্ঞাসা করি অর্থাৎ মানুষের লক্ষণ কি ?

আনন্দ । ভাই ! আমি এ সমস্ত বিষয় কখনও আলোচনা করি নাই । আচ্ছা তুমিই বল গুনি ।

নবদীপ । তুমি একজন উচ্চশিক্ষিত তাহাতে আবার আইন-ব্যবসায়ী । প্রতিদিন কত আইনের অভিপ্রায় লইয়া বড় বড় জজ, ম্যাজিস্ট্রেটের মাথা ঘুরাইয়া দাও, আর সামান্য মানুষের লক্ষ্যটা বলিতে অত ভাবিতেছ ? আমাদের শাস্ত্রে বলে মানুষ চতুর্কিংশতিভাষে গঠিত অর্থাৎ পঞ্চ কর্ম্মেন্দ্রিয়, পঞ্চ জ্ঞানেন্দ্রিয়, পঞ্চভূত, পঞ্চতন্ত্রাত্ম, মন, বুদ্ধি, অহঙ্কার ও মহৎ এই চব্বিশটি বস্তু দ্বারা আমাদের এই দেহটা গঠিত হইয়াছে, কেমন নয় কি ?

আনন্দ । আরও একটু পরিষ্কার করিয়া না বলিলে হইবে না ।

নবদীপ । পঞ্চ কর্ম্মেন্দ্রিয়, অর্থাৎ বাক্, গানি, পাদ, পানু, উপস্থ ; পঞ্চ জ্ঞানেন্দ্রিয় অর্থাৎ চক্ষু, কর্ণ, নাসিকা, জিহ্বা, স্পৃহ ; পঞ্চভূত অর্থাৎ ক্রিতি, অপ, ভেজ, মরুৎ, ধোম ; পঞ্চতন্ত্রাত্ম অর্থাৎ রূপ, রস, গন্ধ, শব্দ, স্পর্শ ।

আনন্দ । হ্যা, এটা বেশ বুঝা গেল ।

নবদীপ । তারপর মন, বুদ্ধি, অহঙ্কার ও মহৎ এই চারিটা । সকল বিকল্পাশ্রয়ীক বৃত্তিবিশেষের নাম মন । নিশ্চয়াশ্রয়ীক বৃত্তিবিশেষের নাম বুদ্ধি । অহঙ্কার অর্থাৎ আমি আমার ইত্যাকার জ্ঞান । তার পর মহৎ ।

আনন্দ । মহৎটা কি ?

নবদীপ । যাহা বলা যায় না বা বুঝান যায় না ; কিন্তু বুঝা যায় । দেখান যায় না ; কিন্তু দেখা যায়, আশ্বাসন করান যায় না কিন্তু আশ্বাদ করা যায় ।

আনন্দ । ঐটাই ত গোলযোগের কথা । যাহার কোনও প্রমাণ প্রদ্বোধন নাই এবং যেটা কাহাকেও দেখান যায় না, বুঝান যায় না বা বলা যায় না, সেটা বিশ্বাস করি কি করিয়া ?

নবদীপ । সেটা ঠিক কথা । আচ্ছা, তুমি যখন অঘোরে নিদ্রা বাও, সে সময় তোমার কন্ঠেজিয়, জ্ঞানেজিয়, মন, বুদ্ধি, অহঙ্কার প্রভৃতি কাহারই কার্য থাকে না ; কারণ তখন তোমাকে কেহ গালাগালি দিলে বা প্রশংসা করিলে তুমি বুঝনা বা হর্ষবিষাদাদি কোনই ক্রিয়া হয় না । এমন কি সে সময় তোমাকে ব্যাঘ্র বা সর্প আক্রমণ করিতে আসিলেও তোমার বুদ্ধিশক্তি দ্বারা তুমি আত্মরক্ষা করিতে পার না । অথচ তুমি থাক এবং তোমার জ্ঞান থাকে । এ কোন্ জ্ঞান বল দেখি ?

আনন্দ । তখন যে আমার কোনও রূপ জ্ঞান থাকে ইহার প্রমাণ কি ?

নবদীপ । যদি তোমার জ্ঞান না থাকে তবে নিদ্রা ভগ্নের পর নিদ্রাকালীন স্মৃতিস্মরণের স্মৃতি হয় কিরূপে ? অর্থাৎ তুমি নিদ্রা হইতে উঠিয়াই বলিলে, “ভাই ! আজ বড় সুখে নিদ্রা গিয়াছি এবং কোনই বাহুস্মৃতি ছিল না ।” ইত্যাকার জ্ঞান ত থাকে ?

আনন্দ । এই জ্ঞানকেই কি মহৎ কহে ?

নবদ্বীপ । না, ঠিক তাহা নয়, এ জ্ঞানকে চৈতন্য অর্থাৎ অবিনাশী নিত্য পদার্থ বলে । মহৎ শব্দের অর্থ ভাষায় ব্যক্ত করা যায় না ; তাই শাস্ত্রে উহাকে অব্যক্ত বলিয়াছেন । উহা কেবল অনুভূতিগম্য । আমি নিতান্ত মূর্খ । আমি এ বিষয়ে কি বলিব ? তাহাতে আবার তুমি একজন শিক্ষিত লোক—বাল্যকাল হইতে পাশ্চাত্য ভাষা অভ্যাস করিয়া তাহাতে বিশেষ পারদর্শিতা লাভ করিয়াছ । কেবল ভাষা অভ্যাস নহে, সেই জাতির আচার ব্যবহার প্রভৃতি অভ্যাস ও আচরণ করিতেছ । তোমাকে বুঝাইয়া দেওয়া আমার সম্ব্যাতীত । তবে আমার গুরুদেবের নিকট যাহা শুনিয়াছি বা শ্রুত বস্তু যতটুকু ধারণা করিয়াছি, তাহা বলিলে যদি তোমার তৃপ্তি হয় বলিতে পারি ।

আনন্দ । তাহা ত বলিবে ! আগে আমার একটি কথার উত্তর দিতে হইবে । ইংরাজী বা কোনও অন্য দেশীয় ভাষা বা আচার-ব্যবহার ও ভাবকে তোমরা এত ঘৃণা কর কেন ?

নবদ্বীপ । কে বলে আমরা ঘৃণা করি ? আমার কথার ভাবে যদি তোমার সেকপ ধারণা হইয়া থাকে, তাহা হইলে আমি বোধ হয় আমার নিজের মনের ভাব ভাষায় ঠিক ব্যক্ত করিতে পারি নাই । আমরা কোন ভাষা বা ভাবকে ঘৃণা করিতে পারি না ; কারণ আমার গুরুদেবের আদেশ ও শিক্ষা তাহা নহে । তিনি বলেন একমাত্র অহঙ্কারে মোহিত নিজের নীচ বৃত্তি ছাড়া এ সংসারে ঘৃণা করিবার আর কিছুই নাই । অগতে দৃষ্টাদৃষ্ট যাবতীয় পদার্থই ভগবৎ প্রকাশ । আমরা যদি কাহাকেও ঘৃণা বা তাচ্ছিল্য করি, তবে আমাদের অধর্ম হয় ।

আনন্দ । তবে তুমি আমাকে বা আমার আচার-ব্যবহারকে এত ঘৃণা কর কেন ?

নবদ্বীপ । তোমাকে বা তোমার আচার-ব্যবহারকে যদি আমি

স্বণাই করিব, তবে কি ভোমার নিকট খেতে আসি ?

আনন্দ । তুমি আমার স্বণা কর না ?

নবদীপ । আমার ত বিশ্বাস তাই ; অন্ততঃ স্বণা না করিবার সাধ্যমত চেষ্টা করি ।

আনন্দ । ভোমার কথায় অনেক সময় পাশ্চাত্য ভাষা বা আচার-ব্যবহারের প্রতি একটা কটাক্ষ আছে বলিয়া বোধ হয় ।

নবদীপ । কখনই নয় । তবে যে কথাটা কটাক্ষ বলিয়া তুমি ধরিয়াছ, সেটা কেবল স্বধর্মত্যাগের প্রতি অর্থাৎ সর্বোৎসাহ, সর্বাভ্যাসমী মঙ্গল ভগবান্ যে স্থানে যে কালে যেই অবস্থায় বাহাকে জন্ম দিয়াছেন, তদুচিত আচরণ, ধর্ম বা কার্যকলাপ পরিত্যাগ করা কখনই মঙ্গলপ্রদ হইতে পারে না । আমরা নিজ নিজ বিস্তারিত অহঙ্কারে মত্ত হইয়া নিজেদের মনগড়া একটা উন্নতি কল্পন। করতঃ অপরের আচার-ব্যবহার বা ধর্মের যে অত্যাচার করিতে যাই সেইটুকি কি কখনও হিতকারী হইতে পারে ? এই কথাকে লক্ষ্য করিয়াই ভগবান্ গীতায় অর্জুনকে বলিয়াছেন, “স্বধর্মো নিধনং শ্রেয়ঃ পরধর্মো ভয়াবহঃ ।”

আনন্দ । তুমি কি বলিতে চাও ইংরাজীশিক্ষা বা পাশ্চাত্য সভ্যতার মধ্যে কোনও সারবত্তা নাই ?

নবদীপ । কে এরূপ কথা বলিল ? এমন কোনও ধর্ম বা ব্যবহার হইতে পারে না, বাহার সারবত্তা নাই । তবে কি জ্ঞান, দেশকালপাত্র-ভ্রূসারে অবস্থা বুঝিয়া ব্যবস্থা করা দরকার । বাতের রোগীকে কুইনাইন খাওয়াইলে চলিবে কেন ? স্বধর্মত্যাগ বা ত্যাগের উপদেশ সম্পূর্ণ ভ্রমজনক ।

আনন্দ । স্বধর্ম যদি কোনও ভ্রম থাকে, তবুও সেই ভ্রমই কি আচরণ করিতে হইবে ? পিতা পিতামহাদি হয় ত সংস্কার বা অজ্ঞানতা

বশতঃ কোনও কার্য আচরণ করিয়াছেন, আমি যদি সেইটা না করি তাহা হইলেই কি আমার স্বখ-ত্যাগ হইল ?

নবদীপ । প্রথম দেখিতে হইবে সেই যে আচরণ সেইটা আধুনিক না প্রাচীন । যদি পূর্বাচার্যদিগের আদিষ্ট পন্থা হয় তবে নিশ্চয়ই সে পথ অশ্রান্ত ; আমি ক্ষুদ্র মস্তিষ্কে বা ক্ষুদ্র জ্ঞানে সে বস্তু ধারণা করিতে পারি না বলিয়াই আমার ভ্রম মনে হয় । কারণ পূর্বাচার্যগণ বিশেষ অহুধাবন পূর্বক নিজেরা আচরণ করিয়া তাহার দোষগুণ অহুভব করতঃ তবে বিধিবদ্ধ করিয়াছেন । আমি সামান্ত জ্ঞানে তাঁহাদিগের আশয় কি বুঝি ? এই ভগবান্কে নিবেদন করিয়া আহার করার দ্বিতীয় উদ্দেশ্য বুঝিবার পূর্বে আমাদের আহার করার উদ্দেশ্য কি বুঝা দরকার । আচ্ছা তুমিই বল দেখি, আমরা আহার করি কেন ?

আনন্দ । আহার করি দেহের পুষ্টিসাধনের জন্ত ।

নবদীপ । শুধু কি দেহেরই পুষ্টিসাধন ? সঙ্গে সঙ্গে মন বা আধ্যাত্মিক শক্তির নয় কি ?

আনন্দ । আহারের সঙ্গে মনের বিশেষ সম্বন্ধ আছে কি না আমি বেশ বুঝিতে পারি না ।

নবদীপ । কেন ভাই, একটু চিন্তা করিয়া দেখ দেখি ! আহারের সহিত মনের কত নিকট সম্বন্ধ ! একদিন যদি তুমি ঠিক সময়ে আহার করিতে না পাও তোমার মন কতদূর চঞ্চল হয় । আবার আহার করিবামাত্র মনটা কেমন শান্তভাবে ধারণ করে ! এই তৃপ্তি অহুভব কে করে ?

আনন্দ । ঠিক কথা, দেহের সহিত মনের বিশেষ বনিষ্ঠ সম্বন্ধ আছে বটে ; কারণ আমাদের দেহের কোনওরূপ বৈগরীত্য ঘটিলে মনের স্থিরতা রাখা কঠিন হইয়া পড়ে ।

নবদীপ । তাহা হইলে বুঝা গেল, আহার দ্বারা যেমন দেহের পুষ্টিসাধন হয়, তেঁর মনেরও হইয়া থাকে ।

আনন্দ । তা হইলই বা, তাহাতে ভগবানকে নিবেদনের কি হইল ।

নবদীপ । আচ্ছা, এই দেহ ও মনের পুষ্টি বলিলে আমরা কি বুঝিব ?

আনন্দ । দেহের পুষ্টি বলিলে দেহ সবল, সুস্থ ও নীরোগ বুঝায়, আর মনের পুষ্টি বলিলে মনের শান্ত অবস্থাকে বুঝায় ।

নবদীপ । মনের শান্ত অবস্থা কাহাকে বলে ?

আনন্দ । শান্ত অবস্থা অর্থাৎ কাম, ক্রোধ, লোভ প্রভৃতির তাড়নাহীন নির্বিকার অবস্থা ।

নবদীপ । অল্প উদ্বেগু যাহা আছে তাহা তোমার জ্ঞান শিক্ষিত ব্যক্তিকে বুঝান আমার মত লোকের পক্ষে সহজ নহে । আর বুঝিলেও তুমি বিশ্বাস করিবে কি ?

আনন্দ । স্বক্তি-সঙ্গত কথা হইলে কেন বিশ্বাস করিব না ?

নবদীপ । মানবজীবনের উদ্দেশ্য কি বল দেখি ?

আনন্দ । খাওয়া দাওয়া মৌজ করা অর্থাৎ আহার-বিহারাদি ।

নবদীপ । আহার-বিহার ছাড়া মানব জীবনের অল্প কোনও উদ্দেশ্য নাই কি ?

আনন্দ । আর কি থাকিবে ?

নবদীপ । তাহা হইলে মনুষ্যজীবনে ও পশুজীবনে পার্থক্য কি ?

আনন্দ । পশুর আহার-বিহারাদি সীমাবদ্ধ—তাহাদের ইচ্ছাশক্তির সেরূপ বিকাশ দেখা যায় না । মনুষ্য স্বাধীন, আপন ইচ্ছানুসারে কার্য্য করিতে সমর্থ ।

নবদীপ । আচ্ছা এই যে আহার-বিহার জীবনের উদ্দেশ্য বলিলে, এই কথাটা কি একবার ভেবে দেখেছ ?

আনন্দ । উহার মধ্যে ভাববার কি আছে ?

নবদ্বীপ । আছে বৈ কি । আচ্ছা বল দেখি তুমি আহার কর কেন ?

আনন্দ । ক্ষুধা নিবৃত্তি ও শরীর পালনের জন্ত আহার করি ।

নবদ্বীপ । ক্ষুধা জ্বিনিসটা কি ?

আনন্দ । অভাব ।

নবদ্বীপ । এই অভাব দূর করাই যদি আহারের মূখ্য উদ্দেশ্য হয়, তবে ত যাহা তাহা খাইলেই চলিতে পারে । ভাল কালীয়া, পোলাও, মুগ্ধ, ঘৃত খাইবার ইচ্ছা কর কেন ?

আনন্দ । ওটা অবস্থা ও প্রবৃত্তি-অমুরূপ । ভাল খাইতে কার না ইচ্ছা হয় ? তবে অবস্থায় কুলায় না বলিয়া লোকে যাহা তাহা খাইয়া ক্ষুধানিবৃত্তি করে ।

নবদ্বীপ । তবেই আহারটা কেবল ক্ষুধানিবৃত্তির জন্ত নহে ; উহার সঙ্গে একটা প্রবৃত্তির যোগ আছে ; যাহার জন্ত মানুষ ভাল খেতে চায় ?

আনন্দ । তা আছে বটে !

নবদ্বীপ । অচ্ছা, সে প্রবৃত্তিটা কি ?

আনন্দ । আমার বিশ্বাস সেটা স্নেহেচ্ছা ।

নবদ্বীপ । কেমন ভাই ! প্রথম বলিয়াছিলে আহার-বিহার মানব-জীবনের উদ্দেশ্য ; এখন বুঝিলে যে আহারের সঙ্গে আনন্দ চাই ?

আনন্দ । এ ত সত্য কথা ; কারণ যে কার্য্যই করিতে যাই, স্নেহ না পেলে করিতে পারি কি ?

নবদ্বীপ । এখন বেশ ক'রে বুঝে দেখ, মানবজীবনের উদ্দেশ্য কেবল আহার-বিহারাদি নয়—আনন্দ । কেহ হয় ত দশদিন অনাহারে একাসনে বলিয়া দিন কাটাইতেছে, কেহ নীচে অগ্নি প্রজ্জ্বলিত করিয়া সূর্য্যের প্রথর কিরণের মধ্যে উৰ্দ্ধপদে হেটমাথে রহিয়াছে, আবার কেহ বা ছদ্মফেননিভ

শয্যায় শয়ন করিয়া দিন যাপন করিতেছে। বল দেখি সকলেরই উদ্দেশ্য এক নয় কি ? প্রথম মনে হয় ছইটী ; কিন্তু একটু চিন্তা করিয়া দেখিতে গেলে এক ভিন্ন আর কিছুই মনে হইবে না।

আনন্দ। তা ত সত্য আনন্দই সকলের উদ্দেশ্য।

নবদীপ। তবে এখন প্রকৃত বিষয় হইল আনন্দ ! আনন্দ পাইবার ক্ষমতা কেবল মানব কেন জীবমাত্রই লাগানিত। এই আনন্দ নিত্য কি অনিত্য বল দেখি ?

আনন্দ। জীবের যখন নিত্যতা নাই, তখন তদাপ্রাপ্ত আনন্দ নিত্য হইবে কিরূপে ?

নবদীপ। আশ্রয়ের সহিত আশ্রিতের এমন কোনও নিকট সম্বন্ধ হইতে পারে না, বাহ্যতে আশ্রয়ের অনিত্যতায় আশ্রিতে অনিত্যতা হইবে। আনন্দ নিত্য পদার্থ ; সচ্চিদানন্দ আদিপুরুষ গোবিন্দের জ্ঞানানন্দী শক্তির বৃত্তিবিশেষ। আনন্দ অপ্রাকৃত। আমরা সংসারে যে আনন্দ উপভোগ করি, সেইটী আনন্দের ছায়া মাত্র ! আহাৰ-বিহার, সংযোগ-বিয়োগ আনন্দ নয়, আনন্দের সহায় বা অবলম্বন। ধর তোমাকে যদি এই কটক হইতে পুরী বাইতে হয়, তবে তোমাকে প্রথম ঘোড়াগাড়ী শেষে রেলগাড়ীতে চড়িয়া তবে বাইতে হইবে। এই পুরী তোমার প্রাপ্তির বিষয়, আর রেলগাড়ী প্রকৃতি বাবতীয় বস্তু সেই বিষয় প্রাপ্তির সহায় বা অবলম্বন। তেমনি আনন্দই একমাত্র জীবের প্রাপ্তির বিষয় সাংসারিক ব্যাপার তাহার সহায়

আনন্দ। আচ্ছা ! এই অর্থাৎ প্রাকৃত কি অপ্রাকৃত ?

নবদীপ। এই অর্থাৎ প্রাকৃত।

আনন্দ। জাগতিক ব্যাপার অবলম্বনে চিন্ত্য অর্থাৎ অপ্রাকৃত আনন্দ উপভোগ হইতে পারে কি ? ধর এই আহাৰ বিহারাদি ভূমি

বলিলে আনন্দের অবলম্বন, এদিকে আবার বলিলে আনন্দ নিত্য এক অপ্রাকৃত । অনিত্য বস্তু অবলম্বনে নিত্য বস্তুকে প্রাপ্ত হওয়া যায় কি ?

নবদীপ । বড়ই সুন্দর প্রশ্ন করিয়াছ । এতক্ষণে যে আমার সহিত বাদানুবাদ হইতেছিল, তাহার শেষে মীমাংসার কথা উপস্থিত হইয়াছে । ভগবান্কে ভোগ দেওয়ার প্রধান উদ্দেশ্য এই ; কারণ আমরা ক্ষুদ্রবুদ্ধি বালক সদৃশ—বস্তুর ভাল মন্দ আমাদের বোধ নাই । কাজেই আমাদের বুদ্ধি অনুসারে বস্তুর বিচার না করিয়া যাহা কিছু উপস্থিত হয়, প্রত্যেক সমর্পণ করিয়া দেই, তিনি উহার হেয় অংশ বাদ দিয়া উপাদের অংশ আমাদের প্রদান করেন । যেমন কোনও বালক একটা স্থপক বেলকল প্রাপ্ত হইয়া পরমানন্দিতভাবে পিতা বা মাতার নিকটে লইয়া গেল । কৌশলী পিতা বা মাতা উক্ত ফলের আবরণ মোচন করতঃ উত্তম সংস্কার করিয়া বালককে খাইতে দিলেন । বালক অতি পরিতৃপ্তভাবে উক্ত ফল খাইয়া আনন্দিত ও পরিপুষ্ট হইল । যে বালক পিতামাতাকে না জানাইয়া নিজের স্বাধীনতা অনুসারে উক্ত ফল খাইতে গেল, সে হয়ত বেলের খোসা চিবাইয়া নীরস বোধে দূরে নিক্ষেপ করিল । তিনি অপ্রাকৃত নিত্য চিহ্নের সর্বব্যাপী । তাঁহার কৃপাপ্রদত্ত বস্তু একবার মাত্র তাঁহার নাম স্মরণ করিয়া তাঁহার হস্তে সমর্পণ করিতে পারিলেই আমাদের কণ্ঠস্থ শেষ হইল । তৎপর তিনি বেকরূপ ভাবেই হউক সেই সেই বস্তুর প্রাকৃত্য নষ্ট করিয়া অপ্রাকৃত গুণ সংস্কার করতঃ আমাদের হস্তে সমর্পণ করেন । খাদ্য বস্তুর কথা ত দূরে, আমরা সময়ে বিব পর্য্যন্ত তাঁহার হাতে দিয়া থাকি ; কিন্তু তিনি এমনি করুণাময় যে সেই বিষকে অবৃত্ত করিয়া আবার আমাদের হস্তে অর্পণ করেন । প্রহ্লাদের পিতা তাহাকে হলাহল বিষমাখা অন্ন খাইতে দিল । প্রহ্লাদ যেমন ভগবান্কে অর্পণ করিল তেমনি সেই বিষ অমৃতে পরিণত হইল । এইরূপ মীরাবাইর প্রার্থনা

মানসে রাণা অতিশয় তীব্র বিষধর কালসর্প শালগ্রাম নাম করিয়া তাহার নিকট প্রেরণ করিয়াছিলেন । মীরা সরলপ্রাণে পেটরা খুলিয়া দেখে অপূর্ণ শালগ্রামশিলা । দেখ, মীরা কিন্তু জানেই না যে পেটরায় কি বস্তু আছে । কেবল রাণা যে শালগ্রাম নাম করিয়াছিলেন, পরম দয়াল ভগবান্ সেই নামপ্রভাবেই পেটরা হইতে কালসর্প দূর করতঃ নিজে তন্মধ্যে প্রবেশ করিলেন । হায় রে ! জীব এমন দয়াল প্রভুও ভজিতে চায় না !

আনন্দ । আচ্ছা, তোমরা যখন যাহা কর সকলই কি তাঁহাকে জানাইয়া কর ।

নবদীপ । ক'রবার চেষ্টা করি । আচ্ছা, ভেবে দেখ, তুমি কোনও একটা কার্য্য গোপনে করিতে গিয়াছ, কিন্তু একজন তাহা দেখিতে পাইল, সেই সময় তোমার কি করা উচিত ।

আনন্দ । কি আর করিব ? যখন সে জানিতেই পারিল, তখন তাঁহাকে সমস্ত কথা প্রকাশ করিয়া বলাই উচিত ।

নবদীপ । তবে দেখ ভগবান্ বিশ্বতচ্ছকু, সর্কাস্ত্র্যামৌ, সর্কনিয়ন্তা । তুমি যতই গোপনে কার্য্য করিতে যাও না কেন, তিনি তোমার নিকটে থাকিয়া হাসিতেছেন । তোমার জানিবার পূর্বেই তিনি জানিয়াছেন । তুমি যাইবার পূর্বে তিনি গমন করিয়াছেন । তুমি না দেখিতেই তিনি দেখিতেছেন । বল দেখি যিনি সমস্ত জানিলেন, তাঁহার নিকট গোপন করা বৃথতা নয় কি ?

আনন্দ । তিনি যে সমস্ত জানিলেন, আমি কি করিয়া বুঝিব ?

নবদীপ । একথা অপরের বুঝাইয়া দেওয়া হুঃসাধ্য । আচ্ছা তোমাকে জিজ্ঞাসা করি—তুমি যখন কোনও অস্ত্রায় কার্য্য বা মিথ্যা মর্কদ্দমা করিত যাও, তখন তোমার প্রাণের মধ্যে কোনওরূপ ভীতি বা সঙ্কোচতা আসে না কি ?

আনন্দ । সময় সময় আসে বটে ; সে এক মিনিট সাধ মিনিটের মধ্যে অমনি বিলীন হইয়া যায় ।

নবদ্বীপ । এই যে আসা, ইহাই ভগবানের আনিবার পরিচয় । অর্থাৎ গোপনীয় কার্য যেমন কাহারও নিকট কিঞ্চিৎ প্রকাশ পাইলে মনের মধ্যে ভীতি আসে, তেমনি লোকচক্ষুর আড়ালে থাকিয়া অতি গোপনে গভীর রাত্রে গৃহাভ্যন্তরে পাপকার্য্য করিতে গিয়াও মনে ভীতির সঞ্চার হয় কেন, না সর্বাঙ্গব্যাপী বিশ্বত্বে চক্ষু ভগবানের গোচর হইয়াছে বলিয়া ।

এইবার আনন্দবাবুর হৃদয়টা কি রকম হইয়া গেল ; চক্ষু দুইটা আরক্তিম এবং ছলছল । গদগদকণ্ঠে বলিলেন,—“দাদা ! যে জন এইরূপ ভাবে অংশে পাপের পাপী, প্রবঞ্চক, অসদাচারী, লম্পট, তাহার কি উপায় নাই ? তাহার ত বোধ হয় অন্তনকাল নরকযন্ত্রণা ভোগ করিলেও প্রায়শ্চিত্ত হইবে না ।

নবদ্বীপ । ভাই, ভয় কি ? পরম দয়াল অবতার । কলিযুগে যদি ঐরূপ বিচার করিয়া জীব উদ্ধার করিতে হইত, তবে আর কলির জীবের গতি ছিল না । তাই দয়াল প্রভু কলিযুগের জন্ত সহজ উপায় নির্ধারণ করিয়াছেন । যে যতই পাপ করিয়া থাকুক না কেন একবার হৃদয়ে অনুতাপানল প্রজ্জ্বলিত করিয়া ব্যাকুলপ্রাণে সরলভাবে ভগবচ্চরণে শরণ লইয়া কৃত পাপের জন্ত ক্ষমা প্রার্থনা করিলে—আবার যাহাতে সে পথে না যাইতে হয় তাহার জন্ত প্রভুর চরণে জানাইলে তিনি কোলে তুলিয়া লইবেন । ভগবান্ সব কার্য্য করিতে পারেন, কেবল জীবকে যুগা করিতে পারেন না । তিনি করুণাময়, যে যতই দুরাচার হউক না কেন, তিনি আদর করিয়া কোলে নিবেন ।

এতক্ষণ আনন্দবাবু নীরবে নবদ্বীপদাদার কথা শুনিতেছিলেন, আর

হুইটা চোখের জলে বুক ভাসাইতেছিলেন, এবার একেবারে অধৈর্য্যভাবে ইহার চরণভলে পতিত হইয়া উচ্চৈঃস্বরে রোদন করিতে লাগিলেন । মুখে কেবল এক বুলি ‘হায় ! আমার কি হইবে ? আমি যে অশেষ পাপের পাপী, আমাকে উদ্ধার করিবে কে ? আমি যে জগাই মাখাই হইতেও ছরাচার !’

এইরূপ আশ্তি দেখিয়া নবদ্বীপদাদা আলিঙ্গনপূর্ব্বক নানারূপ সান্ত্বনা-বাক্যে আশ্বস্ত করিলে আনন্দবাবু কাদিতে কাদিতে বলিলেন,—“দাদা ! আমার উদ্ধারের কি উপায় হইবে ? আপনি আমায় কৃপা করিয়া যখন চৈতন্ত্য দিয়াছেন, তখন আবার যেন নরকে না পড়ি । আমাকে কিরূপ ভাবে চলিতে হইবে, কিরূপ কি করিতে হইবে আদেশ করুন ।” তখন নবদ্বীপদাদা বলিলেন, “দেখ, আমার যতদূর শক্তি আমি বলিয়াছি, এখন গুরুদেবের হাত । তিনি যেক্রপ ব্যবস্থা করিবেন সেইরূপই হইবে ।”

আনন্দ । আপনার গুরুদেব কোথায় ? তিনি কি এই মহাপাপীকে স্পর্শ করিবেন ? এ মহাপাতকীর কি এমন শুভদিন হইবে ?

নবদ্বীপ । ভাই ! তিনি পরম দয়াল, তাঁহাকে একবার দর্শন করিলেই তুমি বৃষ্টিতে পারিবে । তিনি সম্প্রতি শ্রীধামপুরীতে আছেন ।

আনন্দ । তাঁহাকে কিরূপে এখানে আনা যায় ?

নবদ্বীপ । তিনি স্বতন্ত্র পুরুষ, জানি না আসিবেন কি না, তবে তোমার যদি প্রাণে ব্যাকুলতা থাকে—প্রাণে প্রাণে আকর্ষণ করিতে পার, তবে আসিলেও আসিতে পারেন ।

আনন্দ । দাদা ! আমার ব্যাকুলতাও নাই আকর্ষণও নাই, আমার অবলম্বন একমাত্র তুমি । তোমার বাহা ইচ্ছা কর । তবে এইমাত্র আমার প্রার্থনা—আর বিলম্ব সহ্য হইতেছে না, যত সম্ভব হস্ত ব্যবস্থা কর ।

এই বলিয়া কাতরভাবে আমাকে ও দাদাকে পুরী আসিবার জন্য

বলিলেন। তাই তাঁহার প্রেরণায় আমরা দুইজনে আপনার নিকট আসিয়াছি। আপনাকে একবার অবশ্যই বাইতে হইবে

বাবাজী। বাবা, পতিতপাবন নিতাইচাঁদকে জানাও। তিনি লইয়া গেলেই যাইব।

তখন নবদ্বীপদাদা বলিলেন, “আজ অসময় হইয়াছে; কাল দিনের গাড়ীতে গেলেই ভাল হইবে।” এইরূপ নানা কথোপকথনে সন্ধ্যা হইল। ঠাকুরের আরতি দর্শন করিয়া সকলেই মনে মনে ভাবিতেছেন, কাহার উপর প্রভুর করুণা হইবে—কাহাকে সঙ্গে বাইতে আদেশ করিবেন, ইচ্ছাময় প্রভুই জানেন। ইত্যবসরে বাবাজী মহাশয় শ্রীজগন্নাথদেবের দর্শন করিয়া মঠে আসিলেন। কেবল মাত্র সেবার উপযোগী চারি পাঁচ জনকে মঠে রাখিয়া আর সকলকেই সঙ্গে বাইতে আদেশ করিলে সকলেই আনন্দিতচিত্তে মহাপ্রসাদ গ্রহণপূর্বক কিকিং বিশ্রামান্তে নাম করিতে করিতে ষ্টেশনে রওনা হইলেন। বাবাজী মহাশয়কে যেই রাত্তার দেখিতেছে, সেই অতি আশ্চর্য্যাবিত হইয়া জিজ্ঞাসা করিতেছে, “আজ্ঞে কতদিনে আবার পুরী প্রত্যাবর্ত্তন হইবে?”

বাবাজী মহাশয় যত হাসিয়া বলিতেছেন, “নিতাই কোথায় লইয়া যাইবেন, কোথায় রাখিবেন, আবার কবে আনিবেন তিনিই জানেন। তোমরা সকলে প্রভুকে জানাও, যথা তথা রাখেন যেন তাঁহার নাম বিন্দুত না হই” বলিয়া হাসিমুখে সকলকে বিদায় দিয়া ষ্টেশনে উপস্থিত হইলেন। যথাসময়ে টিকিটের ঘণ্টা বাজিলে আনন্দবাবুর প্রেরিত ভ্রাতৃলোকটী বাবাজী মহাশয়কে বলিলেন, “আজ্ঞে আনন্দবাবু সেকেণ্ড ক্লাসের টিকিট করিতে আদেশ করিয়াছেন।” বাবাজী মহাশয় যত হাসিয়া বলিলেন “বাবা। রেল বড় লোক হইলে কি হইবে? কাল হুগল কটকে ডিফা করিতে হইবে; সুতরাং নীচের ক্লাসের টিকিট করাই ভাল।”

বাবুটি একটু অপ্রতিভ হইয়া বাবাজী মহাশয়ের আদেশানুসারে ছাব্বিশখানি টিকিট করিয়া আনিলে ইহার গাড়ীতে উঠিলেন ।

যথাসময়ে গাড়ী ছাড়িয়া দিল । বাবাজী মহাশয় খোল করতাল ধোঁগে নাম আরম্ভ করিলেন । নবদ্বীপদাদার মনে কি এক কোঁতুহল হইয়াছে যে আনন্দকে বাবাজী মহাশয়ের আগমনবার্তা জানান হইবে না বা ইহার পরিচয়ও দেওয়া হইবে না । দেখা যাক তাহার কতদূর চিন্তের উৎকর্ষ জন্মিয়াছে । যদি সে তাহার ইষ্টদেবকে চিনিয়া লইতে না পারে তবে জানিব আরও সময় বাকী আছে । এদিকে আনন্দবাবুর মনে কি ভাবের উদয় হইল, অন্তর্যামী প্রভুই জানেন । কোনই খবরাখবর নাই, হঠাৎ গাড়ী লইয়া ষ্টেশনে উপস্থিত হইলেন । যথাসময়ে ট্রেন আসিয়া ষ্টেশনে লাগিল । বাবাজী মহাশয়ের স্বাভাবিক নিয়ম—গাড়ীতে উঠিবার সময় সকলকে আগে উঠাইয়া পরে নিজে উঠিয়া থাকেন । আবার নামিবার সময়ও সকলকে নামাইয়া তবে নিজে নামিয়া থাকেন । আজও তাহাই হইল । সন্নিগণ গাড়ী হইতে নামিয়া যেমন বাহির হইতেছেন, অমনি আনন্দবাবু করযোড়ে দণ্ডবৎ প্রণামপূর্বক বোড়ার গাড়ীতে উঠিবার প্রার্থনা করিয়া ষ্টেশনের ঠিকে গাড়ীওয়ালাদিগকে বলিলেন, “দেখ্ এক এক গাড়ীতে দুই দুইজন করিয়া আমার বাড়ীতে লইয়া যা ।” গাড়োয়ানগণও বাবুর হুকুমমত কার্য্য করিতে লাগিল । নবদ্বীপদাদা পূর্বোক্ত ভদ্রলোকটার সঙ্গে একপার্শ্বে দাঁড়াইয়া আনন্দবাবুর অতুরাগ পরীক্ষা করিতেছেন । ক্রমে সমস্ত সন্নিগণ চলিয়া গেলে বাবাজী মহাশয় ধীরে ধীরে বাহির হইলেন । ইহাকে দেখিবামাত্র আনন্দবাবু বাতাহত কদলীবৃক্ষের শ্রায় ইহার চরণতলে পতিত হইয়া ঠিক অপরাধী বালকের শ্রায় উচ্চৈঃস্বরে রোদন করিতে করিতে ব্যাকুলভাবে বলিতে লাগিলেন, “বাবা ! আমাকে উদ্ধার করুন । আমার আর কেহই নাই /, এতদিন

আপনার বোধে বাহাদের জ্ঞান ধর্ম্মাধর্ম্ম পাপপুণ্য বিচার না করিয়া প্রাণপণে খাটিয়াছি, এখন জানিলাম তাহারা কেহই আমার পাপের ভাগী হইবে না । এখন একমাত্র আপনিই আমার ভরসা ।” বাবাজী মহাশয় সজলনয়নে আনন্দকে উঠাইয়া আলিঙ্গন পূর্বক গদগদকণ্ঠে বলিলেন, “বাবা ! ভয় কি ? পরম দয়াল পতিতপাবন নিতাইচাঁদ আছেন । চল, বাড়ী চল” বলিয়া গাড়ীতে উঠিলেন ।

ইত্যবসরে নবদ্বীপদাদা এবং পূর্বোক্ত ভদ্রলোকটী একখানা গাড়ী করিয়া অতি দ্রুতবেগে গমনপূর্বক আনন্দবাবুর বাড়ীর সংলগ্ন একটা পৃথক্ বাড়ীতে সকলের থাকিবার ব্যবস্থা করিয়া দিলেন । যত কিছু ব্যবস্থার ভার নবদ্বীপদাদার উপর । আনন্দবাবুর গাড়ীতে বাবাজী মহাশয়, আনন্দবাবু, ললিতাদাসী এবং কুসুমমঞ্জরী দাসী এই চারিজন উঠিলেন । গাড়ীতে উঠিয়াই আনন্দবাবু বাবাজী মহাশয়ের চরণ দুইখানি বক্ষে ধারণ পূর্বক দুইটা চোখের জলে ধোত করিতে করিতে জীবনের আশ্রয় বৃত্তান্ত বর্ণনা করিতে লাগিলেন, “—বাবা ! আমি অশেষ পাপের পাপী । মত্ত মাংস প্রভৃতি এরূপ বস্তু জগতে কম আছে বাহা আমি ব্যবহার না করিয়াছি । আমার এই পেটে এখন পর্য্যন্ত বোধ হয় মূব্গীর হাড় আছে ! আমা হইতে কত জ্বীলোকের যে সত্যিকার নষ্ট হইয়াছে তাহার ইয়ত্তা নাই । শাস্ত্রে জগাই মাধাই, অজামিল, রত্নাকর প্রভৃতি যে সমস্ত দস্যুর কথা শুনিয়াছি, তাহাদের অপেক্ষাও আমি মহাপাপী ; কারণ দস্যুগণ মাথায় লাঠি মারিয়া লোকের নিকট যে সমস্ত ধন থাকে তাহা লুণ্ঠন করিয়া যায়, আর আমি এমনই বিশ্বাসঘাতক যে একজনের যথাসর্ব্ব লুণ্ঠন করিয়াছি । এক পক্ষের উকীল হইয়া টাকার লোভে অপরের কার্য্য করিয়াছি । অভিमानে ধরাকে সরাসরি জ্ঞান করিয়াছি । জগতে জৈবর বলিয়া কেহ আছে বা একদিন আমার এই কৃতকর্ম্মের ফলে আমার অশেষ

স্বপ্না ভোগ করিতে হইবে, এমন কি আমার উপর বিচারকর্তা কেহ আছে বলিয়া এতদিন আমার বিশ্বাস ছিল না। গুরুদেব মানি নাই; সম্বন্ধ বিচার যে কাহাকে বলে আমার ধারণা ছিল না। বাবা! কেবল নবদ্বীপদাঁদার কৃপায় আজ আমার ঘুম ভাঙিয়াছে, আজ আমি ত্রিভুগৎ শূন্য দেখিতেছি! যেদিকেই আমার দৃষ্টি পতিত হইতেছে, সেই দিকেই আমি অপার দৃঃখ-জলধি দেখিয়া হতাশ হইতেছি। বাহার মুখপানে তাকাইতেছি তাহার নিকটেই আমার নিজেকে ঘোর অপরাধী বলিয়া মনে হইতেছে। বাবা গো! আমার যে আর উপায় নাই, আমি যে অকূল সাগরে পতিত হইয়াছি; আমার উদ্ধার করিতে আপনি ভিন্ন আর কেহই নাই। আমার বিশ্বাস, আমাকে দেখিয়া নিতাই গৌর ভয়ে পলাইয়া যাইবেন। আমার দুরাচারের কথা শুনিলে জগতে এ হেন জন নাই যে স্বপ্না না করিবে। বাবা! একমাত্র আপনি ভিন্ন এ ঘোর নারকী অগ্নম পতিতকে উদ্ধার করিতে পারে এমন আর কেহই নাই।” এইরূপ ভাবে কত যে অহুতাপ করিতেছেন, কাহার সাধ্য তাহা ভাষায় ব্যক্ত করে? বাবাজী মহাশয় অর্কমুজিত নয়নে ঠেস দিয়া বসিয়া আছেন, চরণ দুখানি আনন্দের বুকের উপরেই রহিয়াছে। একএকবার ঈষৎ কম্পিতভাবে গদগদকণ্ঠে জয় নিতাই, জয় নিতাই বলিতেছেন। কিছুক্ষণ পরে আনন্দবাবু বড়ই অধৈর্য্য হইয়া পড়িলে বাবাজী মহাশয় তাহাকে নানারূপ প্রবোধ বাক্যে বলিতে লাগিলেন, “বাবা! চিন্তা কি? ধন্য কলিযুগ! পরমদয়াল অবতার অদোবদর্শী নিতাই-গৌরের কৃপায় কেহই বঞ্চিত হইবে না। তোমার জন্মজন্মাজ্জিত সমস্ত পাপ তাপ আমাকে দিয়া তুমি নির্মলভাবে তাঁহাদের চরণে শরণাপন্ন হও” বলিয়া দৃঢ় আলিঙ্গন করিলেন।

কি আশ্চর্য্য! আলিঙ্গন করিয়া স্থিরভাবে বসিলেন; কিন্তু বাবাজী

মহাশয়ের মূর্ত্তিখানি এমনি শ্রীহীন ও কৃষ্ণবর্ণ হইয়া গেল যে, ইহাকে চেনা কঠিন হইয়া পড়িল । ক্রমকাল মধ্যে গাড়ী আসিয়া কাঠগড়াসাহি আনন্দ বাবুর বাড়ীর সম্মুখে পহঁছিলে সকলে গাড়ী হইতে নামিলেন । নবদীপ দাদা আসিয়া বাবাজী মহাশয়ের ঐরূপ মূর্ত্তি দেখিবামাত্র অতিশয় ব্যাকুল ভাবে “হা নিতাই জয় নিতাই” বলিয়া উন্মত্তের ত্যায় নৃত্য করিতে লাগিলেন । উভয়ের মনের ভাব উভয়েই জানিলেন । বাবাজী মহাশয় টলিতে টলিতে বামহস্তে নবদীপদাদার দক্ষিণ হস্ত ধরিয়া নৃত্য করিতে লাগিলেন । ইত্যবসরে সকলে খেল করতাল লইয়া উপস্থিত হইলে ঐ স্থানে কীর্ত্তন আরম্ভ হইল । কোশলী নবদীপদাদা তাঁহার প্রাণের প্রাণ দাদাকে লইয়া নাচি ত নাচিতে আনন্দবাবুর বসতবাটীর পার্শ্ববর্ত্তী বাটীর মধ্যে প্রবেশ করিলেন । ভিতরে প্রবেশ করিবামাত্র বাবাজী মহাশয় উদ্ভগ্ন নৃত্য আরম্ভ করিলেন । সঙ্গিগণ চারিদিকে দেরিয়া নাম করিতে লাগিল । অকস্মাৎ আনন্দবাবুর বাড়ীতে অপূৰ্ণ সংকীৰ্ত্তন ধ্বনি শুনিয়া প্রতিবেশীগণ উধাও হইয়া ছুটিয়া আসিতে লাগিল । সম্পূর্ণ অসম্ভব সম্ভব হইয়াছে দেখিয়া সকলেই বিস্মিতভাবে পরস্পর বলাবলি করিতেছে, “কি আশ্চর্য্য ! যাহার ভয়ে পাড়ার মধ্যে ভিখারী আসিত না, আজ তাহারই বাড়ীর মধ্যে নাম সংকীৰ্ত্তন !” নিকটে গিয়া সকলে দেখে আনন্দবাবু দুইটা হাত উৰ্দ্ধে তুলিয়া বিভোরভাবে নৃত্য করিতেছেন । গায়ে জামা-জোড়া কিছুই নাই—দুইটা চোখের জলে মুখ বুক ভাসিয়া যাইতেছে । এক একবার সংকীৰ্ত্তনের মধ্যে রঞ্জে গড়াগড়ি দিতেছেন দেখিয়া সকলেই বলাবলি করিতেছে, “এমন অপূৰ্ণ পরিবৰ্ত্তন দেখা ত দূরের কথা, কখন শুনিও নাই । একি আবার সত্যযুগ আসিল না কি ?” কেহ বলিতেছে, “ঐ যে পাতলা মত বাবাজীটা, উহাকে আমি আরও তিন চারি দিন নামগান করিতে করিতে বাবুর বাড়ীর মধ্যে প্রবেশ করিতে দেখিয়াছি ।

বোধ হয় উহার কৃপায়ই বাবুর মনের কিছু পরিবর্তন হইয়াছে ।” কেহ কেহ বলিতেছে, “হ্যাঁ, এখনও মুরগীর ডিম ঘরে আছে । তাহার আবার পরিবর্তন !” কেহ বা বলিতেছে “ভাই ! সাধুর কৃপা হইলে মন ফিরিতে কতক্ষণ ? দেখ না ঐ যে মহাপুরুষটি নৃত্য করিতেছেন, উহার কেমন সুদীর্ঘ কলেবর, আজামুলম্বিত বাহু, আর কেমন আবিষ্টভাবে নৃত্য ও কীর্ত্তন করিতেছেন ! আহা মরি কেমন সুমধুর কণ্ঠস্বর ! ঐ দেখ না আনন্দবাবু এক একবার কাঁদিতে কাঁদিতে ঐ মহাপুরুষের চরণতলে পতিত হইয়া গড়াগড়ি দিতেছে, আর আকুলপ্রাণে কত কি না বলিতেছে । নিশ্চয়ই তোমরা দেখিতে পাইবে ঐ মহাপুরুষের কৃপায় আনন্দবাবু দেব প্রকৃতির লোক হইবে সন্দেহ নাই” ইত্যাদি সাহার যেরূপ মনের ধারণা সে সেইরূপ সমালোচনা করিতেছে । ইহারা কিন্তু নামানন্দে বিভোর । অনেকক্ষণ সংকীৰ্ত্তনের পর সকলে উপবেশন করিলে পাড়ার অনেক ভদ্রলোক আসিয়া বাবাজী মহাশয়ের সহিত নানারূপ কথোপকথন করিতে লাগিলেন । আনন্দবাবু ইহাদের আহারাদির বা সেবাশুশ্রূষার সম্পূর্ণ ভার নবদ্বীপদাদার উপর নির্ভর করিয়া নিশ্চিন্তমনে বাবাজী মহাশয়ের শ্রীমুখে তত্ত্বকথা শুনিতে লাগিলেন । নবদ্বীপদাদাও সুচারুরূপে ভোগ রাগের বন্দোবস্ত করিলেন । রাত্রি আন্দাজ এগারটার সময় সকলে মহাপ্রসাদ পাইয়া বিশ্রাম করিলেন ।

ভগবৎকৃপায় যেমন অসম্ভব সম্ভব হইতে পারে, ভগবদ্ভক্তের কৃপায়ও তেমন মানববুদ্ধির অতীত কার্য্য অতি অলক্ষিতভাবে সম্পন্ন হইয়া থাকে । আজ আনন্দবাবু সত্বগুণের মূর্ত্তি, স্বর্গের দেবতা । আজ আর তাঁহার তেমন উদ্ধত প্রকৃতি নাই । মন্ত্ৰেলগণ কোনও মকদ্দমার পরামর্শ করিতে আসিলে তিনি নম্রভাবে বলিতেছেন, “বাবা ! যদি ইহার মধ্যে কোনওরূপ প্রত্যাহারময় ঘটনা প্রকাশ পায়, তবে কিন্তু আমি

সেই মুহূর্ত্তেই এই মৰ্কটমা পরিত্যাগ করিব ।” আর একটা অপূৰ্ণ গুণ আনন্দবাবুতে প্রকাশ পাইল । মক্কেলগণকে বলিতে লাগিলেন, “বাবা ! মিছামিছি বিবাদবিষম্বাদ করিয়া সাধের মনুষ্যজন্ম নষ্ট করিবে কেন ? যাও পরস্পর মিটাইয়া ফেল, তাহাতে যদি কিছু ক্ষতি হয় সেও ভাল । ভাবিয়া দেখ, মামলা করিতে গেলেই ত অর্থদণ্ড ও শারীরিক পরিশ্রম, তাহাতে আবার অশান্তি । বল দেখি অর্থব্যয় করিয়া অনর্থ খরিদ করে কে ?” তাঁহার ঐরূপ মিষ্ট ব্যবহার ও কথাবার্ত্তায় এহেন লোক নাই, যাহার চোখে জল না আসিতেছে । জ্বীকে বলিলেন, “দেখ, আমার পূৰ্ণ জন্মভাবের অল্পকুল যে সমস্ত দ্রব্যাদি আছে, হয় ফেলাইয়া দাও নচেৎ কাহাকেও বিলাইয়া দাও । যেন বাড়ীতে ও সমস্ত বস্তুর কোনরূপ সংস্রব না থাকে । বৈঠকখানায় যে সকল বাজে ছবি ছিল, সে সব উঠাইয়া ভগবৎসম্বন্ধীয় চিত্রপট দেওয়াইলেন । চাকর দ্বারা বৈঠকখানা ধোয়াইয়া পরিষ্কার করিলেন । যে আনন্দবাবুকে দেখিতেছে বা উহার অন্ততঃ ব্যবহারিক জগতেরও দুইটা কথা বলিতেছে, সেই গদগদকণ্ঠে ভগবানকে ধন্যবাদ দিয়া আনন্দবাবুর উদ্দেশ্যে প্রণাম করিতেছে ।

বাবাজী মহাশয়ের সহিত আনন্দবাবুর পিতাপুত্র সম্বন্ধ । আনন্দবাবু বাবা বলিতে অস্থির । বাবাজী মহাশয় হয় ত বসিয়া আছেন, হঠাৎ আনন্দবাবু গিয়াই বাবা বলিয়া চরণ দুইখানি বক্ষে ধারণপূৰ্ব্বক পঞ্চমবয়সী বালকের ন্যায় কাঁদিতে লাগিলেন । অপূৰ্ণ পরিবর্তন ! আনন্দের বর্ত্তমান অবস্থা দেখিলে কে বলিবে যে এই ব্যক্তি কখনও উন্নত প্রকৃতির লোক ছিল বা রঞ্জনগুণ কখনও উহার হৃদয় স্পর্শ করিয়াছিল । যে আনন্দবাবুর মুখে হুজুরে ওরে ছাড়া চাকর চাকরাণী কখনও ওনে নাই, তিনি আজ বাবা বাছা ব্যতীত কাহারও সহিত কথা বলিতেছেন না । আর যে সে কথায় যাহার তাহার নিক আত্মগোঁ প্রকাশপূৰ্ব্বক কাঁদিয়া অধীর

হইতেছেন ।

একদিন বেলা প্রায় সাড়ে দশটা ; কিন্তু আনন্দবাবু নিশ্চেষ্টভাবে বাবাজী মহাশয়ের নিকট বসিয়া আছেন । বাবাজী মহাশয় জিজ্ঞাসা করিলেন, “আনন্দ ! আজ কাছারী যেতে হবে না কি ?”

আনন্দ । বাবা ! আমার আর ঐ প্রভারণাময় কার্য্য করিতে ইচ্ছা নাই ; আপনি কৃপা করুন, আমি আর কাছারী যাইব না ।

বাবাজী । কেন বাবা ! তুমি ত উচ্চশিক্ষিত, তুমি একরূপ ছেলে-মানুষের মত কথা বলিলে চলিবে কেন ? আচ্ছা আমাকে তুমি বুঝাইয়া দাও যে কাহার দোষে ওকালতি কার্য্য প্রভারণাময় হইল ?

আনন্দ । দোষ কাহার বলিব ? ও কার্য্যটাই এইরূপ যে ইচ্ছা না থাকিলেও প্রবঞ্চনা করিতে হইবেই হইবে ।

বাবাজী । আচ্ছা আইন শব্দের অর্থ কি ?

আনন্দ । আইন শব্দের প্রকৃত অর্থ উচিত বা জায় ।

বাবাজী । বেশ ! রাজপুরুষগণ যে আমাদের দেশে এই আইনের প্রচলন করিয়াছেন, ইহা কি তাঁহাদের নিজেদের কল্পিত, না আমাদের কোনও শাস্ত্রসম্মত মত ?

আনন্দ । আইনটী কাহারও কল্পিত নহে সত্য ; কারণ মনু, মিতাক্ষরী, দায়ভাগ প্রভৃতি হিন্দুদিগের স্মৃতিশাস্ত্র হইতে অভিপ্রায় লইয়া আইন প্রণয়ন করা হইয়াছে ।

বাবাজী । স্মৃতিশাস্ত্রকে ব্যবস্থা শাস্ত্র বা ধর্ম্মশাস্ত্র বলে । ধর্ম্ম শব্দ যে স্থানে থাকে, সে স্থানে কখনও প্রবঞ্চনা, কপটতা, হলচাতুরী প্রভৃতি থাকিতে পারে না । বিচারালয়ের নাম ধর্ম্মস্থান । বিচারকের নাম ধর্ম্ম-অবতার ! এতগুলি ধর্ম্ম শব্দ যে স্থানে, সে স্থানে মিথ্যা প্রবঞ্চনা কোথা হইতে আসিল ? উকীল ও মোক্তার শব্দের অর্থ সহায় ; অর্থাৎ

একটি অশিক্ষিত লোক রাজপুরুষের নিকট গিয়া তাহার নিজ মনোভাব ব্যক্ত করিতে অসমর্থ । এমন কি সে সম্পূর্ণ অপরিচিত ব্যক্তি, বিচারক যে কে, তা সে জানে না । হয় ত অপর কোনও ব্যক্তির নিকট নিজ মনোভাব প্রকাশ করিলে তাহার অনিষ্ট হইবার সম্ভাবনা ; একারণ সুকোশলী রাজা প্রজাদিগের অভাব দূরীকরণার্থ অশিক্ষিত আইনজ্ঞ অথচ রাজসরকারে সুপরিচিত বিশ্বাসী ব্যক্তির উপর এইরূপ একটা ক্ষমতা প্রদান করিয়াছেন যে, ইনি বাদী বা প্রতিবাদীর পক্ষ হইতে যাহা বিচারককে বুঝাইয়া দিবেন, সেই অনুসারেই তিনি বিচার করিবেন । বল, রাজা কি অভিপ্রায়ে উকীল মোক্তারের সৃষ্টি করিলেন ? তোমরা কিনা অর্থের লোভে নিজ নিজ ধর্মের প্রতি লক্ষ্য না করিয়া পরের অনিষ্ট করিতেছ ? কিন্তু দোষ দিতেছ আইনের বা বৃত্তির । কি ভয়ানক ব্যাপার ! একবার ভাবিয়া দেখ দেখি একটা উকীলের দোষে কতজন লোকের অনিষ্ট হইল ! প্রথম যিনি বিচার-আসনে উপবিষ্ট আছেন, তাঁহাকে মিথ্যা জিনিষটা একরূপভাবে বুঝাইয়া দেওয়া হইল যে, তিনি বহু অনুসন্ধান করিয়াও তাহার ভেদ বুঝিতে না পারিয়া অবশেষে সেই মিথ্যাকেই সত্যবোধ করিতে বাধ্য হইলেন ; কাজেই তাঁহার ষোর অপরাধ হইল । আবার এই বৃত্তির দ্বারা উপার্জিত ধনে যিনি ধনী এবং সেই ধনে যাহারা পরিপুষ্ট তাহাদের অসদৃশ্য গতি । আবার যিনি এই উকীলবাবুর সহায়তা পাইয়া অপরের বিভ্রাটহরণাদি করিতেছেন, তাঁহার সগোষ্ঠী এবং যাহারা সাক্ষ্য দিতেছে তাহাদের কি গতি হইবে ! মোটকথা—এই সমস্ত অনর্থের মূল একমাত্র উকীলবাবুর স্বার্থপরতা নয় কি ?

আনন্দ । তাই ত বাবা ! আমি একরূপ অসৎ কার্য আর করিতে ইচ্ছা করি না ।

বাবাজী ! কৈ বাবা ! এত ওকালতী ব্যবসায়ের কোনও দোষ
 হইল না । আইনে ত আর তোমাকে প্রবঞ্চনা করিয়া এতগুলি লোকের
 নরকের পথ পরিষ্কার করিতে বলে নাই ! বরং যাহাতে মিথ্যা ব্যবহার
 না হয় সেইরূপ চেষ্টা করিতেই বলিয়াছে । আমার মতে ধর্মপ্রবৃত্তি লইয়া
 যতই এইসমস্ত কার্যে প্রবৃত্ত হইতে পারা যায়, ততই ভাল । অর্থাৎ ততই
 অধর্মের প্রশ্রয় কম হয় । বেশ ত আজ হইতে তুমি মনে মনে দৃঢ় সংকল্প
 কর যে—“আমি কোনওরূপ মিথ্যা ব্যবহার করিব না । মিথ্যা মকদ্দমায়
 যদি বহু অর্থও পাই, তথাপি তাহা গ্রহণ করিব না । প্রাণপণে সত্যের
 দিকে অগ্রসর হইব ।” দেখিবে তোমার দিন দিন কত উন্নতি হইবে ।
 তবে প্রথম প্রথম একটু অভাব বোধ হইবে বটে ; কিন্তু সেই অবস্থায়
 একটু শোভা স্বরণ করিতে হইবে । হয় ত একজন একটা মিথ্যা মকদ্দমার
 জন্য পাঁচশত টাকা দিতে প্রস্তুত । তখন মনে হইতে পারে যে আমি হাতে
 পাইয়া এতগুলি টাকা পরিত্যাগ করিব ? এমনকি হয়ত অনেক আত্মীয়-
 স্বজন আসিয়া তখন উপদেশ দিবেন, “একি মহাশয় ! ব্যবসা করিতে
 গিয়া ওরূপ করিলে চলে কি ? এরূপ করিলে পসার থাকিবে কেন ?
 আপনার চিরদিনের বাধা মকেলগণ অল্প উকীলের হাতে যাইবে এটা কি
 ভাল ? ইত্যাদি” কিন্তু বাবা, সেই সময় যদি একটু ধৈর্য্য ধরিতে পার,
 তবে ভবিষ্যতে অর্থাৎ যখন প্রকৃত তোমার সত্যবাদিতা জগতে প্রকাশ
 পাইবে, তখন দেখিবে কত মকেল তোমার কাছে গড়াগড়ি যাইবে ।
 প্রভু তোমাকে চারিদিক হইতে এত অর্থ এত সম্মান প্রদান করিবেন যে,
 তোমার সে সমস্ত সামলান কঠিন হইবে । বাবা ! লোভের
 বশবর্তী হইয়া অধিক পরিমাণে রসগোল্লা খাইলে যখন অল্পশূল জন্মিবে,
 তখন রসগোল্লার দোষ দিলে চলিবে কেন ? দিবানিশি প্রভুর চরণে
 পূর্ণ-উপার্জিত পাপকর্মের জন্য ক্ষমা ভিক্ষা এবং ভবিষ্যৎ জীবনের জন্য

সত্যতা, শ্রাস্ত-পরায়ণতা, ধর্মনিষ্ঠা প্রভৃতি ভিক্ষা চাও । পিশাচপ্রবৃত্তি চরিতার্থ করার দরুণ আত্মমানি জন্মাইবার চেষ্টা কর, পরম শান্তিলাভ করিতে পারিবে । কর্মত্যাগ করিলেই যে সাধু হওয়া যায় একথা মনে করা ভুল । কপটতা পরিত্যাগ কর, ধর্মের ভান করিও না—ভিতর বাহির এক করিতে চেষ্টা কর, ভগবানে নির্ভর কর, কখনই অসৎ পথে পতিত হইবে না । ভ্রমবশতঃ অসৎ পথে গমন করিতে চাহিলেও নিশ্চয়ই প্রভু ফিরাইয়া আনিবেন ।

আনন্দবাবু এতক্ষণ চিত্রপুস্তলিকার দ্বায় স্থিরভাবে বাবাজী মহাশয়ের কথা শুনিতেছিলেন, আর এতদিন যে লোভের বশবর্তী হইয়াই এত অসৎ কার্য্য করিয়াছেন, এইটী ধারণা করিয়া মনে মনে নিজেকে বিচার দিতেছিলেন । যেমন বাবাজী মহাশয়ের কথা শেষ হইল, অমনি অভিশয় ব্যাকুলভাবে কাদিতে কাদিতে ইহার চরণতলে পতিত হইলেন । বাবাজী মহাশয়ও শশব্যস্তে উহাকে তুলিয়া আলিঙ্গন প্রদানে স্তম্ভ করতঃ কাছারিতে পাঠাইয়া দিলেন । এদিকে বথাসময়ে ঠাকুরের ভোগ লাগিল । ইহারাত্ত মধ্যাহ্নকোষ্ঠনাদি শেষ করতঃ প্রসাদাদি পাইয়া বিশ্রাম করিলেন ।



আনন্দবাবুর দীক্ষা ।

বাবাজী মহাশয়ের নিকট আনন্দবাবুর সর্বদাই আকার--সর্বদাই ঠিক বালকের ছায় কাগ্না । একদিন বিশেষ জেদ করিয়া বলিলেন, “আমাকে দীক্ষা প্রদান করিতে হইবে । আমাকে যদি নরককুণ্ড হইতে উদ্ধারই করিলেন, তবে আবার বাহাতে পতিত না হই সে চেষ্টাও ত করিতে হইবে ! আমার আজ দুইদিন হইতে রাত্রে কেবল মনে হয় বাবা আমাকে উপযাচক কোন কথা বলেন না কেন ? আমি যে পণ্ড সেই পণ্ডই রহিলাম । আমি যেন সর্বদা দেহকে অপবিত্র মনে করিতেছি । অশুভ হইয়া রহিলে ত আর ভগবৎ-উপাসনা হইবে না ! উপাসনা কাহাকে বলে বা উপাসনার ক্রম কি, কি উপায়ে ডাকিলে বা কোন্ পথে চলিলে সহজে ভগবৎ-পথে অগ্রসর হওয়া যায়, তাহাও ত আমি কিছুই জানি না । আজ আমাকে মন্ত্র প্রদান করিতেই হইবে ।”

বাবাজী মহাশয় আনন্দকে পরীক্ষা করিবার মানসে বৃহৎ হাসিয়া বলিলেন, “বাবা ! অত উৎসাহ কেন ? স্থির হও, ক্রমে ক্রমে হইবে ।”

আনন্দ । বাবা ! আর কেন আমার পরীক্ষা করিতেছেন ? আর কি সময় আছে ? আমি যে বাজে কাজে আমার জীবনের সমস্ত সময় কেন্দ্রন করিয়াছি, আর ত আমার সময় নাই । না জানি কোন্ সময় খালি হইয়া যাইবে । আর কেন বাবা ! আজই আমার পণ্ড দ্রুত করিয়া দিন । পতিত অধম সন্তানকে একবার কোলে লইয়া আবার ত্যাগ কেন ?

বাবাজী । বাবা ! ত্যাগ নহে, নিতাইচাঁদ তোমাকে ত্যাগ করিবেন

তাহাতে আমার কি ? তবে এ পুতুলকে নিমিত্ত না করিয়া অস্ত্র কাহার দ্বারা করিলেই ভাল হইত ।

আনন্দ । আজ্ঞে, ত্রিজগতে এমন মানুষ বা দেবতা নাই, যিনি এই পাষাণকে উদ্ধার করিতে পারেন । আমার বিশ্বাস, একমাত্র আমাকে উদ্ধার করিবার জন্যই বোধ হয় আপনার অবতারণা । নিতাই গৌর জগীশ মাধাইকে উদ্ধার করিয়া পতিত-পাবন হইয়াছিলেন ; কিন্তু আমার কাছে তাঁহারও পরাস্ত । আমার মনে ধারণা ছিল না যে আমার উদ্ধারকর্ত্তা কেহ আছেন । যেমন হিরণ্যকশিপুকে উদ্ধার করিবার জন্য নৃসিংহ অবতারণা হইয়াছিলেন, তেমনি আমাকে উদ্ধারের জন্য আপনার অবতারণা এটা ঐশ্বর্য্য সত্য ।

বাবাজী । পাগল ! অমন কথা বলিলে অপরাধ হয় । ‘বৃক্কদ্বারে কৃপা করেন ইহা তাঁহার গুণ ।’ যা হউক, যদি নিতাই কৃপা করেন, তবে কাল দেখা যাইবে ।

তিনিয়া আনন্দের আনন্দ আর ধরে না । ক্রমগতি নবদ্বীপদাদার নিকট গিয়া বলিলেন, “দাদা ! বাবা কাল মন্ত্র দেওয়ার কথা বলিলেন ; আমার কিরূপ কি বোগার করিতে হইবে ?” দাদা হাসিতে হাসিতে বলিলেন, “কি আর করিতে হইবে ! গলায় মালা পরিতে পারিবে কি ?”

আনন্দ । দাদা ! আমিও কিছুই পারি নাই বা পারিবও না, তোমার যদি কৃপা-কটাক্ষ হয়, তবে এমন কি কার্য্য আছে যে না হইতে পারে ?

নবদ্বীপ । ভাই ! আমি কে ? যদি নিতাই করেন করিবেন । গলায় মালা এবং মস্তকে শিখা এ ত চাই আর কি বলিব ? সন্দের বাহা কিছু দাদাকে জিজ্ঞাসা করিও ।

‘আইনু’ সেদিন গত হইল । পরদিন প্রাতে উঠিয়া আনন্দবাবু

চাকরকে হুকুম দিলেন, “বাবা ! একটা পরামাণিক ডেকে নিয়ে আয়ত ?
 গুনিবামাত্র চাকর পরামাণিক ডাকিয়া আনিলে আনন্দবাবু পরামাণিককে
 বলিলেন, “বাবা ! আমার মাথায় বেশ বড় একটা শিখা রাখিয়া মাথা
 মুড়াইয়া দেও ত ।” পরামাণিক গুনিয়া বলিল, “আজ্ঞে বাবু ! যথার্থই
 বলিতেছেন, না বৈরাগীদিগকে ঠাট্টা করিতেছেন ?”

আনন্দ । কেন বাবা ! আমার কি ঐরূপ বেশ হওয়া অসম্ভব মনে
 করিতেছ ?

পরামাণিক । বাবু ! আমি আপনার চাকর, কি আর বলিব ? আপনার
 ওরূপ বেশ হওয়া ত দূরের কথা, আপনার মুখে ঐরূপ কথাটা শুনাও
 অসম্ভব মনে করিতেছি ।

আনন্দবাবু সজলনয়নে গদগদকণ্ঠে বলিলেন, “বাবা ! মহতের কুপা-
 কটাক্ষে সম্পূর্ণ অসম্ভবও আজ সম্ভব হইয়াছে । আজ আমার পুনর্জন্মদিন ।
 আর কালবিলম্ব না করিয়া আমার মস্তক মুণ্ডন করিয়া দাও এবং তোমরা
 আমার আশীর্বাদ কর যেন ত্রিগুরুবৈষ্ণবপদে মতি ভক্তি থাকে ।

পরামাণিক করুণাভরে আনন্দবাবুর চরণ ধরিয়া কঁাদিতে কঁাদিতে
 বলিল, “বাবু ! আজ আমি ধন্য হইলাম । এমন মহাপুরুষ যে
 জগতে আছেন, একথায় আমাদের বিশ্বাস ছিল না । আজ আপনার
 রূপায় আমরা উহার দর্শন স্পর্শে কৃতার্থ হইলাম ।” বলিয়া আনন্দবাবুর
 আদেশ অনুসারে উহার মাথা এবং মুখ স্নান করিয়া দিল । আনন্দবাবু
 অতি সস্তর কাঠকুড়ি নদীতে স্নান করতঃ মুণ্ডিত মস্তকে নবদ্বীপদাদার
 চরণে সাষ্টাঙ্গ দণ্ডবৎ প্রণাম করিলে দাদা উহাকে শলব্যস্তে উঠাইয়া
 আলিঙ্গনদানে কৃতার্থ করিলেন । ইতিপূর্বে পুরী অবস্থানকালে বাবাজী
 মহাশয়ের জন্ম নূতন মালা প্রস্তুত হইয়াছিল ; কিন্তু ইনি তাহা পরেন
 নাই, উহা সজেই ছিল । ঐ নূতন মালা আনন্দকে দিবার প্রস্তাব হওয়ার

আনন্দবাবু “ও মালা! আমি পুরিব না” বলিয়া ক্রান্তপদে বাবাজী মহাশয়ের নিকটে গমনপূর্বক ইহার চরণতলে পতিত হইলেন ।

বাবাজী মহাশয় প্রথম আনন্দ বলিয়া চিনিতেই পারিলেন না । পরে বলিলেন—“এ কি ! তোমাকে এক্রপ করিতে কে বলিল ?

আনন্দ । বাবা ! কে আর বলিবে ? আপনি ভিন্ন আমার আর বলিবার কে আছে ? আমাকে আপনার গলার মালা দিতে হইবে ।

বাবাজী মহাশয় মুহু হাসিয়া বলিলেন, “কেন বাবা ! বেশ ত আহ, আবার মালা পরা কেন ? অনেক সময় সাহেবদের সহিত ব্যবহার করিতে হইবে, তাহারা হয় ত উপহাস করিবে ।

আনন্দ । বাবা ! সম্মানকে অমন করিয়া উপেক্ষা করিলে চলিবে কেন ? লোকের নিকট প্রতিষ্ঠার বা প্রশংসার আশায় এতদিন অনেক করিয়াছি ; কিন্তু কৈ শাস্তি ত পাইলাম না ! প্রকৃত পথও পাইলাম না । যদি আপনি প্রকৃত পথ দেখাইয়া নিঃপটে সেই পথে চলিবার শক্তি প্রদান করেন, তবে আমার বিশ্বাস আর কেহই উপহাস করিবে না । আমাদের অস্তঃকরণ দুর্বল ; তাই আমরা কোনও রাজা বা রাজপুরুষের সঙ্গে সাক্ষাৎ করিতে হইলে ভাল পোষাক পরিচ্ছদ পরিধান করিয়া যাই । এমন কি মালা তিলকাদি স্ব স্ব ধর্ম্মচিহ্ন পর্য্যন্ত গোপন করিতে চেষ্টা করি । কিন্তু ভাবিয়া দেখি না যে এই কপটতার জন্য আমি প্রভুর নিকট এবং সেই রাজা বা রাজপুরুষের নিকট এই উভয় দিকেই কত অপরাধী হইলাম । আমার যদি শ্রীগুরুপাদপদ্মে প্রকৃত নিষ্ঠা থাকে, আমি যদি নিঃপটভাবে প্রভুকে ডাকিতে পারি বা তদনুকূল বেশাদি করি তবে লোকে আমাকে উপহাস করিবে কেন ? করিলেও তাহাতে আমার আনন্দ বই নিরানন্দ হইবার সম্ভাবনা নাই ।

তিনি বাবাজী মহাশয় অভিশয় আনন্দিতভাবে আনন্দবাবুকে

আলিঙ্গনপূর্বক বলিলেন, “বাবা ! আজ আমি তোমার মুখে অপূর্ব নিষ্ঠা ও নির্ভরতার কথা শুনিয়া যে কত সুখ পাইলাম তা আর কি বলিব ? মনে স্থখ করিও না, আমি তোমার মুখে এই কথা শুনিবার জন্যই ঐরূপ-ভাবে বলিয়াছিলাম । তোমার সরলতা এবং নিষ্কপটভাবে আমি তোমার নিকট বিক্রি হইলাম । এখন আমি তোমার, তুমি যাহা ইচ্ছা করিতে পার ।” বলিয়া নিজের গলার পাঁচকণ্ঠি মালা ছিঁড়িয়া একজনকে বলিলেন, “আনন্দকে পরাইয়া তিলক করিয়া দাও ।” বাবাজী মহাশয়ের আদেশে আনন্দবাবুকে তিলক করিয়া মালা পরাইয়া দেওয়া হইল এবং বাবাজী মহাশয়ের গলায় ঐ নূতন মালা পরাইয়া দিবামাত্র ইনি নাম ধরিলেন । সঙ্গিগণ আসিয়া নামকীৰ্ত্তনে যোগ দিলেন, মাতামাতিভাবে উদ্গু কীৰ্ত্তন চলিতে লাগিল ।

যথাসময়ে বাবাজী মহাশয় আনন্দবাবুর কর্ণে মন্ত্র প্রদান করিলেন । অমৃতপানলে উহার হৃদয়-ক্ষেত্রের আবর্জনা দৃষ্ট এবং নয়নজলে বিধোত ও সরস হওয়ার আজ বীজ পাঁতত হইবামাত্রই অঙ্কুরিত হইয়া উঠিল—উহার দেহে সমকালীন অশ্রু, কম্প, পুলকাদি সাস্থিক বিকারসকল প্রকাশ পাইতে লাগিল । এতই অধৈর্য্য হইয়া পড়িলেন যে, উহাকে সামলান সুকঠিন হইয়া পড়িল । সঙ্গিগণ নামে উদ্গুত, আনন্দবাবু ভাবে উদ্গুত । আনন্দের আজ যেমন আনন্দ-সাগর উথলিয়া উঠিল । দুই বাহু উর্ধ্বে তুলিয়া বিভোর ভাবে নৃত্য করিতে করিতে হঠাৎ বৃহীত হইয়া ভূতলে পতিত হইলেন । দেখিয়া নবদীপদাদা প্রেমানন্দে উদ্গু নৃত্য করিতে লাগিলেন ! কাহারই বাহুবলি নাই । বাবাজী মহাশয় অর্দ্ধমুদ্রিতভাবে এক একবার ‘জয় নিতাই’ বলিয়া যেমন হুঙ্কার করিতেছেন, অমনি সংকীৰ্ত্তন-স্তবন অতি প্রবল ভাব ধারণ করিতেছেন । আনন্দবাবু কিন্তু অচেতন—দুইটা চক্ষু হইতে অবিরতধারে অশ্রু ঝরিতেছেন—

পুলকাবলি-বিভূষিত—মুখখানি রক্তবর্ণ এবং প্রফুল্ল । এক একবার চমকিত হইয়া উঠিতেছেন, আর একপভাবে কম্পিত হইতেছেন যে, লোক-সকল দেখিয়া অবাক্ । কিছুক্ষণ পরে বাবাজী মহাশয় উহার হাত দুইখানি ধরিয়া উঠাইলেন । আনন্দবাবু অর্ধবাহুদশা প্রাপ্ত হইয়া বাবাজী মহাশয়ের চরণ ধারণ পূর্বক কাঁদিতে লাগিলে—ইনি নানারূপ প্রবোধবাক্যে উহাকে আশস্ত করতঃ উহার হাত ধরিয়া প্রেমানন্দে উদ্ভগ্ন নৃত্য করিতে লাগিলেন ; আনন্দবাবুও মন্ত্রমুগ্ধের স্থায় বাবাজী মহাশয়ের সঙ্গে সঙ্গে নাচিতে লাগিলেন । আনন্দবাবুর অবস্থা দর্শনে আগন্তুক লোকসকল বিমুগ্ধ, স্তম্ভিত ও বিস্মিতভাবে মহাপুরুষের রূপার ধন্যবাদ দিতে লাগিল । কিছুক্ষণ কীর্ত্তনের পর বাবাজী মহাশয় নাম সমাপ্তি করিলেন ।

আনন্দবাবুর বৈঠকখানায় চারি হাত দীর্ঘ দুই হাত প্রস্থ একখানি আয়না আছে । বাবাজী মহাশয় আনন্দবাবুর হাত ধরিয়া উক্ত আয়নার সম্মুখে গিয়া দাঁড়াইলেন । অপূর্ব দৃশ্য ! আনন্দবাবু অতি দীর্ঘাকার গৌরবর্ণ পুরুষ, তাহাতে আজ মালা তিলক শিখা প্রভৃতি ধারণ এবং মস্তক মুগুন করার যেন সঙ্কল্পের বৃষ্টি হইয়াছেন । ইহাদের উভয়ের তাত্‌কালিক শোভার কথা ভাষায় বর্ণনা করা হুঃসাধ্য । যে একবার বাবাজী মহাশয়ের বামে আনন্দকে দেখিতেছে, সেই আনন্দে বিভোর হইয়া বাইতেছে । হঠাৎ বাবাজী মহাশয়ের মনে কি ভাবের উদয় হইল—নিজ বাম হস্তখানি আনন্দের স্বরূপে অর্পণ করিলেন ! চারিদিকে ভক্তগণ হরি হরি ধ্বনি করিয়া উঠিল । আজ আনন্দ সে আনন্দ নাই—আজ যেন অপ্রাকৃত আনন্দের বৃষ্টি হইয়াছেন ! ধন্য রূপা ! ধন্য মহাপুরুষের শক্তি প্রভাব ! আজ আনন্দের অবস্থা দর্শনে অতীতকালের রত্নাকর, অজামিল বা জগাই মাধাই উদ্ধারের কথা মনে উদয় হইতেছে । আহামরি ! প্রভুর নিত্য লীলা-খেলায় কি মাধুরী ! ইহা যেন উত্তরোত্তর বৃদ্ধি পাইতেছে । অজাপিছ

সেই লীলা করে গোরারায় । বরং প্রকট হইতে অপ্রকটে অধিক মাধুর্য্য—অধিক শক্তির বিকাশ । আমরা অন্ধ, বধির, অবিবাহী জীবঃ প্রত্যক্ষ দেখিয়াও দেখি না—গুনিয়াও গুনি না—বুঝিয়াও বুঝিতে চাই না । মহাহুভব ভক্তগণ একবার নিমিলিতনেত্রে আনন্দ মিত্রের তাত্‌কালিক অবস্থাটী ও মূর্ত্তিখানি মনে মনে ভাবিয়া দেখুন । যে আনন্দের প্রভাবে সহরের সাধু, বৈষ্ণব, ভিখারীদ্বীপ সশক্তিত—ভয়ে লুক্কায়িত, সেই আনন্দ আজ হাত তুলিয়া সংকীৰ্ত্তনে নৃত্য করিতে করিতে গড়াগড়ি দিতেছে । গলায় পাঁচকণ্ঠীমালা, কপালে হরিমন্দির তিলক, নয়নে অশ্রু, অঙ্গে পুলক ও কম্প ! যে ব্যক্তি সাধুবৈষ্ণব দেখিলে ভণ্ড বৈ বলিত না, সে আজ বৈষ্ণব নাম গুনিবা মাত্র শশব্যস্তে দণ্ডবৎ-নমস্কার-পরায়ণ ! ধন্য নবদ্বীপদাদা ! তোমার অহৈতুকী কৃপার জয় হউক । যে বৈঠকখানায় পরনিন্দা, পরচর্চা, পরচ্ছিন্নদ্রোহণ এবং পরবিস্তাপহরণ প্রভৃতির পরামর্শ হইত, সেই বৈঠকখানা আজ সংকীৰ্ত্তন-ধ্বনিতে পরিপূর্ণ । যে বৈঠকখানা বাবুভায়াদের জুতার শব্দ বা আলবোলায় শব্দে মুখরিত হইত, সেই বৈঠকখানা আজ খোল করতাল-ধ্বনিতে পরিপূর্ণিত । মুকং করোতি বাচালং পদ্বং লজ্জয়তে গিরিং ইত্যাদি বাহা আমরা গুনিয়াছি, আজ আনন্দবাবুর পরিবর্ত্তন দর্শনে সে সকল বাক্যও যেন সামান্য বলিয়া মনে হইতেছে । আনন্দবাবু এক একবার সেই আরনায় নিজমূর্ত্তি দেখিতেছেন, আর পূর্ব্বকার পোষাক পরিচ্ছদকে দ্বিভাষ দিতেছেন ছটী চোখের জলে মুখ বুক ভাসিয়া বাইতেছে । ক্ষণকাল পরে আনন্দবাবু কার্য্যাহুরোধে যেমন বাড়ীর মধ্যে গিয়াছেন, অমনি নবদ্বীপদাদা তথায় উপস্থিত হইয়া আনন্দবাবুর পত্নী ও চাকরানী প্রভৃতিকে জিজ্ঞাসা করিলেন, “আচ্ছা মা সকল ! তোমরা আজ তোমাদের বাবুর চেহারা দেখিয়া বখাৰ্ধ বল দেখি, আগের মূর্ত্তি ভাল ছিল না এই মূর্ত্তি ভাল ?” তখন সকলেই

একবাক্যে বলিয়া উঠিল, “বাবুর আগের মূর্তি দেখিলেই যেন আমাদের ভয় হইত, এমনকি কথা বলিতে সাহস হইত না। আর এ যেন মাধুর্য্যের মূর্তি। দর্শন মাত্রই তান্ময়াগিতে ইচ্ছা হয়। আনন্দবাবুর পত্নী আসিয়া নবদ্বীপদাদার চরণ ধারণ পূর্ব্বক কাঁদিতে কাঁদিতে বলিলেন, “দাদা ! আমি এমন কি অপরাধ করিলাম যে আমার উদ্ধার হইল না ? আমি কি এইরূপ পণ্ডই থাকিব ?” গুনিয়া নবদ্বীপদাদা গদগদকণ্ঠে বলিলেন, “ভয় কি ? পতিতপাবন অবতारे কেহই বঞ্চিত হইবে না।” এইরূপ ভাবে আশ্বাস প্রদান করিতে লাগিলেন। এদিকে ঠাকুরের ভোগরাগ শেষ হইলে সকলে মহাপ্রসাদ পাইয়া বিশ্রাম করিলেন। আনন্দবাবু বাবাজী মহাশয়ের অধরামৃত নিজে পাইলেন এবং বাটীস্থ সকলকে দিলেন। এইরূপভাবে প্রত্যহ বাবাজী মহাশয়ের, নবদ্বীপদাদার এবং বৈষ্ণবদিগের অধরামৃত ওচরণামৃত দ্বারা আনন্দবাবুর গৃহ পরিতৃপ্ত হইলে উহার প্রার্থনায় বাবাজী মহাশয় যথাসময়ে উহার পরিবারস্থ সকলকে মন্ত্রপ্রদান করিলেন। ক্রমে আনন্দবাবুর ভবনে সাত্ত্বিক আহার-ব্যবহার ও সাত্ত্বিক আচারাদি দর্শনে কটকবাসী লোকসকল বাবাজী মহাশয়কে বিশেষভাবে ভক্তি করিতে লাগিল।



সদলে পুরী প্রত্যাবর্তন ।

আনন্দ মিত্রের বাড়ীতে মাসাবধি কাল অতীত হইল। বাবাজী মহাশয় কোথাও যাইবার কথা বলিলেই আনন্দবাবু অশ্রুপূর্ণ নয়নে ইহার চরণভলে পতিত হইয়া বলেন, “বাবা ! আর কয়েক দিন থাকিতে হইবে।” এমন কি কেহ ইহাদিগকে নিমন্ত্রণ করিতে আসিলে আনন্দবাবু ব্যাকুলভাবে কাদিয়া ফেলেন। একদিন প্রাতঃকালে বাবাজী মহাশয় অতি গম্ভীরভাবে বসিয়া আছেন, এই সময় আনন্দবাবু দণ্ডবৎ প্রণাম করিবামাত্র ইনি বলিলেন, “বাবা ! আজ পুরী যাইতে হইবে। বহুদিন হইল জগন্নাথদেব দূরে রাখিয়াছেন ; আজ তাঁহার জগু মন বড়ই উথলা হইয়াছে। তুমি অতি সাবধানে থাকিবে, যতদূর পার সাধুর সঙ্গ করিতে চেষ্টা করিবে। অসত্য ব্যবহার, হিংসা, পরচর্চা, পরহিদ্ভাষেবিত্তা, পরনিন্দা, পরের অনিষ্ট-চেষ্টা প্রভৃতি বর্জন করিবে। সর্বদা নামের আশ্রয় গ্রহণ করিয়া থাকিবে, কোনই বিপদ হইবে না। প্রভু মহলময় এ কথা সর্বদা স্মরণ রাখিবে।” ইত্যাদি নানারূপ সূত্ৰপদেশ দান করিতে লাগিলেন। আনন্দবাবু কিন্তু বাবাজী মহাশয় যে প্রথমে বলিয়াছেন, শ্রীধাম পুরী যাইতে হইবে ঐ কথাই চিন্তা করিতেছেন। গদগদকণ্ঠে বলিলেন, “বাবা ! আর কিছুদিন এই স্থানে অবস্থানপূর্বক অবোধ সন্তানকে একটু স্থির করিয়া গেলেই ভাল হইবে।” বাবাজী মহাশয় বলিলেন, “বাবা ! নিতাইচাঁদ সমস্ত পূরণ করিবেন। আজ আর বাধা দিও না।” বলিয়া সজ্জনকে পুরী যাইবার জগু প্রস্তুত হইতে আদেশ করিলেন। এদিকে আগন্তুক ভক্তবৃন্দের নিকট বিদায় গ্রহণ পূর্বক আনন্দবাবু সমাপনাগ্নে মহাপ্রসাদ পাইয়া কিঞ্চিৎ বিশ্রাম করিলেন।

অপরাত্নে ত্রীধাম পুরী গমন করিবার মানসে ষ্টেশনান্তিমুখে রওনা হইলেন । আনন্দবাবু সেদিন আর কাহারো যান নাই ; সুতরাং ইহাদের সঙ্গে সঙ্গে ষ্টেশনে চলিলেন । যথাসময়ে ষ্টেশনে পৌঁছিয়া টিকিট করা হইলে আনন্দবাবু বাবাজী মহাশয়ের ত্রীচরণ ধরিয়া কাদিতে কাদিতে বলিলেন, “বাবা ! আমি কিছুতেই থাকিতে পারিব না । আমাকে আপনার সঙ্গে লইতে হইবে ।” বাবাজী মহাশয় নানারূপ প্রবোধবাক্যে উহাকে আশ্বস্ত করতঃ কয়েকদিন পরে একবার পুরী যাইবার আদেশ করিয়া ট্রেনে উঠিলেন । যথাসময়ে ট্রেন ছাড়িয়া দিলে আনন্দবাবু হুঃখিত-চিত্তে নিজ বাসায় প্রত্যাবর্তন করিলেন বটে ; কিন্তু তাঁহার প্রাণ সেই ট্রেনে উঠিয়া সেই মধুময় সঙ্গে চলিয়া গিয়াছে । বাড়ীতে আসিয়া বৈঠকখানায় শয়ন করিয়া রহিলেন । জীপুত্রাদি তাঁহাকে আনমনা করিবার চেষ্টা করিতে লাগিল, কিন্তু তাঁহার সেই বিরহ ব্যাধি যেন ক্রমেই প্রবল হইতে লাগিল । এদিকে যথাসময়ে গাড়ী আসিয়া পুরী উপস্থিত হইলে বাবাজী মহাশয় সদলে অবতরণ পূর্বক ঝাঁজপীটা মঠে আসিয়া পহুঁছিলেন ।

প্রাণবল্লভ মঠ প্রাপ্তি ।

পুণীতে আজ হইতে আবার নূতন আনন্দ চলিতে লাগিল । বাবাজী মহাশয় ত্রীশ্রীজগন্নাথদেবের মন্দিরে প্রত্যহ সংকীৰ্ত্তন করিয়া নাম করিতে করিতে সমুদ্রস্নান ও পরিক্রমা করিতে লাগিলেন । পুরীবাসী পাণ্ডা পূজারীগণ বাবাজী মহাশয়ের প্রতি এতই আকৃষ্ট হইয়া উঠিয়াছিল যে ইনি উপস্থিত না থাকিলে তাঁহারা যেন একটা বিশেষ অভাবই বোধ করেন । এমন কি স্পষ্টই বলেন, “দেখুন আপনি না থাকিলে জগন্নাথকে আমাদের কাঁকা

কাকা বোধ হয় । আমাদের বিশ্বাস, জগন্নাথ আপনাকে পাইলে বড়ই সুখী থাকেন ।” এইরূপ পরমানন্দে দিন অতিবাহিত হইতে লাগিল । একদিন উকীল শ্রীযুক্ত বাবু প্রাণবল্লভ পোষ মহাশয় বাবাজী মহাশয়কে ডাকাইয়া বলিলেন, “বাবা ! আমার শরীরটা তত ভাল নয় । আমার ইচ্ছা আমরা স্বামী জী উভয়ে আপনার নিকট শিক্ষা গ্রহণ করি । অতএব আমার এই বৃদ্ধ অবস্থার অসুযোগটা আপনাকে রক্ষা করিতেই হইবে । কবে দিন ধার্য্য করিবেন আমাকে আদেশ করুন ।”

বাবাজী । বাবা ! আমি কি বলিব ? কোন্‌ শুভ মুহূর্ত্তে এ কাঠের পুতুলকে নিমিত্ত করিয়া আপনাকে রূপা করিবেন নিতাইচাঁদ জানেন ।

প্রাণবল্লভ । বাবা ! আপনি বাহাই কেন বলেন না, আমি পাঞ্জি দেখিয়াছি কাল বেশ ভাল দিন আছে ; অতএব কাগই করিয়া দিতে হইবে ! তবে কি কি যোগাড় করিতে হইবে আমার আদেশ করুন ।

বাবাজী । বাবা ! এ সমস্ত কার্য্যে একমাত্র ভগবদারাদনা ব্যতীত আর কিছুই প্রয়োজন হয় বলিয়া আমার ধারণা নাই । আপনি শিক্ষিত লোক, আপনিই ভাবিয়া দেখুন, প্রভু ভাবগ্রাহী, একমাত্র ভাব ভিন্ন তিনি আর কিছু আমাদের নিকট চান কি ? বাহার যেরূপ প্রাণের ভাব তাহাকে ঠিক সেইরূপ ভাবে রূপা করেন । আচ্ছা তিনি যেরূপ করাইতে ইচ্ছা করেন করুন ।

প্রাণবল্লভ । আমার ইচ্ছা মঠে যে কয়েক বৈষ্ণব আছেন, সকলে কাল এই স্থানে প্রসাদ পান ।

বাবাজী । বেশ, আপনার যেরূপ ইচ্ছা তাহাই হইবে । তবে জগন্নাথদেবের মহাপ্রসাদ ত দিবসে পাওয়া কষ্ট ।

প্রাণবল্লভ । না, পূজারী দ্বারা এইস্থানে ঠাকুরের ভোগের আয়োজন করিয়া দিলে কোনও আপত্তি আছি কি ?

বাবাজী ! না বাবা ! আপত্তি আর কি ? তবে পূজারীটী একটু সম্প্রদায়ী দীক্ষিত ও সদাচারী হইলেই হইবে ।

এই বলিয়া বাবাজী মহাশয় চলিয়া গেলেন । প্রাণবল্লভ বাবু সেইরূপ চেষ্টা করিয়া সমস্ত যোগার করিতে লাগিলেন । পরদিবস অতি প্রত্যুষে রাত্রি আরম্ভ হইল । বেলা দশটার সময় বাবাজী মহাশয় নামকীৰ্ত্তন করিতে করিতে তথায় গিয়া উপস্থিত হইলেন । প্রাণবল্লভবাবু দণ্ডবৎ প্রণামপূর্বক করষোড়ে ইহাদিগকে বৈঠকখানায় বসাইলেন । নামকীৰ্ত্তন হইতে লাগিল । আনন্দের অবোধি নাই । অনেক শিক্ষিত উকীল মোক্তারগণ আসিয়াছেন । সকলেই অত্যন্ত আনন্দ পাইলেন । এদিকে বাড়ীর মধ্যে একটি ঘরে নানাবিধ পূজার দ্রব্য আয়োজন করা হইয়াছে ! ভক্তের বাসনামুসারে বাবাজী মহাশয় সেই গৃহে প্রবেশ করিলেন । বাহিরে নাম হইতে লাগিল । কিছুক্ষণ পরে প্রাণবল্লভবাবু এবং তাঁহার স্ত্রী বাবাজী মহাশয়ের আদেশক্রমে সেই গৃহাভ্যন্তরে প্রবেশ করিলে বাবাজী মহাশয় তাঁহাদিগকে মন্ত্র প্রদান করিলেন । বাড়ীর একটি চাকরাণী এবং আরও তিন চারিজন লোকও ঐ সঙ্গে মন্ত্রগ্রহণ করিল । যথাসময়ে সংকীৰ্ত্তন সমাপনান্তে মহাপ্রসাদ গ্রহণপূর্বক সকলে নাম করিতে করিতে বাসায় প্রত্যাবর্তন করিলেন ।

এইরূপে দিনের পর দিন ব্যয় একদিন সংবাদ আসিল, প্রাণবল্লভবাবুর শরীর বড়ই কাতর । বাবাজী মহাশয় উহাকে দেখিতে গেলেন তিনি বলিলেন, “দেখুন, আমার বড়ই অভিনায যে আমার এই বাড়ীটী ঐশ্বরীরাধাকান্ত জীউকে অর্পণ করিয়া আমি ভেদ গ্রহণ করি । কারণ আমার বিশ্বাস, আমি আর বেশী দিন বাঁচিব না ।” বাবাজী মহাশয় বলিলেন, “কেন আপনাকে স্ত্রী যখন বর্তমান আছেন, তখন এত উদ্ভঙ্গ হইবার প্রয়োজন কি ?” প্রাণবল্লভবাবু বলিলেন, “স্ত্রীর জন্ত দেশে সম্পত্তি

আছে, আমার স্বেপার্জিত সম্পত্তি আমি নিজহাতে ভগবৎউদ্দেশ্যে দান করিয়া যাইব এই অভিলাষ।” উহার স্ত্রীও এই কথায় সম্মতি প্রকাশ করতঃ বিশেষ উৎসাহের সহিত বাড়ীটা লেখাপড়া করিয়া দিলেন। চারি পাঁচ দিন পরেই প্রাণবল্লভবাবুর দেহ ক্রমে অপটু হইতে লাগিল। কাজেই তাঁহার প্রার্থনামুসারে বাবাজী মহাশয় তাঁহাকে ভেক দিলেন। প্রভুর ইচ্ছায় ভেক গ্রহণের কয়েকদিন পরেই তিনি ইহধাম পরিত্যাগ করিলেন! তাঁহার স্ত্রী তাঁহার মহোৎসবাদি করিয়া কিছুদিন পরে দেশে গমন করিলেন। বাবাজী মহাশয় ঐ স্থানটির নাম রাখিলেন **প্রাণবল্লভ মঠ**। স্থানটি অতি মনোরম দেখিয়া প্রায় অনেক সময় বাবাজী মহাশয় গিয়া ঐ মঠে থাকেন। এমন কি এক একদিন জগন্নাথ দর্শন করিয়া আসিবার সময় হয় ত রাত্রে ঐ মঠেই শয়ন করিয়া থাকিতেন।

গদাধরদাসের পুনর্জন্ম ।

একদিন বাবাজী মহাশয়ের মনে কি খেয়াল উদয় হইল—ললিতা দাসীকে বলিলেন, “দেখ, কাল অনেক বাবু ভক্তদিগকে প্রসাদ পাইবার জন্য বলিব মনে করিয়াছি; অতএব যাতে খুব শীঘ্র শীঘ্র ঠাকুরের ভোগের যোগাড় হয়, সেইরূপ বন্দোবস্ত করিতে হইবে।”

ললিতা।। আজ্ঞে কত লোক হইবে ?

বাবাজী।। লোকের হিসাবে তোমার কোন প্রয়োজন নাই। তুই মন কৃষ্ণভোগ চাউলের অন্ন হইবে এবং সেই পরিমাণে অন্নাচ্ছ দ্রব্য চাই। একা তোমাকে রান্না করিতে হইবে। হোলার ডাইল, আলুর এবং হানার রস প্রভৃতি চারি পাঁচখানা তরকারী ও নুচি পায়স হইবে।

ললিতা । রাগার জন্ত আমার সহিত আর একজনকে না দিলে বেলা অতিরিক্ত হইয়া বাইবে যে ।

বাবাজী মহাশয় নানারূপ আপত্তির পর অগত্যা কুমুমমঞ্জরী দাসীকে সঙ্গে লইয়া দশটার সময় ভোগের ব্যবস্থা করিতে বলিলেন । ললিতা দাসী বাজার হইতে সমস্ত জিনিষ পত্র যোগাড় করাইতে লাগিলেন । সেদিন রাত্রে সদলে বাবাজী মহাশয়ের বড় হরিশ বাবুর বাড়ীতে নিমন্ত্রণ । এদিকে বৈকাল বেলা হইতে চাঁল ডাল প্রভৃতি আমানিয়া হইতে লাগিল । সন্ধ্যার সময় রাখাকান্ত দেবের আরাতি দর্শন করিয়া সকলে পত্রতে বাইবার উদ্যোগ করিতেছেন, এই সময় বাবাজী মহাশয়ের শিষ্য গদাধর দাস নামক জাজপুর নিবাসী একটা বুদ্ধ বৈষ্ণব মঠের ইন্দারার নিকট হইতে চৌকর করিয়া বলিলেন, “বাবা ! আমার সর্পাঘাত হইয়াছে, প্রাণ যায় আমার রক্ষা করুন ।” শুনিয়া সকলেই শশব্যস্তে সেস্থান হইতে বুদ্ধকে ধরিয়া আনিলেন । অঙ্গনে আসিতে না আসিতেই বুদ্ধ বাবাজী কেমন এক প্রকার হইয়া পড়িলেন—উঁহার বর্ণ নীল হইয়া গেল—হস্ত পদের সন্ধিসকল স্নগ্ধ হইল—জিহ্বা প্রায় পাঁচ অঙ্গুলি পরিমাণে বাহির হইয়া পড়িল । পূজাপাদ অবধৌত জ্ঞানানন্দ স্বামীজীর শিষ্য গোবিন্দানন্দ পরিত্রাজক ও কৃষ্ণানন্দ স্বামীজী একগোছা পাটের দ্বারা উঁহার পাস্বের গোছা বঁধিয়া দিলেন । বাবাজী মহাশয় উঁহার অবস্থা দর্শনে সকলকে নাম করিতে বলিয়া উঁহার পায়ের বঁধন খুলিয়া দিলেন । বঁধন খুলিয়া দিবামাত্র সে একেবারে অচৈতন্য হইয়া পড়িল । উপস্থিত সকলেই বিমনা । বাবাজী মহাশয় গদাধরকে সংকীর্ণনের মধ্যস্থলে শয়ন করাইয়া খুব জোরে নাম ধরিলেন । ক্রণকাল মধ্যে নামের এক অপূর্ণ রোল উঠিল চারিদিকের লোকসকল চুষকাকুট লোহের জায় আকুট হইতে লাগিল । ঠাকুরে অঙ্গনমধ্যে তিলার্দ্ধ স্থান নাই । বড়দূর পর্য্যন্ত

নামের ধ্বনি গিরাছে, ততদূর হইতে লোকসকল আসিয়া উপস্থিত হইতে লাগিল। সংকীৰ্ত্তনকারিগণ ঠিক আলাতচক্রের জায় ভ্রমণ করিতে লাগিল। সকলেরই মনের ধারণা বুদ্ধ গদাধর দাস মানবলীলা সম্বরণ করিয়াছেন। বাবাজী মহাশয় সংকীৰ্ত্তনের মধ্যে ভ্রমণ করিতে করিতে গদাধর দাসের মস্তকের উপর বাম পদ দ্বারা সজোরে এক লাথি মারিয়া আবার ভ্রমণ করিতে লাগিলেন। পদস্পর্শ পাইবামাত্র গদাধরের যেন অবস্থা পরিবর্তন হইতে লাগিল। কৃষ্ণানন্দ স্বামীজী একটু বিস্মিত হইয়া কেবল বাবাজী মহাশয়ের দিকে লক্ষ্য করিতেছেন, এমন সময় অলক্ষিত ভাবে পুনর্বার আবার বাবাজী মহাশয় গদাধরের মস্তকে এক পদাঘাত করিলেন। যেমন পদাঘাত অমনি গদাধর শব্দবাস্তে উঠিয়া কেবল বাবাজী মহাশয়কে অন্বেষণ করিতে লাগিলেন। বাবাজী মহাশয় কিন্তু এবার সংকীৰ্ত্তনের মধ্যস্থানে গিয়া উল্লসিত নৃত্য করিতেছেন। গদাধরদাস স্রোতঃ পাইয়া বাবাজী মহাশয়ের শ্রীচরণ ধারণ পূর্বক রোদন করিতে লাগিলেন। ক্রমে বাবাজী মহাশয় উহাকে স্থির করতঃ তুলিয়া কীৰ্ত্তনে নাচিতে বলায় তিনি অতি অপূর্বভাবে নৃত্য করিতে লাগিলেন। সকলে দেখিয়া অবাক্! যে গদাধর দাস কখনও এক পা নৃত্য করিতে জানেন না, তিনি আজ এমন সুমধুর ভাবে নৃত্য করিতেছেন যে, সকলের বিশ্বয় উৎপাদন করিয়া দিতেছেন।

কিছুক্ষণ পরে নাম সন্ধ্যাপ্ত হইল। তখন গদাধর দাস কাদিতে কাদিতে বলিতে লাগিলেন, “বাবা! আজ আমার নির্দোষ মৃত্যুদিন ছিল। আমার একখানি কোলী আছে, ঐ কোলীখানির ফলাফল সমস্ত সত্য হয়। তাহাতে লেখা আছে একষট্টি বৎসর বয়সে সন্ধ্যাকালে দক্ষিণ পায়ের পঞ্চাৎ ভাগের শিরার উপর সর্পাঘাত হইয়া প্রাণ বহির্গত হইবে। আমি দেশে অনেক জ্যোতির্বিৎ পণ্ডিতদিগকে উহার প্রতিকার করিবার

অল্প অমুরোধ করিয়াছিলাম ; কিন্তু সকলেই বলিয়াছিলেন যে তোমার আর ভোগকাল নাই । ঐ একবৃষ্টি বৎসরই শেষ ভোগ । তাই আমি সংসার আশ্রম পরিত্যাগ করিয়া আপনার আশ্রমে আশ্রয় গ্রহণ করিয়াছিলাম । আমার দিনটী ঠিক মনে ছিল ; কিন্তু আমি কাহাকেও কিছু বলি নাই । আজ যেমন ইন্দারার কাছে গিয়াছি, অমনি কোথা হইতে ঐ সর্প আসিল ভগবান্ জানান—ঠিক দক্ষিণ পায়েই সেই নির্দিষ্ট স্থানে আঘাত করিল । আমি তখনই বুঝিলাম যে আমার জীবন এই পর্য্যন্ত । কি আশ্চর্য্য ! আপনি আমাকে দৈবের অগোচর ভাবে বাঁচাইলেন !”

বাবাজী । পাগল ! ও কথা বলিতে নাই । নাম নামী অভিন্ন ; এই নাম হইতেই তোমার সর্ব-আপদ শাস্তি হইয়াছে ।

গদাধর । বাবা ! আমি ত প্রত্যক্ষ দেখিলাম, আপনি আমাকে ফিরাইয় আনিলেন । আমি আপনার ওকথায় ভুলিব কেন ?

বাবাজী । বাবা ! প্রভুর কার্য্য দাসের উপর আরোপ করিতে নাই ; উহাতে অপরাধ হয় ।

গদাধর । আমি যদি প্রত্যয়বাক্য বলি তবে ত আমার দোষ হইবে ?

বাবাজী । তোমার সেই কোষ্ঠীখানা আছে কি ?

গদাধর । আজ্ঞে আছে বই কি ।

বাবাজী । আচ্ছা কাল দেখা যাইবে । তুমি সন্ধ্যাভি নিমন্ত্রণ যাইবে কি ?

গদাধর । আজ্ঞে আমি আপনার, এ দেহ আপনার, বাবা অমর করেন তাহাই করিব ।

বাবাজী । তবে চল, মহাপ্রসাদ পাইলে ভগবান্ দৈবের কৃপায় তোমার সমস্ত ভাল হইয়া যাইবে ।



এই বলিয়া নাম করিতে করিতে বড় হরিশবাবুর বাজী মহাপ্রসাদ পাইতে গেলেন । গদাধরও সেই সঙ্গে গেল । পরদিবস প্রাতে একজন উড়িষ্যাবাসী ব্রাহ্মণকে ডাকাইয়া তাঁহা দ্বারা গদাধর দাসের কোষ্ঠী গণনা করান হইল । বাস্তবিক গত রাত্রের ঘটনা আশুপূর্ব্বিক সমস্ত উহাতে লেখা আছে । ঐ দিনের পর আর উহার আশুকাল নির্ধারণ করা হয় নাই । সকলে অবাক্ ! এরূপ কোষ্ঠীর ফল কেহ কখন দেখিয়াছেন কি না সন্দেহ । গদাধরের সেই ক্ষতস্থানে একটু মাত্র বেদনা তিন চারি দিন পর্য্যন্ত ছিল ; কিন্তু বাবাজী মহাশয়ের দুইটা চক্ষু রক্তবর্ণ এবং মস্তিষ্ক এতই গরম হইল যে, তিনবার স্নান করিয়াও রাত্রে নিদ্রা হয় না । নানারূপ বস্ত্রে তিন দিন পরে শরীর সুস্থ হইল । উক্ত গদাধর দাস দুই বৎসর পুরীতে থাকিয়া বাবাজী মহাশয়ের আদেশক্রমে শ্রীধাম বৃন্দাবন শ্রীরাধাকুণ্ডে বাস করিলেন । তথায় আড়াই বৎসর কাল জীবিত থাকিয়া পরে শ্রীরাধাকুণ্ডে দেহ রক্ষা করিলেন ।

অটলদাসের সহিত মিলন ।

একদিন বেলা আন্দাজ বারটার সময় একটি গৌরবর্ণ যুবক আসিয়া মঠে উপস্থিত হইল । যুবকটি শিক্ষিত বলিয়া বোধ হয় ; কিন্তু কি যেন অন্বেষণ করিতে আসিয়াছে । কাহাকেও কিছু বলা কথা নাই—কেবল সকলকে জিজ্ঞাসা করিতেছে, এ আশ্রমের কর্তা কে ? সকলেই বলিতেছেন, “আপনি বিশ্রাম করুন—মহাপ্রসাদ গ্রহণ করুন, কর্তা আসিলে দেখা হইবে ।” যুবক কিন্তু তাহাতে তত রাজি নয় । কি করে অগত্যা জ্ঞান করিয়া মহাপ্রসাদ পাইল । বাবাজী মহাশয়ের সে দিন অস্ত্রস্থলে নিমন্ত্রণ থাকায় তথায় গমন করিয়াছিলেন । বেলা অনুমান চারিটার সময় আশ্রমে আসিয়া উপস্থিত হইলেন । একজন আশ্রমবাসী, আগন্তুক যুবকটিকে বাবাজী মহাশয়ের পরিচয় দিলেন । যুবকটি তখন ইহাকে দণ্ডবৎ প্রণাম করিয়া সম্মুখে উপবেশন করিল । বাবাজী মহাশয় জিজ্ঞাসা করিলেন, “বাবা ! তোমার নাম নাম কি ?”

যুবক । আমার নাম অনাথবন্ধু দাস ।

বাবাজী । তোমার নিবাস ?

অনাথ । আজ্ঞে কলিকাতা ভবানীপুর ।

বাবাজী । কোন চাকরী করিয়া থাক কি ?

অনাথ । আজ্ঞে আমি বি, এ পাশ করিয়া আর কোন চাকরী করি নাই, শুধু কি করাইবেন তাহাও জানি না । সম্প্রতি আমার গুরুদেব শ্রীদীনবন্ধু কাব্যভীর্ষ মহাশয় আমাকে পাঠাইয়াছেন ! তাঁহার তৃতীয় ভ্রাতৃ সঙ্গার আশ্রম পরিত্যাগ করিয়া নাকি পুরীধামে আপনার নিকট

আছেন। তাই আপনার নিকট আসিরাছি। আপনিই কি এই আশ্রমের কর্তা ?

বাবাজী। বাবা ! তুমি শিক্ষিত, তোমার ঐক্লপ কথা বলা উচিত হয় নাই ; কারণ জীব ভগবানের ক্রীড়ার পুতুল। জীব কখনও কর্তা হইতে পারে না জোর করিয়া কর্তা সাজিলেও সেটা ভুল।

অনাথ। কেন ? আমাদের যে কতকগুলি স্বাধীন শক্তি আছে, তদ্বারা আমরা কি স্বাধীন হইয়া কার্য্য করিতে পারি না ?

বাবাজী ! বাবা ! আমাদের কি কি স্বাধীন বৃত্তি বা শক্তি আছে, যা তুমি বুঝেছ একবার আমাকে বুঝাইয়া দাও দেখি !

অনাথ। কেন ? আমরা ইচ্ছা করিলে অপরের উপকার করিতে পারি, আবার অনিষ্টও করিতে পারি : জ্ঞান-উপার্জন, তীর্থপর্য্যটন, অর্থাদিসংগ্রহ, সদ্ব্যয় বা অসদ্ব্যয় ইত্যাদি প্রত্যেক কার্য্যের মধ্যেইত দুইটা শক্তি অর্থাৎ ভগবদ্বিচ্ছা এবং নিষেচ্ছা বা ক্রিয়া প্রত্যক্ষ রহিয়াছে।

বাবাজী। জীব সচ্চিদানন্দ পরমপুরুষের অণু অংশ লাভ করিয়াছে, বাহার বলে 'আমি আমার' এই প্রভুত্ব জ্ঞান করিয়া থাকি। ভগবানের বেক্লপ শক্তি আছে জীবেরও সেইরূপ শক্তি আছে। ভগবান্ বাহা বাহা করিতে পারেন, জীবও সেই সমস্ত করিতে পারে। তবে তিনি পূর্ণ পূর্ণরূপে করিতে সমর্থ ; জীব অণু পরমাপুরুষে করিতে সমর্থ। কিন্তু বুঝিয়া দেখ, এই যে জীবের স্বাধীনতা বা ঈশ্বরত্ব, অথবা ইচ্ছাশক্তি ইহা সম্পূর্ণ পরাধীন কি না। আমি ইচ্ছা করিলেই কোনও কার্য্য করিতে পারি কি ? ইচ্ছা করিলেই যদি অর্থ সংগ্রহ করিতে পারা যাইত তবে লোক দরিদ্র থাকিত কি ? ঋণপুরুষ সঙ্কষণে সম্ভান উৎপত্তি হয় ; কিন্তু কত সোক বহু বহু চেষ্টা করিয়াও একটা সম্ভান উৎপাদন করিতে পারিতেছে না কেন ? আবার হস্ত একহাতে সম্ভান না হইবার জন্য

কত চেষ্টা করিতেছে ; কিন্তু কই কৃতকার্য্য হইতে পারিতেছে কি ? একজন বিজ্ঞা শিক্ষা করিবার জন্য কত চেষ্টা করিতেছে—কত অর্থব্যয় করিয়া মাটির পণ্ডিত রাখিতেছে ; কিন্তু তাহার কোনই জ্ঞান হইতেছে না ; আবার এক জনের হয়ত সামান্য চেষ্টাতেই সুন্দর জ্ঞান জন্মিতেছে । আমরা যে দেহ দ্বারা অপরের ইষ্ট অনিষ্ট করিব, সেই দেহের উপর আমাদের নিজ কর্তৃত্ব আছে কি ? তুমি ইচ্ছা করিয়া তোমার বালা বা কৈশোর অবস্থা নিয়মের অতিরিক্ত দুইদিন রাখিতে পারিতে কি ? আবার এই যৌবনকাল নির্দিষ্ট সময়ের অতিরিক্ত একমুহূর্ত্তও রাখিবার শক্তি আছে কি ? যখন দাঁত উঠে নাই তখন বহুচেষ্টা করিয়া উঠাইবার কাহারও শক্তি ছিল কি ? আবার যখন উঠিল তখন বাধা দিবার বা যখন পড়িয়া যাইবে তখন রাখিবার ক্ষমতা কাহারও আছে কি ? এইরূপ প্রত্যেক কার্য্যে জীবের কোনও স্বাধীনতা নাই । আপাততঃ দেখিলে বোধ হয় যেন জীবই কার্য্য করিতেছে ; কিন্তু ভাবিয়া দেখিলে সে ভ্রম থাকিতে পারে না । আমি হয়ত একজনের ইষ্ট বা অনিষ্ট করিতে প্রস্তুত হইয়াছি, ঠিক সেই মুহূর্ত্তেই যদি আমার দেহ অচল হয় বা প্রাণবাহ্য বাহির হইয়া যায়, কি করিতে পারি ? তবেই বল এই স্বাধীনতাকে স্বাধীনতা বলিবে, না সম্পূর্ণ অধীনতা বলিবে ? এই সমস্ত বিষয় পুঙ্খানুপুঙ্খরূপে বিচার করিয়াই আচার্য্যগণ বলিয়াছেন—

প্রকৃতেঃ ক্রিয়মাণানি গুণৈঃ কর্ম্মাণি সর্ব্বশঃ ।

অহঙ্কারবিশৃঙ্খল্য কৰ্ত্তাহমিতি মজ্জতে ॥

‘জীব ক্রিয়ানিত্যদাস ।’ জীবের বিন্দুমাত্র নিজের কর্তৃত্ব নাই ।

অনাথ । জীবের স্বত্ত্ব কার্য্যকারিত্ব শক্তি না থাকিলেও মানসিক বৃত্তি ত আছে ! মানসিক ইচ্ছা ও আর কাহারই অধীন নহে ? যেমন কোলও বলবান্ জীব দুর্বল জীবের উপর অত্যাচার করিতেছে । সে

শারীরিক তাহার কোনওরূপ প্রতিকার করিতে না পারিলেও তাহার মানসিক ইচ্ছা ত নিশ্চয়ই হইতেছে ?

বাবাজী । / সঙ্কল্প-বিকল্পাত্মিক। বৃত্তির নাম মন এবং নিশ্চয়াত্মিক। বৃত্তির নাম বুদ্ধি। এই মন ও বুদ্ধি জড় পদার্থ। চৈতন্য শক্তি ভিন্ন উহারা কোনই কার্য করিতে সমর্থ হয় না। আমরা ব্রহ্মাঙ্ক জীব, সহজে সৰ্বশক্তিমান্ সৰ্বাস্তর্যামী সৰ্বব্যাপী ভগবৎসত্তা উপলব্ধি করিতে না পারিয়া মনের বা বুদ্ধির উপর আরোপ করিয়া থাকি। প্রকৃতপক্ষে তাহা নহে; জীবের যত কিছু কার্য ভগবৎসত্তার অধীন। চৈতন্যশক্তি না থাকিলে মন, বুদ্ধি বা ইন্দ্রিয়গণ কোনও কার্য করিতে সমর্থ হয় না।

অনাথ। অচ্ছা সংসার পরিত্যাগ করিয়া বৈরাগ্য না করিলে কি ভগবৎ-উপাসনা হয় না ?

বাবাজী। কে বলিল যে সংসার না ছাড়িলে ভগবৎপ্রাপ্তি হয় না ? গোপীগণ বা ব্রজবাসীগণের মধ্যে কয়জন গৃহত্যাগী ছিলেন ? ঐব, প্রহ্লাদ, হরিশ্চন্দ্র, অশ্বরীষ, জনক, পৃথু প্রভৃতির কি ভগবৎউপাসনা বা ভগবৎপ্রাপ্তি হয় নাই ? সংসারত্যাগ ভগবৎপ্রাপ্তির প্রতি কারণ হইতে পারে না। তবে উপাসনা করা চাই। ভগবদারাধনা ভগবৎপ্রাপ্তির প্রতি কারণ এ কথা সত্য। সেই আরাধনা বাহার বেক্সে সুবিধা হয় সে সেইরূপে করিয়া থাকে। সংসারে থাকিয়া বাহ্যার সুবিধা হয়, সে কেন সংসার পরিত্যাগ করিয়া বনে বাইবে ? আরও দেখ, সংসারে থাকিলে অন্ততঃ গ্রামাচ্ছাদনের জন্ত ত আর চিন্তা করিতে হয় না। কাজেই সংসারে থাকিলে আমার মতে অনেক সুবিধা।

অনাথ। তবে আপনি সংসার পরিত্যাগ করিয়াছেন কেন ?

বাবাজী। বাবা! আমি দেখিলাম আমার পক্ষে এই সুবিধা ; কারণ বেশ বাইতে পাওয়া যায়। লোকের নিকট খুব প্রতিষ্ঠা লাভ হয়,

তাই পেটের দারে বৈরাগ্য ।

অনাথ । এই যে আমাদের জায় সুবক হেলেরা, ইহারা কেন সংসার পরিত্যাগ করিয়াছে ? ইহারা যদি সংসারে থাকিয়া নানারূপ অর্থাদি উপায় দ্বারা দুঃখী দরিদ্রের উপকার করিত তবে জগতের কত মঙ্গল হইত ! এ বিষয়ে আপনার উপদেশ করা উচিত । সকলেই যদি এইরূপ বৈরাগ্য করিবে তবে পিতামাতা ভাই বন্ধু যে অর্থব্যয় করিয়া লেখাপড়া শিখাইলেন । তাহার সার্থকতা হইল কই ?

বাবাজী । বাবা ! ভগবান্ যাহাকে যে মুহূর্ত্তে যাহা করাইবেন, সে তদতিরিক্ত কিছুই করিতে সমর্থ হয় না । তুমি আসিয়াছ একজনকে বৈরাগ্যপথ হইতে গৃহে ফিরাইয়া লইবার জন্য । প্রভু যদি ইচ্ছা করেন এবং প্রভুর রূপায় তাহার বৈরাগ্য যদি খাটি হয়, তবে হয় ত তাহার যাওয়ার পরিবর্ত্তে তোমাকেও এই পথে রাখিয়া দিতে পারেন ।

অনাথ । আমি কখনই এ পথে আসিব না । কারণ যাহারা এত চেষ্টা করিয়া লেখাপড়া শিখাইলেন, তাঁহাদেরও ত কিছু করা চাই ! সংসারে সৎপথে থাকিয়া ভগবতুপাসনা করিলেই হইল । সংসার ছাড়া আমার গুরুদেবের মত নহে ।

এইরূপে সে দিন গত হইল । পরদিবস প্রাতে উঠিয়াই বাবাজী মহাশয় স্নানাদি শেষ করতঃ নামকীৰ্ত্তন করিতে করিতে সদলে মন্দিরে গমন করিলেন । পূর্বোক্ত অনাথবাবুও সঙ্গে সঙ্গে চলিলেন । জগন্নাথ দেবের মন্দিরে গমন করিবামাত্রই জগন্নাথদেবের দর্শন হইল । আজ বাবাজী মহাশয়ের সংকীৰ্ত্তন বেন অল্প রকম ; কেবলই দর্শনজাতীয় ভাবা বা তদ্ভাজীয়া কথা, সমস্ত সাধন হইতে ভক্তিমার্গে সাধনের শ্রেষ্ঠত্ব, মনুজীবনের কর্তব্য ইত্যাদি । অনাথবাবু কিন্তু ক্রমেই বেন ক্রমেন হইয়া যাইতেছেন । তিনি এতদিন যে ভাবে চলাটা জীবনের উন্নতির

সোপান মনে করিয়াছিলেন, ক্রমেই সেটা বেন অকিঞ্চিৎকর বলিয়া বোধ হইতে লাগিল। তিনি যে ভাবে সংসার-আশ্রম করিতে যাইতেছিলেন, এবং অল্পকে উপদেশাদি দিতেছিলেন, সেটা বেন তাঁহার ভুল বলিয়া মনে হইতে লাগিল। বাবাজী মহাশয়ের সেই সৰ্বদর্শন-সম্বলিত শাস্ত্র ও যুক্তি-পূর্ণ এক একটা কথা বেন তাঁহার হৃদয়ে বাণবৎ বিদ্ধ হইয়া কুসংস্কাররূপ শত্রুদিগকে সমূলে উৎপাটিত করিতে লাগিল। ক্রমে চোখে জল আসিল—অভিশয় বাগ্রভাবে সংকীৰ্ত্তনের মধ্যে গিয়া গড়াগড়ি দিতে লাগিলেন। ক্রমকাল পরে বাবাজী মহাশয় উহাকে উঠাইয়া আলিঙ্গন দিলেন। সংকীৰ্ত্তন-অন্তে বাবাজী মহাশয়ের চরণ ধারণপূৰ্ব্বক কাতরভাবে বলিতে লাগিলেন, “প্রভু! আমার বন্ধন মোচন করুন, আমার আর নেই সংসার-রূপে বাঁপ দিতে ইচ্ছা হইতেছে না” ইত্যাদি নানারূপ কাতরোক্তি শ্রবণে বাবাজী মহাশয়ের হৃদয় দ্রব হইয়া গেল। অনাথবাবুর বিশেষ আগ্রহে তাঁহাকে নিতাই-গৌরান্দ্র মন্ত্র প্রদান করিলেন। অনাথবাবু চিরজীবনের মত বাবাজী মহাশয়ের শ্রীচরণে আত্মসমর্পণ করিলেন। আর তাঁহার সংসারে ফিরিয়া যাওয়া হইল না। যাহাকে ফিরাইয়া সংসারে লইবার জন্ত আসিয়াছিলেন, আজ তাহার সহিত মিলিত হইয়া বৈষ্ণব-সেবা, গুরু-সেবা ও ভগবৎ-সেবা-কার্য্য করিতে লাগিলেন। কিছু দিন পরে আশ্রম ত্যাগ করিয়া বৈরাগ্যের বেশ ধারণ করিবার জন্ত অত্যন্ত আগ্রহ করিলেন বাবাজী মহাশয় প্রথম অনেক বাধা দিলেন। যখন কিছুতেই বাধা মানিলেন না, তখন তাঁহাকে ভেক-দিয়া দিলেন। উহার আশ্রম ত্যাগের নাম হইল অটলবিহারী দাস। অটল সৰ্ব্বগুণমণ্ডিত হইলেন, তাঁহার গুরুনিষ্ঠা ও গুরুভক্তি অদ্বিতীয়। অটল শিক্ষিত লোকের নিকট বলিতেন, “দেখ ভাই, তোমরা বাবাজী মহাশয়ের কথায় অন্ধ বিশ্বাস করিও না। বেশ করিয়া পুঙ্খানুপুঙ্খরূপে বিচার করিয়া লও।

বৈষ্ণব-ধর্ম কেবল অন্ধবিশ্বাসের বা অশিক্ষিতের ধর্ম বলিয়া মনে করিও না। বাবাজী মহাশয় কাহাকেও প্রলোভন দিয়া বৈরাগ্য করান, এ কথা মনে করিও না। যাহারা বৈরাগ্য করে, তাহারা বিশেষরূপে বুঝিয়া গুঝিয়াই করে। তাহার দৃষ্টান্ত আমি নিজে।” এইরূপে অটল দাস শিক্ষিত সমাজেও বিশেষ আদরের পাত্র হইয়া পড়িলেন। বাবাজী মহাশয়ের সঙ্গ-সুখ যে কতদূর আনন্দপ্রদ, তাহা তিনি বিশেষরূপে লোককে বুঝাইয়া দিতে লাগিলেন।

এইরূপভাবে কিছুদিন যায়, একদিন বাবাজী মহাশয় অটলকে জিজ্ঞাসা করিলেন, “বাবা অটল ! যাহার অদেশে বা রূপায় তুমি ধামে আসিলে, তাঁহাকে কোনরূপ খবরাখবর দিয়াছ কি ?”

অটল। আজ্ঞে কৈ তা ত কিছুই দেই নাই। দিলেই আবার সংসারের নানারূপ ঝঞ্ঝাট আসিয়া উপস্থিত হইবে ; সুতরাং আমার মতে তাঁহাদিগকে না জানানই ভাল।

বাবাজী। তাহা হইলে তোমার মতে কি বৈরাগ্যটা সংসারকে না জানাইয়া গোপনে করাই দরকার ?

অটল ! অজ্ঞে তা বই কি ? সংসারের লোক জানিলেই নানারূপ বিঘ্ন বিপত্তি উপস্থিত হইয়া থাকে। যত নিৰ্ঝঞ্ঝাটে থাকা যায় ততই মঙ্গল।

বাবাজী। যখন প্রকাশ হইবে তখন কি করিবে ? এটো তোমার সম্পূর্ণ ভুল ধারণা। তুমি বৈরাগ্য জিনিষটা এতই ঢর্কল মনে করিয়াছ যে সামান্য একটু বাধা পাইলেই পরাস্ত হইয়া যাইবে ? অথ কোনও, বস্ত হইলেও হইতে পারে ; কিন্তু বৈরাগ্য কখনও লুকাইয়া হয় না। যে বৈরাগ্য বাধাবিঘ্নকে লুকাইয়া করা হয়, আমার বিশ্বাস, উহা কখনও হারী হইতে পারে না। যদি প্রকৃতই মনে বৈরাগ্য আসিয়া থাকে,

জবে তোমার গুরুদেবের নিকট ক্ষমা প্রার্থনাপূর্বক কৃপা ভিক্ষা চাও, বস্তু দৃঢ় হইবে। এবং যখন বনে গমন করেন, তখন নারদ তাঁহার বৈরাগ্য পরীক্ষার জন্ত কত মতে প্রলোভন দেখাইয়াছিলেন! এবং ত বালক, কৈ দেবর্ষি তাহার পরিবর্তন করিতে পারিয়াছিলেন কি? যাক্, কাব্যতীর্থ মহাশয়কে একখানা পত্র দাও।

বাবাজী মহাশয়ের কথা অনুসারে অটল নিম্নের যথাযথ অবস্থা বর্ণনা করিয়া কলিকাতায় একখানি পত্র দিলেন। কিছুদিন পরে উহার জ্যেষ্ঠ ভ্রাতা হরিপদ বাবু আসিয়া পহঁছিলেন। তাঁহার ইচ্ছা যে অটলকে এবং কাব্যতীর্থ মহাশয়ের তৃতীয় ভ্রাতাকে একসঙ্গে কলিকাতায় লইয়া যান। দৈবচক্র এবং মহৎ শক্তিপ্রভাবে তাঁহারও মতিপরিবর্তন হইয়া গেল। একদিন বাবাজী মহাশয়কে বলিলেন, “বাবা! আমার আর সংসারে যাইবার ইচ্ছা নাই, বড়ই তীর্থ ভ্রমণের সাধ হইয়াছে।” বাবাজী মহাশয় মুহূ হাসিয়া বলিলেন, “হ্যাঁটিয়া, না রেল পথে যাইবার বাসনা?”

হরিপদ। আজ্ঞে সে সব আমি জানি না আমি আপনার চরণে ভার দিলাম, আপনার বেরূপ ইচ্ছা।

বাবাজী মহাশয় আর কিছুই বলিলেন না। তিন চারিদিন যায়, একদিন একটা বৃদ্ধা স্ত্রীলোক আসিয়া বাবাজী মহাশয়কে বলিলেন, “বাবা! আমার মনে বড়ই বাসনা হইয়াছে যে আমি একটু তীর্থ ভ্রমণ করি, আপনি আমায় এমন একটা বিশ্বাসী লোক দিন, যে আমাকে একটু যত্নপূর্বক সকলস্থান দর্শন করাইয়া আনে। আমি তাহার সকল ব্যয়ভার বহন করিব।” বাবাজী মহাশয় সান্ত্বগদগদ কণ্ঠে বলিলেন— “হা নিতাই! তুমি বাহ্যকল্পভর, কাহারও কোন বাসনা অপূর্ণ রাখ না। আহা মরি দয়ার বালাই যাই!” বলিয়া হরিপদ বাবুকে বৃদ্ধার সঙ্গে তীর্থ ভ্রমণে পাঠাইয়া দিলেন। দীনবন্ধু কাব্যতীর্থ মহাশয় এই

সংবাদে বড়ই বিস্ময়ান্বিত হইয়া বলিলেন—“কি আশ্চর্য্য ! বাহাকে পাঠাই সেই আর ফিরিয়া আসে না ! আচ্ছা এইবার আমি নিজে গিয়া একবার দেখি যে, সেখানে কি কাণ্ড হইতেছে ।” বলিয়া একটু জুজুভাবে পুরী আসিয়া বাবাজী মহাশয়ের সহিত আলাপ ব্যবহারে এবং অটল ও উঁহার তৃতীয় ভ্রাতার অবস্থা দর্শনে যেন কেমন একরকম হইয়া গেলেন । চারি সপ্তাহদিন মঠে থাকিয়া পরমানন্দ উপভোগ করতঃ বাবাজী মহাশয়ের আদেশক্রমে উহাদিগকে আশীর্বাদ করিয়া কলিকাতায় আগমন করিলেন ।

এই হইতেই কাব্যতীর্থ মহাশয় বাবাজী মহাশয়ের প্রতি বিশেষ আকৃষ্ট হইলেন । এমন কি তাঁহার গর্ভধারিণী যদি কখনও স্নেহের বেশে পুত্রের বৈরাগ্য হেতু বাবাজী মহাশয়ের প্রতি কোনওরূপ কটাক্ষ করিতেন, অমনি তিনি বলিতেন, “মা ! আপনি জানেন না যদি কখনও সেই মহাত্মার দর্শন পান তখন দেখিবেন । তাঁহার অমামুখিক শক্তি । আমি অনেক দেশদেশান্তর ভ্রমণ করিয়াছি ; কিন্তু ওরূপ মহাপুরুষের দর্শন আমি আর কোথাও পাই নাই । পূর্বজন্মের বিশেষ স্মৃতি এবং পিতামার কৃপা না থাকিলে অমন মহাপুরুষের শ্রীচরণাশ্রয় ঘটে না । এমনই আশ্চর্য্য ! মূর্ত্তিখানি দেখিলেই মনপ্রাণ গলিয়া যায় । আর সংসারের কথা মনে থাকে না । ইচ্ছা হয় চিরজীবনের মত ঐ শ্রীচরণাশ্রয় করিয়া জন্ম সফল করি । অপরের কা কথা ? দেখা অবধি সর্বদাই যেন তাঁহার মূর্ত্তিখানি আমার হৃদয়ে আগরূক হইতেছে । মনে হয় কখন আর একবার দর্শন পাইয়া জীবন ধন্য করিব !”

ইতি তৃতীয় খণ্ড ।

